

ଲୁକ ଲିଖିତ ସୁସମାଚାର ଲୁକ ରାଜାମାନି ନେହଁ କାବୁ ମୂଲୁ ହାଡ଼ା

ଲୁକ ରାଜାମାନି ନେହଁ କାବୁତା ଜୀସୁ କ୍ରୀସ୍ତ ଜୀଝୁତି କାତା ରାସ୍ତକି ଆହାମାନେ □ ପୁଃନି ମେରାତି ସାରିଗଟା ନେହଁ କାବୁ ପତିୟା ବିତ୍ରାଟି ଇଦି ରଣ୍ଡି “ନେହଁ କାବୁ” ଇନେରି □ ଇ ବାରେ ପ୍ରବୁ ଜୀସୁ ହାଡ଼ି ତାୟୁ ମାତିୟୁ, ମାର୍କ, ଲୁକ ଅଡ଼େ ଜହନ ରାଜାମାନେରି □ ଲୁକ ଜୀସୁ ମାହାପୁରୁଝାଣି ଏନାଆଁ ଗଟାଝି ଆହାମାନେ ଅଡ଼େ ଜୀସୁ ହାହାନା ଝେଣ୍ଡେ ନିଜିତି ତାୟୁ ଲାକପୁରୁ ହାଚାଣି ଇଞ୍ଜା ତାମି ସୀସୁୟା ଏନିକିଁ କାମା କିତେରି ଏ ବାରେ ରାଜାମାନେସି □ ଏ ପତିଇଁ “ପାଣ୍ଡୁଝି ଆହାମାନାରି କାମା” ଇଞ୍ଜୁ ଇନେରି □ ଇ ପତି ଏଡ଼େତା ରାସ୍ତକି ଆହାମାନେ, ଅଡ଼େ ଆମିନି ଚାୟୁତା ରାସ୍ତକି ଆହାମାନେ, ଏ କାତା ଆମ୍ବାଆସି ନେହଁକିଁ ପୁଞ୍ଜାହିଲଅସି, ଇ ପତି ଜୀସୁ କ୍ରୀସ୍ତ ଜାର୍ନା ଆଡ଼ି ୭୨ ବାର୍ସା ତାୟୁ ରାସ୍ତକି ଆହାମାନେ □

ଇ ପତିତା ଜୀସୁ ଇସାୟେଲତି ଗେଲ୍‌ପିନାସି ଅଡ଼େ ବାରେ କୁଡ଼ାତି ଲକୁଣି ଗେଲ୍‌ପିନାସି ଇଞ୍ଜୁ ଲୁକ ତାନି ନେହଁ କାବୁତା ରାଜାନା ତସାମାନେସି □ ହିଲାଆ ଗାଟାରି ତାଣା ନେହଁ କାବୁ ଝେକ୍‌ହାଲି, ମାହାପୁରୁତି ସୁଦୁଜୀଝୁ ଜୀସୁଇଁ ଆଚାମାତେ, ଇଞ୍ଜା ଜୀସୁ ଏନିକିଁ ହାଡ଼େକା ଦେବା ଦୁକୁ କସ୍ତ ଗାଟାରାଇଁ ଅଡ଼େ ହିଲାଆଗାଟାରାଇଁ ସାୟେମି କିହାମାତେସି ଲୁକ ରାଜାମାନେସି □

ଜୀସୁ ଜାର୍ନାଆଡ଼ି ବେଲାତା ଦୁତୁୟା ପାରୁ ପାଟିନାୟି ଅଡ଼େ ମେଣ୍ଡା ଗଡ଼କା ଜୀସୁଇଁ ବେଟି ହାନାୟି, ଜୀସୁ ବାର ବାର୍ସା ଆହାମାଚାଟି ମାହାପୁରୁ ଇଲୁତା ହାନାୟି, ଇଞ୍ଜା ନେହଁ ସମିରଣି ଅଡ଼େ ଜାଜିତି ମୀରଏଣି ପୁଣ୍ଡିକିନି କାତା ଇ ବାରେ ସାରିଗଟା ନେହଁ କାବୁ ରାଜାମାନାରି ବିତ୍ରା ଲୁକ ନେହଁକିଁ ରାଜାନା ତସାମାନେସି □

ଅଡ଼େ ମାହାପୁରୁ ତାଣା ପ୍ରାତାନା କିନାଣି ଜିକେଏ ଲୁକ ହାରେକା
 ରାଚାନା ତସାମାନେସି ୩:୨୧; ୬:୧୭; ୬:୧୨; ୧୧:୧-୧୨ □
 ସୁଦୁଜୀଝୁ ବେଟାଆନି କାତା, ଜୀସୁଇଁ ସେବାକିନି ଇୟାସିକା କାତା
 ଇଞ୍ଜା ମାହାପୁରୁ ଲକୁଇଁ ତାମି ପାପୁ ମ୍ଲେକ୍ନି କାତା ଇ ବାରେ କାତା
 ଲୁକ ହାରେଏ ନେହୁଁକଁ ରାଚାନା ଖେସାମାନେସି ୩:୩; ୧୧:୪;
 ୧୭:୩-୪; ୨୩:୩୪; ୨୪:୪୭ □

ପତିତା ମାନାୟି

- ୧ ଲୁକ ଖେକ୍ନାୟି ଅଡ଼େ ଏନାଆଁତାକି ରାଚାମାନାଣି ଖେହ୍ନାୟି
 □ ୧:୧-୪
- ୨ ଜୀସୁ କ୍ରୀସ୍ତ ଜାର୍ନା ଅଡ଼େ ସେବା କାମା ମାର୍ଚ୍ଚନାୟି □ ୧:୫-୪:୧୩
- ୩ ଜୀସୁ କ୍ରୀସ୍ତତି କାବାଆନି କାମାୟାଁ ଅଡ଼େ ଜାପ୍ନନାୟି □ ୪:୧୪-
 ୨୧:୩୮
- ୪ ଜୀସୁ କ୍ରୀସ୍ତ ହାନାୟି, ମାହାଣିଣା ମୁହ୍ନାୟି ଅଡ଼େ ଖେଣ୍ଡେ
 ନିଜ୍ଞନାୟି □ ୨୨:୧-୨୪

ମାର୍ଚ୍ଚନି କାତା

- ୧ ମୁଲୁଟିଏ ଆମ୍ବାଆରି ତୀରେ ମେସ୍ତାରି ଇଞ୍ଜା ବଲୁ ଖେକ୍ନାରି,
 ଏଞ୍ଜାରି ମାଙ୍ଗେ ହେରପା ମାଞ୍ଜାନି ଲେହେଁ,
- ୨ ମା ବିତ୍ରା ଆହାମାନି କାମା ବାରେ ହାରେକା ନେହୁଁକଁ
 ରାଚାଲି ଜାଗ୍ରାତା ଆହାମାନେରି □
- ୩ ଜୀଝୁତି ତିୟପିଲ, ମୁଲୁଟିଏ ବାରେ କାତା ନେହୁଁକଁ
 ସିନିକିହାନା ଏମ୍ବାଆଁ ଏନାୟି ମାନେ ଏଦାଆଁ ନିଙ୍ଗେତାକି ରାଚାଲି
 ନାନୁ ଜିକେଏ ନେହେଁ ଇଞ୍ଜୁଁ ଅଣ୍ପିତେଏଁ □
- ୪ ଏନିକଁ ନାନୁ ଏ ବାରେ କାତା ଜାପାମାଞ୍ଜି, ଏଡ଼ି ସାତା ଇଞ୍ଜୁଁ
 ପୁଞ୍ଜାଲି ଆଡ଼ିଦି □

ବାପ୍ତିସ୍ମା* ହାନି ଜହନତି ଜାର୍ନାତି କାରୁ

୫ ଜୀହୁଦା ଦେସାତି ରାଜା ହେରଦ ବେଲାତା ଅବିୟ କୁଡ଼ାତି
 ଜିକରିୟ ଦରୁଗାଟି ର ପୂଜେରା ମାତେସି; ତାନି ଡକ୍ତି ହାରଣ କୁଡ଼ାତି
 ମାଙ୍ଗା, ଏଦାନି ଦରୁ ଏଲିସାବେତ □

* ୧:୪ ୧:୫ ମୁଞ୍ଜନାୟି

୬ ଜିକରିୟ ଅଡ଼େ ଏଲିସାବେତ ମାହାପୁରୁତି ହୁକୁମି ଇଞ୍ଜା ମେରା ତଲେ ଦହ୍ ହିଲାଆଗାଟାଇ ଆହାନା ମାହାପୁରୁ ନକିତା ଦାମ୍ବୁ ଗାଟାଇ ମାରୁ □

୭ ସାମା ଏଝାରାକି କକାରି ପଦାୟା ହିଲାଆଡୁ, ଇତିହିଁ ଏଲିସାବେତ ବାଞ୍ଝେଣି ମାରେ, ଅଡ଼େ ତକ୍ତି ତକ୍ତା ରିଆରି ଜିକେଏ ଗାତି ବୁଡ଼ହି ବୁଡ଼ହା ଆହାମାରେରି □

୮ ର ଦିନା ଜିକରିୟ ତାମି ଗତିତି ପାଲି ଏଜାଲିଏ ମାହାପୁରୁ ନକିତା ପୂଜେରା କାମା କିନି ବେଲାତା,

୯ ପୂଜେରା କାମାତି ମେରା ତଲେ ଆର୍ଡ଼ି ଆହାନା ଏଝାଣାକି ମାହାପୁରୁ ଇଲୁତା ହଡ଼ାନା ଦୁପ୍ପଣି ହୀହାଲି ଆଡ଼େ,

୧୦ ଇଞ୍ଜା ଦୁପ୍ପଣି ହୀନି ବେଲାତା ବାରେ ଲକୁ ପାଙ୍ଗାତା ପ୍ରାଡ଼ାନା କିହିମାରେରି □

୧୧ ଏତିବେଲା ମାହାପୁରୁତି ର ଦୁଡୁ ଦୁପ୍ପଣି ପିଣ୍ଡା ଚିଝନିଝାକି ନିଚାନା ଏଝାଣାଇଁ ତଞ୍ଜାଆଡ଼େ □

୧୨ ଜିକରିୟ ଏଦାଣି ମେସାନା କାବାଆହାନା ଆଜିତେସି □

୧୩ ସାମା ଦୁଡୁ ଏଝାଣାଇଁ ଏଲେଇଚେ, “ଜିକରିୟ, ଆଜାଆନି, ଇତିହିଁ ମୀ ଗହାରା ଝେଣ୍ଡି ଆହାମାନେ, ଇଞ୍ଜା ନୀ ତକ୍ତି ଏଲିସାବେତ ନିଞ୍ଝେତାକି ର କକାଣାଇଁ ଜାନି କିନେ, ଇଞ୍ଜା ଏଝାଣି ଦରୁ ଜହନ ଇଞ୍ଜିଁ ହୀଦେରି □

୧୪ ଇତିହିଁ ଏଝାସି ମୀ ରାହାଁତି ରାହାଁ ଆନେସି, ଇଞ୍ଜା ହାରେକା ଏଝାଣି ଜାନୀତା ରାହାଁ କିନେରି □

୧୫ ଇଞ୍ଜା ଏଝାସି ମାହାପୁରୁ ନକିତା କାଜାସି ଆନେସି; ଏଝାସି ଅଞ୍ଜୁରି ରାସା କି କାଡ଼ୁ ଏତେଲାଝା ଗହ୍‌ଅସି, ଇଞ୍ଜା ତାଲିନି ବାଣ୍ଡିଟିଏ ସୁଦୁଜୀଝୁତା ବେଟାଆନେସି,

୧୬ ଏଝାସି ଇସ୍ରାୟେଲ ମୀରକା ବିତ୍ରାଟି ହାରେକା ଲକୁଇଁ ମାହାପୁରୁ ଝାକି ଝେଟ୍‌ହା ତାନେସି □

୧୭ ତାଞ୍ଜିୟାଁ ହିୟାଁ ମୀରକା ଝାକି ଇଞ୍ଜା କାତା ମାନୁଝି ଆଆଗାଟାରାଇଁ ତାରିଗାଟି ବୁଦିତା ତାକାଲି ଝେଟ୍‌ହା ତାଗାଲି ଇଞ୍ଜା ମାହାପୁରୁ ତାକି ତିୟାରା ଆହାମାନି ର ଲକୁତି କୁଲମି ଜାଗ୍ରାତା

କିହାଲି ବାପ୍ତିସ୍ମା† ହାନି ଜହନ ଏଲିୟତି ଜୀଝୁ ଅଡ଼େ ବାଡ଼ୟୁ ତଲେ ପ୍ରବୁତି ନକିତା ତାକିନେସି □”

୧୮ ଏଚେଟିଏ ଜିକରିୟୁ ଦୂତୁଇଁ ଏଲେଇଚେସି, “ନାନୁ ଆମିନି ସିନା ତଲେ ପୁଇଁ ? ଇଚିହିଁ ନାନୁ ବୁଡ଼ହାଡେଏଁ, ଇଞ୍ଜା ନା ଡକ୍ରିନି ବାର୍ସା ଗାଡ଼ି ଆଡ଼େୟିଏ □”

୧୯ ଦୂତୁ ଏଝାଣାଇଁ ଏଲେଇଚେ, “ନାନୁ ଗାବ୍ରିୟେଲ, ନାନୁ ମାହାପୁରୁ ନକିତା ନିଚା ଡୟିନାଡେଏଁ, ଇଞ୍ଜା ନିଞ୍ଜେ ଝେସାଲି ଅଡ଼େ ଇ ନେହିଁ କାରୁ ପୁଣ୍ଠି କିହାଲି ନାନୁ ପାଣ୍ଡୁଝି ଆହାମାଇଁ □

୨୦ ମେହ୍ନୁ ଇ ବାରେ ଆଆପାଡେକା ନାନୁ ବେବ୍ଡା ଆହାନା ଡୟିଦି, ଇଚିହିଁ ନା ଆମିନି କାତା ସାତା ଆନେ ଏ ବାରେ ନାନୁ ନାମାଆତି □”

୨୧ ଏମ୍ବାଟିଏ ଲକୁ ଜିକରିୟୁଇଁ କାଡ଼ିମାଚେରି, ଇଞ୍ଜା ମାହାପୁରୁ ଇଲୁତା ଇଚେକା ଝେଡ଼ା ଆଡ଼ାକି କାବା ଆହିମାଚେରି □

୨୨ ସାମା ଏଝାସି ପାଙ୍ଗାତା ଝାହାନା ଏଝାରାଇଁ କାତା ଆହାଲି ଆଡ଼ାଆଡେସି; ଏମ୍ବାଟିଏ ଏଝାସି ମାହାପୁରୁ ଇଲୁତା ଏନାଆଁ ମେସାମାନେସି ଇଞ୍ଜା ଏଝାରି ପୁଚେରି, ଇଞ୍ଜା ଏଝାସି ଏଝାରାଇଁ କେୟୁ ହୁଟିହିଁ ତସାଲି ମାଟ୍‌ହେସି ଇଞ୍ଜା ବେବ୍ଡା ଆହାନା ଡୟିଡେସି □

୨୩ ଡାୟୁ ମାହାପୁରୁ ଇଲୁତି ସେବା କାମା ରାୟାଲିଏ, ଏଝାସି ତାନି ଇଜ ହାଚେସି □

୨୪ ଏଚରଦିନା ହାଚି ଡାୟୁ ତାନି ଡକ୍ରି ଏଲିସାବେତ ପୁରାମାସା ଆଡେ ଅଡ଼େ ଏଦି ପାସା ଲେଞ୍ଜୁ ପାଡେକା ଲକୁଣି ତଞ୍ଜା ଆଆଡେ □

୨୫ ଏଦି ଏଲେଇଚେ, “ନୀଏଁ ନାଞ୍ଜେ ପ୍ରୁ କାର୍ମାମେସାନା ଲକୁ ନାଞ୍ଜେ ଲାଜା କିହିମାଞ୍ଜାତାଣି ପିସ୍‌ପି କିହାଲି ନାଞ୍ଜେ ଇଲେକି କିହାମାଞ୍ଜାନେସି □”

ଜୀସୁ ଜାର୍ନାତି କାରୁ

† ୧:୧୭ ୧:୧୭ ମୁଞ୍ଜନାୟି

୨୬ ଏଲିସାବେତ ପୁରାମାସା ଆହାନା ସ ଲେଖୁ ଆହାଲିଏ ଗାବ୍ରିୟେଲ ଦୂତୁ ମାହାପୁରୁ ତାଣାଟି ଗାଲିଲିତି ନାଜରିତ ଗାଡ଼ାତି ର ଡାଆ ପଦାନି ତାଣା ପାଣ୍ଡୁଆଡେ;

୨୭ ☆ ଡାଆ ପଦାନି ଦାହୁଦ କୁଡାତି ଜସେପ ଇନାଣାକି ରୀସା ମାଚେରି; ଏ ଡାଆ ପଦା ଦରୁ ମରିୟମ □

୨୮ ଦୂତୁ ପଦା ତାଣା ଖାହାନା ଏଲେଇଚେ, “ଆଲ ମାହାପୁରୁତି କାର୍ମା ମେହନାତି ନିଙ୍ଗେ ହିଡ଼ି ଆୟାପେ □”

୨୯ ମରିୟମ ଏ ହାଡା ଖେଜାନା ଇଦି ଏନିଲେହେତି କାତା ଇଞ୍ଜି ଆଜାନା ମନତା ଅଗ୍ପିତେ □

୩୦ ଏମ୍ବାଟିଏ ଦୂତୁ ଏଲେଇଚେ, “ଆଲ ମରିୟମ ଆଜାଆନି; ନିଙ୍ଗେ ମାହାପୁରୁ କାର୍ମା ମେସାମାଞ୍ଜାନେସି □

୩୧ ☆ ନାନୁ ପୁରାମାସା ଆହାନା ର ମୀରଏଣାଇଁ ବେଟାଆଦି ଏଞ୍ଜାଣି ଦରୁ ଜୀସୁ ଇଞ୍ଜି ଇଟିଦେରି □

୩୨ ଏଞ୍ଜାସି କାଜାସି ଆନେସି ଇଞ୍ଜା ମାହାପୁରୁ ମୀରଏସି ଇଞ୍ଜି ଖେଙ୍ଗିନେସି; ପ୍ରୁ ମାହାପୁରୁ ଏଞ୍ଜାଣାକି ତାମି ଆକୁ ଦାହୁଦତି ସିଂଗାସାଣି ହାନେସି,

୩୩ ଏଞ୍ଜାସି ଜାକୁବ କୁଡାତା ଜୁଗୁ ଜୁଗୁତାକି ରାଜି କିନେସି, ଇଞ୍ଜା ଏଞ୍ଜାଣି ରାଜି ଏଚେଲାଞ୍ଜା ରାଏ □”

୩୪ ସାମା ମରିୟମ ଦୂତୁଇଁ ଏଲେଇଚେ, “ଇଦି ଏନିକି ଆନେ ? ନାନୁ ତକ୍ରାଇଁ ଜିକେଏ ପୁଞ୍ଜାହିଲଅଁ □”

୩୫ ଦୂତୁ ଏଲେଇଚେ, “ସୁଦୁଜୀଞ୍ଜୁ ନୀ ଲାକ ରେଟାଞ୍ଜାନେ ଅଡେ ମାହାପୁରୁତି ବାଡ଼ୟୁ ଖାନେ, ଏଦାଆଁତାକି ନୀ ତାଣାଟି ଜାର୍ନା ଆନେସି, ଏଞ୍ଜାସି ମାହାପୁରୁତି ମୀରଏସି ଇଞ୍ଜି ଖେଙ୍ଗିନେସି □

୩୬ ଅଡେ ମେହମୁ ନୀ କୁଡାତି ଏଲିସାବେତ ଜିକେଏ ବୁଡ଼ହି ବେଲାତା ପୁରାମାସା ଆହାମାନେ □ ଆମିନି ଇୟା ବାଢ଼େଣି ଇଞ୍ଜି ଖେଙ୍ଗାମାନେ, ଏଦି ନୀଏଁ ସ ଲେଖୁ ଆହାମାନେ;

୩୭ ଇଟିହିଁ ମାହାପୁରୁତି ବଲୁ ବାଡ଼ୟୁ ହିଲାଆଗାଟାୟି ଆଏ □”

୩୮ ଏମ୍ବାଟିଏ ମରିୟମ ଏଲେଇଚେ, “ନାନୁତ ପ୍ରବୁତି ହ୍ରେଲେଣିଚେଏ; ନୀ କାଚେଏ ନାଜେତାକି ଆୟାପେ □” ଏମ୍ବାଟିଏ ଦୂତୁ ଏଦାନି ତାଣାଟିଏ ହାଚେ □

ମରିୟମ ଏଲିସାବେତ ଇଜ ହାନାୟି

୩୯ ଏମ୍ବାଟିଏ ମରିୟମ ନିଜାନା ଜୀହୁଦା ଦେସାତି ହ୍ରେକା ରାକ୍ତିତି ର ଗାଡାତା ତବେ ହାଚେ,

୪୦ ଅଡେ ଜିକରିୟ ଇଜ ହାନାନା ଏଲିସାବେତନି ଜହରା କିଚେ □

୪୧ ଅଡେ ଏଲିସାବେତ ମରିୟମନି ଜହରା ଝେଣ୍ଡମ୍ବନିଏ ତାନି ବାଣ୍ଡିତି ମୀଲା ଝାଡିଚେ, ଇଞ୍ଜା ଏଲିସାବେତ ସୁଦୁଜୀଝୁଟି,

୪୨ କାଜା ଗିୟାତଲେ ଏଲେଇଚେ, “ଇୟାସିକା ବିତ୍ରାଟି ନୀନୁ ହାରେକା ନେହାତି, ଇଞ୍ଜା ନୀ ବାଣ୍ଡିତି ମୀଲା ଜିକେଏ ନେହାୟି □

୪୩ ଅଡେ ନା ପ୍ରବୁତି ଇୟା ନା ତାଣା ଝାଡେ ଇ କାର୍ମା ନାଜେ ଏମ୍ବିଟି ଝାଚେ ?

୪୪ ଇଚିହିଁ ନୀ ଜହରା ହାଡା ନା କିୟିଁ ଝେଣ୍ଡମ୍ବନିଏ ନା ବାଣ୍ଡିତି ମୀଲା ରାହାଟି ଝାଡିଚେ

୪୫ ଆମିନି ଗାଟାୟି ନାମିଚେ ଏଦାନାକି ନେହେଁ, ଇଚିହିଁ ପ୍ରବୁ ତାଣାଟି ଏଦାନାକି ଏନାଆଁ ଝେସ୍ପି ଆହାମାନେ ଏ ବାରେ ପୂରା ଆଡେ □”

ମରିୟମତି ଜହରା ପାରୁ

୪୬ ଏଚେଟିଏ ମରିୟମ ଏଲେଇଚେ,
“ନା ଜୀଝୁ ପ୍ରବୁତି ଜହରା କିହିମାନେ;

୪୭ ଅଡେ ନା ଜୀଝୁ ନାଜେ ଗେଲ୍ପାନି ମାହାପୁରୁ ତାଣା ରାହାଁ ଆହିମାନେ,

୪୮ ଇଚିହିଁ ଏଝାସି ତାନି ହ୍ରେଲେଣିନି କାର୍ମା କାକୁଲି ମେସାମାନେସି □

ଏନିଇଚିହିଁ ନୀଞ୍ଜୁଟିଏ ବାରେ ଲକୁ ନାଜେ ନେହାୟି ଇଞ୍ଜା ଜଲ୍ଲାନେରି,

୪୯ ଇଚିହିଁ ଆମ୍ବାଆସି ବାରେକିହାଁ ବାଡୁମୁଗାଟି ମାହାପୁରୁ ଏଝାସି ନା ତାକି କାଜା କାମା କିହାମାନେସି,

ଏଞ୍ଜେଲି ଦରୁ ସୁଦୁ;

୫୦ ଇଞ୍ଜା ତାଙ୍ଗେ ଆଜିନାରାକି ପାରୁ ପାରୁ ତାକି ତାନି
କାର୍ନାମେହନାୟି ଡୟିନେ □

୫୧ ଏଞ୍ଜସି ତାନି ବାଡ଼ୟୁଗାଟି କେୟୁଟି କାଜା କାମା କିହାମାନେସି,
ତାହାରା ଗାଟାରାଇଁ ଏଞ୍ଜାରି ହିୟାତି ଅଣ୍ପୁତା ମାନାଣି ଗୁଟି
କିହାମାନେସି;

୫୨ ଏଞ୍ଜସି ସାଲୁଞ୍ଜି କିନାରାଇଁ ତାନି ରାଜା ଗାଦି ପିସ୍ପି କିହାମାନେସି,
କାକୁଲି ଗାଟାରାଇଁ ନିକ୍‌ହାମାନେସି,

୫୩ ଏଞ୍ଜସି ହାକି ଗାଟାରାଇଁ ନେହୁ ଆସ୍ତି ହାହାନା ପାଞ୍ଜି
କିହାମାନେସି,

ଇଞ୍ଜା ଦନ ଗାଟାରାଇଁ ଖାରଇ କେୟୁଟି ପାଶ୍ଟାମାନେସି □

୫୪ କାଲ୍‌କାଲ୍‌ ତାକି ଅଣ୍ପାଲି ତାନି ହରେଲଏସି ଇସ୍ତାୟେଲତି କାର୍ନା
ଆହାମାନେସି □

୫୫ କାଲ୍‌କାଲ୍‌ ତାକି ଅବ୍ରାହାମ ଅଡ଼େ ତାନି ବାରେ କୁଡ଼ାତାରାଇଁ
କାର୍ନାମେହନାଣି ବାଶା ଆହାହିଲଅସି □”

୫୬ ଅଡ଼େ ମରିୟମ ତାନି ଲେଞ୍ଜୁ ଏଲିସାବେତ ତଲେ ଡୟାନା
ତାନି ଇଜ ଖାଡ଼େ □

ବାପ୍ତିସ୍ମା‡ ହାନି ଜହନତି ଜାର୍ନା

୫୭ ତାୟୁ ଏଲିସାବେତ ପୁରାମାସା ଏଜାଲିଏ ର କକାସି ଜାର୍ନା
ଆଡ଼େସି,

୫୮ ଅଡ଼େ ମାହାପୁରୁ ଏଦାନି ହାରେକା କାର୍ନା ମେସାମାନାଣି
ଖେଞ୍ଜାନା ତାନି କୁଡ଼ାତାରି ଇଞ୍ଜା ଅଡ଼େ ଆଟ୍‌ହତାରି ଏଦାନିତଲେ
ହାରେକା ରାହାଁ କିଡ଼େରି □

୫୯ କକାସି ଖାରେକା ଆହାଲିଏ, ଏଞ୍ଜାରି ତଲୁ ଦାଟାଲି ଖାହାନା
ତାନି ଆବା ଦରୁଲେହେଁ ତାନି ଦରୁ ଜିକରିୟ ଇଟାଲି ମନ କିଡ଼େରି
□

୬୦ ସାମା ତାନି ଇୟା ଏଲେଇଡେ, “ଆସ୍! ଏଞ୍ଜେଲି ଦରୁ ଜହନ
ଆନେ □”

‡ ୧:୫୭ ୧:୫୭ ମୁଞ୍ଜିନାୟି

୨୧ ଏଞ୍ଜାରି ଏଲେଇଚେରି, “ମୀ କୃତାତା ଆମ୍ବାଆରାକି ଏଲେତି ଦରୁ ହିଲେଏ!”

୨୨ ଏମ୍ବାଟିଏ ଏଞ୍ଜାରି ତାଞ୍ଜିଗାଟାଣାକ୍ କେୟୁ ହୁଟାନା କକାଣାକ୍ ଏନି ଦରୁ ଇଟିନାୟି ଇଞ୍ଜିଁ ଝେଚେରି □

୨୩ ଜିକରିୟ ର ରାଟିନି ପାଟା ରାସାନା ଏଞ୍ଜାଣି ଦରୁ ଜହନ ଇଞ୍ଜିଁ ରାଟିତେସି, ଏଦାଆଁ ମେସାନା ବାରେଜାଣା କାବା ଆଡେଚିରି □

୨୪ ଅଡେ ଏ ଦେବୁଣିଏ ଏଞ୍ଜାଣି ଗୁତି ଅଡେ ଝେନ୍ଦରି ପିସ୍ପି ଆଡେ ଅଡେ ଏଞ୍ଜାସି ଜଲିହଁ ମାହାପୁରୁତି ଜହରା କିତେସି □

୨୫ ଏମ୍ବାଟିଏ ତାନି ଲକୁ ବାରେ ଆଜାହାଚେରି, ଅଡେ ଇ କାତା ଜାହୁଦା ଦେସାତି ହରକା ରାଜିତା ବାରେଞ୍ଜାକି ଝେଜିତେ,

୨୬ ଇଞ୍ଜାଁ ଝେନି ବାରେ ଲକୁ ଏ କାତା ତାନି ମନତା ଇଟାନା ଏଲେଇଚେରି, “ଆତିହଁ ଇ କକାସି ଏନିଲେହେଁତାସି ଆନେସି?” ଏନିଇଚିହଁ ପ୍ରୁ ଇଞ୍ଜାଣି ତଲେ ମାନେସି ଇଞ୍ଜିଁ ପୁଚେରି □

ଜିକରିୟତି ତାୟୁ ଆନି କାତା ଝେକନାୟି

୨୭ ଅଡେ ଜିକରିୟ ସୁଦୁଜୀଝୁ ତଲେ ଇ ତାୟୁ ଆନି କାତା ଏଲେଇଚେସି,

୨୮ ଇସ୍ରାୟେଲତି ମାହାପୁରୁ ଜହରା □

ଏନିଇଚିହଁ ଏଞ୍ଜାସି ତାନି ଲକୁଣି କାର୍ମାମେସାନା ଗେଲ୍ପି କିହାମାନେସି;

୨୯ ଏଞ୍ଜାସି ତାନି ହଲେଏସି ଦାଝୁଦ କୃତାଟି ମା. ତାକି ର. ଗେଲ୍ପିନାଣାକ୍ ହାହାମାଞ୍ଜାନେସି □

୩୦ ତଲି କାଲ୍ଲାଟିଏ ତାନି ନେହଁ ମାହାପୁରୁ ଅଣ୍ପୁତି ବଲୁ ଝେହ୍ନାରି ଗୁତି ତଲେ ଏନିକଁ ଜଲ୍ଲା ମାଚେରି,

୩୧ ଏଲେକିହଁ ଏ ମାଙ୍ଗେ ମା. ସାତୁୟା ତାଣାଟି ଅଡେ ମାଙ୍ଗେ ଅପାଆଗାଟାରି ତାଣାଟି ଗେଲ୍ପି କିହାମାଞ୍ଜାନେସି,

୩୨ ଏଞ୍ଜାସି ଏଲେ ଇଞ୍ଜାମାନେସି, ଏଞ୍ଜାସି ମା. ଆକୁୟାଣି କାର୍ମା ମେସାମାକ୍ ଅଡେ ତାନି ସୁଦୁଗାଟି ରାଜିମାନାତି ଅଣ୍ପିନେସି □

- ୭୩ ମା ଆବା ଅବାହାମ ତାଣା ଏନିମି ପାରମାଣା କିହ୍ନି ଆଞ୍ଜାମାନାଣି
ଅଶ୍ଵାନା ପୁରା କିହାମାନେସି,
୭୪ ଅଡେ ମା ସାତୁୟାଁ ତାଣାଟି ଗେଲ୍ପି ଆହାନା, ଆଜାଆନା କାଚେଲଏ
ତାଙ୍ଗେ ସେବା କିହାଲି ଆଡିନାୟି,
୭୫ ତାନି ନକିତା ମାର ନୀତାମାନି ପାତେକା ସୁଦୁ ଅଡେ ଦାମ୍ବୁ
ଗାଗାତାୟି ଆହାନା ଡୟିନାୟି □
୭୬ ଏ ନା ମୀର୍ଏଣାତି ନୀନୁ ବାରେତି କିହ୍ନି ବାଡୁୟୁଗାଟି ମାହାପୁରୁ
ଅଶ୍ଵପୁତି ବଲୁ ଝେହ୍ନାତି ଇଞ୍ଜି ଝେଜିଦି;
୭୭ ପାପୁ ମ୍ନେପ୍ଵକି ଆହାନା ଏଞ୍ଜାରି ଗେଲ୍ପି ଆନାଣି ବେଟାଆନେରି,
ଏ କାତା ପୁଣ୍ଡି କିହାଲି ତାକି ତାନି ଲକୁତାଣା ହାଜି □
୭୮ ଇଞ୍ଜା ମାଙ୍ଗେ ହିଡଡି ଜିରୁତା ତାଚାଲି ମା ମାହାପୁରୁତି ଜୀଞ୍ଜୁନନ୍ତି
କାର୍ମାତଲେ ଲାକପୁରୁଟି ମାଙ୍ଗେତାକି ଝେଡ଼ା ହଡ଼ିମାନି ଲେହେଁ
ଆନେ,
୭୯ ଆମ୍ବାଆରି ହାନିଲେହେଁତି ତାଣା ବାସା କିନେରି, ହିଡଡି
ଜିରୁତା ଅହାଲି ତାକି ଏଞ୍ଜାସି ବାରେତି ଲାକ ଲାକପୁରୁଟି
ଉଜେଡ଼ି ହାନେସି □
୮୦ ଇଞ୍ଜା ଏ କକାସି ଆଙ୍ଗାତା ଜୀଞ୍ଜୁତା ପାତାଆହାନା
ଇସ୍ତାୟେଲ ଲକୁତାଣା ଝେଙ୍ଗାଆ ପାତେକା ଲକୁ ହିଲିଆ ଟାୟୁତା
ଡୟିତେସି □

୨

ଜୀସୁତି ଜାର୍ନା

(ମାତି ୧:୧୮-୨୫)

୧ ଏତିବେଲାତା ରମ୍ ଦେସାତି ବାରେ ଲକୁ ଦରୁ ରାଡ଼ି କିହାଲି
କାୟିସର ଅଗସ୍ତସ୍ ତାଣାଟି ହୁକୁମି ଆଡେ □

୨ ସିରିୟାତି ସାଲ୍ଵା କିନାସି କୁରିଣିୟ ବେଲାତା ତଲି ମୁଲୁ ଦରୁ
ରାସ୍‌କି ଆହାମାତେ □

୩ ଏଦାଆଁତାକି ବାରେଜାଣା ଦରୁ ରାଡ଼ି କିହାଲି ନାୟୁଁଟିଏ ଜାହାରା
ଗାଡ଼ାତା ହାଚେରି □

୪ ଜସେପ ଜିକେଏ ଦରୁ ରାଡ଼ି କିହାଲି ମରିୟମନି ତଲେ ଗାଲିଲିତି ନାଜରିତ ଗାଡ଼ାଟି ଜୀହୁଦା ରାଜିତି ବେତଲିହିମ ଇନି ଦାଝୁଦ ଗାଡ଼ାତା ହାରେସି, ଇରିହୁ ଏଝାସି ଦାଝୁଦ କୂଡ଼ା ଇଞ୍ଜାହାଁ ଏ ଗତିତାସି ମାରେସି;

୫ ଏଝାସି ଦରୁ ରାଡ଼ି କିୟାଲି ମରିୟମନି ତଲେ ହାରେସି, ଏଡ଼ି ଏଝାଣାକି ବୀହା ଆହାଲି ରାସ୍ପି ଆହାମାରେ ଅଡ଼େ ଏଡ଼ି ପୁରାମାସା ଆହାମାରେ □

୬ ଅଡ଼େ ଏ ଲକୁ ବେତଲିହିମତା ମାନିବେଲା, ଏଦାନାକି ଜାନି କିନି କାରୁ ଏଗାଝାଡ଼େ,

୭ ଇଞ୍ଜା ଏଡ଼ି ତାନି ପାଣ୍ଡା ମୀରଏଣାଇଁ ଜାନି କିତେ ଇଞ୍ଜା ହିମ୍ବୁରି ପୁକ୍‌ହାନା କଡ଼ିୟାଁ ଗହନି ତଂଗତା ତ୍ରିପ୍‌ହେ, ଇରିହୁ ଏ ଲକୁତାକି ବାସାଗାୟୁ ହିଲାଆଡ଼େ □

ମେଣ୍ଡା ଗଡ଼କା ଅଡ଼େ ଦୁତୁୟାଁ

୮ ଏ ଦାରିମାରି ନାସ୍‌କାଣାଁ ମେଣ୍ଡା ଗଡ଼କା ଲାଆଁୟାଁ ପାଙ୍ଗାତା ଡ଼ୟାନା ମେଣ୍ଡାୟାଁ କାଡ଼ିମାରେରି □

୯ ପ୍ରବୁତି ର ଦୁତୁ ଏଝାରିତାଣା ଝାଡ଼େ ଇଞ୍ଜା ପ୍ରବୁତି ଗାଝୁରମିତି ଡ଼ଜେଡ଼ି ଏଝାରି ସାରିଝାକି ତଞ୍ଜାଆଡ଼େ, ଅଡ଼େ ଏଝାରି ହାରେକା ଆଜିଡ଼େରି □

୧୦ ଏମ୍ବାଟିଏ ଦୁତୁ ଏଝାରାଇଁ ଏଲେଇଚେ, “ମୀରୁ ଆଜାଆଦୁ! ନାନୁ ମୀ ବାରେ ଲକୁତାକି ହାରେକା ରାହାତି କାରୁ ମିଙ୍ଗେ ଝେସିମାଞ୍ଜାଇଁ,

୧୧ ଇରିହୁ ନୀଞ୍ଜୁ ଦାଝୁଦ ଗାଡ଼ାତା ମିଙ୍ଗେ ଗେଲ୍‌ପାନାସି ଜାନା ଆହାମାନେସି, ଏଝାସି କ୍ରୀସ୍ତ ପ୍ରବୁ □

୧୨ ଅଡ଼େ ଇଦି ମିଙ୍ଗେତାକି ସିନାଲେହେଁ ଆନେ, ମୀରୁ ର କକାଣାଇଁ ହିମ୍ବୁରି ପୁକ୍‌ହାନା କଡ଼ିୟାଁ ଗହନି ତଂଗତା ତୁରାମାନାଣି ମେହ୍‌ଦେରି □”

୧୩ ଦେବୁଣିଏ ଏ ଦୁତୁ ତଲେ ଲାକପୁରୁତି ହାରେକା ଦୁତୁୟାଁ ଝାହାନା ମାହାପୁରୁଇଁ ଜହରା ପାରୁ ପାଡ଼ିତୁ,

୧୪ “ଲୀକପୁରୁ ମାହାପୁରୁତି ଗାଝୁରମି, ଅଡ଼େ ଦାର୍ତ୍ତିତା ଏଞ୍ଜାଣି ରାହାଁ ଇଞ୍ଜା ମାଣ୍ଠସିୟା ବିତ୍ତା ହିଡ଼ଡ଼ି □”

୧୫ ଦୂତୁୟା ଏମ୍ପାଟି ଲୀକପୁରୁ ହାଜାଲିଏ ମେଣ୍ଡା ଗଡ଼କା ତାମ୍ପୁ ତାମ୍ପୁ କାତା ଆଡ଼େରି, “ମାର ବେତଲିହିମ ପାତେକା ହାଜାନା ପ୍ରୁ ମାଙ୍ଗେ ଆମିନି କାତା ଝେସାମାଞ୍ଜାନେସି ଏଦାଆଁ ସିନି କିକାନ □”

୧୬ ଏମ୍ପାଟିଏ ତବେ ହାଜାନା ପାରାମା ମରିୟମ ଅଡ଼େ ଜସେପ ଇଞ୍ଜା କଡ଼ିୟା ଗହନି ଡ଼ଗତା ପୁଃନି ଜାନାଆଡ଼ି କକାଣାଈଁ ତୁରାମାନାଣି ମେସ୍ତେରି □

୧୭ ଏଞ୍ଜାରି ଈ ବାରେ ମେସାନା ଏ କକାଣି କାତା ଏନାଆଁ ଇଣ୍ଡି ଆହାମାତେ ଏଦାଆଁ ଝେକହେରି □

୧୮ ଅଡ଼େ ଏଚେକା ଲକୁ ମେଣ୍ଡା ଗଡ଼କା ତାଣାଟି ଏ ବାରେ କାତା ଝେଚେରି, ଏଞ୍ଜାରି ବାରେ ଏ କାତାତାକି କାବା ଆଡ଼େରି □

୧୯ ସାମା ମରିୟମ ଈ ବାରେ କାତା ହିୟାତା ଇଶାନା ହାରେକା ଅଣ୍ପାଲି ମାଟ୍‌ହେ □

୨୦ ଅଡ଼େ ମେଣ୍ଡା ଗଡ଼କାକି ଏନିକ୍‌ ଝେସ୍‌ପି ଆହାମାତେ, ଏଲେକିହ୍‌ ଏ ଏଞ୍ଜାରି ଏନା ଏନାଆଁ ଝେଚେରି ଇଞ୍ଜା ମେସ୍ତେରି ଏ ବାରେତାକି ମାହାପୁରୁତି ଗାଝୁରମି ଅଡ଼େ ଜହରା କିହ୍‌ ଝେଣ୍ଡା ହାଚେରି □

ଜୀସୁଇଁ ଦରୁ ଇଟିନାୟି

୨୧ ☆ଏଞ୍ଜାଣାକି ଆଟାଦିନା ଆଡ଼େ ଅଡ଼େ ତଲୁ ଦାଃନି ଦିନା ଝାଡ଼େ ଇଞ୍ଜା ଏଞ୍ଜାଣି ଦରୁ ଜୀସୁ ଇଞ୍ଜାଁ ଇଟିଚେରି; ଈ ଦରୁ ତାନି ପୁରାମାସା ଆନି ନକେଏ ଦୂତୁ ତାଣାଟି ଝେସ୍‌ପି ଆହାମାତେ □

ମାହାପୁରୁ ଇଲୁତା ଜୀସୁ

୨୨ ଅଡ଼େ ଏଚେତା ମସାତି ମେରା ତଲେ ଏଞ୍ଜାରି ଅଟ୍‌ହା କଡ଼ିନି ଦିନା ଏଗାଝାଡ଼େ, ଏଚେଟିଏ ଜସେପ ଅଡ଼େ ମରିୟମ ଜୀସୁଇଁ ମାହାପୁରୁ ନକିତା ଜିରୁସାଲମତା ଅହ୍‌ ହାଚେରି □

୨୩ ଏନିକି ମାହାପୁରୁତି ସାସ୍ତ୍ରିତା ରାସ୍ତି ଆହାମାନେ,
 “ବାରେ ପାଣ୍ଡା ମୀରକା ପ୍ରୁ ତାକି ସୁଦୁଗାଟାରି ଇଞ୍ଜି
 ଝେଙ୍ଗିନେରି □”

୨୪ ଅଡେ ମୋରାତା ରାସ୍ତି ଆହାମାନି ଇ ମୋରା ତଲେ ରୀ କୁଗୁରି
 ପଟାୟା ଆଆତ ରୀ ପାଞ୍ଚା ପଟାୟା ମାହାପୁରୁ ନକିତା ପୂଜା
 କିହାଲି ଏଞ୍ଜାଣାଇଁ ଜିରୁସାଲମତା ଅଡେରି □

୨୫ ଏଚିବେଲା ଜିରୁସାଲମତା ସିମିୟନ ଦରୁଗାଟି ର ମାଣ୍ଡସି
 ମାଚେସି; ଏଞ୍ଜାସି ର ଦାମୁଗାଟାସି ଅଡେ ମାହାପୁରୁଇଁ ଆଜିନାସି
 ମାଚେସି, ଅଡେ ଇସ୍ରାୟେଲ ଲକୁ ବାସୁଁ ବେଟାଆନାଣି କାଡିମାଚେସି,
 ଇଞ୍ଜା ସୁଦୁଜାଞ୍ଜୁ ଏଞ୍ଜାଣି ତାଣା ମାଚେ □

୨୬ ମାହାପୁରୁ ପାଣ୍ଡାନ୍ତି କ୍ରୀସୁଇଁ ମୋହୁଆ ପାଚେକା ଏଞ୍ଜାସି ହାଅସି
 ଇଞ୍ଜି ସୁଦୁଜାଞ୍ଜୁ ତଲିଏ ଝେସାମାଚେ □

୨୭ ସିମିୟନ ସୁଦୁଜାଞ୍ଜୁଟି ମାହାପୁରୁ ଇଲୁତା ଝାଡେସି; ଅଡେ ତାଲି
 ତାଞ୍ଜି ମସାଡି ମୋରାଲେହେଁ କିହାଲି ଜୀସୁଇଁ ବିତ୍ରା ତାଡୁ,

୨୮ ଏଚିବେଲା ସିମିୟନ କକାଣାଇଁ ପମାନା ମାହାପୁରୁଇଁ ଜହରା
 କିଚେସି;

୨୯ “ଏ ପ୍ରୁ ନୀଏଁ ନୀନୁ ଝେସିଲେହେଁ
 ନୀ ହଲେଏଣା ଜୀଞ୍ଜୁ ହିଡଡିତଲେ ଅମୁ;

୩୦ ନା କାନୁ ନୀ ଗେଲୁପିନାଣାଇଁ ମୋସାମାନେ □

୩୧ ଏନିଇଚିହିଁ ବାରେ ଲକୁତାକି କେପାମାନି

୩୨ ଜୀହୁଦିଆଆତାରାକି ସାତା ତହୁନି ର ଉଜେଡି ଆନେସି,
 ଅଡେ ନୀ ଇସ୍ରାୟେଲ ଲକୁତି ଗାଞ୍ଜୁରମି ଲେହେଁ କିହାମାଞ୍ଜି
 □”

୩୩ ଇଞ୍ଜା ତାମି ଇୟା ଅଡେ ଆବା ଏଞ୍ଜାଣି ତାକି ଝେସପି ଆହିମାନି
 ବାରେ କାତାତାକି କାବା ଆହିମାଚେରି □

୩୪ ଏଚେଟିଏ ସିମିୟନ କକାଣାଇଁ ବର ହୀହାନା ତାମି ଇୟା
 ମରିୟମନି ଏଲେଇଚେସି, “ମୋହୁମୁ ଇଞ୍ଜାସି ଇସ୍ରାୟେଲତି
 ହାରେକା ଲକୁଣି ନାସା କିହାଲି ଅଡେ ଗେଲୁପାଲି ଆଡ଼ଞ୍ଜି
 ଆହାମାନେସି, ଆମ୍ବାଆରି କପାଟି ହାରେକା ଜଲିନେରି □ ଏଞ୍ଜାସି
 ମାହାପୁରୁ ତାଣାଟି ର ସିନାଲେହେଁ ଆନେସି □

୩୫ ଆଥାତ୍ ନୀ ଜୀଝୁତା ଜିକେଏ କାଣ୍ଡାତଲେ ଗ୍ଲୁକ୍‌ହିସାରେ ହରାହାନି ଲେହେଁ, ଏ କସ୍ତ୍ର ନୀ ହିୟାତା ଆୟାନେ □”

୩୬ ଅଡେ ହାନା ଦରୁଗାଟି ର ମାହାପୁରୁ ଅଣ୍‌ପୁତି ବଲୁ ଝେହ୍‌ନାୟି ମାତେ; ଏଡି ଆସେର୍ କୁଡାତି ପନ୍‌ଏଲ ମାଜ୍ଜା □ ଏଦାନାକି ହାରେକା ବାର୍ସା ଆହାମାତେ; ଏଡି ଡାଆ ଆଡି ଜେଚ ସାତା ବାର୍ସା ଡକ୍ରାତଲେ ବାସା କିହାମାତେ, ଅଡେ ସାରିକଡି ସାରି ବାର୍ସା ରାଣ୍ଡେଣି ଆହାନା ନୀଡାମାତେ □

୩୭ ଏଡି ମାହାପୁରୁ ଇଲୁ ପିହ୍‌ଆନା ବାତିମାଲିହ୍‌ ଲାଆଁ ମାଦେନା ରାନ୍ଦା ତିନାଆନା ପ୍ରାଡାନା କିହିମାତେ □

୩୮ ଏ ଦେବୁଣିଏ ଏଡି ଝାହାନା ମାହାପୁରୁତି ଜହରା କିହ୍‌ ଜିରୁସାଲମତି ଗେଲ୍‌ପିନାଣାଇଁ କାଡି ମାନାରାଇଁ ଏଝାଣି କାତା ଝେସାଲି ମାଟ୍‌ହେ □

ନାଜ୍‌ରିତତା ଝେଣ୍ଡା ଝାନାୟି

୩୯ ☆ଡାୟୁ ଜସେପ ଅଡେ ମରିୟମ ମାହାପୁରୁତି ମେରା ତଲେ ବାରେ କାମା ରାପ୍‌ହାନା ଗାଲିଲିତି ତାନି ଗାଡା ନାଜ୍‌ରିତତା ଝେଣ୍ଡା ଝାଡେରି

୪୦ ଅଡେ ଜୀସୁ ଆଜ୍ଜାତା ବୁଦିତା ଅଡେ ବାଡ୍‌ୟୁତା ପାତା ଆଡେସି, ଅଡେ ମାହାପୁରୁତି କାର୍ମା ଏଝାଣିଲାଇ ମାତେ □

ଜୀସୁ ମାହାପୁରୁ ଇଲୁତା

୪୧ ତାନି ଇୟା ଆବା ବାରେ ବାର୍ସା ପିସ୍‌ପିଆନ୍ତି ପାର୍ବୁତାକି ଜିରୁସାଲମତା ହାଜିମାତେରି □

୪୨ ଜୀସୁ ବାର ବାର୍ସା ଆହାଲିଏ ଏଝାରି ପାର୍ବୁତି ମେରାଲେହେଁ ଜିରୁସାଲମତା ହାଚେରି □

୪୩ ଅଡେ ପାର୍ବୁତି ଦିନା ରାପ୍‌ହାନା ଏଡେତା ଏଝାରି ଝେଣ୍ଡା ଝାହିମାତେରି, ଏରିବେଲତା ଡଶା କକାସି ଜୀସୁ ଜିରୁସାଲମତା ଡୟାହାଚେସି, ସାମା ତାନି ଇୟା ଆବା ପୁଞ୍ଜାହିଲଆତେରି;

୪୪ ସାମା ଏଞ୍ଜାରି ତାମିତଲେ ୱାହାମାଟି ଲକ୍ଷ୍ମତଲେ ମାନେସି ଇଞ୍ଜି ଅଣ୍ଠପାନା ର ଦିନାତି ଜିରୁ ହାଚେରି, ଅଡ଼େ ତାମି ଲକ୍ଷ୍ମ ଇଞ୍ଜା ପୁଟି ଲକ୍ଷ୍ମତାଣା ପାରାଲି ମାଟ୍‌ହେରି,

୪୫ ଇଞ୍ଜା ଏଞ୍ଜାଣାଇଁ ମେଡ଼ା ଆଆନା ପାରି ପାରି ଜିରୁସାଲମତା ୱେଣ୍ଟା ହାଚେରି □

୪୬ ତାନିଦିନା ତାୟୁ ଏଞ୍ଜାରି ଏଞ୍ଜାଣାଇଁ ମାହାପୁରୁ ଇଲୁତା ବେଟାଆଡ଼େରି; ଏଞ୍ଜାସି ମେରାପୁନାରି କାତା ୱେଞ୍ଜିହିଁ ଏଞ୍ଜାରାଇଁ ୱେଣ୍ଟେ କାତା ୱେଞ୍ଜିମାଚେସି,

୪୭ ଅଡ଼େ ଏଚେକା ଲକ୍ଷ୍ମ ଏଞ୍ଜାଣି କାତା ୱେଞ୍ଜିମାଚେରି, ବାରେଜାଣା ଏଞ୍ଜାଣି ବୁଦିତା ଅଡ଼େ ୱେହ୍‌ନି କାତାତା କାବା ଆହିମାଚେରି □

୪୮ ଏତିବେଲା ତାମି ଇୟା ଆବା କକାଣାଇଁ ମେସାନା କାବାଆତୁ ଇଞ୍ଜା ତାମି ଇୟା ଏଞ୍ଜାଣାଇଁ ଏଲେଇଚେ, “ମୀରୁଏଣା ମାଙ୍ଗେ ଏନାଆଁତାକି ଇଚେକା ଦୁକୁ ହିୟାତି ? ମେହ୍‌ମୁ ନାନୁ ଅଡ଼େ ମୀ ଆବା ଏଚେକା ଦୁକୁଆହିଁ ନିଙ୍ଗେ ପାରିମାଞ୍ଜାନମି □”

୪୯ ଏମ୍ବାଟିଏ ଜୀସୁ ଏଲେଇଚେସି, “ମୀରୁ ନାଙ୍ଗେ ଏନାଆଁତାକି ପାରିମାଞ୍ଜାଦେରି ? ନା ଆବା ଇଜ ନାନୁ ମାନାଣି ମୀରୁ ପୁଞ୍ଜାହିଲଅଚେରି ?”

୫୦ ସାମା ଏଞ୍ଜାସି ଆମିନି କାତା ଜଲିଚେସି, ତାମି ଇୟା ଆବା ପୁଞ୍ଜାଲି ଆଡ଼ାଆଚେରି □

୫୧ ତାୟୁ ଜୀସୁ ତାମି ଇୟା ଆବା ତଲେ ୱେଣ୍ଟେ ନାଜ୍‌ରିତତା ୱାଚେସି, ଇଞ୍ଜା ଏଞ୍ଜାରି କାତା ମାନଞ୍ଜି ଆହାନା ଡ଼ୟିଚେସି, ଅଡ଼େ ତାମି ଇୟା ଇ ବାରେ କାତା ଜାଗ୍ରାତା ତଲେ ମନତା ଇଟାମାଚେ □

୫୨ ଅଡ଼େ ଜୀସୁ ଆଙ୍ଗାତା, ବୁଦିତା ଇଞ୍ଜା ମାହାପୁରୁ ଅଡ଼େ ମାଣ୍‌ସିୟା କାର୍ମାଟି ପାତା ଆଚେସି □

୩

ବାପ୍ତିସ୍ମ* ହାନି ଜହନ ୱେକ୍‌ନାୟି

(ମାଟି ୩:୧-୧୨; ମାର୍କ ୧:୧-୮; ଜହ ୧:୧୯-୨୮)

* ୩: ୩:୧ ମୁଞ୍ଜନାୟି

୧ ତିବିରିୟା କାୟିସରତି ସାଲଝି କିନି ପନ୍ଦର ବାର୍ଷା ଆୟାଲିଏ, ଏତିବେଲା ପନ୍ତ୍ରୟ ପିଲାତ ଜାହୁଦା ରାଜିତି ସାଲଝି କିନସି ଅଡ଼େ ହେରଦ ଗାଲିଲି ରାଜିତି ରାଜା ମାଚେସି, ଅଡ଼େ ତାମି ତାୟି ପିଲିପ ଇତୁରିୟା ଅଡ଼େ ବ୍ରାକନିତି ରାଜି ଅଡ଼େ ଲୁସାନିୟା ଅବିଲିନିତି ରାଜା ମାଚେସି □

୨ ହାନାନ ଅଡ଼େ କୟାପା କାଜା ପୂଜେରା ମାଚେରି, ଏତିବେଲାତା ମାହାପୁରୁତି ବଲୁ ଲକୁ ହିଲାଆ ଟାୟୁତା ଜିକରିୟ ମୀର୍ଏସି ଜହନ ତାଣା ଖାଡ଼େ □

୩ ଏମ୍ବାଟିଏ ବାପ୍ତିସ୍ତା ହାନି ଜହନ ଜର୍ଦ୍ଦନ ଦାରିତି ବାରେ ନାସକାଖାକି ହାଜାନା ପାପୁ ମ୍ଲୋପକି ଆହାଲି ମନ ଖେଟ୍‌ହାନା ବାପ୍ତିସ୍ତା ଅନି କାତା ଖେକ୍‌ହାଲି ମାଟ୍‌ହେସି,

୪ ଏନିଇଚିହିଁ ମାହାପୁରୁ ଅଣ୍‌ପୁତି ବଲୁ ଖେହ୍‌ନି ଜିସାୟ ପତିତା ରାସ୍‌କି ଆହାମାନେ,

“ଲକୁ ହିଲାଆ ଟାୟୁତା ରଅଣି ହାଡ଼ା ଖେକ୍‌ମାନେ;
ପ୍ରବୁତି ଜିରୁ ନେହିଁ କେପାଦୁ;
ଅଡ଼େ ଏଞ୍ଜାଣି କାଜା ଆଂଗେଣି ତିୟି କିଦୁ □

୫ ବାରେ ଗାଡ଼ଙ୍ଗା ନେଞ୍ଜି କିଝିଆନୁ,
ବାରେ ହରକା ମେଟାୟା ଉଣା କିଝିଆନୁ,
ଡଂଗିତି ଜିରୁ ତିୟି କିଝିଆନେ,
କାଡ଼ନ୍ଦି ତେପା ବୁମିତି ବାରେ ସମାନା କିଝିଆନେ □

୬ ବାରେ ଦାରତିତି ଲକୁ ମାହାପୁରୁତି ଗେଲ୍‌ପିନାଣି ମେହ୍‌ନେରି □”

୭ ✨ଏଲେକିହିଁ, ଜହନ ତାଣାଟି ବାପ୍ତିସ୍ତା ଅହାଲି ଖାହିମାନି ଲକୁଣି ମେସାନା ଏଞ୍ଜାରାଲ୍ ଏଲେଇଚେସି, “ଆଡ଼େ ରାସ୍‌କା କୁଡ଼ାତାତେରି ମାହାପୁରୁ ପାଣ୍ଡାମାଞ୍ଜାନି କପାଟି ପିସ୍‌ପି ଆହାଲି ମାଙ୍ଗେ ଆମ୍ବାଆସି ସେଡ଼ନା ହିୟାତେସି ?

୮ ✨ଏଦାଆଁତାକି ମନ ଖେଟ୍‌ହାକତିତି ନେହିଁ କାମା ତହ୍‌ଦୁ; ଅଡ଼େ ଅବ୍ରାହାମ ମା ଆବା ଇଞ୍ଜିହିଁ ଅଣ୍‌ପାଆଦୁ, ନାନୁ ମିଙ୍ଗ

† ୩:୩ ୩:୩ ମୁଞ୍ଜିନାୟି ‡ ୩:୩ ୩:୩ ମୁଞ୍ଜିନାୟି ☆ ୩:୭ ୩:୭ ମାତି ୧୨:୩୪; ୨୩:୩୩
§ ୩:୭ ୩:୭ ମୁଞ୍ଜିନାୟି ☆ ୩:୮ ୩:୮ ଜହ ୮:୩୩

ଝେସିମାଞ୍ଜାଇଁ, ମାହାପୁରୁ ଇ ଖାଲକାଟି ଜିକେଏ ଅବ୍ରାହାମତି ମୀରକାଣି ଗାଡ଼ି କିହାଲି ଆଡ଼ିମାନେସି □

୯ ✧ଅଡ଼େ ନୀର୍ବି ଜିକେଏ ମାର୍ତ୍ତୁ ଡାକିତା କାଃଆଲି ଆଟାମାନେ; ଆମିନି ମାର୍ତ୍ତୁ ନେହଁ ପାଡ଼େୟି ଆୟେଏ ଏଦାନି ଚୁଣ୍ଠାହାନା ହିରୁତା ମେଡ଼ପି ଆଡ଼େ □”

୧୦ ଏମ୍ବାଟିଏ ଲକୁ ଏଞ୍ଜାଣାଇଁ ଝେଚେରି, “ଆଡ଼ିହଁ ମାମ୍ବୁ ଏନାଆଁ କିନମି ?”

୧୧ ଏଞ୍ଜାସି ଏଲେଇଚେସି, “ଆମ୍ବାଆରାକି ଜଡ଼େକା ସକାୟାଁ ମାନୁ, ଏଞ୍ଜାସି ଆମ୍ବାଆରାକି ହିଲାର ଏଞ୍ଜାଣାକି ରଣ୍ଡାଆଁ ହୀପେସି; ଇଞ୍ଜା ଆମ୍ବାଆରାକି କାଡ଼ି ମାନେ ଏଞ୍ଜାସି ଜିକେଏ ଏଲେକିପାସି □”

୧୨ ✧ସିସ୍ତୁ ରୀହ୍ନାରି ଜିକେଏ ବାପ୍ତିସ୍ତ* ଅହାଲି ଖାହାନା ଏଲେଇଚେରି, “ଏ ଗୁରୁ ମାମ୍ବୁ ଏନାଆଁ କିନମି ?”

୧୩ ଏଞ୍ଜାସି ଏଞ୍ଜାରାଇଁ ଏଲେଇଚେସି, “ମିଙ୍ଗେଡାକି ଏଚେକା ମେରା ମାନେ ଏଚେକାଟିଏ ଆଗାଡ଼ା ରୀହ୍ଆଡୁ □”

୧୪ ଏଚରଜାଣା ରିଜାରି କସ୍‌କା ଖାହାନା ଏଲେଇଚେରି, “ମାମ୍ବୁ ଏନାଆଁ କିନମି ?”

ଏଞ୍ଜାସି ଏଞ୍ଜାରାଇଁ ଏଲେଇଚେସି, “ବାଡ଼ୁୟୁଟି କି ନାଡ଼ିକିହାନା ଆମ୍ବାଆରି ଦନ ମୀଞ୍ଜା ଅଆଡୁ, ଅଡ଼େ ମୀରୁ ଏଚେକା ବେଟାଆଦେରି ଏଚେକା ତଲେଏ ନୀଡ଼ାଡୁ □”

୧୫ ଲକୁ ମସିହାଇଁ କାଡ଼ିମାଚେରି, ଇଞ୍ଜା ଜହନଏ କ୍ରୀସ୍ତ ହାବୁଲା ଇଞ୍ଜା ଅଣ୍ଡାପାନା ବାରେଜାଣା ତାମି ମନତା କାତା ଆହିମାଚାକି,

୧୬ ଜହନ ଏଞ୍ଜାରାଇଁ ଏଲେଇଚେସି, “ନାନୁସାଁ ଏୟୁତଲେ ବାପ୍ତିସ୍ତ† ହୀହିମାଞ୍ଜାଇଁ, ସାମା ନା କିହାଁ ଆମ୍ବାଆସି ବାଡ଼ୁୟୁ ଗାଟାସି ଏଞ୍ଜାସି ଖାହିମାନେସି, ଏଞ୍ଜାଣି ସେପୁୟାଡ଼ି ତ:ରକା ଜିକେଏ ହୁକ୍‌ହାଲି ନାନୁ ପାଡ଼ାଆଅଁ; ଏଞ୍ଜାସି ମିଙ୍ଗେ ସୁଦୁଜୀଞ୍ଜୁ ଅଡ଼େ ହିରୁତଲେ ବାପ୍ତିସ୍ତ‡ ହିୟାନେସି □

✧ ୩:୯ ୩:୯ ମାଡ଼ି ୭:୧୯ ✨ ୩:୧୭ ୩:୧୭ ଲୁକ ୭:୨୯ * ୩:୧୭ ୩:୧୭ ମୁଞ୍ଜିନାୟି
 † ୩:୧୭ ୩:୧୭ ମୁଞ୍ଜିନାୟି ‡ ୩:୧୭ ୩:୧୭ ମୁଞ୍ଜିନାୟି

୧୭ ତାନି କ୍ଳାନ୍ତୁତି ତାସାଲି ଅଡ଼େ ତାନି ଆର୍ନାତି କ୍ଳୁସାହ୍ନା କୃଡ଼ି କିହାନା ଗାଦେୟିତା ଇଟାଲି ଏଞ୍ଜାଣି କେୟୁତା ହେଚି ମାନେ, ଇଞ୍ଜା ଟାଟା ପଡ଼ୁତି ଏରେଲା ତୁମ୍ବାଆଗାଟି ହିରୁତା ହୁଡା ତୁହନେସି □”

୧୮ ଏଞ୍ଜାସି ଇଲେତି ହାରେକା କାତା ଖେସିହିଁ ଅଡ଼େ ରାହ୍ନାତି କାତା ଜଲିହିଁ ଲକୁତାଣା ନେହିଁ କାରୁ ଖେକ୍ହି ମାଚେସି;

୧୯ ✨ସାମା ରାଜା ହେରଦ ତାମି ତାୟି ଡକ୍ରି ହେରଦିୟାନି କାତା ଅଡ଼େ ତାନୁ କିହାମାନି ବାରେ ଲାଗେଏତି କାମାତାକି ଜହନ ତାଣାଟି ଲାଗି ବେଟା ଆହାମାଚାକି,

୨୦ ହେରଦ ଜହନଇଁ ଦସ୍ପାନା କାୟିଦିତା ଇଟାନା ହାରେକା ଲାଗେଏତି କାମା କିଡେସି □

ଜୀସୁତି ବାପ୍ତିସ୍ମା

(ମାତି ୩:୧୩-୧୭; ମାର୍କ ୧:୯-୧୧)

୨୧ ବାରେ ଲକୁ ବାପ୍ତିସ୍ମା* ଅତି ଡାୟୁ ଜୀସୁ ଜିକେଏ ବାପ୍ତିସ୍ମା† ଅହାନା ପ୍ରାତାନା କିହିମାଚାଟି ହାଗୁ ଦେପିଆଡେ,

୨୨ ✨ଅଡ଼େ ସୁଦୁଜୀସୁ ପାରୁଞ୍ଜା ପଟାଲେହେଁ ଏଞ୍ଜାଣିଲାକ ରେଟାଞ୍ଜାଡେ; ଇଞ୍ଜା ହାଗୁଟି ଇ ହାଡା ଆଡେ, “ନୀନୁ ନା ଜୀସୁତି ମୀରୁଏଣାତି ନୀ ତାଣା ନା ରାହ୍ନା ମାନେ □”

ଜୀସୁତି ଆକୁ ଆବାୟା

(ମାତି ୧:୧-୧୭)

୨୩ ଜୀସୁ ସେବା କାମା ମାଟ୍ହି ବେଲାତା ଏଞ୍ଜାଣାକି କଡ଼େଦସ ବାର୍ସା ଆହାମାଚେ; ଲକୁତି କାତାତଲେ ଏଞ୍ଜାସି ଜସେପ ମୀରୁଏସି; ଜସେପ ଏଲି ମୀରୁଏସି,

୨୪ ଏଲି ମତାତ ମୀରୁଏସି, ମତାତ ଲେବି ମୀରୁଏସି, ଲେବି ମଲ୍ଲକି ମୀରୁଏସି, ମଲ୍ଲକି ଜନୟ ମୀରୁଏସି, ଜନୟ ଜସେପ ମୀରୁଏସି,

✨ ୩:୧୯ ୩:୧୯ ମାତି ୧୪:୩,୪; ମାର୍କ ୬:୧୭,୧୮ § ୩:୨୦ ୩:୨୧ ମୁଞ୍ଜନାୟି

* ୩:୨୧ ୩:୨୧ ମୁଞ୍ଜନାୟି † ୩:୨୧ ୩:୨୧ ମୁଞ୍ଜନାୟି ✨ ୩:୨୨ ୩:୨୨ ମାତି ୩:୧୭; ମାର୍କ ୧:୧୧; ଲୁକ ୯:୩୫

୨୫ ଜସେପ ମତିତିୟା ମୀରୁଏସି, ମତିତିୟା ଆମସ ମୀରୁଏସି, ଆମସ ନାହୁମ ମୀରୁଏସି, ନାହୁମ ହେସଲି ମୀରୁଏସି, ହେସଲି ନଗୟ ମୀରୁଏସି,

୨୬ ନଗୟ ମହତ ମୀରୁଏସି, ମହତ ମତିତିୟସ୍ ମୀରୁଏସି, ମତିତିୟସ୍ ସିମିୟି ମୀରୁଏସି, ସିମିୟି ଜସେକ ମୀରୁଏସି, ଜସେକ ଜଦା ମୀରୁଏସି,

୨୭ ଜଦା ଜହନ ମୀରୁଏସି, ଜହନ ରେସା ମୀରୁଏସି, ରେସା ଜିରୁବାବେଲ ମୀରୁଏସି, ଜିରୁବାବିଲ ସଲ୍‌ଟିୟେଲ୍ ମୀରୁଏସି, ସଲ୍‌ଟିୟେଲ୍ ନେରି ମୀରୁଏସି,

୨୮ ନେରି ମଲ୍‌କି ମୀରୁଏସି, ମଲ୍‌କି ଅଦ୍‌ଦି ମୀରୁଏସି, ଅଦ୍‌ଦି କସାମ ମୀରୁଏସି, କସାମ ଏଲ୍‌ଆଦାନ ମୀରୁଏସି, ଏଲ୍‌ଆଦାନ ଏର ମୀରୁଏସି,

୨୯ ଏର ଜିହସୁୟ ମୀରୁଏସି, ଜିହସୁୟ ଏଲିୟାଜର ମୀରୁଏସି, ଏଲିୟାଜର ଜରିମ ମୀରୁଏସି, ଜରିମ ମତାତ ମୀରୁଏସି, ମତାତ ଲେବି ମୀରୁଏସି,

୩୦ ଲେବି ସିମିୟନ ମୀରୁଏସି, ସିମିୟନ ଜୀହୁଦା ମୀରୁଏସି, ଜୀହୁଦା ଜସେପ ମୀରୁଏସି, ଜସେପ ଜନାମ ମୀରୁଏସି, ଜନାମ ଏଲିୟାକିମ ମୀରୁଏସି,

୩୧ ଏଲିୟାକିମ ମଲାହ ମୀରୁଏସି, ମଲାହ ମନ୍‌ନା ମୀରୁଏସି, ମନ୍‌ନା ମତତା ମୀରୁଏସି, ମତତା ନାତନ ମୀରୁଏସି, ନାତନ ଦାହୁଦ ମୀରୁଏସି,

୩୨ ଦାହୁଦ ଜିସି ମୀରୁଏସି, ଜିସି ଅବେଦ ମୀରୁଏସି, ଅବେଦ ବୟାଜ ମୀରୁଏସି, ବୟାଜ ସେଲହ ମୀରୁଏସି, ସେଲହ ନହସନ ମୀରୁଏସି,

୩୩ ନହସନ ଅମିନାଦାବ ମୀରୁଏସି, ଅମିନାଦାବ ଅଦ୍‌ନିନି ମୀରୁଏସି, ଅଦ୍‌ନିନି ଅର୍ନି ମୀରୁଏସି, ଅର୍ନି ହେସ୍ରା ମୀରୁଏସି, ହେସ୍ରା ପେରସ ମୀରୁଏସି, ପେରସ ଜୀହୁଦା ମୀରୁଏସି,

୩୪ ଜୀହୁଦା ଜାକୁବ ମୀରୁଏସି, ଜାକୁବ ଇସାହାକ ମୀରୁଏସି, ଇସାହାକ ଅବ୍ରାହାମ ମୀରୁଏସି, ଅବ୍ରାହାମ ତେରହ ମୀରୁଏସି, ତେରହ ନାହର ମୀରୁଏସି,

୩୫ ନାହର ସରୁଗ ମୀରୁଏସି, ସରୁଗ ରଗୁ ମୀରୁଏସି, ରଗୁ ପେଲଗ

ମୀରୁଏସି, ପେଲଗ ଏବର ମୀରୁଏସି, ଏବର ସେଲହ ମୀରୁଏସି,
 ୩୬ ସେଲହ କେନାନ ମୀରୁଏସି, କେନାନ ଅର୍ପକ୍ୟଦ ମୀରୁଏସି,
 ଅର୍ପକ୍ୟଦ ସେମ ମୀରୁଏସି, ସେମ ନହ୍ ମୀରୁଏସି, ନହ୍ ଲେମକ
 ମୀରୁଏସି,
 ୩୭ ଲେମକ ମତୁସେଲହ ମୀରୁଏସି, ମତୁସେଲହ ହନକ
 ମୀରୁଏସି, ହନକ ଜେରଦ ମୀରୁଏସି, ଜେରଦ ମହଲଲେଲ
 ମୀରୁଏସି, ମହଲଲେଲ କେନାନ ମୀରୁଏସି,
 ୩୮ କେନାନ ଏନସ ମୀରୁଏସି, ଏନସ ସେତ ମୀରୁଏସି, ସେତ
 ଆଦମ ମୀରୁଏସି, ଆଦମ ମାହାପୁରୁ ମୀରୁଏସି □

୪

ଜୀସୁଇଁ ତାୟିପାରି କିନାୟି

(ମାତି ୪:୧-୧୧; ମାର୍କ ୧:୧୨-୧୩)

୧ ଜୀସୁ ସୁଦୁଜୀଝୁ ବେଟାଆହାନା ଜର୍ଦନ କାତାଟି ଝେଶ୍ଟାଝାଡେସି
 ଇଞ୍ଜା ରୀ କଡ଼ି ଦିନା ପାତେକା ସୁଦୁଜୀଝୁ ତଲେ ଲକୁ ହିଲାଆ
 ଚାୟୁତା ହାଚେସି □

୨ ଏମ୍ବାଆଁ ଏଝାସି ସୟତାନ ତାଣାଟି ତାୟିପାରି କିଝିଆଡେସି □ ଇ
 ରୀ କଡ଼ି ଦିନା ଏଝାସି ଏନାଆଁ ତିନାଆଡେସି, ଅଡେ ଏ ରୀ କଡ଼ି ଦିନା
 ରାହାଲିଏ ଏଝାସି ହାକି ଆଡେସି □

୩ ଏମ୍ବାଟିଏ ସୟତାନ ଏଝାଣାଇଁ ଏଲେଇଚେ, “ନାନୁ ମାହାପୁରୁ
 ମୀରୁଏଶାଟି ଇଚିହ୍ ଇ ଝାଲକାଣି ରୁଟି ଆହାଲି ହୁକୁମି ହୀମୁ □”

୪ ସାମା ଜୀସୁ ଏଲେଇଚେସି, “ଦାମ୍ବୁ ସାସ୍ତେରିତା ରାସ୍କି
 ଆହାମାନେ, ମାଣ୍ଡି ଝାରୁଇ ରୁଟି ତିଞ୍ଜାନା ନୀତଅସି □”

୫ ଅଡେ ସୟତାନ କାଜା ହରୁ ଲାକ ଅହାନା ଗାଡେକା ତାକି
 ଦାରୁତିତ ବାରେ ରାଜି ଏଝାଣାଇଁ ତସ୍ତେ □

୬ ଇଞ୍ଜା ସୟତାନ ଏଝାଣାଇଁ ଏଲେଇଚେ, “ନାନୁ ନିଙ୍ଗେ ଇ ବାରେ
 ଦନଡି ଅଦିକାରା କିୟାଇଁ, ଏନାଆଁତାକି ଇଚିହ୍ ବାରେ ନାଙ୍ଗେ
 ହେରୁପି ଆହାମାଞ୍ଜାନେ, ଅଡେ ନାନୁ ଆମ୍ବାଆରାକି ମନ ଏଝାଣାକି
 ହୀଇଁ □

୭ ଇଦାଆଁତାକି ନୀନୁ ନା ନକିତା ମେଣ୍ଟାକୁତାନା ଜହରା କିୟାଦି, ଇଚିହଁ ଇ ବାରେ ନୀଦି ଆନେ □”

୮ ଜୀସୁ ଏଲେଇରେସି, “ରାସ୍‌କି ଆହାମାନେ, ‘ନୀନୁ ନୀ ମାହାପୁରୁଇଁ ଜହରା କିଦି, ଅଡ଼େ ଖାରଇ ଏଞ୍ଜାଣି ସେବା କିଦି □’ ”

୯ ଅଡ଼େ ସୟତାନ ଏଞ୍ଜାଣାଇଁ ଜିରୁସାଲମତା ଅହାନା ମାହାପୁରୁ ଇଲୁ ତୁଡ଼ିୟା ଲାକ ନିପ୍‌ହାନା ଏଲେଇରେ, “ନୀନୁ ମାହାପୁରୁତି ମୀରଏଣାତି ଇଚିହଁ ଇମ୍‌ଗାଟି ଡ଼ଇକା ଗେମ୍‌ମା;”

୧୦ ଇଚିହଁ ରାସ୍‌କି ଆହାମାନେ, ‘ନିଙ୍ଗେ ଗେଲ୍‌ପାଲିତାକି ମାହାପୁରୁ ତାନି ଦୁତୁୟାଁଇଁ ହୁକୁମି ହୀନେସି □’

୧୧ ଅଡ଼େ ରାସ୍‌କି ଆହାମାନେ, ‘ନୀ କତାୟାଁ ଏନିକଁ ଖାଲ୍‌କାଣା ଆଡ଼ାଉ ଏଦାଆଁତାକି ଏଞ୍ଜି ନିଙ୍ଗେ କେସ୍‌ତଲେ ପେର୍‌ହା ଆସ୍‌ମାନ୍ତୁ □’ ”

୧୨ ସାମା ଜୀସୁ ଏଦାନି ଏଲେଇରେସି, “ଦାମ୍‌ସା ସାସ୍‌ସ୍‌ରିତା ରାସ୍‌କି ଆହାମାନେ, ନୀନୁ ପ୍ରୁ ନୀ ମାହାପୁରୁଇଁ ତାୟିପାରି କିଆନି □”

୧୩ ସୟତାନ ଜୀସୁଇଁ ବାରେ ତାୟିପାରି କିନାଣି ରାପ୍‌ହାନା ଗାଡ଼କା ତାକି ଏଞ୍ଜାଣାଇଁ ପିସାନା ହାଚେ □

ଜୀସୁ ଗାଲିଲିତା ସେବା କାମା ମାଟ୍‌ନାୟି

(ମାତି ୪:୧୨-୧୭; ମାର୍କ ୧:୧୪-୧୫)

୧୪ ଏ ତାୟୁ ଜୀସୁ ସୁଦୁଜୀଖୁତି ବାଡ଼ୟୁ ତଲେ ଗାଲିଲିତା ଖାଡ଼େସି, ଅଡ଼େ ସାରିଖାକି ଏଞ୍ଜାଣି କାତା ଖେଙ୍ଗିଡ଼େ □

୧୫ ଅଡ଼େ ଏଞ୍ଜାସି ଏଞ୍ଜାରି ଜୀହୁଦି ଲକୁଡି କୁଟମି ଇଲ୍‌କାଣା* ଜାପ୍‌ହିହଁ ବାରେ ଲକୁ ତାଣାଟି ଗାଞ୍ଜୁରମି ବେଟାଆଡ଼େସି □

ଜୀସୁଇଁ ନାଜରିତତା ଅପାଆଡ଼େରି

(ମାତି ୧୩:୫୩-୫୮; ମାର୍କ ୬:୧-୬)

୧୬ ଅଡ଼େ ଏଞ୍ଜାସି ଆମିନି ନାଜରିତତା ପହିପାତି ଆହାମାଚେସି, ଏଚେତା ଏ ଗାୟୁତା ହାଚେସି ଅଡ଼େ ତାନି ମେରାଲେହେଁ ଜମିନି ଦିନାତା ଜୀହୁଦି ଲକୁଡି କୁଟମି ଇଲୁତା† ହାଚେସି ଇଞ୍ଜା ପଡ଼ଞ୍ଜି ଆହାଲି ନିଡ଼େସି,

* ୪:୧୫ ୪:୧୫ ସିନଗର † ୪:୧୬ ୪:୧୬ ସିନଗର

୧୭ ଏମ୍ବାରିଏ ମାହାପୁରୁ ଅଣ୍ଟପୁତି ବଲୁ ଝେହ୍ନି ଜିସାୟତି ପତି ହୀତେରି, ଜୀସୁ ଏଡାଆଁ ଏକ୍ହାନା ଏମିନିତାଣା ଇ କାତା ରାସ୍କି ଆହାମାନେ ଏ କାତା ବେଟାଆଡେସି;

୧୮ “ପ୍ରବୁତି ଜୀସୁ ନା ତାଣା ମାନେ,
ଏନିଇତିହିଁ ହିଲୀଆ ଗାଟାରି ତାଣା ନେହିଁ କାରୁ ଝେକ୍ହାଲି
ଏଝାସି ନାଢେ ଆଟାମାଞ୍ଜାନେସି;

କାୟିଦିତା ମାନାରାଇଁ ପିସ୍ପି ଆନାଣି ଝେକ୍ହାଲି,
କାଶ୍କା ମେହ୍ଆଗାଟାରାଇଁ ମେସ୍ପି କିହାଲି,

ଦୁକୁ ବେଟାଆହି ମାନାରାଇଁ ଗେଲ୍ପାଲି,

୧୯ ଇଞ୍ଜା ମାହାପୁରୁ କାର୍ମା ମେସ୍ପାନି ଚେଲାତି ବାର୍ଯା ଝେକ୍ହାଲି
ପ୍ରବୁ ନାଢେ ପାଣ୍ଡାମାଞ୍ଜାନେସି □”

୨୦ ଏମ୍ବାରିଏ ଜୀସୁ ପତିତି ମୁଦା କିହାନା ସେବା କିନାଣି କେନ୍ଦୁତା ହୀହାନା କୁଗିତେସି □ ଅଡେ ଜୀହୁଦି ଲକୁତି କୁଟମି ଇଲୁତାଃ କୁଗାମାନି ବାରେ ଲକୁ ଜୀସୁ ଝାକି ସିନିକିତେରି □

୨୧ ଇଞ୍ଜା ଜୀସୁ ଏଝାରାଇଁ ଏଲେଇଚେସି, “ନୀଞ୍ଜୁଟିଏ ଦାର୍ମ୍ ପତିତି ଇ କାତା ମୀରୁ ଝେଶ୍ମନିଏ ପୂରା ଆଡେ □”

୨୨ ଅଡେ ବାରେଜାଣା ତାନି କାତାତାକି ସାକି ହୀତେରି, ଅଡେ ତାନି ଗୁଡିଟି ହଡିମାନି କାର୍ମାତି ବଲୁତା କାବା ଆଡେରି ଇଞ୍ଜା ଏଲେଇଚେରି, “ଇଝାସି ଏନାଆଁ ଜସେପ ମୀରଏସି ଆଏକି ?”

୨୩ ଏମ୍ବାରିଏ ଏଝାସି ଏଝାରାଇଁ ଏଲେଇଚେସି, “ମୀରୁ ସାତେଏ ନାଢେ ଏଲେ ଇଞ୍ଜାଦେରି, ଏ ଅସଗୁରୁ ନୀନୁଏ ନିଢେ ନେହିଁ କିହାକତାମୁ; କପରନାହୁମତା ଏନା ଏନାଆଁ କିହାମାଞ୍ଜି ଇଞ୍ଜା ମାମ୍ ଝେଞ୍ଜାମାନମି ଏଲେକ୍ ମୀ ଆକୁ ଆବାୟା ନାୟୁତା ଜିକେଏ କିମୁ □”

୨୪ ✨ଅଡେ ଏଝାସି ଏଲେଇଚେସି, “ନୀନୁ ମିଢେ ସାତା ଝେସିମାଞ୍ଜାଇଁ, ମାହାପୁରୁ ଅଣ୍ଟପୁତି ବଲୁ ଝେହ୍ନାରାଇଁ ତାନୁ ପାତାଆଡି ନାୟୁତି ଲକୁ ଅପଅରି □

‡ ୪:୨୦ ୪:୨୦ ସିନଗର୍ ☆ ୪:୨୪ ୪:୨୪ ଜହ ୪:୪୪

୨୫ ସାମା ନାନୁ ମିଙ୍ଗେ ସାତା ୱେସିମାଞ୍ଜାଇଁ, ଏଲିୟ ବେଲୀତା ଏନିକ୍ ତାନି ବାର୍ଯା ସ ଲେଞ୍ଜୁ ପାତେକା ହାଗୁଟି ପିୟୁ ରିଆତାକି ବାରେ ଦେସା କାର୍ଡୁ ଆହାମାରେ, ଏତିବେଲା ଇସ୍ରାୟେଲତା ହାରେକା ରାଣ୍ଡେଣିସିକା ମାଟିହିଁ ଜିକେଏ;

୨୬ ଏଲିୟ ଏଞ୍ଜାସିକା ତାଣା ପାଣ୍ଡୁଞ୍ଜି ଆଆନା ସିଦନ ଦେସାତି ସାରିପତ ନାୟୁତି ର ରାଣ୍ଡେଣିନି ତାଣା ପାଣ୍ଡୁଞ୍ଜି ଆଡେସି □

୨୭ ଅଡେ ମାହାପୁରୁ ଅଣ୍ପୁତି ବଲୁ ୱେହ୍ନି ଏଲିସାୟ ମାଚାଟି ଇସ୍ରାୟେଲ ବିତ୍ରା ହାରେକା କାଜା ରଗା ଗାଗାରି ମାଚେରି; ଆଡିଜିକେଏ ଏଞ୍ଜାରି ବିତ୍ରାଟି ରଅସି ଜିକେଏ ନେହିଁ ଆଆଡେସି, ସାମା ସିରିୟା ଦେସାତି ନାମାନ ନେହିଁ କିଞ୍ଜିଆଡେସି □”

୨୮ ଜୀହୁଦି ଲକୁତି କୁଟମି ଇଲୁତାଽ ଇ ବାରେ କାତା ୱେଞ୍ଜାନା ବାରେଜାଣା କାର୍ବି ଆଡେରି,

୨୯ ଅଡେ ଏଞ୍ଜାରି ନିଙ୍ଗାନା ଏଞ୍ଜାଣାଇଁ ଗାଡାଟି ପାଙ୍ଗାତା ପେରହେରି ଇଞ୍ଜା ଏଞ୍ଜାରି ଏମିନି ଗାଡା ହୁରୁଲେକ ଦସାମାଚେରି ଏ ହୁରୁ ଲାକଟି ଡ଼ଇକା ମେଡହାଲି ଏଞ୍ଜାଣାଇଁ ଅଡେରି;

୩୦ ସାମା ଏଞ୍ଜାସି ଏଞ୍ଜାରି ମାଦିଟି ହଚାହାଚେସି □

ଜୀସୁ ବୁଡୁ ଆଲଗା ମାଚାଣାଇଁ ନେହିଁ କିନାୟି

(ମାର୍କ ୧:୨୧-୨୮)

୩୧ ଜୀସୁ କପରନାହୁମ ଦରୁଗାଟି ଗାଲିଲିତି ର ଗାଡାତା ୱାଡେସି, ଇଞ୍ଜା ଜମିନି ଦିନା ଲକୁଣି ଜାପୁହି ମାଚେସି,

୩୨ ☆ଅଡେ ଏଞ୍ଜାରି ଏଞ୍ଜାଣି ଜାପୁନି ତାଣା କାବା ଆଡେରି, ଏନାଆଁତାକି ଇଟିହିଁ ଏଞ୍ଜାଣି ଜଲିନାୟି ଅଦିକାରା ଗାଚାୟି ଲେହେଁ ମାଚେ □

୩୩ ର ଦିନା ଜୀହୁଦି ଲକୁତି କୁଟମି ଇଲୁତା* ର ପଲ୍ଲଆ ବୁଡୁ ଆଲଗାମାଚି ଲକୁ ମାଚେସି; ଏଞ୍ଜାସି କିରଡିହିଁ ଏଲେଇଚେସି,

୩୪ “ଏ ନାଜରିତତି ଜୀସୁ ନୀ ତଲେ ମାଙ୍ଗେ ଏନାୟି ମାନେ ? ନୀନୁ ମାଙ୍ଗେ ନାସା କିହାଲି ୱାହାମାଞ୍ଜି କି ? ନୀନୁ ଆମ୍ବାଆତି ନୀନୁ ପୁଞ୍ଜାମାଇଁ; ନୀନୁ ମାହାପୁରୁତି ସୁଦୁ ମାଣ୍ଡସିତି □”

୯ ୪:୨୮ ୪:୨୮ ସିନଗଗ୍ ☆ ୪:୩୨ ୪:୩୨ ମାତି ୭:୨୮,୨୯ * ୪:୩୩ ୪:୩୩ ସିନଗଗ୍

୩୫ ଜୀସୁ ଏଦାନି ଦାକା ହୀହାନା ଏଲେଇରେସି, “ପାଲେଏ ଆମ୍ବୁ ଇଞ୍ଜା ଇଝାଣି ତାଣାଟି ହରାହାଲାନୁ □” ଏମ୍ବାଟିଏ ଏ ବୃତୁ ଏଝାଣାଇ ମାଦିଏ ତ୍ରକହାନା ଏଝାଣାଇ ଏନାଆଁ କିଆନା ହରାହାରେ □

୩୬ ଏମ୍ବାଟିଏ ବାରେଜାଣା କାବାଆହାନା ଏଲେଇଶ୍ମି ଆଡେରି, “ଇଦି ଏନିଲେହେଡି କାତା ? ଏଝାସି ବୃତୁୟାଁଇ ଅଦିକାରା ଅଡେ ବାଡ଼ୟୁଟି ହୁକୁମି ହୀହିମାନେସି ଇଞ୍ଜା ଏଝି ହରା ହାଜିମାନୁ □”

୩୭ ଏମ୍ବାଟିଏ ଏଝାଣି ହାଡ଼ାତି କାରୁ ଦେସାତି ସାରିଝାକି ଝେଙ୍ଗାହାରେ □

ଜୀସୁ ହାଡ଼େକା ଲକୁଇଁ ନେହଁକିନାୟି

(ମାତି ୮:୧୪-୧୭; ମାର୍କ ୧:୧୯-୩୪)

୩୮ ଏମ୍ବାଟିଏ ଜୀସୁ ଜୀହୁଦି ଲକୁଡି କୁଟମି ଇଲୁଟି[†] ହରାନା ସିମନ ଇଜ ହାରେସି □ ସିମନ ପୟା ଗାଡି ନଫେରି ଆହାମାରେ, ଅଡେ ଏଝାରି ଇ କାତା ଜୀସୁଇଁ ଏଲେଇରେରି □

୩୯ ଏମ୍ବାଟିଏ ଏଝାସି ଏଦାନି ତାଗେ ନିଗାନା ନଫେରିତି ଦାକା ହୀତେସି, ଇଞ୍ଜା ଏଦାନାକି ନଫେରି ପିସ୍ତେ, ଏଦି ଏ ଦେବୁଣିଏ ନିଙ୍ଗାନା ଏଝାରି ସେବା କିତେ □

୪୦ ଝେଡା କୁଡ଼ହି ମାଚାଟି ଆମ୍ବାଆରି ତାଣା ଏନିଲେହେଡି ରଗ ମାରେ, ଏଲେତି ରଗ ଲକୁଣି ଜୀସୁ ତାଣା ତାତେରି, ଇଞ୍ଜା ତାନି ତାକାଣା କେୟୁ ଇଟାନା ବାରେଡି ନେହଁ କିତେସି □

୪୧ ଅଡେ ବୃତୁୟାଁ ଜିକେଏ କିରଡିହଁ ହାଡ଼େକା ଲକୁ ତାଣାଟି ଏଲେଇଞ୍ଜି ହରାହାରୁ, “ନୀନୁ ମାହାପୁରୁ ମୀରଏଶାତି □”

ଅଡେ ଜୀସୁ ଏ ବାରେଡି କାତା ଆହାଲି ହୀଆନା ଦାକା ହୀତେସି, ଇତିହଁ ଏଝାସି କ୍ରୀସୁ ଇଦାଆଁ ଏଝି ପୁଞ୍ଜାମାରୁ □

ଜୀସୁ ଜୀହୁଦି ଲକୁଡି କୁଟମି ଇଲୁତା ଝେକନାୟି

(ମାର୍କ ୧:୩୫-୩୯)

୪୨ ଲାଇ ଝେୟାଲିଏ ଏଝାସି ହରାନା ଲକୁ ହିଲାଆ ଚାୟୁତା ହାରେସି; ଅଡେ ଲକୁ ଏଝାଣାଇଁ ପାରି ପାରିହଁ ଏଝାଣି ତାଣା

[†] ୪:୩୮ ୪:୩୮ ସିନଗଗ

ଝାଡ଼େରି, ଅଡ଼େ ଏଝାସି ଏନିକ୍ ଏଝାରି ତାଣାଟି ହାଲଅସି, ଏଦାଆଁତାକି ଏଝାଣାଇଁ ମାଞ୍ଜାଲି ବାତିମାଲିତେସି □

୪୩ ସାମା ଏଝାସି ଏଝାରାଇଁ ଏଲେଇଚେସି, “ଏଟ୍‌କା ଗାଡ଼ାତା ଜିକେଏ ନାନୁ ମାହାପୁରୁ ରାଜିତି ନେହ୍ କାରୁ ଝେକ୍‌ନାୟି ମାନେ, ଇଚିହ୍ ଏଦାଆଁତାକି ନାନୁ ପାଣୁଝି ଆହାମାଇଁ □”

୪୪ ଇଞ୍ଜା ଏଝାସି ଜୀହୁଦା ଦେସାତି ଜୀହୁଦି ଲକୁତି କୁଟମି ଇଲକାଣା‡ ହାଜାନା ନେହ୍ କାରୁ ଝେକ୍‌ହେସି □



ଜୀସୁ ମୀଣ୍ଡକା ଆହ୍‌ନାରାଇଁ ହାଟିନାୟି

(ମାତି ୪:୧୮-୨୨; ମାର୍କ ୧:୧୭-୨୦)

୧ ✨ର ଦିନା ଜୀସୁ ଗେନେସର ବାନ୍ଦା ଗାରୁତା ନିଚାମାଚାଟି ହାରେକା ଲକୁ ମାହାପୁରୁତି କାତା ଝେଞ୍ଜାଲି ଏଝାଣି ସାରିପୁରୁ ରୁଣ୍ଡା ଆଡ଼େରି □

୨ ଇଞ୍ଜା ଏଝାସି ବାନ୍ଦା ଗାରୁତା ରୀ ତଂଗାୟି ମାନାଣି ମେସ୍‌ସେସି; ଏମ୍ବାଟି ମୀଣ୍ଡକା ଆହ୍‌ନାରି ଏମ୍ବାଟି ରେଚାନା ତାମି ଜାଲ୍‌ଲାଇଁ ନର୍‌ହି ମାଚେରି □

୩ ଏ ତଂଗ ବିତ୍ତାଟି ଏମିନାୟି ସିମନଝାୟି ମାଚେ, ଏ ତଂଗତା କୁଗାନା ଗାରୁଟିଏ ହିରେ ହେକ ହାଜାଲି ବାତିମାଲିତେସି; ଇଞ୍ଜା ଏଝାସି କୁଗାନା ଲକୁଣି ଜାପ୍‌ହେସି □

୪ ଏଝାସି ତାନି କାତା ରାପ୍‌ହାଲିଏ ସିମନଇଁ ଏଲେଇଚେସି, “ମୀଣ୍ଡକା ଆସାଲି କୁଡ଼ନି ଏୟୁଝାକି ହାଜାନା ମୀ ଜାଲ୍‌ଲାଇଁ ମେଡ଼ଦୁ □”

୫ ✨ଏମ୍ବାଟିଏ ସିମନ ଏଲେଇଚେସି, “ଏ ଗୁରୁ ମାମ୍ବୁ ଲୁଆଁ ଝେୟେ କସ୍ତୁ କିତିଝା ର ମୀନୁ ଜିକେଏ ବେଟାଆଆତମି; ସାମା ନୀ କାତା ଆସାନା ଜାଲ୍‌ଲା ମେଡ଼ଇଁ □”

୬ ✨ଇଞ୍ଜା ଏଝାରି ଜାଲ୍‌ଲା ମେଡ଼ହାଲିଏ ଏମ୍ବାଆଁ ଜାଲ୍‌ଲା ନେଞ୍ଜେ ମୀଣ୍ଡକା ହରୁ, ଇଞ୍ଜା ଏଝାରି ଜାଲ୍‌ଲା ତାମ୍ବାଲି ମାଟ୍‌ହେ □

‡ ୪:୪୪ ୪:୪୪ ସିନଗର୍ ✨ ୫:୧ ୫:୧ ମାତି ୧୩:୧,୨; ମାର୍କ ୩:୯,୧୦; ୪:୧ ✨ ୫:୫ ୫:୫ ଜହ ୨୧:୩ ✨ ୫:୭ ୫:୭ ଜହ ୨୧:୭

୭ ଏମ୍ବାଟିଏ ଏଝାରି ଆମିନି ତଡ଼ଗୁାଗାରି ଅର ତଂଗତା ମାଚେରି, ଏଝାରି ଏନିକିଁ ଝାହାନା ସାଢ଼େମି କିନେରି, ଏଦାଆଁତାକି ଏଝାରି ଏଝାରାଇଁ କେୟୁ ଜୀଞ୍ଜିତେରି, ଏମ୍ବାଟିଏ ଏଝାରି ଝାହାନା ରୀ ତଂଗଁଣା ମୀଶକା ନେଞ୍ଜି କିୟାଲିଏ ଏ ତଂଗାଁୟାଁ ମୁଞ୍ଜିମାରୁ □

୮ ସାମା ସିମନ ପିତର ଏଦାଆଁ ମେସାନା ଜୀସୁ କଡାଣା ରିହାନା ଏଲେଇଚେସି, “ଏ ପ୍ରବୁ ନା ତାଣାଟି ହାଜାତୁହ୍ମୁ ଏନାଆଁତାକି ଇଚିହ୍ମି ନାନୁ ପାପୁଗାଟି ମାଣସିତେଏଁ □”

୯ ଇଚିହ୍ମି ଏଝାରି ହାରେକା ମୀଶକା ଆସାମାଚାକି ତାନୁ ଅଡ଼େ ତାନିତଲେ ମାଚାରି କାବା ଆହାହାଚେରି;

୧୦ ଜେବଦିତି ରୀ ମୀରକା ଜାକୁବ ଅଡ଼େ ଜହନ, ଆମ୍ବାଆରି ସିମନ ଆଟ୍‌ହିତାରି ମାଚେରି, ଏଝାରି ଜିକେଏ କାବା ଆହାହାଚେରି □ ଅଡ଼େ ଜୀସୁ ସିମନଇଁ ଏଲେଇଚେସି, “ଆଜାଆନି ନୀଞ୍ଜୁଟିଏ ନୀନୁ ଲକୁଣି ଆହ୍‌ଦି □”

୧୧ ଏଚେଟିଏ ଏଝାରି ତଂଗାଁୟାଁ ଗାଟୁତା ତାଚାନା ଏମ୍ବାଆଁ ବାରେ ପିସାନା ଜୀସୁ ଜେଟ ହାଚେରି □

**କାଜା ରଗ ଗାଗାଣାଇଁ ନେହ୍‌କିନାୟି
(ମାତି ୮:୧-୪; ମାର୍କ ୧:୪୦-୪୫)**

୧୨ ଜୀସୁ ର ଗାଡ଼ାତା ମାଚାଟି ମେହ୍‌ଦୁ ଏମ୍ବାଆଁ ଗୁଡ଼ା ଆଜା କାଜା ରଗ ଗାଗାସି ମାଚେସି; ଏଝାସି ଜୀସୁଇଁ ମେସାନା ମୁନୁ କୁତାନା ଏଝାଣାଇଁ ଏଲେଇଚେସି, “ଏ ପ୍ରବୁ ନୀନୁ ମନ କିତିହ୍ମି ନାଜେ ନେହ୍‌ କିହାଲି ଆଡ଼ାଦି □”

୧୩ ଏଚେଟିଏ ଏଝାସି କେୟୁ ଦାସାହାଁ ତୀଗାନା ଏଲେଇଚେସି, “ନାନୁ ମନ କିହିମାଇଁ ନୀନୁ ନେହ୍‌ ଆମ୍ବୁ □” ଏ ଦେବୁଣିଏ କାଜା ରଗଟି ଏଝାସି ନେହ୍‌ ଆଚେସି □

୧୪ ଜୀସୁ ଏଝାଣାଇଁ ହୁକୁମି ହୀହାନା ଏଲେଇଚେସି, “ଆମ୍ବାଆରାଇଁ ଝେହ୍‌ଆନି, ସାମା ହାଜାନା ପୂଜେରାଜାଣି ତହ୍‌ମୁ, ଅଡ଼େ ମସାତି ମେରାଲେହ୍‌ ନୀନୁ ନେହ୍‌ ଆଡ଼ାଣି ସାକି ହୀହାଲି ପୂଜା ହୀମୁ □”

୧୫ ସାମା ଏଝାଣି କାତା ହାରେକା ଝେଙ୍ଗାହାରେ, ଅଡ଼େ ହାରେକା ଲକୁ ଝେଙ୍ଗାଲିତାକି ଅଡ଼େ ରଗଟି ନେହ୍ ଆହାଲିତାକି ରୁଣ୍ଡା ଆଡ଼େରି □

୧୬ ସାମା ଜୀସୁ ଲକୁ ହିଲାଆ ଟାୟୁତା ହାଜାନା ପ୍ରାଡାନା କିହିମାରେସି □

ଜୀସୁ ର ଟଟ ଝାୟିତାଣାକ୍ ନେହ୍ କିନାୟି
(ମାତି ୯:୧-୮; ମାର୍କ ୨:୧-୧୨)

୧୭ ର ଦିନା ଜାପୁହି ମାଟାଟି, ଗାଲିଲି ଦେସାତି ବାରେ ନାସକାଟି, ଜୀହୁଦା ଦେସା ଇଞ୍ଜା ଜିରୁସାଲମଟି ଝାହାମାନି ପାରୁସିୟା ଅଡ଼େ ମେରାପୁନାରି ଜୀସୁ ତାଣା କୁଗାମାରେରି, ଇଞ୍ଜା ଏଝାସି ଏନିକ୍ ନେହ୍ କିନେସି ଇଦାଆତାକି ପ୍ରବୁତି ନେହ୍ କିନି ବାଡ଼ୟୁ ଜୀସୁ ତାଣା ମାରେ □

୧୮ ଏଚରଜାଣା ଲକୁ ର ଟଟ ଝାୟିତାଣାକ୍ କାଟେଲିତା ଡେକା ତାତାନା ଜୀସୁ ନକିତା ବିତ୍ତା ଅହାଲି ଅଣ୍ପିତେରି □

୧୯ ସାମା ଏମ୍ପାଆଁ ହାରେକା ଲକୁ ମାଟାକି ଜିରୁ ବେଟାଆଆତେରି, ଇଞ୍ଜା ଏଝାରି ଇଲୁ ଡେପରିତା ଡେକା ଅହାନା ତୁଡ଼ିୟାତି ଟାୟିଲି ହୁକ୍‌ହାନା କାଟେଲି ତଲେ ଜୀସୁ ନକିତା ରେପ୍‌ହେରି □

୨୦ ଜୀସୁ ଏଝାରି ନାମ୍ ମେସାନା ଟଟ ଝାୟିତାଣାକ୍ ଏଲେଇରେସି, “ତଣେ ନୀ ପାପୁ ବାରେ ମେଶ୍‌ଜାମାନେ □”

୨୧ ଏରେଟିଏ ମେରା ଜାପୁନାରି ଅଡ଼େ ପାରୁସିୟା କାତା ଆହ୍ ଏଲେଇଶ୍‌ମି ଆଡ଼େରି, “ଇଝାସି ମାହାପୁରୁ ନିନ୍ଦା କିହିମାନେସି, ଇଝାସି ଆମ୍ପାଆସି! ମାହାପୁରୁ ପିସ୍‌ପେ ଅଡ଼େ ଆମ୍ପାଆସି ପାପୁ ମ୍ଲେକ୍‌ହାଲି ଆଡ଼ିମାନେସି □”

୨୨ ସାମା ଜୀସୁ ଏଝାରି କାତାବାର୍ତ୍ତା ଆହିମାନାଣି ପୁଞ୍ଜାନା ଏଝାରାକ୍ ଏଲେଇରେସି, “ମୀରୁ ମୀ ମନ୍‌ତା ଏନାଆତାକି ଏଲେକ୍ ଅଣ୍ପିମାଞ୍ଜେରି ?

୨୩ ଏନାଆଁ ଇନାୟି ଉସାସା ‘ନୀ ପାପୁ ବାରେ ମେଶ୍‌ଜାତେ ଇନାୟି କି ନିଜାମା ତାକାମ୍ ଇନାୟି ?’

୨୪ ଦାରତ୍ତିତା ପାପୁ ମ୍ଲୋକ୍‌ହାଲି ମାଣ୍ଡି ମୀରଏଣାକି ଅଦିକାରା ମାନେ, ଇଦାଆଁ ମୀରୁ ଏନିକି ପୁଞ୍ଜାଲି ଆଡ଼ିଦେରି” ଇଦାଆଁତାକି ଚଟ ଝାୟିତାଣାଇଁ ଏଲେଇଚେସି, “ନାନୁ ନିଙ୍ଗେ ଝେସିମାଞ୍ଜାଇଁ, ନିଙ୍ଗାନା ନୀ କାଟେଲି ଡେକାନା ନୀ ଇଜ ହାଲାମୁ □”

୨୫ ଏଚେଟିଏ ଏଞ୍ଜାସି ଏ ଦେବୁଣିଏ ଏଞ୍ଜାରି ନକିତା ନିଙ୍ଗାନା ଆମିନି କାଟେଲିତା ତୁରାମାଚେସି, ଏଦାଆଁ ଡେକାନା ମାହାପୁରୁଇଁ ଜହରା କିହୁଁ ତାମି ଇଜ ହାଚେସି □

୨୬ ଏଚେଟିଏ ବାରେଜାଣା କାବାଆହାନା ମାହାପୁରୁଇଁ ଜହରା କିଚେରି, ଅଡ଼େ ଆଜିତଲେ ଏଲେଇଚେରି, “ନୀଞ୍ଜୁ ମାମ୍ବୁ କାବାଆନି କାମା ମେସୁମି □”

ଜୀସୁ ଲେବିଇଁ ହାଟିନାୟି

(ମାତି ୯:୯-୧୩; ମାର୍କ ୨:୧୩-୧୭)

୨୭ ଏମ୍ବାଟିଏ ଜୀସୁ ପାଙ୍ଗାତା ହାଜାନା ଲେବି* ଦରୁଗାଟି ର ସିସୁ ରାହନାସି ସିସୁ ରାହନି ଚାୟୁତା କୁଗାମାନାଣି ମେସାନା ଏଞ୍ଜାଣାଇଁ ଏଲେଇଚେସି, “ନା ଜେଚ ଝାମୁ □”

୨୮ ଏମ୍ବାଟିଏ ଏଞ୍ଜାସି ବାରେ ପିସାନା ନିଙ୍ଗାନା ଏଞ୍ଜାଣି ଜେଚ ହାଚେସି □

୨୯ ଅଡ଼େ ଲେବି ତାମି ଇଜ ର କାଜା ବକ୍ତି କିଚେସି, ଇଞ୍ଜା ହାଚେକା ସିସୁ ରାହନାରି ଅଡ଼େ ଏଟକାଟି ଲକୁ ବାରେ ଏଞ୍ଜାରିତଲେ ତିଞ୍ଜାଲି କୁଗିଚେରି □

୩୦ ☆ଏଚେଟିଏ ପାରୁସିୟାଁ ଅଡ଼େ ଏଞ୍ଜାରି ଗଚିତି ମେରାପୁନାରି ତାମି ସୀସୁୟାଁଇଁ ଏଲେଇଚେରି, “ମୀରୁ ଏନାଆଁତାକି ସିସୁ ରାହନାରି ଅଡ଼େ ପାପୁ ଗାଟାରି ତଲେ ତିଞ୍ଜି ଉଣ୍ଡି ମାଞ୍ଜେରି ?”

୩୧ ଜୀସୁ ଏଞ୍ଜାରାଇଁ ଏଲେଇଚେସି, “ନେହୁଁ ମାନାରାକି ଅସଗୁରୁ ଲଡ଼ା ହିଲେଏ, ସାମା ରଗ ଗାଟାରାକି ଲଡ଼ାମାନେ □

୩୨ ନାନୁ ତାରିଗାଟାରାଇଁ ହାଟାଲି ଝାହାହିଲଅଁ, ସାମା ମନ ଝେଟପି କିହାଲି ପାପୁ ଗାଟାରାଇଁ ହାଟାଲି ଝାହାମାଇଁ □”

* ୫:୨୭ ୫:୨୭ ମାତିୟୁ ☆ ୫:୩୦ ୫:୩୦ ଲୁକ ୧୫:୧,୨

ଉପାସା କିନି କାତା ୱେନାୟି
(ମାତି ୯:୧୪-୧୭; ମାର୍କ ୨:୧୮-୨୨)

୩୩ ଏଚେକା ଲକୁ ଜୀସୁଇଁ ୱେଚେରି, “ଜହନତି ସୀସୁୟାଁ ଅଡ଼େ ପାରୁସିୟାଁତି ସୀସୁୟାଁ ଅଲେ ଅଲେ ଉପାସା ଅଡ଼େ ପ୍ରାତାନା କିହିମାନେରି, ସାମା ନୀ ସୀସୁୟାଁ ତିଞ୍ଜି ଉଣ୍ଡି ମାନେରି □”

୩୪ ଏମ୍ବାଟିଏ ଜୀସୁ ଏଞ୍ଜରାଇଁ ଏଲେଇଚେସି, “ବୀହା ଲକୁତଲେ ହନେଏସି ମାନି ପାତେକା ବୀହା ଲକୁ ଉପାସା ମାଞ୍ଜାଲି ଆଡ଼ିନେରି ?

୩୫ ସାମା ର ଦିନା ୱାନେ; ଏଞ୍ଜରି ତାଣାଟି ହନେଏସି ହାନେସି, ଏଚେଟିଏ ଏଞ୍ଜରି ଉପାସା କିନେରି □”

୩୬ ଇଞ୍ଜା ଏଞ୍ଜସି ର ପୁଣ୍ଡିକିନି କାତା ଜିକେଏ ୱେସେସି, “ଆମ୍ବାଆସି ପୁଞ୍ଜଇ ହିମ୍ବରିତା ପୁଞ୍ଜି ପାସକି ତାଚଅସି; ତାଡ଼ିଡ଼ିଞ୍ଜା ଏ ପୁଞ୍ଜି ପାସକି ଗେହନେ ଇଞ୍ଜା ପୁଞ୍ଜି ପାସକି ପୁଞ୍ଜଇ ପାସକି ତଲେ ଆଣ୍ଡେଏ □

୩୭ ଅଡ଼େ ଆମ୍ବାଆସି ପୁଞ୍ଜି ଅଜୁରି ରାସା ପୁଞ୍ଜଇ ତ:କାତା† ଇଚଅସି; ଇଚିତିହଁ ଅଜୁରି ରାସା ତ:କାତି ଅୟି କିହାନା ବହାହାନେ ଅଡ଼େ ତ:କା ଜିକେଏ ନସୁ ଆନେ,

୩୮ ସାମା ପୁଞ୍ଜି ଅଜୁରି ରାସା ପୁଞ୍ଜି ତ:କାତା ଇଚିନାୟି ମାନେ □

୩୯ ଆମ୍ବାଆରି ପୁଞ୍ଜଇ ଅଜୁରି ରାସା ଗସ୍ତି ତାୟୁ ପୁଞ୍ଜି ଅଜୁରି ରାସା ଗହଅଚେରି □ ପୁଞ୍ଜଆୟି ନେହେଁ ଇଞ୍ଜେରି □”



ଜମିନି ଦିନାତି ପ୍ରବୁ
(ମାତି ୧୨:୧-୮; ମାର୍କ ୨:୨୩-୨୮)

୧ ର ଜମିନି ଦିନା ଜୀସୁ ତାନି ସୀସୁୟାଁ ତଲେ ଗହଁ ଗୁଡ଼ିୟାଟି ହାଜିମାଚାଟି ସୀସୁୟାଁ ଗହଁ ଜେକା ତାପହାନା କେୟୁତଲେ ରାକ୍‌ହା ତିଞ୍ଜିମାଚେରି □

† ୫:୩୭ ୫:୩୭ ତଲୁ ତଲେ କେପିତି ଅଜୁରି ରାସା ଇଚିନି ବାସା ରୁପୁ

୨ ସାମା ପାରୁସିୟା ବିଦ୍ରାଠି ଏଚରଜାଣା ଏଲେଇରେସି, “ଜଫିନି ଦିନାତା ଏନାଆଁ କିନାୟି ଫେରା ହିଲେଏ ମୀରୁ ଏନାଆଁତାକି କିହିମାଞ୍ଜେରି □”

୩ ଜୀସୁ ଏଞ୍ଜାରାଇଁ ଏଲେଇରେସି, “ଦାଝୁଦ ଅଡ଼େ ତାନି ତଃଣେସିଙ୍ଗା ହାକିଟି ମାଚାଟି ଏନାଆଁ କିହାମାଚେରି, ଏଦାଆଁ ମୀରୁ ଏଚେଲା ପଡ଼ଝି ଆହାହିଲଅତେରି ?

୪ ଏଞ୍ଜାସି ମାହାପୁରୁ ଇଲୁତା ହଡାନା ଆମିନି ହେରପିଆହାମାନି ରୁଟି ପୁଜେରାଙ୍ଗା ପିସପେ ଆମ୍ବାଆରି ତିନି ଫେରା ହିଲାଆତେ ଏଦାଆଁ ତିରେସି ଇଞ୍ଜା ତାନି ତଃଣେସିଙ୍ଗାକି ଜିକେଏ ହୀତେସି □”

୫ ଅଡ଼େ ଏଞ୍ଜାସି ଏଞ୍ଜାରାଇଁ ଏଲେଇରେସି, “ମାଣ୍ଡସି ମୀରୁଏସି ଜଫିନି ଦିନାତି ପ୍ରବୁ ଆନେସି □”

**ୱାୟିତି କେୟୁ ଗାଟାଣାଇଁ ନେହୁଁ କିନାୟି
(ମାତି ୧୨:୯-୧୪; ମାର୍କ ୩:୧-୬)**

୬ ଏଞ୍ଜାସି ର ଜଫିନି ଦିନାତା ଜୀହୁଦି ଲକୁତି କୁଟମି ଇଲୁତା* ହାଜାନା ଜାପୁହି ମାଚେସି; ଏମ୍ବାଆଁ ରଅସି ମାଚେସି ଏଞ୍ଜାଣି ଟିଃନି କେୟୁ ୱାୟାହାଜାମାଚେ □

୭ ଅଡ଼େ ଏଞ୍ଜାସି ଜଫିନି ଦିନାତା ନେହୁଁ କିନେସିକି ଆଏ ଏଦାଆଁ ସିନିକିହାଲି ଫେରାପୁନାରି ଅଡ଼େ ପାରୁସିୟା କୁଗାନା ସିନିକିହିମାଚେରି, ଏନିକିଁ ଏଞ୍ଜାଣାଇଁ ଦହ ଆସାଲି ପାରୁ ବେଟାଆନେରି □

୮ ସାମା ଏଞ୍ଜାସି ଏଞ୍ଜାରି ହିୟାତି ଅଣ୍ପୁ ପୁଞ୍ଜାନା ଆମିନି ଲକୁତି କେୟୁ ୱାୟାହାଜାମାଚେ ଏଞ୍ଜାଣାଇଁ ଏଲେଇରେସି, “ନିଙ୍ଗାମୁ ମାଦି ନିମୁ □” ଏଚେଟିଏ ଏଞ୍ଜାସି ନିତେସି □

୯ ଏମ୍ବାଟିଏ ଜୀସୁ ଏଞ୍ଜାରାଇଁ ଏଲେଇରେସି, “ନାନୁ ମିଙ୍ଗେ ୱେଞ୍ଜିମାଞ୍ଜାଇଁ ଜଫିନି ଦିନାତା ଏନାଆଁ କିନାୟି ଫେରା ମାନେ ? ନେହୁଁ କିନାୟି କି ଲାଗେଏ କିନାୟି ? ଜୀଝୁତି ଗେଲ୍ପିନାୟି କି ନାସା କିନାୟି ?”

* ୭:୭ ୭:୭ ସିନଗଗ

୧୦ ଅଡ଼େ ଏଞ୍ଜାସି ସାରିଖାକି ଲକୁଣି ସିନିକିହାନା ଏଞ୍ଜାଣାଈ ଏଲେଇଚେସି, “ନୀ କେୟୁ ଦାହୁମୁ □” ଏମ୍ବାଟିଏ ଦା଼ସ୍ତସି, ଇଞ୍ଜା ଏଞ୍ଜାଣି କେୟୁ ନେହୁ ଆହାହାଚେ □

୧୧ ଏଦାଆଁ ମେସାନା ଏଞ୍ଜାରି କାରବି ଆହାହାଚେରି ଅଡ଼େ ଜୀସୁଇଁ ଏନିକିହାଲି ଆନେ ଇଞ୍ଜୁଁ ତାମ୍ବୁତାମ୍ବୁ କାତା ଆଡ଼େରି □

ଜୀସୁ ବାରଜାଣା ସୀସୁୟାଁଇଁ ଆଡ଼ିନାୟି

(ମାତି ୧୦:୧-୪; ମାର୍କ ୩:୧୩-୧୯)

୧୨ ଏଚିବେଲାତା ଏ ଦିନା ପ୍ରାତାନା କିହାଲି ହରୁ ଲାକ ହାଚେସି ଇଞ୍ଜା ଲାଆଁ ଝେୟେ ମାହାପୁରୁ ତାଣା ପ୍ରାତାନା କିଚେସି □

୧୩ ଲାଈ ଝେୟାଲିଏ ଏଞ୍ଜାସି ତାନି ସୀସୁୟାଁ ତାଗେ ହାତାନା ଏଞ୍ଜାରି ବିତ୍ରାଟି ବାରଜାଣାଟି ଆଡ଼ିଚେସି; ଇଞ୍ଜା ଏଞ୍ଜାରାଈଁ ପାଣୁଞ୍ଜି ଆଡ଼ାରି ଇଞ୍ଜୁଁ ଦରୁ ଇଚିଚେସି,

୧୪ ଏଞ୍ଜାରି ଆଡ଼େରି ସିମନ ଆମ୍ବାଆରାଈଁ ଏଞ୍ଜାସି ପିତର ଦରୁ ହୀଚେସି, ଅଡ଼େ ତାନି ତାୟି ଆୟିୟ, ଜାକୁବ ଅଡ଼େ ଜହନ, ପିଲିପ, ବାର୍ତ୍ତଲମି,

୧୫ ମାତିୟୁ ଅଡ଼େ ତମା, ଆଲେପି ମୀର୍ଏସି ଜାକୁବ ଅଡ଼େ ସିମନ, ଆମିନି ଗାଟାଣାଈଁ ତାନି ଦେସାତି ଜୀସୁ ନନାସି ଇନେରି,

୧୬ ଜାକୁବ ମୀର୍ଏସି ଜୀହୁଦା ଅଡ଼େ ଇସ୍ତାରିୟତ ଜୀହୁଦା, ଆମ୍ବାଆସି ଜୀସୁଇଁ ସାତୁ କେୟୁତା ହେରପିଚେସି □

ଜୀସୁତି ଜାପ୍ନାୟି ଅଡ଼େ ରଗଟି ନେହୁଁକିନାୟି

(ମାତି ୪:୨୩-୨୫)

୧୭ ଅଡ଼େ ଏଞ୍ଜାସି ଏଞ୍ଜାରିତଲେ ରେଟାଞ୍ଜାହାନା ନିମା ଗାଟି ଟାୟୁତା ନିଚେସି, ଇଞ୍ଜା ତାନି ହାରେକା ସୀସୁୟାଁ ଅଡ଼େ ବାରେ ଜୀହୁଦା ଦେସା ଜିରୁସାଲମ ଇଞ୍ଜା ସର ଅଡ଼େ ସିଦନ ଦାରିଟି ହାରେକା ଖାଡ଼େରି □

୧୮ ଏଞ୍ଜାରି ଜୀସୁତି କାତା ଝେଞ୍ଜାଲି ଅଡ଼େ ତାନି ରଗଟି ନେହୁଁ ଆହାଲି ଖାହାମାଚେରି, ଅଡ଼େ ଆମିନି ଗାଟାରି ବୁତୁୟାଁ ତାଣାଟି କସ୍ତ ବେଟାଆହି ମାଚେରି, ଏଞ୍ଜାରି ଜିକେଏ ନେହୁଁ ଆଡ଼େରି;

୧୯ ବାରେଜାଣା ଏଞ୍ଜାଣାଇଁ ଡାଗାଲି ମନ କିହିମାଚେରି, ଇଚିହିଁ ଏଞ୍ଜାଣି ତାଣାଟି ବାଡ଼ୟୁ ହତାନା ବାରେଜାଣାଟି ନେହିଁ କିହିମାଚେ
□

ଆମ୍ବାଆରି ନେହେଁ

(ମାତି ୫:୧-୧୨)

୨୦ ଏଚିବେଲତା ଜୀସୁ ତାନି ସୀସୁୟାଣି ସିନିକିହାନା ଏଲେଇଚେସି,

“ହିଲିଆଗାଟାଚେରି ମୀରୁ; ମିଙ୍ଗେ ନେହେଁ,

ଇଚିହିଁ ମାହାପୁରୁ ରାଜି ମୀଦିଏ □

୨୧ ନୀର୍ବ ହାକି ଗାଟାଚେରି ମୀରୁ; ମିଙ୍ଗେ ନେହେଁ,

ଇଚିହିଁ ମୀରୁ ଡାୟୁ ପାଞ୍ଜିଦେରି □

ନୀର୍ବ ଡାହିମାନାଚେରି ମୀରୁ; ମିଙ୍ଗେ ନେହେଁ,

ଇଚିହିଁ ମୀରୁ ଡାୟୁ କାକ୍‌ଦେରି □”

୨୨ ☆ “ଏଚେତା ଲକୁ ମିଙ୍ଗେ ଅପୁଅରି ଅଡେ ମାଣସି ମୀରୁଏଣା ତାକି ଏଟକା କିୟାନେରି, ଅଡେ ନିନ୍ଦା କିୟାନେରି ଇଞ୍ଜା ମୀ ଦରୁତି ଲାଗେଏତାୟି ଇଞ୍ଜିଁ ଅପୁଅରି, ଆତିହିଁ ମୀରୁ ନେହେଁ □

୨୩ ☆ ଏ ବେଲତା ରାହାତଲେ ଏନ୍ଦାଦୁ, ଏନିଇଚିହିଁ ଲାକପୁରୁ ମିଙ୍ଗେତାକି ହାଟେକା ଦାନା ମାନେ; ଅଡେ ଏଲେକିହିଁଏ ଏଞ୍ଜାରି ଆକୁ ଆବାୟା ମାହାପୁରୁ ଅଶ୍‌ପୁତି ବଲୁ ଝେହ୍‌ନାରାଇଁ କିହିମାଚେରି
□”

୨୪ “ସାମା ଆୟତା ତଣ୍ଡ ବେଟାଆନି ଦନ ଗାଟାଚେରି ମୀରୁ;

ମୀରୁ ମୀ ଅଶ୍‌ପିମାତି ସୁକୁ ବେଟା ଆହାମାଞ୍ଜେରି □

୨୫ ଆୟତା ତଣ୍ଡ ବେଟାଆନାଚେରି ନୀର୍ବ ପାଞ୍ଜାମାନାଚେରି ମୀରୁ;

ଇଚିହିଁ ଡାୟୁ ମୀରୁ ହାକି ଆଡେରି □

ଆୟତା ନୀର୍ବ କାକ୍‌ହି ମାନାଚେରି ମୀରୁ;

ଇଚିହିଁ ଡାୟୁ ମୀରୁ ଦୁକୁ ଆହାନା ଡାଦେରି □”

୨୭ “ଏଚିବେଲା ବାରେ ଲକୁ ମିଙ୍ଗେ ନେହ୍ନାତେରି ଇଞ୍ଜାନେରି, ଏଚିବେଲା ଆୟତା ଡଣ୍ଡ ବେଟା ଆନାତେରି; ଏଲେକିହିଁ ଏ ଏଞ୍ଜାରି ଆକୁ ଆବାୟା ମିଚି ବଲୁ ୱେହ୍ନାରାଇଁ କିହିମାଚେରି □”

ସାତୁୟାଁଇଁ ଜୀଞ୍ଜନନାୟି

(ମାତି ୫:୩୮-୪୮; ୭:୧୨)

୨୭ ସାମା ମୀରୁ ୱେଞ୍ଜିମାଞ୍ଜେରି, ନାନୁ ମିଙ୍ଗେ ୱେସିମାଞ୍ଜାଇଁ, ମୀ ସାତୁୟାଁଇଁ ଜୀଞ୍ଜନଦୁ; ଆମ୍ବାଆରି ମିଙ୍ଗେ ଅପଅରି ଏଞ୍ଜାରି ନେହ୍ନ କିଦୁ;

୨୮ ଆମ୍ବାଆରି ମିଙ୍ଗେ ବାକା ଇଟାନେରି, ଏଞ୍ଜାରାଇଁ ବର ହୀଦୁ; ଆମ୍ବାଆରି ମିଙ୍ଗେ ଲାଗେଏ କିହିଁ ଲେମ୍ବାନେରି ଏଞ୍ଜାରି କସମି ପ୍ରାତାନା କିଦୁ □

୨୯ ଆମ୍ବାଆସି ମିଙ୍ଗେ ର ଗେଏଲାତା ସାପୁଡ଼ା ୱେତାନେସି, ଏଞ୍ଜାଣାକି ଅର ଗେଏଲା ଜିକେଏ ଅଗାହୀଦୁ; ଇଞ୍ଜା ଆମ୍ବାଆସି ମୀ ହିମ୍ବୁରି ଅନେସି ଏଞ୍ଜାଣାଇଁ ମୀ ସକା ଜିକେଏ ଅହାଲି କାହିକିଆଦୁ □

୩୦ ଆମ୍ବାଆସି ମିଙ୍ଗେ ରୀସ୍ତାନେସି, ଏଞ୍ଜାଣାକି ହୀଦୁ; ଇଞ୍ଜା ଆମ୍ବାଆସି ଦନ ଅନେସି, ଏଞ୍ଜାଣାଇଁ ୱେଶ୍ଟେ ରୀହ୍ଆଦୁ □

୩୧ ☆ଲକୁ ମିଙ୍ଗେ ଏନିକିଁ ଲେମ୍ବାପେରି ଇଞ୍ଜା ଅଶ୍ପିମାଞ୍ଜେରି, ମୀରୁ ଜିକେଏ ଏଞ୍ଜାରାଇଁ ଏଲେକିହିଁ ଲେମ୍ବାଦୁ □

୩୨ ଇଞ୍ଜା ଆମ୍ବାଆରି ମିଙ୍ଗେ ଜୀଞ୍ଜୁ ନୟାନେରି, ଏଞ୍ଜାରାଇଁ ଜୀଞ୍ଜୁ ନଡିହିଁ ଏନି ବର ବେଟାଆଦେରି ? ଇଚିହିଁ ପାପୁ ଗାଟାରି ଜିକେଏ ତାମଙ୍ଗେ ଜୀଞ୍ଜୁ ନନାରାଇଁ ଜୀଞ୍ଜୁ ନନେରି □

୩୩ ଅଡେ ଆମ୍ବାଆରି ମିଙ୍ଗେତାକି ନେହ୍ନ କିୟାନେରି, ମୀରୁ ଏଞ୍ଜାରି ନେହ୍ନ କିଦେରି, ଆଡିହିଁ ମୀରୁ ଏନି ବର ବେଟାଆଦେରି ? ଇଚିହିଁ ପାପୁ ଗାଟାରି ଜିକେଏ ଏଲେକିନେରି □

୩୪ ଇଞ୍ଜା ଆମ୍ବାଆରି ତାଣାଟି ବେଟାଆହାଲି ଆସା ମାନେ, ଏଞ୍ଜାରାକି ରୀଣା ହୀଡିସାରେ ମୀରୁ ଏନି ବର ବେଟାଆଦେରି ? ପାପୁ ଗାଟାରି ଜିକେଏ ସମାନା ଲେକାତଲେ ବେଟାଆହାଲି ପାପୁ ଗାଟାରାକି ରୀଣା ହୀନେରି □

୩୫ ସାମା ମୀ ସାତୁୟାଣି ଜୀଝୁନଦୁ ଇଞ୍ଜା ଏଝାରି ନେହୁଁ କିଦୁ, ଝେଣ୍ଡେ ବେଟାଆହାଲି ଆସା କିଆନା ଉଦାରା ହୀଦୁ; ଆତିହୁଁ ମିଙ୍ଗେତାକି କାଜା ଦାନା ମାନେ, ଇଞ୍ଜା ମୀରୁ କାଜା ମାହାପୁରୁତି ମୀରକା ଆଡେରି, ଇତିହୁଁ ଏଝାସି ଜୀଝୁ ନଆଗାଟାରାଇଁ ଅଡେ ପାପୁ ଗାଟାରାଇଁ ଜିକେଏ ଜୀଝୁ ନନାସି □

୩୬ ମୀ ଲାକପୁରୁତି ଆବା ଏନିକିଁ କାର୍ମା ମେହନାସି ମୀରୁ ଜିକେଏ ଏଲେକିହୁଁ ଏ କାର୍ମା ମେହନାତେରି ଆଦୁ □

ଏଟକା ତାରାଇଁ ନୀହାୟି କିଆଦୁ
(ମାତି ୭:୧-୫)

୩୭ “ଅଡେ ନୀହାୟି କିଆଦୁ, ଆତିହୁଁ ମୀରୁ ମାହାପୁରୁ ତାଣା ନୀହାୟି କିଝି ଆଅତେରି; ଦହ ଦହଆଦୁ, ଆତିହୁଁ ମୀରୁ ମାହାପୁରୁ ତାଣା ଦହ ଗାଟାତେରି ଆଅତେରି; ଦହ ମ୍ଲେକ୍‌ଦୁ, ଆତିହୁଁ ମାହାପୁରୁ ମୀ ଦହ ଜିକେଏ ମ୍ଲେକ୍‌ହାନେସି;

୩୮ ହୀଦୁ ଆତିହୁଁ ମିଙ୍ଗେ ଜିକେଏ ହୀପକିଆନେ; ଲକୁ ମାଣାତି ନେଞ୍ଜିକିହାନା ଏଦାନି ନାବ୍‌ଗାନା ଦାକ୍‌ହାନା ତେଲି କିହାନା ମୀ ଅଟଡିତା ହିୟାନେରି; ଇତିହୁଁ ଆମିନି ମାଣାତଲେ ଲାଡିଦେରି, ମିଙ୍ଗେ ଜିକେଏ ଏ ମାଣା ତଲେଏ ଲାଟା ହିୟାନେରି □”

୩୯ ☆ଏଝାସି ଏଝାରାଇଁ ର ପୁଣ୍ଡିକିନି କାତା ଜିକେଏ ଏଲେଇଚେସି, “ର କାଣା ଅର କାଣାଇଁ ଜିରୁ ତସାଲି ଆଡିନେସିକି ? ଏଝାରି ରିଆରି ଜିକେଏ ରହେଏ ଗାଡ଼ୟୁତା ତରଗଅରି କି ?

୪୦ ☆ସୀସୁ ତାନି ଗୁରୁ କିହାଁ କାଜାସି ଆଏ; ସାମା ବାରେଜାଣା ସୀସୁୟା ନେହୁଁ କିଁ ଜାପାଲି ଆଡିସାରେ ତାନି ଗୁରୁ ସମାନା ଆନେରି □”

୪୧ ଅଡେ ଏନାଆଁତାକି ମୀ ତାୟି କାନୁତି ଲାଟା ସିନିକିହିମାଞ୍ଜି, ସାମା ନୀ କାନୁତା ଆମିନି କାଜା ଲାଟା ମାନାଣି ଏନାଆଁତାକି ଅଣ୍ଡି ହିଲଅତି ?

୪୨ ନୀନୁ ନୀ କାନୁତା ମାନି କାଜା ଲାଟା ଅଣ୍ଡିଆନା, ଏନିକିଁ ନୀ ତାୟିଇଁ ଏଲେଇଞ୍ଜାଲି ଆଡିଦି, ତାୟି ଝାମୁ ନୀ କାନୁତା ମାନି

☆ ୭:୩୯ ୭:୩୯ ମାତି ୧୫:୧୪ ☆ ୭:୪୦ ୭:୪୦ ମାତି ୧୦:୨୪,୨୫; ଜହ ୧୩:୧୬; ୧୫:୨୦

ଲାଟା ଡେଝାଇଁ, ଆଡ଼େ କୁଟୁ ଗାଟାତି ତଲିଏ ନୀ କାନୁତି କାଜା ଲାଟା ଡେଝା କତାମ୍, ଡାୟୁ ମୀ ତାୟି କାନୁତି ଲାଟା ନେହଁ କଁ ମେସାଲି ଆଡ଼ିଦି □

ମାର୍‌ନୁ ଅଡ଼େ ତାନି ପାଡ଼େୟି
(ମାତି ୭:୧୭-୨୦; ୧୨:୩୩-୩୫)

୪୩ “ଇଚିହଁ ଇଲେତି ଏନି ର ନେହଁ ମାର୍‌ନୁ ହିଲେଏ, ଏମିନାୟି ଲାଗେଏତି ପାଡ଼େୟି ଆୟିନେ, ଅରଝାକି ଇଲେତି ଏନି ମାର୍‌ନୁ ହିଲେଏ ଏମିନାୟି ନେହଁ ପାଡ଼େୟି ଆୟିନେ □

୪୪ ☆ଇଚିହଁ ବାରେ ମାର୍‌କାଣି ତାନି ପାଡ଼େୟି ତଲେ ପୁନାୟି; ହାପକା ମାର୍‌ନୁଟି ଲକୁ ତୟା ପାଡ଼େୟି ଏହଅରି, ଇଞ୍ଜା ହାପକା ବୃଟାଟି ଅକୁରି ପାଡ଼େୟି ଏହଅରି □

୪୫ ☆ନେହଁ ଲକୁ ନେହଁ ମନ ବିତ୍ରାଟି ନେହଁ କାତା ହପ୍‌ନେସି, ଇଞ୍ଜା ପଲୁଆ ଗାଟାସି ପଲୁଆ ମନ ବିତ୍ରାଟି ପଲୁଆ କାତା ହପ୍‌ନେସି; ଇଚିହଁ ହିୟା ବିତ୍ରା ମାନାଣି ଗୁତିଟି ଜଲିନେସି □

ରୀ ଇଲକା କେପିନାରି
(ମାତି ୭:୨୪-୨୭)

୪୬ ଅଡ଼େ ମୀରୁ ଏନାଆଁତାକି ନାଙ୍ଗେ ପ୍ରବୁ ପ୍ରବୁ ଇଞ୍ଜଁ ମାଞ୍ଜାଦେରି, ସାମା ନା କାତା ମାନଝି ଆହି ହିଲଅଡେରି ?

୪୭ ଆମ୍ବାଆସି ନା ତାଣା ଝାହାନା ନା କାତା ଝେଞ୍ଜାନା ବାରେ ମାନଝି ଆନେସି, ଏଝାସି ଏନିଲେହେଡାସି, ନାନୁ ମିଙ୍ଗେ ଝେସ୍ତାଇଁ □

୪୮ ଏଝାସି ଇଲେତି ର ଇଲୁ ଦହ୍‌ନିଲେହେତି ଲକୁ, ଏମିନିଗାଟାସି ଗାତି ଗାଡ଼ୟୁ କାରହାନା ପୁନାଦି ଝାଲକାତଲେ କାତି ନିପ୍‌ନେସି; କାଜା କାତା ଝାହାନା ଏ ଇଲୁତି ଗୁପିଡେ, ଝାଲକାତଲେ ଇଲୁ ଦସାମାଟାକି କାତା ଇଲୁତି ଦାକ୍‌ହାଲି ଆଡାଆଡେ □

୪୯ ସାମା ଆମ୍ବାଆସି ଝେଞ୍ଜାନା ମାନଝି ଆସି ଏଝାସି ଗାଡ଼ୟୁଟିଏ ପୁନାଦି କିଆନା ଇର୍‌ଆ ଲାକ ଇଲୁ କିହାମାନି ଲକୁ ଲେହେଡାସି; କାଜା କାତା ଝାହାନା ଇଲୁତି ଗୁପାଲିଏ ଦେବୁଣିଏ ଇଲୁ ରିହା ହାଡେ ଇଞ୍ଜା କୁଡ଼ପୁନାସା ଆହାହାଡେ □”



ଜୀସୁ ର ରମିୟ ହଲେଏଣାଇଁ ନେହୁଁ କିନାୟି
(ମାତି ୮:୫-୧୩)

୧ ଜୀସୁ ଲକୁ ନକିତା ବାରେ କାତା ଖେସାଲି ରାପ୍‌ହାଲିଏ କପରନାହୁମ ଗାଡ଼ାତା ହାଚେସି □

୨ ଏରିବେଲାତା ରଅସି ପାସାକଡ଼ି କସ୍‌କା ମୁହେଁ କାଜାଣା ହଲେଏସି ହାନିଲେହେଁ ନଟ୍‌ମରି ଆହାମାଚେସି; ଏ ହଲେଏଣାଇଁ ଏଝାସି ହାଚେକା ଜୀସୁ ନହୁଁ ମାଚେସି □

୩ ଏଝାସି ଜୀସୁ କାତା ଖେଞ୍ଜାନା, ଏଝାସି ଏନିକିଁ ଖାହାନା ତାନି ହଲେଏଣାଇଁ ନେହୁଁ କିନେସି, ଇଦାଆଁତାକି ଜୀହୁଦି ଲକୁଡି କାଜାରି ବିତ୍ରାଟି ଏଚରଜାଣାତି ଏଝାଣି ତାଣା ପାଣ୍ଡାନା ବାତିମାଲିଚେସି □

୪ ଏଝାରି ଜୀସୁ ତାଣା ଖାହାନା ହାଚେକା ବାତିମାଲିହୁଁ ଖେସ୍ତେରି, “ଏଝାସି ନୀ ତାଣାଟି ହାଚେକା ସାୟେମି ବେଟାଆହାଲି ପାଡ଼ା ଆନାସି;

୫ ଇଚିହୁଁ ଏଝାସି ମା ଜୀହୁଦି ଲକୁଣି ଜୀସୁ ନଚେସି ଅଡ଼େ ତାନୁଏ ମାଞ୍ଜେତାକି ଜୀହୁଦି ଲକୁଡି କୁଟମି ଇଲୁ* କିହାମାନେସି □”

୬ ଏମ୍ବାଟିଏ ଜୀସୁ ଏଝାରିତଲେ ହାଚେସି, ଏଝାସି କାଜାଣି ଇଲୁଟିଏ ହିରେ ହେକ ମାଚାଟିଏ, କସ୍‌କା ମୁହେଁ କାଜାସି ତାନି ତଚେସିକାଣି ଖେସା ପାଣ୍ଡିଚେସି, “ଏ ପ୍ରବୁ ନୀନୁ ଅଡ଼େ କସ୍ତୁ ପ୍ଲୁଃଆନିଦେ; ଇଚିହୁଁ ନୀନୁ ନା ଇଜ ପାଞ୍ଜୁଲି ଇଚିଦି ଇଲେକିଁ ପାଡ଼ାଆଆତାଚେସି;

୭ ଇଦାଆଁତାକି ନାନୁ ନୀ ତାଣା ଖାହାଲି ପାଡ଼ାଆଆଁ ଇଞ୍ଜୁଁ ଅଣ୍ପିଚେସି; ସାମା ନୀନୁ ର ପଦୁ ଖେସା ପାଣ୍ଡାମୁ ନା ହଲେଏସି ନେହୁଁ ଆଚେନସି □

୮ ଇଚିହୁଁ ନାନୁ ରଅଣି ତାଣା କାମା କିନି ମାଣ୍ଡସି ଆଡ଼ିହୁଁ ଜିକେଏ ନା ଅଦିକାରାତା ଅଡ଼େ କସ୍‌କା ମାନେରି; ଅଡ଼େ ନାନୁ ରଅଣାଇଁ ହାଲାମୁ ଇଚିହୁଁ ହାନେସି; ରଅଣାଇଁ ଖାମୁ ଇଚିହୁଁ

* ୭:୫ ୭:୫ ସିନଗଗ

ଓନେସି; ଇଞ୍ଜା ନା ହଲେଏଣାଇଁ ଇଦାଆଁ କିମ୍ପୁ ଇଚିହିଁ ଏଓସି କିନେସି □”

୯୮ ଜୀସୁ ଇ ବାରେ କାତା ଖେଞ୍ଜାନା କାବା ଆଡେସି, ଅଡେ ଜେଟ ଖାହିମାନି ଲକୁଓକି ସିନିକିହାନା ଏଲେଇଚେସି, “ନାନୁ ମିଙ୍ଗେ ଖେସିମାଞ୍ଜାଇଁ ଇସ୍ତାୟେଲ ଲକୁ ବିତ୍ରା ଜିକେଏ ନାନୁ ଇଲେତି ନାନୁ ମେସାହିଲଅଁ □”

୧୦ ଅଡେ ପାଣ୍ଡୁଓ ଆହାମାଟି ଲକୁ ଇଜ ଓହାନା ହଲେଏସି ନେହିଁ ଆହାମାନାଣି ମେସ୍ତେରି □

ରାଣ୍ଡେଣି ଇୟାନି ମାର୍‌ଏଣାଇଁ ଜୀସୁ ହାନାୟି

୧୧ ଏମ୍ବାଟିଏ ନାଇନ ଦରୁଗାଟି ଗାଡ଼ାତା ହାଚେସି, ତାନି ସୀସୁୟାଁ ଇଞ୍ଜା ହାଚେକା ଲକୁ ଏଓଣିତଲେ ହାଜିମାଚେରି □

୧୨ ଏଓସି ଗାଡ଼ାତି ଗଲିମୁଗାତା ଏଜାଲିଏ ଲକୁ ର ମାଡ଼ହାତି ପାଙ୍ଗାତା ଡେକା ତାଟି ମାଚେରି, ଏଓସି ତାମି ଇୟାନି ରଣ୍ଡିଏ ମାର୍‌ଏସି ମାଚେସି, ଇଞ୍ଜା ଏ ଇୟା ରାଣ୍ଡେଣି ମାଚେ; ଅଡେ ଗାଡ଼ାତି ହାଚେକା ଲକୁ ଏଦାନିତଲେ ମାଚେରି □

୧୩ ଏଦାନି ମେସାନା ଜୀସୁ ହାଚେକା କାର୍ମା ଅଣ୍‌ପାନା ଏଦାନି ଏଲେଇଚେସି, “ଡ଼ୀଆନି □”

୧୪ ଅଡେ ଏଓସି ଡାଗେ ହାଜାନା ଡେକାମାଟି ଚେଚେଣିତି ଡାଗିଚେସି, ଇଞ୍ଜା ଡେକା ଅହିମାଟି ଲକୁ ନିଚାଲିଏ ଜୀସୁ ଏଲେଇଚେସି, “ଆଡେ ଦାଂଗ୍‌ଶେଣାଁତି! ନାନୁ ଏଲେଇଞ୍ଜିମାଞ୍ଜାଇଁ ନିଙ୍ଗାମୁ □”

୧୫ ଏଚେଟିଏ ହାହାମାଟି ଦାଂଗ୍‌ଶେଏସି ନିଙ୍ଗାନା କୁଗିଚେସି ଇଞ୍ଜା ଜଲିଚେସି, ଇଞ୍ଜା ଏଓସି ତାମି ଇୟାନି କେୟୁତା ହେଚିଚେସି □

୧୬ ଏଚେଟିଏ ବାରେଜାଣା ଆଜିତାକି ମାହାପୁରୁଇଁ ଜହରା କିହିଁ ଏଲେଇଚେରି; “ମା ବିତ୍ରା ର ମାହାପୁରୁ ଅଣ୍‌ପୁତି ବକୁ ଖେହ୍‌ନାସି ହଚାମାନେସି, ଇଚିହିଁ ମାହାପୁରୁ ତାନି ଲକୁଣି କାର୍ମା ମେସାମାନେସି □”

୧୭ ଇଞ୍ଜା ଜୀସୁ କିତି ଇ କାତା ବାରେ ଜୀହୁଦା ଦେସାତା ଅଡେ ସାରିସୁଟୁ ମାନି ରାଜିତା ଖେଙ୍ଗାହାଚେ □

ବାପ୍ତିସ୍ମା[†] ହୀନ ଜହନତି କାରୁ ଝେହ୍ନାରି
(ମାତି ୧୧:୨-୧୯)

୧୮ ତାମ୍ଭୁ ବାପ୍ତିସ୍ମା[‡] ହୀନ ଜହନତି ସୀସୁୟାଁ ଇ ବାରେ କାତା ଏଞ୍ଜାଣାଇଁ ଝେସ୍ତେରି □

୧୯ ଏଚେଟିଏ ଜହନ ତାନି ରୀ ସୀସୁୟାଁଇଁ ତାଗେ ହାଟାନା ପ୍ରବୁ ତାଣା ଏଲେଇଞ୍ଜା ପାଣ୍ଡିତେସି, “ଆମ୍ବାଆସି ଖାନାୟି ମାଚେ, ନୀନୁଏ ଏଞ୍ଜାତିକି, ଆଆତ^୪ ମାମ୍ଭୁ ଅର ରଅଣାଇଁ କାଃଆନମି ?”

୨୦ ଏଞ୍ଜାରି ଜୀସୁ ତାଣା ଖାହାନା ଏଲେଇଚେରି, “ବାପ୍ତିସ୍ମା^୫ ହୀନ ଜହନ ମାଚେ ଏଲେଇଞ୍ଜା ପାଣ୍ଡିତେସି, ଆମ୍ବାଆସି ଖାନାୟି ମାଚେ ଏଞ୍ଜାତି ନୀନୁଏ କି ଆଆତ^୬ ମାମ୍ଭୁ ଅର ରଅଣାଇଁ କାଃଆନମି ?”

୨୧ ଏଚିବେଲା ଏଞ୍ଜାସି ହାରେକା ରଗ, କସ୍ତୁ ଅଡ଼େ ପଲୁଆ ବୁଡୁୟାଁ ତାଣାଟି ହାରେକା ଲକୁଣି ନେହ^୭ କିତେସି, ଇଞ୍ଜାଁ ହାରେକା କାଣ୍ଟକା ମେହ୍‌ଆଗାଟାରାଇଁ ମେହ୍‌ନି ବାଡ଼ୁୟୁ ହୀତେସି □

୨୨ ଏଞ୍ଜାସି ଏଞ୍ଜାରାଇଁ ଏଲେଇଚେସି, “ମୀରୁ ହାଜାନା ଏନା ଏନାଆଁ ମେସାମାଞ୍ଜେରି ଅଡ଼େ ଝେଞ୍ଜାମାଞ୍ଜେରି, ଏ ବାରେ ଜହନଇଁ ଝେହ୍‌ଦୁ; କାଣ୍ଟକା ମେହ୍‌ଆଗାଟାରି ମେସାଲି ଆଡ଼ିମାନେରି, ସଚାୟାଁ ତାକାଲି ଆଡ଼ିମାନେରି, କାଜା ରଗ ଗାଟାରି ନେହ^୮ ଆହିମାନେରି, ବେରାୟାଁ ଝେଞ୍ଜିମାନେରି, ହାଡ଼ାରି ନୀତିମାନେରି, ଅଡ଼େ ହିଲାଆ ଗାଟାରି ନେହ^୯ କାରୁ ଝେଞ୍ଜିମାନେରି;

୨୩ ନା ତାଣା ଆମ୍ବାଆରି ଆନାମାନା ଆଆନା ନାମାନେରି, ତାମଚେଏ ନେହେଁ □”

୨୪ ଜହନ ସୀସୁୟାଁ ହାଜାଲିଏ, ଜୀସୁ ଲକୁଣି ଜହନତି କାତା ଏଲେଇଚେସି, “ଏଚିବେଲା ବାଃଲି ବାଟାତା ମୀରୁ ହାଜାମାଚେରି, ଏମ୍ବାଆଁ ଏନାଆଁ ମେସାଲି କାଟାମାଚେରି ? ଏନାଆଁ ଗାଲି ତଲେ ଖାଲିମାନି ତାଣ୍ଡିତି ?

୨୫ ଏନାଆଁ ଆଆତିହ^{୧୦} ଏନାଆଁ ମେସାଲି ହାଜାମାଚେରି ? ନେହ^{୧୧} ଅଜିତି ପାଡ଼ାଡ଼ା ହିମ୍ବରି ହୁଟାମାନି ର ମାଣ୍ଟସିଇଁ ? ମେହ୍‌ଦୁ

† ୭:୧୭ ୭:୧୮ ମୁଞ୍ଜିନାୟି ‡ ୭:୧୮ ୭:୧୮ ମୁଞ୍ଜିନାୟି § ୭:୨୦ ୭:୨୦ ମୁଞ୍ଜିନାୟି

ଆମ୍ବାଆରି ନେହଁ ନେହଁ ହିମ୍ବରକା ହୁଚାନା ସୁକୁ ତଲେ ଡ଼ୟିନାରି ଏଞ୍ଜାରି ରାଜା ଗାଡ଼ାତା ଡ଼ୟିନେରି □

୨୭ ଏଦାଆଁ ଆଆତଁ ଏଦାଆଁ ମେସାଲି ହାଜାମାତେରି ? ଏଦାଆଁ ର ମାହାପୁରୁ ଅଣ୍ଟପୁତି ବଲୁ ଝେହ୍ନାଣାଇଁ ? ନାନୁ ମିଙ୍ଗେ ସାତା ଝେସିମାଞ୍ଜାଇଁ, ମାହାପୁରୁ ବଲୁ ଝେହ୍ନାରି କିହଁ କାଜାଣାଇଁ □

୨୭ ଆମ୍ବାଆରି କାତା ରାସ୍‌କି ଆହାମାନେ, ‘ହେଶୁ ନାନୁ ନା କାରୁ ଝେହ୍ନାଣାଇଁ ନୀ ନକିତା ପାଣ୍ଡିମାଞ୍ଜାଇଁ, ଏଞ୍ଜାସି ନୀ ନକିତା ଜିରୁ ଡ଼ୟାରା କିନେସି, ଏଞ୍ଜାସି ଏ ମାଣସି □’

୨୮ ନାନୁ ମିଙ୍ଗେ ସାତା ଝେସିମାଞ୍ଜାଇଁ ଇୟାନି ବାଣ୍ଡିଟି ଜାର୍ନା ଆହାମାନାରି ବିତ୍ତା ଜହନ ବାରେକିହଁ କାଜାସି; ଆଡ଼ିଜିକେଏ ମାହାପୁରୁ ରାଜିତା ଆମ୍ବାଆସି ଉଣା ଏଞ୍ଜାସି ଏଞ୍ଜାଣି କିହଁ କାଜାସି □”

୨୯ ✨ବାରେଜାଣା ଇ କାତା ଝେଞ୍ଜାନା, ସିସ୍ତୁ ରୁହ୍ନାରି ଜିକେଏ ଜହନ ତାଣାଟି ବାପ୍ତିସ୍ତା* ଅହାମାଚାକି ମାହାପୁରୁଇଁ ସାତା ଇଞ୍ଜାଁ ଇଚେରି;

୩୦ ସାମା ପାରୁସିୟାଁ ଅଡ଼େ ମେରାପୁନାରି ଏଞ୍ଜାଣି ତାଣାଟି ବାପ୍ତିସ୍ତା† ପ୍ଲାଃଆନାହଁ ତାମ୍‌ଙ୍ଗେ ତାକି ମାହାପୁରୁ ଅଣ୍ଟପିମାଚାଣି କୂତେରି □

୩୧ “ଇ କାଲ୍‌ମାତି ଲକୁଣି ଆମ୍ବାଆରି ତଲେ ତୁକ୍‌ଇଁ, ଇଞ୍ଜାଁ ଏଞ୍ଜାରି ଆମ୍ବାଆରି ଲେହେଁ ?

୩୨ ଏମିନି କକାରି ହାଟା ବାଜାରାତା କୁଗାନା ତାମ୍‌ ଏଲେଇଣ୍ଡି ଆନେରି, ‘ମାମ୍‌ ମୁଙ୍ଗିତାକି ପୀରୁଡ଼ି ଉକିତମି, ମୀରୁ ଏଦାଆତେରି; ମାମ୍‌ ଦୁକୁତଲେ ଡ଼ୀତମି ମୀରୁ ଡ଼ୀଆତେରି □’ ଏଞ୍ଜାରି ଇଲେତାରି ଇଞ୍ଜାଁ ଜୀସୁ ଝେସେସି □

୩୩ ଇଚିହଁ ବାପ୍ତିସ୍ତା‡ ହୀନି ଜହନ ଝାହାନା ରାନ୍ଦା ତିନାଆତେସି କି ଅଙ୍ଗୁରି ରାସା ଗହ୍‌ଆତେସି, ଅଡ଼େ ମୀରୁ ଏଲେଇଚେରି, ‘ଏଞ୍ଜାଣାଇଁ ବୃତୁ ଆଲ୍‌ଗାମାଚେ □’

୩୪ ମାଣସି ମୀରୁଏସି ଝାହାନା ରାନ୍ଦା ତିରେସି ଉଚେସି, ଅଡ଼େ ମୀରୁ ଏଲେ ଇଞ୍ଜାମାଞ୍ଜେରି, ‘ମେହ୍‌ଦୁ ଇଞ୍ଜାସି ଚିଣ୍ଡିକାଞ୍ଜୁ, କାଡ଼ବୁତୁ, ସିସ୍ତୁ

✨ ୭:୨୯ ୭:୨୯ ମାତି ୨୧:୩୨; ଲୁକ ୩:୧୨ * ୭:୨୯ ୭:୨୯ ମୁଞ୍ଜନାୟି † ୭:୩୦ ୭:୩୦ ମୁଞ୍ଜନାୟି ‡ ୭:୩୩ ୭:୩୩ ମୁଞ୍ଜନାୟି

ରୀହନାରି ଅଡ଼େ ପାପୁ ଗାଟାରି ତଢ଼େଏସି □’

୩୫ ମାହାପୁରୁତି ବୁଦି ତାନି ବାରେ ମୀରକା ତାଣାଟି ସାତା ଇଞ୍ଜି
ତଞ୍ଜାଆନ୍ନେ □”

ପାରୁସି ସିମନ ଇଜ ଜୀସୁ ହାନାୟି

୩୬ ଅଡ଼େ ପାରୁସିୟାଁ ବିତ୍ରାଟି ରଅସି ଜୀସୁଇଁ ତାନି ଇଜ ତିଞ୍ଜାଲି
ଏଲେଇଚେସି, ଏମ୍ବାଟିଏ ଜୀସୁ ଏ ପାରୁସି ଇଜ ହଡ଼ାନା ରାନ୍ଦା ତିଞ୍ଜାଲି
କୁଗିଚେସି □

୩୭ ☆ ମେହୁ ଏ ଗାଡ଼ାତା ପାପୁଗାଟି ର ଇୟା ମାଚେ; ଜୀସୁ
ପାରୁସିୟାଁ ଇଜ ତିଞ୍ଜାଲି କୁଗାମାନେସି ଇଞ୍ଜି ପୁଞ୍ଜାନା ଏଦି ର
ଗାକୁତା ଗାନ୍ଦାଗାଟି ନିୟୁଁ ତାଚାନା,

୩୮ ତାୟୁଞ୍ଜାକି ଜୀସୁ କଡ଼ାୟାଦାରି ନିଚାନା ଡ଼ାହି ଡ଼ାହି କାଣ୍ଡୁ
ବକ୍ତହାନା ଏଞ୍ଜାଣି ପାଃଆନାୟାଁ ଉଦି କିହାନା ତାନି ତାୟୁଁ ରାଣାୟାଁ
ତଲେ ଜୀସୁ ପାଃଆନାୟାଁ ଜେଜିହଁ ଏଞ୍ଜାଣି ପାଃଆନାୟାଁ ନଶ୍ଚିତେ
ଅଡ଼େ ଗାନ୍ଦା ନିୟୁଁ ରୁବିତେ □

୩୯ ଏଦାଆଁ ମେସାନା ଆମିନି ପାରୁସି ହାଟାମାଚେସି, ଏଞ୍ଜାସି ମନ
ମନତା ଅଣପିଚେସି, “ଇଞ୍ଜାସି ମାହାପୁରୁ ଅଣ୍ପୁତି ବଳୁ ଖେହ୍ନାସି
ଆହାମାଟିହଁ ମା, ତାଙ୍ଗେ ଡାଗିମାନି ଇୟାଟି ଏନିଲେହେତାୟି
ପୁଚେସିମା, ଇଚିହଁ ଏଦି ପାପୁ ଗାଟାୟି □”

୪୦ ଜୀସୁ ଏଞ୍ଜାଣାଇଁ ଏଲେଇଚେସି, “ଆଡ଼େ ସିମନ ନାନୁ ନିଙ୍ଗେ
ର କାତା ଖେସ୍ତାନାୟିମାନେ □”

ଏଞ୍ଜାସି ଏଲେଇଚେସି, “ହାଅ ପ୍ରବୁ ଖେସ୍ତାମୁ □”

୪୧ “ର ସାଞ୍ଜୁକାରି ତାଣା ରିଆରି ରୀଣାଗାଟାରି ମାଚେରି; ରଅସି
ପାସାଞ୍ଜା ଅଡ଼େ ରଅସି ରୀ କଡ଼ି ଦସଟାକା ରୀଣା ଗାଟାସି □

୪୨ ଏଞ୍ଜାରି ରୀଣା ତିକ୍ତାଲି ଆଡ଼ାଆଲିଏ, ଏଞ୍ଜାରି ସାଞ୍ଜୁକାରି
ରିଆରି ରୀଣାଟି ଜିକେଏ ପିସାତୁସେସି □ ଇଞ୍ଜା ଏଞ୍ଜାରି ବିତ୍ରାଟି
ଆମ୍ବାଆସି ଏଞ୍ଜାଣାଇଁ ହାରେକା ଜୀସୁ ନଚେସି ?”

୪୩ ସିମନ ଏଲେଇଚେସି, “ନା ଅଣ୍ପୁତା ଆମ୍ବାଆରାକି ଗାଡ଼ି ରୀଣା
ପିସ୍ପିଆଡ଼େ ଏଞ୍ଜାସି □”

☆ ୭:୩୬ ୭:୩୭ ମାତି ୨୭:୭; ମାର୍କ ୧୪:୩; ଜହ ୧୨:୩

ଜୀସୁ ଏଲେଇରେସି, “ନୀନୁ ନେହୁଁ ଅଣ୍ଠପାମାଞ୍ଜି □”

୪୪ ଅଡ଼େ ଏଝାସି ଏ ଇୟାନିଝାକି ସିନିକିହାନା ସିମନଇଁ ଏଲେଇରେସି, “ଇ ଇୟାନି ମେସିମାଞ୍ଜି ? ନୀନୁ ମୀ ଇଜ ଝାଡ଼େସୁଁ, ନା କଡ଼ାୟାଁ ତାକି ଏୟୁ ହିୟାଆତି, ସାମା କାଣ୍ଡୁତୁଲେ ନା ପାଃଆନାୟାଁ ଉଦି କିହାନା ତାନି ତାୟୁଁ ରୁଣାୟାଁ ତଲେ ଜେଜାଡ଼େ □

୪୫ ନୀନୁ ନାଜେ ନଣ୍ଡାଆତି ? ସାମା ନୀନୁ ବିତ୍ରା ଝାଝିନିଏ ନା ପାଃଆନାୟାଁ ନଣ୍ଡାଲି ପିସିମାଞ୍ଜେଏ □

୪୬ ନୀନୁ ନା ତାୟୁଁ ତୁ ନିୟୁଁ ରୁବାଆତି ? ସାମା ଇଦି ନା ପାଃଆନାଣାଁ ଗାନ୍ଦା ନିୟୁଁ ରୁବାଡ଼େ □

୪୭ ଇଦାଆଁତାକି ନୀନୁ ନିଜା ଝେସିମାଞ୍ଜାଇଁ, ଇଦାନି ହାରେକା ପାପୁ ମେଣ୍ଠାମାନେ ଏଦାଣିତାକି ଏଦି ହାରେକା ଜୀଝୁନହୁଁ ମାଞ୍ଜାନେ; ସାମା ଆମ୍ବାଆରାକି ଉଣା ପାପୁ ମେଣ୍ଠାମାନେ ଏଝାସି ଉଣା ଜୀଝୁ ନନେସି □”

୪୮ ଅଡ଼େ ଜୀସୁ ଏ ଇୟାନି ଏଲେଇରେସି, “ନୀ ପାପୁ ବାରେ ମେଣ୍ଠାମାନେ □”

୪୯ ଏମ୍ବାଟିଏ ଏଝାଣିତଲେ ତିଞ୍ଜାଲି କୁଗାମାଚାରି ମନ ମନତା ଏଲେଇରେସି, “ପାପୁ ଜିକେଏ ମେଣ୍ଠା କିହିମାନେସି ଇଝାସି ଆମ୍ବାଆସି ?”

୫୦ ସାମା ଜୀସୁ ଏ ଇୟାନି ଏଲେଇରେସି, “ନୀ ନୀନୁ ନିଜେ ଗେଲ୍‌ପାମାଞ୍ଜାନେ; ହିଡ଼ି ତଲେ ହାଲାମୁ □”

୮

ଜୀସୁତଲେ ଡ଼ୟିନି ଇୟାସିକା

୧ ଏଚରଦିନା ତାୟୁ ଜୀସୁ ଗାଡ଼ାତାକି ଗାଡ଼ା ନାୟୁଁ ତାକି ନାୟୁଁ ରେଜିହୁଁ ମାହାପୁରୁ ରାଜିତି ନେହୁଁ କାରୁ ଝେକ୍‌ହେସି, ଅଡ଼େ ବାଉଜାଣା ସୀସୁୟାଁ ଏଝାଣିତଲେ ମାଚେରି,

୨ ଅଡ଼େ ଏନିନିଗାଟି ଇୟାସିକା ପଲ୍‌ଆ ବୁଡୁୟାଁ ତାଣାଟି ରଗଟି ନେହୁଁ କିଝି ଆହାମାରୁ, ଇଚିହୁଁ ମଗ୍‌ଦଲିନି ମରିୟମ, ଆମ୍ବାଆରି ତାଣାଟି ସାଡ଼ାଗାଟା ବୁଡୁୟାଁ ହଡ଼ାହାଜାମାରୁ,

୩ ହେଉଏ ଇଜିପ୍ଟ ଗୁମୁସ୍ତା କୁଜା ଅଡ଼େ ତାନି ଡକ୍ରି ଜହାନା, ସଫାନା ଅଡ଼େ ହାରେକା ଇୟାସିକା ଏଝାଣିତଲେ ମାଞ୍ଜାନା ତାନି ଦନ୍ ହୀହାନା ଏଝାରି ସେବା କିହିମାରୁ □

ବିଚା ମାଟିନି ପୁଣ୍ଠିକିନି କାତା
(ମାତି ୧୩:୧-୧୯; ମାର୍କ ୪:୧-୯)

୪ ଲକୁ ବାରେ ଗାଡ଼ାୟାତି ଝାହିମାତାକି ହାରେକା ଲକୁ ଏଝାଣି ତାଣା ରୁଣ୍ଡା ଆଡ଼େରି ଇଞ୍ଜା ଏଝାସି ଏଝାରାଇଁ ପୁଣ୍ଠିକିନି କାତାତଲେ ଝେସ୍ତେସି □

୫ “ରଅସି ବିଚା ମାଟିନାସି ବିଚା ମାଟାଲି ହଡ଼େସି □ ଏଝାସି ମାଟି ମାଟିହିଁ କଚେକା ବିଚା ଜିରୁତା ରୀତେ ଏଦାଆଁ ଲକୁ ଝିସାତୁସ୍ତେରି, ଅଡ଼େ ହାଗୁ ଲାକ ଡ଼ମ୍ପିନି ପଟା କାଟି ପେର୍ହା ତିରୁ □

୬ ଅଡ଼େ କଚେକା ଝାଲୁକା ଲାକ ରୀତେ, ଇଞ୍ଜା ନେୟାନା ବୁଫି ଅଲୁ ହିଲାଆତାକି ଝାୟାହାଚେ □

୭ ଅଡ଼େ କଚେକା ହାପୁକା ବୁଟାତା ରୀତେ, ଇଞ୍ଜା ହାପୁକା ବୁଟା ପାତାଆହାନା ଆନା ତାକିତି ପୁକହାତୁସ୍ତେ □

୮ ଅଡ଼େ କଚେକା ବିଚା ନେହିଁ ବୁଫିତା ରୀତେ, ଇଞ୍ଜା ପାତାଆହାନା ପାସାକଡ଼ି ପାଡ଼େୟି ଆୟିତେ □” ଏଚେଟିଏ ଜୀସୁ କାଜା ଗିୟାତଲେ ଏଲେଇଚେସି, “ଆମ୍ବାଆରାକି ଝେଞ୍ଜାଲି କୀକା ମାନୁ ଏଝାରି ଝେଣ୍ଠାରି □”

ପୁଣ୍ଠିକିନି କାତାତି ଅଣ୍ଠୁ
(ମାତି ୧୩:୧୦-୧୭; ମାର୍କ ୪:୧୦-୧୭)

୯ ତାନି ସୀସୁୟା ଇ ପୁଣ୍ଠିକିନି କାତାତି ଅର୍ତ୍ତ ଏନାୟି ଇଞ୍ଜାଁ ଝେଚେରି,

୧୦ ଏଝାସି ଏଲେଇଚେସି, “ମାହାପୁରୁ ରାଜିତି କାତା ପୁଞ୍ଜାଲି ମିଙ୍ଗେ ବାଡ଼ୟୁ ହାପୁକି ଆହାମାନେ, ସାମା ଏଟକା ତାରାଇଁ ପୁଣ୍ଠିକିନି କାତାତଲେ ଝେସ୍ତପିଆନେ, ଇଚିହିଁ ଏଝାରି ମେସି ମେସିହିଁ ମେହ୍‌ଅରି ଅଡ଼େ ଝେଞ୍ଜିଝେଞ୍ଜି ତେଲ୍‌ହଅରି □”

ଜୀସୁ ବିଚା ମାଟିନି କାତାତି ପୁଣ୍ଠିକିନାୟି

(ମାତି ୧୩:୧୮-୨୩; ମାର୍କ ୪:୧୩-୨୦)

୧୧ ପୁଣ୍ଠିକିନି କାତା ଅର୍ତ୍ତ ଇଦି, ବିଚା ମାହାପୁରୁ ବଲୁ,

୧୨ ଜିରୁ ଦାରିତି ପାଡ଼େୟି ଇଲେତାରି, ଏଞ୍ଜାରି ମାହାପୁରୁ କାତା ଖେନେରି; ତାୟୁ ସୟତାନ ଖାହାନା ଏଞ୍ଜାରି ଏନିକ୍ ନାମାଆପେରିଖା ଅଡ଼େ ଗେଲ୍ପି ଆଆପେରିଖା ଇଞ୍ଜି ଏଞ୍ଜାରି ହିୟାତା ଖେଞ୍ଜାମାନାଣି ମୀଞ୍ଜାଅନେ ।

୧୩ ଖାଲ୍‌କା ବୁମିତା ରିତି ଲକୁ ଇଲେତାରି, ଏଞ୍ଜାରି କାତା ଖେଞ୍ଜାନା ରାହାଟି ଆହନେରି; ଏଞ୍ଜାରିତାଣା ହୀରୁ ଜୀଆତାକି ଗାଡ଼େକା ତାକି ନାମିନେରି, ଅଡ଼େ ତାୟିପାରି କିନାୟି ଖାଡ଼ିସାରେ ମାହାପୁରୁଇଁ ପିସା ତୁହନେରି ।

୧୪ ଅଡ଼େ ହାପ୍‌କା ବୁଗାତା ରିତି ଲକୁ ଇଲେତାରି ଆମିନି ଗାଗାରି ମାହାପୁରୁ କାତା ଖେଞ୍ଜାନା ଦାରତିତି ଦୁକୁ କାକୁଲି, ଦନତି ଜୁପ୍‌କା ଅଡ଼େ ଦାରତିତି ରାହା ଏଞ୍ଜାରାଇଁ ପ୍ଟିକ୍‌ହାତୁସାମାନାକି ନେହ୍ କି କାମ୍‌ଲି ଆଡ଼ଅରି ।

୧୫ ନେହ୍ ବୁମିତା ରିତି ପାଡ଼େୟି ଇଲେତାରି, ଏମିନିଗାଗାରି ନେହ୍ ସୁଦୁଜୀଞ୍ଜୁ ହିୟାଟି କାତା ଖେଞ୍ଜାନା ଆହନେରି, ଅଡ଼େ ବାରେ ଅରହାନା କାମା କିହାନା ପାଡ଼େୟି ଆୟିନେରି ।

ମାଣା ପ୍ଟିକ୍‌ହି ଦୀଞ୍ଜି

(ମାର୍କ ୪:୨୧-୨୫)

୧୬ *ଦୀଞ୍ଜି ତୀସାନା ଆମ୍‌ଆରି ମାଣା ପ୍ଟିକ୍‌ହାନା କି କାଟେଲି ତୁଇକା ଇଟଅରି, ସାମା ଦୀଞ୍ଜି ସତ୍‌ତା ଇଟିନେରି, ଏନିକ୍ ଇଜଞ୍ଜାନି ଲକୁ ଉଜେଡ଼ି ମେହନେରି ।

୧୭ *ତୁଗୁମାନାୟି ଏନାୟିଖା ହିଲେଏ, ଏନାୟି ତଞ୍ଜା ଆଏ ଇଲେକ୍ ଏନାୟି ଜିକେଏ ହିଲେଏ, ଖେସ୍‌ପି ଆହାନା ତଞ୍ଜା ଆଏ ଇଲେତି ତୁଗୁମାନାୟି ଏନାୟି ହିଲେଏ ।

୧୮ ଏନିକ୍ ଖେଞ୍ଜାମାଞ୍ଜେରି ଏଦାଆଁତାକି ଜାଗ୍ରାତା; ଇତିହ୍ ଆମ୍‌ଆରାଞ୍ଜାୟି ମାନେ ଏଞ୍ଜାଣାକି ହୀପ୍‌କିଆନେ,

☆ ୮:୧୭ ୮:୧୭ ମାତି ୫:୧୫; ଲୁକ ୧୧:୩୩ ☆ ୮:୧୭ ୮:୧୭ ମାତି ୧୦:୨୬; ଲୁକ ୧୨:୨

ଅଡ଼େ ଆମ୍ବାଆରାଝାୟି ହିଲେଏ ଏଝାସି ନାଦି ମାନେ ଇଞ୍ଜି
ଅଣ୍ଠିମାନେସି, ଏଦାଆଁ ଜିକେଏ ଅଝିଆନେ □

ଜୀସୁତି ଇୟା ଅଡ଼େ ତାୟିୟାଁ

(ମାତି ୧୨:୪୭-୫୦; ମାର୍କ ୩:୩୧-୩୫)

୧୯ ଜୀସୁତି ଇୟା ଅଡ଼େ ତାମି ତାୟିୟାଁ ଏଝାଣି ତାଣା ଝାଡ଼େରି,
ସାମା ଲକୁ ମାନ୍ଦା ମାଚାକି ଏଝାଣି ତାଣା ହାଜାଲି ଆଡ଼ାଆଡ଼େରି □

୨୦ ଏମ୍ବାଟିଏ ଜୀସୁଇଁ ଝେସ୍ତେରି, “ମୀ ଇୟା ଅଡ଼େ ମୀ ତାୟିୟାଁ
ନିଞ୍ଜେ ମେସାଲି ପାଙ୍ଗାତା ନିଚାମାନେରି □”

୨୧ ସାମା ଏଝାସି ବାରେତି ଏଲେଇଚେସି, “ମାୟା ଅଡ଼େ ମା
ତାୟିୟାଁ ଏଝାରି, ଆମ୍ବାଆରି ମାହାପୁରୁତି କାତା ଝେନେରି ଅଡ଼େ
ମାନଝି ଆନେରି □”

ଜୀସୁ କାଜା ଗାଲିତି ସାପି କିନାୟି

(ମାତି ୮:୨୩-୨୭; ମାର୍କ ୪:୩୫-୪୧)

୨୨ ର ଦିନା ଜୀସୁ ଅଡ଼େ ତାନି ସୀସୁୟାଁ ତଂଗତା କୁରିଚେରି, ଇଞ୍ଜା
ଜୀସୁ ଏଝାରାଇଁ ଏଲେଇଚେସି, “ଝାଦୁ ମାର ସାମଦୁରି ଆତାଲା ହାନ
□” ଏମ୍ବାଟିଏ ଏଝାରି ତଂଗଟି ହାଚେରି □

୨୩ ସାମା ଏଝାରି ତଂଗତା ହାଜିମାନି ବେଲାତା ଜୀସୁ ତୁରିଚେସି
□ ଏଚିବେଲା ସାମଦୁରିତା କାଜା ଗାଲି ଆଡ଼େ, ଅଡ଼େ ଏୟୁ ତଂଗତା
ହଡ଼ିମାଚାକି ଏଝାରି ହାରେକା କସ୍ତୁ ଆଡ଼େରି ଇଞ୍ଜା ଆଜିଚେରି □

୨୪ ଏଚେଟିଏ ସୀସୁୟାଁ ତାଗେ ଝାହାନା ନିକହାଁ ଏଲେଇଚେରି, “ଏ
ଗୁରୁ ଏ ଗୁରୁ ମାର ହାହିମାନାୟି □” ଏମ୍ବାଟିଏ ଏଝାସି ନିଙ୍ଗାନା କାଜା
ଗାଲିତି ଦାକା ହାଚେସି, ଇଞ୍ଜା ଏ ବାରେ ସାପି ଆହାନା ସୂସ୍ତି ଆଡ଼େ
□

୨୫ ଇଞ୍ଜା ଏଝାସି ଏଝାରାଇଁ ଏଲେଇଚେସି, “ମୀ ନାମୁ ଆମ୍ବିୟା ?”
ସାମା ଏଝାରି ଆଜି ଅଡ଼େ କାବାଆହାନା ତାମ୍ବୁ ଏଲେଇଚ୍ଠି ଆଡ଼େରି,
“ଇଝାସି ଏନିଲେହେଁତାସି ଇଚିହଁ ଗାଲି ଅଡ଼େ ଝାଡ଼ିମାନି ଏୟୁଣି
ଜିକେଏ ହୁକୁମି ହାହିମାନେସି □”

ବୁତୁୟାଁ ଆଲଗା ମାଚାଣାଇଁ ଜୀସୁ ନେହଁକିନାୟି

(ମାତି ୮:୨୮-୩୪; ମାର୍କ ୫:୧-୨୦)

୨୭ ତାମ୍ଭୁ ଏଞ୍ଜାରି ଗାଲିଲି ନକିତି ଆତାଲାଞ୍ଜାକି ଗରାସିୟ ଡେସାତା ଏତେରି □

୨୭ ଜୀସୁ ଡଂଗଟି ରେଚାନା ଗାରୁତା ଖାହାଲିଏ, ଏ ଗାଡ଼ାତି ର ବୁତୁ ଆଲଗା ମାଚାସି ଖାହାନା ଏଞ୍ଜାଣାଇଁ ବେଟାଆଡେସି; ଏଞ୍ଜାସି ଗାଡୁ ଦିନାଟିଏ ହିମ୍ବରିକା ହୁଚାଆନା ଅଡ଼େ ଇଜ ମାନାଆନା ମାଡ଼ହା ମୁହନି ଗାମୁତା ଡୟିମାଚେସି □

୨୮ ଏଞ୍ଜାସି କିର୍ଡିହିଁ ଜୀସୁ କଡାଣା ରିହାନା କାଜା ଗିୟାତଲେ ଏଲେଇଚେସି, “ଏ ବାଡ଼ମୁଗାଟି ମାହାପୁରୁ ମୀରଏଣାତି ଜୀସୁ ନୀ ତଲେ ନାଈଁ ଏନାୟି ମାନେ ? ନାନୁ ବାଡିମାଲିମାଞ୍ଜାଇଁ ନାଈଁ ଅଡ଼େ କସ୍ତ ହିୟାଆନି □”

୨୯ ଇତିହିଁ ଜୀସୁ ଏ ପଲଆ ବୁତୁତି ଏ ମାଣସି ତାଣାଟି ହଚା ହାଜାଲି ହୁକୁମି ହାହାଲି ହାଜିମାଚେସି □ ଏ ପଲଆ ବୁତୁ ହାରେକା ପାଲି ଏଞ୍ଜାଣାଇଁ ଆଲଗାମାଚେ, ଇଞ୍ଜା ଲକୁ ଏଞ୍ଜାଣାଇଁ କେସ୍ତା କଡାଣା ହିକ୍‌ଣିୟା ତଲେ ଦସ୍‌ପା ଇଟିମାଚେରି, ସାମା ଏ ଦସ୍‌ପା ମାଚାଣି ଡାପହାନା ବୁତୁ ତଲେ ବାୟା ଆହାନା ଲକୁ ହିଲାଆ ଗାମୁତା ହଟିମାଚେସି □

୩୦ ଜୀସୁ ଏଞ୍ଜାଣାଇଁ ଏଲେଇଚେସି, “ନୀ ଦରୁ ଏନାୟି ?”

“ନା ଦରୁ ମାୟା” ଇଞ୍ଜାଁ ଇଚେସି, ଏନାଆଁତାକି ଇତିହିଁ ହାରେକା ବୁତୁୟା ଆଲଗାମାଚୁ □

୩୧ ଇଞ୍ଜାଁ ଜୀସୁ ଏଞ୍ଜାସିକାଣି ତାଡ଼େପୁରୁ ପାଣ୍ଡାଲି ହୁକୁମି ହାଅସି, ଇଦାଆଁତାକି ଏଞ୍ଜାଣାଇଁ ବାଡିମାଲିତୁ □

୩୨ ଏମ୍ବାଆଁ ହରୁ ଦାରିତା ର ମାୟା ପାଜିୟା ମେୟିମାଚୁ, ଇଞ୍ଜାଁ ଜୀସୁଇଁ ଏ ବୁତୁୟା ପାଜିୟା ମାୟା ବିତ୍ରା ହାଜାଲି ହେଲ ରାସ୍ତା □

୩୩ ଏଞ୍ଜାସି ହେଲ ହାହାଲିଏ, ବୁତୁୟା ଏ ମାଣସି ତାଣାଟି ହଚା ହାଜାନା ପାଜିୟା ବିତ୍ରା ହଚୁ; ଏଚେଟିଏ ଏ ପାଜିୟା ଏ ହରୁଟି ଦାବଡ଼ି ହାଜାନା ଦାରିତା ମାଟି ସାମ୍‌ଦୁରିତା ମେଦା ହାହାହାଚୁ □

୩୪ ଏ ପାଜିୟା ମାୟା ମେଟିମାଟି ଗଡ଼କା ଏଦାଆଁ ମେସାନା ହଚେରି ଇଞ୍ଜାଁ ଗାଡ଼ା ଅଡ଼େ ନାସ୍‌କାଣାଁ ଏ କାତା ଖେସ୍ତେରି □

୩୫ ଏନାୟି ଆହାମାନେ ଏଦାଆଁ ମେସାଲି ଲକୁ ହଚାଖାଡେରି; ଇଞ୍ଜାଁ ଏଞ୍ଜାରି ଜୀସୁ ତାଗେ ଖାହାନା, ଆମିନି ମାଣସି ତାଣାଟି ବୁତୁୟା

ହଟା ହାଜାମାରୁ, ଏଞ୍ଜାଣାଇଁ ନେହଁ ହିମ୍ବରକା ହୁଚାନା ନେହଁ ମନତଲେ ଜୀସୁ କର୍ତ୍ତା ଡ଼ଇ କୁଗାମାଚାଣି ମେସାନା ଆଜିତେରି □

୩୭ ଅଡ଼େ ଆମିନି ଗାଚାରି ମେସାନାଚେରି ଏଞ୍ଜାରି ଏ ବୁତୁ ଆଲୁଗା ମାଚାସି ଏନିକଁ ନେହଁ ଆଡ଼େସି, ଏଦାଆଁ ଏଞ୍ଜାରାଇଁ ଝେସ୍ତେରି □

୩୮ ଏମ୍ବାଟିଏ ଗରାସିୟ ବାରେ ନାସ୍‌କାତି ସାରିଞ୍ଜାକି ବାରେ ଲକୁ ଜୀସୁଇଁ ତାମି ଦେସାଟି ହାଜାଲି ବାତିମାଲିତେରି, ଇଚିହଁ ଏଞ୍ଜାରି ହାରେକା ଆଜିମାଚେରି □ ଇଞ୍ଜା ଏଞ୍ଜାସି ର ଡ଼ଗଡା ହଟାନା ଝେଣ୍ଡାହାଚେସି □

୩୯ ସାମା ଏମିନିଗାଚାଣି ତାଣାଟି ବୁତୁୟାଁ ହଟା ହାଜାମାରୁ, “ନାଢ଼େ ନୀ ତଲେ ହାଜଲି ହେଲ ହିୟାମୁ” ଇଞ୍ଜାଁ ବାତିମାଲିତେସି;

୪୦ ସାମା ଜୀସୁ ଏଞ୍ଜାଣାଇଁ ହେଲ ହାହାନା, “ମୀ ଇଜ ଝେଣ୍ଡା ହାଲାମୁ, ଇଞ୍ଜାଁ ମାହାପୁରୁ ନିଢ଼େତାକି ଆମିନି କାମା କିହାମାଞ୍ଜାନେସି ଏ କାତା ଝେକ୍‌ମୁ □” ଏଚେଟିଏ ଏଞ୍ଜାସି ହାଜାନା ଜୀସୁ ତାଢ଼େତାକି ଆମିନି କାମା କିହାମାଚେସି, ଏ ବାରେ ଗାଡ଼ାତା ଝେକ୍‌ହେସି □

**ଜାୟିରସତି ମାଢ଼ା ଅଡ଼େ ଜୀସୁତି ହିମ୍ବରି କୁକୁ ଡ଼ାଗିତି ଇୟା
(ମାତି ୯:୧୮-୨୭; ମାର୍କ ୫:୨୧-୪୩)**

୪୦ ଜୀସୁ ଝେଣ୍ଡା ଝାହାଲିଏ ମାନ୍ଦା ଲକୁ ଏଞ୍ଜାଣାଇଁ ରାହାଁତଲେ ବେଟାଆଡ଼େରି, ଇଚିହଁ ଏଞ୍ଜାରି ବାରେଜାଣା ଏଞ୍ଜାଣାଇଁ କାଡ଼ିମାଚେରି □

୪୧ ଏମ୍ବାଟିଏ ଜାୟିରସ ଦରୁଗାଚାସି ଝାଡ଼େସି; ଏଞ୍ଜାସି ଜୀହୁଦି ଲକୁଡ଼ି କୁଟମି ଇଲୁଡ଼ି* କାଜାସି ମାଚେସି □ ଏଞ୍ଜାସି ଜୀସୁ କଡ଼ାଣା ରିହାନା ତାମି ଇଜ ହାଜାଲି ବାତିମାଲିତେସି,

୪୨ ଇଚିହଁ ଏଞ୍ଜାଣାକି ବାର ବାସାତି ରଣ୍ଡିଏ ମାଢ଼ା ମାଚେ, ଏଡ଼ି ହାନ୍ତିଲେହେଁ ନମେରି ଆହାମାଚେ □

ସାମା ଏଞ୍ଜାସି ହାଜିମାଚାଟି ଲକୁ ଏଞ୍ଜାଣି ମୁହେଁ ମୁହେଁ ଆହିମାଚେରି □

୪୩ ଏଚିବେଲାତା ବାର ବାସା ପାଡ଼େକା ନେତେରି ଝାଢ଼ିନି ରଗାଚାଟି ର ଇୟା, ଏମିନି ଗାଚାୟି ଆମ୍ବାଆରି ତାଣାଟି ଜିକେଏ ନେହଁ ଆହାଲି ଆଡ଼ିହିଲାଆଡ଼େ,

* ୮:୪୧ ୮:୪୧ ସିନଗର

୪୪ ଏହି ଡାୟୁ ଖାକିଟି ଖାହାନା ଜୀସୁତି ହିମ୍ବରି କୁଞ୍ଜୁ ଡାଗିତେ, ଏ ଦେବୁଣିଏ ଏଦାନି ନେତେରି ବନାୟି ପିସ୍ତେ ।

୪୫ ଏମ୍ବାଟିଏ “ନାଙ୍ଗେ ଆମ୍ବାଆୟି ଡାଗାତେ” ଇଞ୍ଜି ଜୀସୁ ଖେରେସି ?

ସାମା ବାରେଜାଣା ଆଏ ଇଞ୍ଜାଲିଏ, ପିତର ଏଲେଇରେସି, “ଏ ଗୁରୁ ଲକୁ ବାରେ ମୁହେଁ ମୁହେଁ ଆହିମାନେରି ।”

୪୬ ସାମା ଜୀସୁ ଏଲେଇରେସି, “ନାଙ୍ଗେ ଆମ୍ବାଆୟିମା ଡାଗାତେ, ଇଚିହୁଁ ନା ଡାଣାଟି ର ବାଡ଼ୁ ହତାକି ନାନୁ ପୁରେଏଁ ।”

୪୭ ଏମ୍ବାଟିଏ ଏ ଇୟା ଖାହାନା ଅଣ୍ପିତେ ନାନୁ ଅଡ଼େ ଡଗୁନା ମାଞ୍ଜାଲି ଆଡ଼ଅଁ ଇଞ୍ଜି ଅଣ୍ପିପାନା ଆଜିତାକି ତାରା ତାରା ଆହୁଁ ଜୀସୁ କଡାଣା ରିହାନା, ଏନାଆଁତାକି ଡାଗିତେ ଇଞ୍ଜା ଦେବୁଣିଏ ଏନିକିଁ ନେହୁଁ ଆଡ଼େ, ବାରେ ଲକୁ ନକିତା ଖେସ୍ତେ ।

୪୮ ଏମ୍ବାଟିଏ ଜୀସୁ ଏଦାନି ଏଲେଇରେସି, “ମାଙ୍ଗା ନୀ ନାମୁ ନିଙ୍ଗେ ନେହୁଁ କିହାମାଞ୍ଜାନେ, ହିଡ଼ିଟି ହାଲାମୁ ।”

୪୯ ଜୀସୁ ଇ କାତା ଖେସିମାଟି ବେଲାତା ଜୀହୁଦି ଲକୁଡି କୁଟମି ଇଲୁଡିଠି କାଜାଣା ଇଜଟି ରଅସି ଖାହାନା ଜାୟିରସଇଁ ଏଲେଇରେସି, “ନୀ ମାଙ୍ଗା ହାହାହାରେୟିଏ ଗୁରୁଇଁ ଅଡ଼େ କସ୍ତ ହୀଆନିଦେହେଁ ।”

୫୦ ସାମା ଜୀସୁ ଏ କାତା ଖେଞ୍ଜାନା ଏଞ୍ଜାଣାଇଁ ଏଲେଇରେସି, “ଆଜାଆନି ନାମାମୁ ଏଦି ନୀତିନେ ।”

୫୧ ଅଡ଼େ ଜୀସୁ ଇଜ ଖାହାନା ପିତର, ଜହନ ଅଡ଼େ ଜାକୁବ ଇଞ୍ଜା ପଦାନି ତାନି ଆବା ଇୟାନି ପିସ୍ତେ ଆମ୍ବାଆରାଇଁ ବିତ୍ରା ହାଜାଲି ହୀଆତେସି ।

୫୨ ସାମା ବାରେଜାଣା ଡାହି ଡାହିଁ ବକତା ଖେଟା କଡିମାତୁ । ଏମ୍ବାଟିଏ ଜୀସୁ ଏଲେଇରେସି, “ଡାଆତୁ; ଏଦି ହାହାହିଲେଏ, ସାମା ତୁରାମାନେ ।”

୫୩ ସାମା ପଦା ହାହାମାନାଣି ପୁଞ୍ଜାନା ଏଡ଼ି ଏଞ୍ଜାଣାଇଁ କାକ୍ତୁ ।

୫୪ ସାମା ଜୀସୁ ପଦାନି କେୟୁ ଆସାନା ହାଟାହାଁ ଏଲେଇରେସି, “ଆକେ ପଦା, ନିଙ୍ଗାମୁ ।”

୫୫ ଏମ୍ବାଟିଏ ପଦାନି ଜୀସୁ ଖେଣ୍ଡା ଖାତେ ଅଡ଼େ ଏ ଦେବୁଣିଏ ନିଜାତେ, ଇଞ୍ଜା ଇଚାଣି ତିଞ୍ଜାଲି ହୀଦୁ ଇଚେସି □

୫୬ ଏମ୍ବାଟିଏ ତାମି ତାଲି ତାଞ୍ଜି କାବାଆଦୁ; ସାମା ଇ ପଦା ନେହିଁ ଆଡ଼ାଣି ଆମ୍ବାଆରାଇଁ ଖେହ୍‌ଆଦୁ ଇଞ୍ଜିଁ ଏଞ୍ଜାସିକାଣି ହୁକୁମି ହୀତେସି □

୯

ଜୀସୁ ବାରଜାଣା ସୀସୁୟାଁଇଁ ପାଣ୍ଡିନାୟି

(ମାତି ୧୦:୫-୧୫; ମାର୍କ ୬:୭-୧୩)

୧ ଏଚେଟିଏ ଜୀସୁ ବାରଜାଣାତି ହାଟାନା ରୁଣ୍ଡା କିହାନା ଏଞ୍ଜାରାଇଁ ବାରେ ବୃତୁୟାଁ ଲାକ ଅଡ଼େ ରଗାଟି ନେହିଁ କିହାଲି ବାଡ଼ୁୟୁ ଅଡ଼େ ଅଦିକାରା ହୀତେସି □

୨ ଅଡ଼େ ଏଞ୍ଜାସି ଏଞ୍ଜାରାଇଁ ମାହାପୁରୁତି ରାଜିତି କାତା ଖେକହାଲି ଅଡ଼େ ରଗା ଗାଟାରାଇଁ ନେହିଁ କିହାଲି ପାଣ୍ଡିତେସି

୩ ଇଞ୍ଜା ଏଞ୍ଜାରାଇଁ ଏଲେଇଚେସି, “ମୀରୁ ହାଜାଲିତାକି କୁତା ବାଡ଼ଗା କି ମଣା କି ରୁଟି କି ଏନି ଟାକାୟାଁ ଜିକେଏ ଅଆଦୁ, ଅଡ଼େ ଜଡ଼େକା ସକାୟାଁ ଜିକେଏ ଅଆଦୁ □

୪ ଅଡ଼େ ମୀରୁ ଆମିନି ଇଜ ହାଜେରି, ଏମ୍ବାଟି ଖେଣ୍ଡାହାନି ପାତେକା ଏମ୍ବାଆଁ ତୟାଦୁ;

୫ ✠✠ଅଡ଼େ ଏଚେକା ଲକୁ ମିଙ୍ଗେ ଆବଅରି ଏଞ୍ଜାରି କପାଟି ସାକି ହୀହାଲି ଏ ଗାଡ଼ାଟି ହଡ଼ା ଖାନାଟି ମୀ କଡ଼ାତି ଦୁଡ଼ି ହାଣ୍ଡାଁନା ଖାଦୁ □”

୬ ଏମ୍ବାଟିଏ ଏଞ୍ଜାରି ହାଜାନା ସାରିଞ୍ଜାକି ନେହିଁ କାରୁ ଖେକହିହିଁ ରଗା ଗାଟାରାଇଁ ନେହିଁ କିହିହିଁ ନାୟୁଁ ନାୟୁଁତା ରେଚେରି □

ହେରଦ ରାଜା ବିଲ୍‌କି ଆନାୟି

(ମାତି ୧୪:୧-୧୨; ମାର୍କ ୬:୧୪-୨୯)

୭ ✨ଏମ୍ବାଟିଏ ଏ ଦେସାତି ରାଜା ହେରଦ ଇ ବାରେ କାତା ଖେଞ୍ଜାନା କାବା ଆଡେସି, ଇତିହିଁ ବାପ୍ତିସ୍ମ* ହାନି ଜହନ ହାଡାରି ତାଣାଟି ନିଙ୍ଗାମାନେସି ଇଞ୍ଜି ଆମ୍ବା ଆମ୍ବାଆରି ଏଲେଇଞ୍ଜିମାନେରି;

୮ ଅଡେ ଆମ୍ବା ଆମ୍ବାଆରି ଏଲିୟ ତଞ୍ଜା ଆହାମାନେସି ଇଞ୍ଜା ଏଟକାତାରି ତଲିକାଲ୍ଲାତି ମାହାପୁରୁ ଅଣ୍ଟପୁତି ବଲ୍ଲୁ ଖେହ୍ନାରି ବିତ୍ରାଟି ରଅସି ନିଙ୍ଗାମାନେସି ଇଞ୍ଜି ଖେସିମାନେରି □

୯ ସାମା ହେରଦ ଏଲେଇଚେସି, “ଜହନତି ତାୟୁଁ ମାରତ ଦାତା ମାନାୟି, ସାମା ଆମ୍ବାଆରି କାତା ମାର ଖେଞ୍ଜିମାନାୟି ଏଞ୍ଜାସି ଆମ୍ବାଆସି ?” ଅଡେ ଏଞ୍ଜାସି ଏଞ୍ଜାଣାଇଁ ମେସାଲି ମନ କିହିମାନେସି □

ଜୀସୁ ପାସାମାଣା ଲକୁଣି ତାହ୍ନାୟି

(ମାତି ୧୪:୧୩-୨୧; ମାର୍କ ୬:୩୦-୪୪; ଜହ ୬:୧-୧୪)

୧୦ ତାୟୁଁ ପାଣ୍ଡୁଞ୍ଜି ଆହାମାଚାରି ଖାହାନା ଏନା ଏନାଆଁ କିହାମାନେରି, ଏ ବାରେ ଏଞ୍ଜାଣାଇଁ ଖେସ୍ତେରି □ ଅଡେ ଏଞ୍ଜାସି ଏଞ୍ଜାରିତଲେ ଏଟକା ଆହାନା ବେଡସାୟିଦା ଦରୁଗାଟି ଗାଡାତା ହାଚେରି □

୧୧ ସାମା ଲକୁ ଏଦାଆଁ ପୁଞ୍ଜାନା ଏଞ୍ଜାଣି ଜେଚ ଜେଚ ହାଚେରି; ଇଞ୍ଜା ଏଞ୍ଜାସି ଏଞ୍ଜାଣାଇଁ କାର୍ନା ଆହାଁ ଆବାନା ମାହାପୁରୁ ରାଜିତି କାତା ଖେସ୍ତେସି, ଅଡେ ଏମିନିଗାଟାରି ରଗଟି ନେହିଁ ଆନାୟି ମାଚେ, ଏଞ୍ଜାଣାଇଁ ନେହିଁ କିଚେସି □

୧୨ ଏଚେତା ମିଡୁଅଲ୍ଲା ଆହାଲି ମାଟ୍‌ହେ; ଏଚେଟିଏ ବାରଜାଣା ସୀସୁୟାଁ ତାନି ତାଣା ଖାହାନା ଏଲେଇଚେରି, “ଲକୁ ଏନିକିଁ ନାସ୍‌କା ଅଡେ ଗାଡାତା ହାଜାନା ବାସାଟାୟୁଁ ଅଡେ ତିଞ୍ଜାଲି କାଡି ପାରିନେରି, ଏଦାଆଁତାକି ଏଞ୍ଜାଣାଇଁ ହେଲ ହୀମୁ ଇତିହିଁ ମାର ଲକୁ ହିଲାଆ ଟାୟୁତା ମାନାୟି □”

୧୩ ସାମା ଏଞ୍ଜାସି ଏଞ୍ଜାଣାଇଁ ଏଲେଇଚେସି, “ମୀରୁ ଏଞ୍ଜାଣାକି ତିଞ୍ଜାଲି ହୀଦୁ □”

✨ ୯:୭ ୯:୭ ମାତି ୧୭:୧୪; ମାର୍କ ୮:୨୮; ଲୁକ ୯:୧୯ * ୯:୭ ୯:୭ ମୁଞ୍ଜିନାୟି

ଏଞ୍ଜେଲ୍ ଏଲେଇରେରି, “ମା. ତାଣା ପାସାଗଟା ରୁଟି ଇଞ୍ଜା ରା ମୀଣକା ପିସପେ ଆଗାଡ଼ା ହିଲାଡ; ଏନାଆଁ ମାର ହାଜାନା ଇ ବାରେତାକି କାଡ଼ି କଡିନାୟି ?”

୧୪ ଇଟିହିଁ ଏଞ୍ଜେରି ପାସାମାଣା ଆବାୟାଁ ମାରେରି □

ଇଞ୍ଜା ଏଞ୍ଜେରି ତାନି ସୀସୁଣି ଏଲେଇରେସି, “କଡେଦସ ଜାଣା ଲାକା କୁଗିକିଦୁ □”

୧୫ ଏରେଟିଏ ଏଞ୍ଜେରି ଏଲେକିହିଁଏ ବାରେତି କୁଗିକିତେରି □

୧୬ ଅଡେ ଏଞ୍ଜେରି ପାସାଗଟା ରୁଟି ଅଡେ ରା ମୀଣକାଣି ଆସାନା ଲାକପୁରୁ ଖାକି ସିନିକିହାନା ବର ହୀତେସି, ଇଞ୍ଜା ରୁଟି ଡିକିହାନା ଲକୁକି ହାସପାଲି ସୀସୁୟାଁକି ହୀତେସି □

୧୭ ଏରେଟିଏ ବାରେଜାଣା ତିଞ୍ଜା ପାଞ୍ଜିତେରି, ଅଡେ ହାରିତାଣି ବାର ତାଲି ରୁଟି କୁଡ଼ି କିତେରି □

ଜୀସୁଇଁ ପିତର କ୍ରୀସୁ ଇଞ୍ଜାଁ ଖେକନାୟି

(ମାତି ୧୭:୧୩-୧୯; ମାର୍କ ୮:୨୭-୨୯)

୧୮ ର. ଦିନା ଜୀସୁ ରଅସିଏ ପ୍ରାଡାନା କିନି ବେଲାତା ସୀସୁୟାଁ ଏଞ୍ଜେରିତଲେ ମାରେରି, ଅଡେ ଏଞ୍ଜେରି ଏଞ୍ଜେରାଇଁ ଖେରେସି, “ନାନୁ ଆମ୍ବାଆତେଏଁ ଇଞ୍ଜାଁ ଲକୁ ଏଲେଇଞ୍ଜିମାନେରି ?”

୧୯ ☆ଏରେଟିଏ ଏଞ୍ଜେରି ଏଲେଇରେରି, “ଆମ୍ବାଆରି ବାପ୍ତିସ୍ମାଁ ହୀନି ଜହନ, ଆମ୍ବାଆରି ଏଲିୟ, ଅଡେ ଆମ୍ବାଆରି ତଲିକାଲାତି ମାହାପୁରୁ ଅଣ୍ଟପୁତି ବକୁ ଖେହନାରି ବିତ୍ରାଟି ରଅସି ନିଙ୍ଗାମାନେସି □”

୨୦ ☆ଏଞ୍ଜେରି ଏଞ୍ଜେରାଇଁ ଏଲେଇରେସି, “ନାନୁ ଆମ୍ବାଆତେଏଁ ମୀରୁ ଏନାଆଁ ଇଞ୍ଜାଁ ମାଞ୍ଜେରି ?”

ପିତର ଏଲେଇରେସି, “ନୀନୁ ମାହାପୁରୁତି କ୍ରୀସୁ □”

ଜୀସୁ ତାନି ଦୁକୁ ଅଡେ ହାକିତି କାତା ଖେହନାୟି

(ମାତି ୧୭:୨୦-୨୮; ମାର୍କ ୮:୩୦-୯:୧)

୨୧ ଏରେଟିଏ ଏଞ୍ଜେରି ଏଞ୍ଜେରାଇଁ ଆମ୍ବାଆରାଇଁ ଖେହଆଦୁ ଇଞ୍ଜାଁ ଜାଣେ କିହିଁ ହୁକୁମି ହୀତେସି,

☆ ୯:୧୯ ୯:୧୯ ମାତି ୧୪:୧,୨; ମାର୍କ ୭:୧୪,୧୫; ଲୁକ ୯:୭,୮ † ୯:୧୯ ୯:୧୯ ମୁଞ୍ଜିନାୟି ☆ ୯:୨୦ ୯:୨୦ ଜହ ୭:୨୮,୨୯

୨୨ “ମାଣ୍ଡସି ମୀରଏସି ହାରେକା ଦୁକୁ ପାଣ୍ଡନାୟି ମାନେ ଇଞ୍ଜା ଲକ୍ଷୁତି କାଜାରି, କାଜା ପୂଜେରାଜା ଇଞ୍ଜା ମେରାପୁନାରି ତାଣାଟି ଅପାଆନା ଏଞ୍ଜାଣାକ୍ ପାୟିନେରି, ଇଞ୍ଜା ତାନି ଦିନାଟିଏ ନିଜିନେସି □”

୨୩ ☆ଏଚେଟିଏ ଏଞ୍ଜାସି ବାରେଡି ଏଲେଇଚେସି, “ଆମ୍ବାଆସି ନା ଜେଚ ତାକାଲି ମନ କିନେସି, ଏଞ୍ଜାସି ତାଜେ ଅପାଆନା ବାରେଦିନା ତାନି କୁସ ଡେକାନାହାଁ ନା ଜେଚ ତାକାପେସି □

୨୪ ☆ଇଚିହ୍ ଆମ୍ବାଆସି ଜାହାରା ଜୀଝୁ ଗେଲ୍ପାଲି ମନ କିନେସି ଏଞ୍ଜାସି ନାସା କିନେସି; ସାମା ଆମ୍ବାଆସି ନା ତାକି ଜାହାରା ଜୀଝୁ ନାସା କିନେସି ଏଞ୍ଜାସି ଗେଲ୍ପି କିହାକଡିନେସି □

୨୫ ଅଡେ ମାଣ୍ଡସି ଇ ଦାର୍ଡିତା ମାନାଣି ବାରେ ମେଡି କିହାନା ତାନି ଜୀଝୁତି ନାସା କିନେସି, ଇଚିହ୍ ଏଞ୍ଜାଣାକି ଏନି ଲାବା ?

୨୬ ଇଚିହ୍ ଆମ୍ବାଆସି ନାଜେତାକି ଅଡେ ନା କାତାତାକି ଲାଜା ଆନେସି, ମାଣ୍ଡସି ମୀରଏସି ତାନି କାଜାପାଣା ତଲେ ଇଞ୍ଜାହାଁ ମାହାପୁରୁ ଆବା ଅଡେ ତାନି ସୁଦୁଗାଟି ଦୁଡୁୟାଁ ତଲେ କାଜାପାଣାଟି ଖାନେସି ଏଚିବେଲା ଏଞ୍ଜାସି ଜିକେଏ ଏଞ୍ଜାଣି ତାକି ଲାଜା ଆନେସି □

୨୭ ସାମା ନାନୁ ମିଜେ ସାତା ଝେସିମାଞ୍ଜାକ୍, ମାହାପୁରୁତି ରାଜି ମେହ୍‌ଆ ପାଡେକା ଇମ୍ବାଆଁ ନିଚାମାନାରି ଏଚରଜାଣା ହାଅରି □”

ଜୀସୁ ଅର ଖାଣା ଆନାୟି

(ମାତି ୧୭:୧-୮; ମାର୍କ ୯:୨-୮)

୨୮ ଇ କାତା ଝେସାନା ଆଟାଦିନା ହାଜାଲିଏ ପିତର, ଜହନ ଅଡେ ଜାକୁବକ୍ ଅହ୍ ହାଜାନା ପ୍ରାତାନା କିହାଲି ହରୁତା ହାଚେସି □

୨୯ ଅଡେ ଏଞ୍ଜାସି ପ୍ରାତାନା କିହିମାଚାଟି ତାନି ମୂମ୍ବୁଡି ଖାଣା ଡିରିମୁହେ ଇଞ୍ଜା ତାନି ହିମ୍ବୁରି ଦବ୍‌ଲା ଆହାନା ହାରେକା ଉଜେଡି ଆଡେ □

୩୦ ମସା ଅଡେ ଏଲିୟ୍ ଏଞ୍ଜାଣିତଲେ କାତା ଆହିମାଚେରି;

୩୧ ଏଞ୍ଜାରି ଗାଝୁରମିଟି ତଞ୍ଜାଆହାନା ଜୀସୁ ଜିରୁସାଲମତା ହାନିକାତା ଜଲ୍‌କି ଆହିମାଚେରି □

☆ ୯:୨୩ ୯:୨୩ ମାତି ୧୦:୩୮; ଲୁକ ୧୪:୨୭ ☆ ୯:୨୪ ୯:୨୪ ମାତି ୧୦:୩୯; ଲୁକ ୧୭:୩୩; ଜହ ୧୨:୨୫

୩୨ ଏରିବେଲା ପିତର ଅଡ଼େ ତାନି ତଣେସିଙ୍ଗାକି ଗାଡ଼ି ଇଦାକାଣ୍ଡକା ହଡ଼ିମାଟୁ; ସାମା ଏଝାରି ଇଦାଟି ନିଙ୍ଗାଲିଏ ତାନି ଗାଝୁରମି ଇଞ୍ଜା ଏଝାଣିତଲେ ରିଆରି ନିଚାମାନାଣି ମେସ୍ତେରି □

୩୩ ଇଞ୍ଜା ଏଝାରି ତାଣାଟି ହାଜିମାଟାଟି ପିତର ଜୀସୁଇଁ ଏଲେଇଚେସି, “ଗୁରୁ ମାମ୍ବୁ ଇମ୍ବାଆଁ ମାନାୟି ନେହେଁ; ମାମ୍ବୁ ଇମ୍ବାଆଁ ତାନିଗଟା ଗୁଡ଼ାୟାଁ କେପିନମି, ନିଙ୍ଗେତାକି ରଣ୍ଡାଆଁ, ମସାକି ରଣ୍ଡାଆଁ ଅଡ଼େ ଏଲିୟକି ରଣ୍ଡାଆଁ □” ସାମା ତାନୁ ଏନାଆଁ ଇଞ୍ଜିମାଚେସି ତାନୁଏ ପୁଞ୍ଜି ହିଲାଆଚେସି □

୩୪ ଏଝାସି ଏଲେଇଞ୍ଜି ମାଟାଟି ଇଚାୟି ହାଗୁ ଦୁନ୍ଦା ଝାହାନା ଏଝାରାଇଁ ପୁକ୍ତେ, ଇଞ୍ଜା ଏଝାରି ଦୁନ୍ଦାତା ହଡ଼ି ମାଟାଟି ଆଜିତେରି □

୩୫ ☆☆ଇଞ୍ଜା ଏ ଦୁନ୍ଦାଟି ଇ ହାଡ଼ା ଝାଡ଼େ, “ଇଝାସି ନା ମୀରଏସି, ନାନୁ ଆଡ଼ିତାସି, ଇଝାଣି ବଲୁ ଝେଞ୍ଜୁ □”

୩୬ ଏଲେଇଞ୍ଜି ଝେସ୍ତି ତାୟୁ ଜୀସୁ ରଅସିଏ ତଞ୍ଜାଆଡ଼େସି □ ଏଝାରି ଇ କାତାତାକି ପାଲେଏ ମାଞ୍ଜାନା, ଏନା ଏନାଆଁ ମେସାମାଚେରି ଏ ବେଲାତା ଆମ୍ବାଆରାଇଁ ଜିକେଏ ଝେହୁଆଡ଼େରି □

**ଜୀସୁ ବୃତ୍ତୁ ଆଲ୍‌ଗାମାଟି କକାଣାଇଁ ନେହୁଁକିନାୟି
(ମାଟି ୧୭:୧୪-୧୮; ମାର୍କ ୯:୧୪-୨୭)**

୩୭ ଅଡ଼େ ର ନେରୁ ହରୁଟି ରେଟା ଝାହାଲିଏ ହାରେକା ଲକୁ ଏଝାଣାଇଁ ବେଟା ଆୟାଲି ଝାଡ଼େରି □

୩୮ ଅଡ଼େ ଏ ମାନ୍ଦା ଲକୁ ବିତ୍ରାଟି କାଜା ଗିୟାଁତଲେ ହାଟାନା ଏଲେଇଚେସି, “ଏ ଗୁରୁ ନାନୁ ବାଡ଼ିମାଲିମାଞ୍ଜାଇଁ ନା ମୀରଏଶାଇଁ କାର୍ମା ଆମ୍ବୁ ଇଚିହୁଁ ଏଝାସି ନା ରଣ୍ଡିଏ ମୀରଏସି;

୩୯ ଏଝାଣାଇଁ ର ବୃତ୍ତୁ ଆଲ୍‌ଗିମାନେ, ଇଞ୍ଜା ଏଝାସି ପେଦ୍‌ରାହାଁ ଦେବୁଣିଏ କିରଡ଼ି ମାନେସି, ଇଞ୍ଜା ଏଝାଣାଇଁ ଇଲେକ୍‌ଟୁ ବୁମିତା ତୁକ୍ତହାନା ଗୁଡ଼ିଟି ପମ୍ବୁଲି ହପ୍‌ହି ମାନେ, ଇଞ୍ଜା ଏଝାଣାଇଁ ଗାଡ଼ି ବାଡ଼ା କିହାନା ଏଝାଣି ତାଣାଟି କାକୁଲିଟି ହଡ଼ାହାନେ □

☆ ୯:୩୫ ୯:୩୫ ମାଟି ୩:୧୭; ୧୨:୧୮; ମାର୍କ ୧:୧୧; ଲୁକ ୩:୨୨ ☆ ୯:୩୫ ୯:୩୫
୨ପିତ ୧:୧୭,୧୮

୪୦ ନାନ୍ତୁ ବୃତ୍ତୁତି ପିସପି କିହାଲି ନୀ ସୀସୁୟାଣି ବାତିମାଲିତେଏଁ, ସାମା ଏଞ୍ଜାରି ପିସପି କିହାଲି ଆଡାଆତେରି □

୪୧ ଜୀସୁ ଏଲେଇଚେସି, “ଆଡେ ନାମାଆଗାଟି ଏଟକା ଜିରୁ ଆହ୍ନି କୁଡ଼ା, ନାନ୍ତୁ ଅଡେ ଏଚେକା ମୀ ତଲେ ମାଞ୍ଜାନା ମୀ କାତା ଅରହାଇଁ ? ନୀ ମୀରଏଣାଇଁ ଇମ୍ମାଆଁ ତାମୁ □”

୪୨ ବୃତ୍ତୁ ଆଲଗାମାଟି କକାସି ଖାହିମାଗାଟି ବୃତ୍ତୁ ଏ କକାଣାଇଁ ବୃମିତା ତାଡ଼ି କିହାନା ତ୍ରେପହାତୁସ୍ତେ, ସାମା ଜୀସୁ ଏ ପଲଆ ବୃତ୍ତୁତି ଦାକା ହୀତେସି ଇଞ୍ଜାଁ କକାଣାଇଁ ନେହଁ କିହାନା ତାମି ଆବା କେୟୁତା ହେରପିତେସି □

୪୩ ଏଚେଟିଏ ବାରେ ଲକୁ ମାହାପୁରୁତି ବାଡ଼ୟୁ ମେସାନା ଜାଗଲ୍ଲା ଆଡେରି □ ସାମା ଏଞ୍ଜାସି କିହାମାନି ବାରେ କାମାତାକି ଜାଗଲ୍ଲା ଆହିମାଗାକି ଜୀସୁ ତାନି ସୀସୁୟାଁ ଏଲେଇଚେସି □

ଜୀସୁ ତାନି ହାକିତି କାତା ଅଡେ ଖେଣ୍ଡେ ଖେହ୍ନାୟି

(ମାତି ୧୭:୨୨,୨୩; ମାର୍କ ୯:୩୦-୩୨)

୪୪ “ଇ ବାରେ କାତା ମୀ କାର୍କା ଅତାନା ଖେଞ୍ଜୁ; ଇଚିହଁ ମାଣସି ମୀରଏସି ସାତୁୟାଁ କେୟୁତା ହେରପିଆନେସି □”

୪୫ ସାମା ଏଞ୍ଜାରି ଏ କାତା ତେଲହାଆତେରି, ଏଞ୍ଜାରି ତେଲହାଲି ଆଡାଆରେଚୁ ଏଞ୍ଜାରି ତାଣାଟି ତଗୁମାଚେ, ଇଞ୍ଜାଁ ଏଞ୍ଜାରି ଏ କାତା ଜିକେଏ ଜୀସୁଇଁ ଖେଞ୍ଜାଲି ଆଜିମାଚେରି □

ବାରେକିହାଁ କାଜସି ଆମ୍ବାଆସି

(ମାତି ୧୮:୧-୫; ମାର୍କ ୯:୩୩-୩୭)

୪୬ ☆ଏଞ୍ଜାରି ବିତ୍ରାଟି ଆମ୍ବାଆସି କାଜସି, ଇ କାତାତାକି ଏଞ୍ଜାରି ବିତ୍ରା ବାଦିବାଦା ଆଡେରି □

୪୭ ସାମା ଜୀସୁ ଏଞ୍ଜାରି ବିତ୍ରା ବାଦିବାଦା ଆହିମାନାଣି ପୁଞ୍ଜାନା, ର ଉଣା କକାଣାଇଁ ତାନି ନକିତା ନିପହାନା ଏଞ୍ଜାରାଇଁ ଏଲେଇଚେସି,

୪୮ ☆“ଆମ୍ବାଆସି ନା ଦରୁଟି ଇ ଉଣା କକାଣାଇଁ ଆବିନେସି, ଏଞ୍ଜାସି ନାଜେ ଆବାନେସି, ଅଡେ ଏଞ୍ଜାସି ନାଜେ ପାଣ୍ଡାତାଣାଇଁ ଆବିନେସି;

ଇଚିହଁମୀ ବିତ୍ରାଟି ଆମ୍ବାଆସି ବାରେକିହଁ ଉଣା ଏଞ୍ଜାସି କାଜାସି
□”

**ମୀ କପାଟି ନିଜାଆ ଗାଟାସି ମୀ ତଲେତାସି
(ମାର୍କ ୯:୩୮-୪୦)**

୪୯ ଏଚେଟିଏ ଜହନ ଏଲେଇଚେସି, “ଗୁରୁ, ମାମ୍ବୁନୀ ଦରୁଟି ବୁରୁୟା ପେର୍ହେ ମାଟାଣି ମେସୁମି ଇଞ୍ଜା ଏଞ୍ଜାସି ମା ତଲେ ନୀ ଜେତ ଖାଆଲିଏ କାହିକିତମି □”

୫୦ ସାମା ଜୀସୁ ଏଞ୍ଜାରାଇଁ ଏଲେଇଚେସି, “କାହିକିଆଦୁ, ଇଚିହଁମୀ ଆମ୍ବାଆସି ମୀ କପାଟି ନିଜା ହିଲଅସି ଏଞ୍ଜାସି ମୀ ତଲେତାସି □”

ସମିରଣି ନାୟକାଣାଁ ଜୀସୁଇଁ ଆବାଆତାୟି

୫୧ ଏଚିବେଲା ଜୀସୁ ଲାକପୁରୁ ହାନି ବେଲା ଏଗାଞ୍ଜାହିମାଟାକି ଏଚିବେଲା ଜୀସୁ ଜିରୁସାଲମତା ହାଜାଲି ମନତି ତୀରି କିତେସି □

୫୨ ଅଡେ ତାନି ନକେଏ କସକାଣି ପାଣ୍ଡିତେସି, ଏଞ୍ଜାରି ହାଜାନା ର ସମିରଣ ନାୟକା ଜୀସୁ ଖାନେସି ଇଞ୍ଜାଁ ଜାଗ୍ରାତା କିହାନା କାଡେରି;

୫୩ ସାମା ଏଞ୍ଜାସି ଜିରୁସାଲମତା ହାଜାଲି ମନ କିହାମାନେସି ଇଞ୍ଜାଁ ପୁଞ୍ଜାନା ଏଞ୍ଜାଣାଇଁ ଆବାଆତେରି □

୫୪ ଇଦାଆଁ ମେସାନା ଜାକୁବ ଅଡେ ଜହନ ଇ ରୀ ସୀସୁୟାଁ ଏଲେଇଚେରି, “ଏ ପ୍ରବୁ ଏଲିୟ ଏନିକଁ ଏଲେଇଞ୍ଜାମାଚେସି, ଏଲେକିହଁଏ ହାଗୁଲାକଟି ହିରୁ ରିହାନା ଏଞ୍ଜାରାଇଁ ନାସା କିପେ, ଏଲେଇଞ୍ଜାଲି ନୀ ମନ ମାନେକି ?”

୫୫ ସାମା ଏଞ୍ଜାସି ଖେଣ୍ଡେ ସିନିକିହାନା ଏଞ୍ଜାରାଇଁ ଲାଗାନା ଏଲେଇଚେସି, “ମୀରୁ ଏନିଲେହେଟି ଜୀଞ୍ଜୁ ଗାଟାଚେରି, ମୀରୁ ପୁଞ୍ଜାହିଲଅତେରି ମାଣ୍ଡିସି ମୀରୁଏସି ମାଣ୍ଡିସିୟାଁତି ଜୀଞ୍ଜୁ ନାସା କିହାଲି ଖାଆନା ଗେଲପାଲି ଖାହାମାନେସି □

୫୬ ଏଚେଟିଏ ଏଞ୍ଜାରି ଅର ନାୟକା ହାଚେରି □”

**ଜୀସୁତି ସୀସୁ ଆହାଲି ପାଡା ଆନାୟି
(ମାଟି ୭:୧୯-୨୨)**

୫୭ ଏଞ୍ଜାରି ଜିରୁତା ହାଜିମାଚାଟି ରଅସି ଖାହାନା ଜୀସୁଇଁ ଏଲେଇଚେସି, “ନୀନୁ ଆମ୍ବିୟା ହାଜି, ନାନୁ ଜିକେଏ ନୀ ତଲେ ଖାକ୍ଟି □”

୫୮ ଜୀସୁ ଏଞ୍ଜାଣାଇଁ ଏଲେଇଚେସି, “ନାକାୟାକି ଡୟିନି ପାସୁୟାଁ ମାନୁ, ହାଗୁ ଲାକ ଉମ୍ବିନି ପଟାୟାକି ବାସାଚାନ୍ନୁ ମାନେ, ସାମା ମାଣସି ମୀରଏଣାକି ତାୟୁଁ ୁନଟହାଲି ଟାୟୁଁ ହିଲେଏ □”

୫୯ ଇଞ୍ଜା ଏଞ୍ଜାସି ଅଡେ ରଅଣାଇଁ ଏଲେଇଚେସି, “ନା ଜେଟ ଖାମୁ □” ସାମା ଏଞ୍ଜାସି ଏଲେଇଚେସି, “ପ୍ରବୁ ନଟେଏ ହାଜାନା ନା ଆବାଇଁ ମାହୁଣିଶା ମୁସାଲି ହେଲ ହିୟାମୁ □”

୬୦ ଜୀସୁ ଏଲେଇଚେସି, “ହାଡାରାଇଁ ତାମି ହାଡି ଲକୁଣି ମୁସାଲି ପିହଦୁ, ସାମା ମୀରୁ ହାଜାନା ମାହାପୁରୁ ରାଜିତି କାତା ଖେହଦୁ □”

୬୧ ଅଡେ ରଅସି ଖାହାନା ଏଲେଇଚେସି, “ପ୍ରବୁ ନାନୁ ଜେଟ ଖାକ୍ଟି ସାମା ନଟେଏ ଇଜତି ଲକୁ ତାଣାଟି ହେଲ ଅହାଲି ହିୟାମୁ □”

୬୨ ସାମା ଜୀସୁ ଏଞ୍ଜାଣାଇଁ ଏଲେଇଚେସି, “ଆମ୍ବାଆସି ନାଟେଲି କେୟୁତା ଆସାନା ତାୟୁଞ୍ଜାକି ସିନିକିନେସି ଏଞ୍ଜାସି ମାହାପୁରୁ ରାଜିତା ପାଡା ଆଅସି □”

୧୦

ଜୀସୁ ତାନିକଡ଼ି ବାରଜାଣାତି ପାଣ୍ଡିନାୟି

୧ ଏମ୍ବାଟିଏ ପ୍ରବୁ ଅଡେ ତାନିକଡ଼ି ବାରଜାଣାତି ଆଚାନା ତାନୁ ଆମିନି ଗାଡା ଅଡେ ନାସକାଣାଁ ହାଜାଲି ମନ କିହାମାଚେସି, ଏ ନାସକା ଅଡେ ଗାଡାୟାଣା ରିଆରି ଲାକା କିହାଁ ପାଣ୍ଡିଚେସି □

୨ ☆ଇଞ୍ଜା ଏଞ୍ଜାସି ଏଞ୍ଜାରାଇଁ ଏଲେଇଚେସି, “ପାଟି ହାରେକା ସାମା ଦାଃଆନାରି ଉଣା ଜାଣା; ଇଦାଆଁତାକି ଗୁଡିୟତା କାମା କିନାରାଇଁ ପାଣ୍ଡାଲିତାକି ଗୁଡିୟତି ସାସୁକାରିଇଁ ବାତିମାଲ୍ଲାଦୁ □

୩ ☆ମୀରୁ ହାଜୁ; ନାନୁ ମିଙ୍ଗ କ୍ଳାଃନିୟାଁ ବିଡ୍ରା ମେଣ୍ଡା ତାଲକା ଲେହେଁ ମିଙ୍ଗେ ପାଣ୍ଡିମାଞ୍ଜାଇଁ □

୪ ତାରୁୟାଁ, ମଣା କି ସେପୁୟାଁ ଜିକେଏ ଅଥାଦୁ, ଅଡ଼େ ଜିରୁତା ଆମ୍ବାଆରାଇଁ ଜହରା କିଆଦୁ □

୫ ଅଡ଼େ ମୀରୁ ଆମିନି ଇଲୁତା ହଡ଼ଦେରି ନଡ଼କଏ ଇ ଇଲୁତାକି ହିଡ଼ଡ଼ି ଆପେ ଇଞ୍ଜୁ □

୬ ଅଡ଼େ ଏ ଇଜ ହିଡ଼ଡ଼ିତି ମାଣସି ରଅସି ମାଟିହିଁ ମୀ ହିଡ଼ଡ଼ି ଏଞ୍ଜାଣାକି ଆପେ; ଅଡ଼େ ହିଲାଆତିହିଁ ମୀ ହିଡ଼ଡ଼ି ମିଙ୍ଗେ ଖେଣ୍ଡେ ଖାନେ □

୭ ✨ଇଞ୍ଜା ଏଞ୍ଜାରିତାଣା ଏନାୟି ମାନେ ଏଦାଆଁ ତିଞ୍ଜା ଉଣ୍ଡାନା ଏ ଇଜ ମାଞ୍ଜୁ, ଇଟିହିଁ କାମାକିନାସି ତାନି କାମାତି ବୁଡ଼ି ମେଡ଼ା ଆନାୟି ମାନେ □ ଏ ଇଜ ପିସାନା ଅର ଇଜ ହାଲାଆଦୁ □

୮ ଅଡ଼େ ଆମିନି ଗାଡ଼ାତା ହାଜେରି ଅଡ଼େ ଲକୁ ମିଙ୍ଗେ ଅପାନେରି ଅଡ଼େ ଏମ୍ବାଆଁ ଏନାଆଁ ତିଞ୍ଜାଲି ହିୟାନେରି ଏଦାଆଁ ତିଞ୍ଜୁ □

୯ ଏମ୍ବାଆଁ ମାନି ରଗ ଗାଟାରାଇଁ ନେହିଁ କିଦୁ, ଅଡ଼େ ଏଞ୍ଜାରାଇଁ ଏଲେଇଞ୍ଜୁ ‘ମାହାପୁରୁତି ରାଜି ମୀ ତାଣା ଏଦାତେୟିଏ □’

୧୦ ✨ସାମା ମୀରୁ ଆମିନି ଗାଡ଼ାତା ହାଜେରି ଇଞ୍ଜା ଲକୁ ମିଙ୍ଗେ ଅପଅରି, ଏମ୍ବାତି ଆଂଗେଣିକାଟି ପାଙ୍ଗାତା ହାଜାନା ଏଲେଇଞ୍ଜୁ,

୧୧ ✨‘ମୀ ଗାଡ଼ାତି ଆମିନି ଦୁଡ଼ି ମା କଡ଼ାୟାଁଣା ଆଟାମାତେ, ଏଦାଆଁ ଜିକେଏ ମିଙ୍ଗେ ତାକି ହାଣ୍ଡି ମାନମି; ସାମା ମାହାପୁରୁତି ରାଜି ଏଗାଞ୍ଜାହିମାନେ ଇଦାଆଁ ପୁଞ୍ଜୁ □’

୧୨ ✨ନାନୁ ମିଙ୍ଗେ ଖେସିମାଞ୍ଜାଇ, ନୀହାୟି ଦିନାତା ଏ ଗାଡ଼ାତି ତଣ୍ଡ କିହାଁ ସଦମ ଗାଡ଼ାତି ତଣ୍ଡ ଉଣା କିଞ୍ଜିଆନେ □

ନାମାଆଗାଟି ନାସ୍‌କା

(ମାତି ୧୧:୨୦-୨୪)

୧୩ ଆୟତା ତଣ୍ଡ ପାଣ୍ଡିନି କରାଜିନ୍ ଅଡ଼େ ବେଡ଼ସାୟିଦା ଇଟିହିଁ ମୀ ତାଣା ଆମି ଆମିନି କାବାଆନି କାମାୟାଁ କିଞ୍ଜିଆହାମାନୁ, ଏ ବାରେ ସର ଅଡ଼େ ସିଦନତା କିଞ୍ଜି ଆହାମାଟିହିଁ ମା, ଏଞ୍ଜାରି ହାରେକା ଦିନା ନଡ଼କଏ ବାସ୍ତାୟାଁ ପରହାଁ ଦାରମ୍ବତୁା କୁଗାନା ମନ୍ ଖେଟ୍‌ହେରିମା □

✨ ୧୦:୭ ୧୦:୭ ୠକର ୯:୧୪; ୠଡ଼ିମ ୫:୧୮ ✨ ୧୦:୧୦ ୧୦:୧୦ କାମା ୧୩:୫୧
✨ ୧୦:୧୧ ୧୦:୧୧ ମାତି ୧୦:୭-୧୪; ମାକ ୭:୮-୧୧; ଲୁକ ୯:୩-୫ ✨ ୧୦:୧୨ ୧୦:୧୨
ମାତି ୧୧:୨୪ମାତି ୧୦:୧୫

୧୪ ଆଡ଼ିଜିକେଏ ନାହାଁୟି ଦିନାତା ସର ଅଡ଼େ ସିଦନତି ଡଣ୍ଡ ଉଣା କିଞ୍ଚିଆନେ □

୧୫ ଏ କପରନାହୁମ ନୀନୁ ଲାକପୁରୁ ପାତେକା ପାତାଆଡ଼ି ? ହାଡ଼ାରି ମାନି ରାଜିତା ମେଡ଼ପି ଆଡ଼ି □”

୧୬ *ଜୀସୁ ଏଲେଇଚେସି “ଆମ୍ବାଆସି ମୀ କାତା ଝେନେସି, ଏଞ୍ଜାସି ନା କାତା ଝେନେସି, ଇଞ୍ଜା ଆମ୍ବାଆସି ମିଙ୍ଗେ ଅପଅସି ଏଞ୍ଜାସି ନାଙ୍ଗେ ଅପଅସି, ଅଡ଼େ ଆମ୍ବାଆସି ନାଙ୍ଗେ ଅପଅସି ଏଞ୍ଜାସି ନାଙ୍ଗେ ପାଣ୍ଡାତାଣାଇଁ ଅପଅସି □”

ତାନିକଡ଼ି ବାରଜାଣା ଝେଣ୍ଡା ଝାନାୟି

୧୭ ଏମ୍ବାଟିଏ ତାନିକଡ଼ି ବାରଜାଣା ଝେଣ୍ଡା ଝାହାନା ରାହାଁଟି ଏଲେଇଚେରି, “ପ୍ରୁ ବୁଡୁୟାଁ ଜିକେଏ ନୀ ଦରୁଟି ମା ଡ଼ଇକା ହେରପି ଆହିମାନୁ □”

୧୮ ସାମା ଜୀସୁ ଏଞ୍ଜାରାଇଁ ଏଲେଇଚେସି, “ହାଗୁ ମିହ୍ନିଲେହେଁ ଲାକଟି ସୟତାନ ରିହିମାନାଣି ମେସ୍ତେଏଁ □

୧୯ ମେହ୍ଦୁ ନାନୁ ମିଙ୍ଗେ ରାସ୍କା, କାରାକୁପିୟା ମୁହେଁ ତାକାଲି ଅଡ଼େ ସାଡୁଡ଼ି ବାରେ ବାଡ଼ୁୟାଁ ମୁହେଁ ଜିକେଏ ଅଦିକାରା ହାହିମାଞ୍ଜାଇଁ, ଅଡ଼େ ଏନାୟି ଜିକେଏ ମିଙ୍ଗେ ନସ୍ତ କିହାଲି ଆଡ଼େଏ □

୨୦ ସାମା ପଲ୍ଲଆ ବୁଡୁୟାଁ ବାଡ଼ୁୟାଁ ମୀ ଡ଼ଇକା ମାନେ ଇଞ୍ଜାଁ ରାହାଁ ଆଆଦୁ, ସାମା ମୀ ଦରୁ ଲାକପୁରୁ ରାସ୍କି ଆହାମାନେ ଏଡ଼ାଆଁତାକି ରାହାଁ କିଦୁ □”

ଜୀସୁତି ରାହାଁ

(ମାତି ୧୧:୨୫-୨୭; ୧୩:୧୬,୧୭)

୨୧ ଏତିବେଲା ଜୀସୁ ସୁଦୁଜୀଝୁ ତଲେ ରାହାଁ ଆହାନା ଏଲେଇଚେସି, “ଆବା ଲାକପୁରୁ ଅଡ଼େ ଦାରତିତି ପ୍ରୁ, ନୀନୁ ବୁଦିଗାଟି ଲକୁତାଣା ଇ ବାରେ କାତା ଡ଼କୁହାନା ଉଣା କକାରି ତାଣା ତସାମାଞ୍ଜି, ଇଦାଆଁତାକି ନିଙ୍ଗେ ଜହରା କିହିମାଞ୍ଜାଇଁ; ଏ ଆବା ଇଦିଏ ନୀ ନକିତା ନେହାୟି ଆଡ଼େ □”

☆ ୧୦:୧୬ ୧୦:୧୭ ମାତି ୧୦:୪୦; ମାର୍କ ୯:୩୭; ଲୁକ ୯:୪୮; ଜହ ୧୩:୨୦

୨୨ ☆ “ନା ଆବାତି ବାରେ ଅଦିକାରା ନାଲେ ହେରପି ଆହାମାନେ; ଅଡେ ମାରୁଏସି ଆମ୍ବାଆସି, ଇଦାଆଁ ଆବା ପିସ୍‌ପେ ଆମ୍ବାଆସି ପୁନଅସି, ଅଡେ ଆବା ଆମ୍ବାଆସି ଇଦାଆଁ ମାରୁଏଶା ପିସ୍‌ପେ ଆମ୍ବାଆସି ପୁନଅସି, ଇଞ୍ଜା ମାରୁଏସି ଆମ୍ବାଆରି ତାଣା ଏଞ୍ଜାଣାଇଁ ତସାଲି ମନ କିନେସି, ଏଞ୍ଜାସିଦେଁ ପୁନେସି □”

୨୩ ଅଡେ ଜୀସୁ ତାୟୁ ସିନିକିହାନା ତାମି ସୀସୁୟାଁଇ ଏଡକେଏ ଏଲେଇରେସି, “ହାରେକା ନେହେଁ ଏ କାଶକା ଏମିନିଗାଟାଣି ମେସିମାନୁ, ଏନାଆଁ ମାରୁ ମେସିମାଞ୍ଜେରି □

୨୪ ଇଚିହୁଁ ନାନୁ ମିଙ୍ଗେ ଖେସିମାଞ୍ଜାଇଁ, ମାରୁ ଏନା ଏନାଆଁ ମେସିମାଞ୍ଜେରି ଏ ବାରେ ହାରେକା ମାହାପୁରୁ ଅଣ୍‌ପୁତି ବଲୁ ଖେହନାରି ଅଡେ ରାଜାୟାଁ ମେସାଲି ମନ କିହାମାରେରି, ସାମା ମେସାଲି ଆଡାଆତେରି; ଅଡେ ମାରୁ ଏନା ଏନାଆଁ ଖେଞ୍ଜିମାଞ୍ଜେରି, ଏ ବାରେ ଏଞ୍ଜାରି ଖେଞ୍ଜାଲି ମନ କିତେରି ସାମା ଖେଞ୍ଜାଲି ଆଡାଆତେରି □”

ନେହୁଁ ସମିରଣତି ପୁଣ୍ଠିକିନି କାତା

୨୫ ☆ ମେହୁଁ ର ମସାତି ମେରା ଜାପୁନାସି ଖାହାନା ଜୀସୁଇଁ ତାୟିପାରିକିହୁଁ ଖେରେସି, “ଏ ଗୁରୁ କାଲାକାଲାତି ଜୀଞ୍ଜୁ ବେଟାଆହାଲି ନାନୁ ଏନାଆଁ କିଇଁ ?”

୨୬ ଏରେଟିଏ ଜୀସୁ ଏଲେଇରେସି, “ମସାତି ମେରାତା ଏନାଆଁ ରାସ୍‌କି ଆହାମାନେ, ନୀନୁ ଏନିକିଁ ପଡ଼ଞ୍ଜି ଆହିମାଞ୍ଜି ?”

୨୭ ଏଞ୍ଜାସି ଏଲେଇରେସି, “ନୀନୁ ନୀ ବାରେ ହିୟାଁ, ବାରେ ଜୀଞ୍ଜୁ, ବାରେ ବାଡ଼ୟୁ ଅଡେ ବାରେ ମନ ହୀହାନା ପ୍ରୁ ନୀ ମାହାପୁରୁଇଁ ଜୀଞ୍ଜୁନମୁ; ଅଡେ ପାଡ଼ିତି ଲକୁଣି ନୀ ଜୀଞ୍ଜୁ ଲେହେଁ ଜୀଞ୍ଜୁ ନମୁ □”

୨୮ ଏରେଟିଏ ଜୀସୁ ଏଞ୍ଜାଣାଇଁ ଏଲେଇରେସି, “ନୀନୁ ନେହୁଁ କିଁ ଖେସାମାଞ୍ଜି; ଏଲେଏ କିମୁ ଆତିହୁଁ ଏ ଜୀଞ୍ଜୁ ମେଡ଼ିକିଦି □”

☆ ୧୦:୨୨ ୧୦:୨୨ ଜହ ୩:୩୫; ଜହ ୧୦:୧୫ ☆ ୧୦:୨୫ ୧୦:୨୫ ମାତି ୨୨:୩୫-୪୦; ମାର୍କ ୧୨:୨୮-୩୪

୨୯ ସାମା ଏଞ୍ଜେଲ୍ ତାଙ୍କେ ତୀରିତାସି କିହାକତାଲି ମନ କିହାନା ଜାସୁଇଁ ଖେଚେସି, “ଆତିହୁଁ ନା ପାଡ଼ିତାସି ଆମ୍ବାଆସି ?”

୩୦ ଜାସୁ ଏ କାତା ଆସାନା ଏଲେଇଚେସି, “ର ଲକୁ ଜିରୁସାଲମଟିଏ ଜିରିହତା ହାଜିମାଚାଟି ସରକା ତାଣା ହେରହେସି □ ଏଞ୍ଜାରି ଏଞ୍ଜାଣି ହିମ୍ବରିଦୁକି ମୀଞ୍ଜାନା ହାନିଲେହେଁ ମାଡ଼ା ଖେଚାନା ପିସା ହାଚେରି □

୩୧ ଏଚିବେଲ୍ଲାତା ର ପୂଜେରା ଏ ଜିରୁଟି ହାଜିମାଚେସି, ଇଞ୍ଜା ଏଞ୍ଜାସି ଏଞ୍ଜାଣାଇଁ ମେସାନା ଜିରୁ ପିସାନା ଅର ଜିରୁଟି ହାଚେସି □

୩୨ ଏଲେକିହୁଁ ଏ ର ଲେବି କୁଡ଼ାତାସି ଜିକେଏ ଏ ଜିରୁଟି ଖାହାନା ଏଞ୍ଜାଣାଇଁ ମେସାନା ଅର ଜିରୁ ହୀହାନା ହାଚେସି □

୩୩ ସାମା ର ସମିରଣ ଲକୁ ଏ ଜିରୁଟି ହାଜିମାଚେସି, ଇଞ୍ଜା ଏଞ୍ଜାଣାଇଁ ମେସାନା ହାଚେକା କାର୍ମା ଆଡେସି,

୩୪ ଅଡ଼େ ତାଗେ ହାଜାନା ଏଞ୍ଜାଣି ଗାହ୍ନାୟାଁ ବାରେ ନିୟୁଁ ଅଡ଼େ ଅଲ୍ଲୁରି ରାସା ରୁବାନା ଗାହ୍ନାୟାଁଣା ଦସ୍ପାନା ଏଞ୍ଜାଣାଇଁ ର ଗାଡ଼ଦେ ଲାକ କୁଗିକିହାନା ର ସେବାକିନି ଇଲୁତା ଅହାନା ଏଞ୍ଜାଣି ସେବା କିଡେସି □

୩୫ ଅର ଦିନା ସେବାକିନି ଇଲୁ ଗାଚାଣାକି ରୀ କାନି ହୀହାନା ଏଲେଇଚେସି, ‘ଇଞ୍ଜାଣି ସେବା କିମ୍ପୁ ଅଡ଼େ ଏଚେକା ଗାଡ଼ି କାର୍ତୁ ଆନୁ, ଖେଶ୍ଟା ଖାନାଟି ବାରେ ହିୟାଇଁ □’ ”

୩୬ ଜାସୁ ଏଲେଇଚେସି, “ଇ ତାନି ଜାଣାତି ବିତ୍ରା ଆମ୍ବାଆସି ସରକାତାଣା ହେରହା ମାଚାଣି ପାଡ଼ିତାସି ଇଞ୍ଜୁଁ ଅଶ୍ପିମାଞ୍ଜେରି ?”

୩୭ ଏ ମେରା ଜାପ୍ନାସି ଏଲେଇଚେସି, “ଆମ୍ବାଆସି ଏଞ୍ଜାଣାଇଁ କାର୍ମା ଆଡେସି ଏଞ୍ଜାସି □”

ଜାସୁ ଏଲେଇଚେସି, “ହାଲ୍ଲାମୁ ନୀନୁ ଜିକେଏ ଏଲେଏ କିମ୍ପୁ □”

ଜାସୁ ମାର୍ତ୍ତା ଅଡ଼େ ମରିୟମନି ଇଜ

୩୮ ☆ଏଞ୍ଜାରି ହାଜିମାନି ବେଲ୍ଲାତା ର ନାୟୁଁତା ହାଚେରି, ଇଞ୍ଜା ମାର୍ତ୍ତା ଦରୁଗାଟି ର ଇୟା ଜାସୁଇଁ ତାନି ଇଜ ହାଡ଼ିଡେ □

୩୯ ଏଦାନାକି ର ତାଜି ମାତେ ଏଦାନି ଦରୁ ମରିୟମ, ଏଦି ପ୍ରବୁତି କର୍ତ୍ତା ତ୍ତଇ କୁଗାନା ଏଞ୍ଜାଣି କାତା ଖେଞ୍ଜିମାତେ □

୪୦ ସାମା ମାର୍ତ୍ତା ରାନ୍ଦା ଖାଜାଲି ହାରେକା କିଲିବିଲି ଆହିମାତେ; ଇଦାଆଁତାକି ଜୀସୁ ତାଣା ଖାହାନା ଏଲେଇଚେ, “ଏ ପ୍ରବୁ ନା ତାଜି ଖାଜିନି କାମା ବାରେ ନା ଲାକ ହେରପା ମାଞ୍ଜାନେ ଇଦାଆଁ ଅଣ୍ଡିପି ହିଲଅତି କି ? ଇଦାଆଁତାକି ନାଜେ ସାୟେମି କିହାଲି ଏଲେଇନାମୁ □”

୪୧ ସାମା ପ୍ରବୁ ଏଲେଇଚେସି, “ମାର୍ତ୍ତା, ମାର୍ତ୍ତା ନୀନୁ ହାରେକା କାମାତା ଅଣ୍ଡିପିହି କିଲିବିଲି ଆହିମାଞ୍ଜି,

୪୨ ସାମା ଖାରଇ ର କାତା ଲଡ଼ାମାନେ □ ମରିୟମ ଏ ନେହି କାତା ବାଟି କିହାମାନେ; ଏଦାଆଁ ଏଦାନି ତାଣାଟି ଅଢ଼ି ଆଏ □”

୧୧

ଜୀସୁ ଜାପ୍‌ହାମାନି ପ୍ରାତାନା

(ମାତି ୭:୯-୧୩; ମାତି ୭:୭-୧୧)

୧ ର ଦିନା ଜୀସୁ ର ଚାୟୁତା ପ୍ରାତାନା କିହିମାତେସି; ଏଞ୍ଜାସି ପ୍ରାତାନା କିହାଲି ରାପ୍‌ହାଲିଏ, ତାନି ସୀସୁୟା ବିତ୍ରାଟି ରଅସି ଏଲେଇଚେସି, “ଏ ପ୍ରବୁ, ଜହନ ଏନିକି ତାନି ସୀସୁୟାଙ୍କୁ ପ୍ରାତାନା କିହାଲି ଜାପ୍‌ହି ମାତେସି, ନୀନୁ ଜିକେଏ ମାଜେ ଏଲେକିହିଏ ପ୍ରାତାନା କିହାଲି ଜାପ୍‌ହାମୁ □”

୨ ଏଚେଟିଏ ଜୀସୁ ଏଞ୍ଜାରାଇଁ ଏଲେଇଚେସି, “ଏଚିବେଲା ମୀରୁ ଏଲେଇଞ୍ଜି ପ୍ରାତାନା କିଦୁ;

ଏ ଆବା

ନୀ ଦରୁ ନେହାୟି ଇଞ୍ଜି ମାନଢ଼ି ଆପେ;

ନୀ ରାଜି ଖାପେ □

୩ ବାରେଦିନା ମାଜେ ଲଡ଼ା ଆନି ରାନ୍ଦା ହିୟାମୁ □

୪ ମା ଦହ ବାରେ ମ୍ବେକ୍‌ହାମୁ,

ଋଚିହି ମାମ୍ବୁ ଜିକେଏ ମା ଦହ କିତାରାଇଁ ମ୍ବେକ୍‌ନମି □

ମାଜେ ପାନ୍ଦାତା ମେଡ଼ହାଆନି □’ ”

୫ ଅଡ଼େ ଏଝାସି ଏଝାରାଇଁ ଏଲେଇରେସି, “ମୀ ତାଣା ଆମ୍ବାଆସି
ଇଲେତି ତଢେଏସି ମାନେସି, ଆମ୍ବାଆରି ତାଣା ମାଦି ଲାଆଁୟା
ହାଜାନା ଏଲେଇନେସି, ‘ଏ ତଢେ ନାଞେ ତାନିଗଟା ରୁଟି ହିୟାମ୍ବୁ,

୬ ଇତିହିଁ ନା ଗତାଗାଟି ତଢେଏସି ନା ତାଣା ଝାହାମାନେସି,
ଏଝାଣାକି ତିଞ୍ଜାଲି ହୀହାଲି ନା ତାଣା ଏନାୟିଝା ହିଲେଏ □’

୭ ଅଡ଼େ ବିତ୍ତାଟି ଏଲେଇନେସି, ‘ନାଞେ କସ୍ତୁ ହିୟାଆନି; ଦାରା
ସୁଣ୍ଡକି ଆଡେୟିଏ, ଇଞ୍ଜା ନା ମୀରକା ନା ତଲେ ତୁରା ମାନେରି;
ନାନୁ ନିଙ୍ଗାନା ହୀହାଲି ଆଡ଼ଅଁ □’

୮ ନାନୁ ମିଙ୍ଗେ ଝେସିମାଞ୍ଜାଇଁ, ଏଝାସି ତାନି ତଢେଏସି
ଆହାମାନାକି ଲାଜା ପିସାନା ଅଲେ ଅଲେ ରୀସ୍ତାକି ଏଝାସି ନିଙ୍ଗାନା
ଏଝାଣି ଲତାମାନି ପାତେକା ଏଝାସି ଏଝାଣାକି ହୀନେସି □”

୯ ନାନୁ ଜିକେଏ ମିଙ୍ଗେ ଝେସିମାଞ୍ଜାଇଁ, ରୀହ୍ତୁ ଆତିହିଁ ମିଙ୍ଗେ
ହୀପକିଆନେ; ପାରାତୁ ଆତିହିଁ ମେଡ଼ି କିଦେରି; ଦୁଝେରିତା ଝେଡୁ
ଆତିହିଁ ମିଙ୍ଗେତାକି ଦାରା ଦେପି ଆନେ □

୧୦ ଇତିହିଁ ଆମ୍ବାଆସି ରୀହ୍ନେସି ଏଝାସି ବେଟାଆନେସି;
ଆମ୍ବାଆସି ପାରିନେସି ଏଝାସି ମେଡ଼ି କିନେସି; ଅଡ଼େ ଆମ୍ବାଆସି
ଦୁଝେରିତା ଝେନେସି ଏଝାଣି ତାକି ଦାରା ଦେପିଆନେ □

୧୧ “ଅଡ଼େ ମୀ ତାଣା ଇଲେତି ଆମିନି ଆବା ମାନେସି, ତାନି
ମୀରଏସି ମୀନୁ ରୀସ୍ତିସାରେ ଏଝାସି ମୀନୁତି ବାଦୁଲି ରାତୁ ହୀନେସି
?”

୧୨ ଅଡ଼େ ଗୁଡୁ ରୀସ୍ତିସାରେ ଏଝାଣାକି କାଚାକୁପି ହୀନେସି ?

୧୩ ଇଦାଆଁତାକି ମୀରୁ ଲାଗେଏ ପଲେଏତି ଲକୁ ଆଡ଼ିଜିକେଏ ମୀ
ମୀରକା ମାସ୍ତାକି ନେହାଁଣି ହୀହିମାଞ୍ଜେରି, ଆତିହିଁ ଆମିନି ଆବା
ଲାକପୁରୁଟି ହୀହିମାଞ୍ଜାନେସି, ଏଝାସି ତାନି ତାଣା ରୀହ୍ନି ଲକୁକି
ଏତେ ହାରେକା ସୁଦୁଜୀଝୁ ହୀଅସି □”

ଜୀସୁ ଅଡ଼େ ପଲ୍ଲଆ ବୁଡୁ

(ମାତି ୧୨:୨୨-୩୦; ମାର୍କ ୩:୨୦-୨୭)

୧୪ ଜୀସୁ ର ପାଲି ବୁଡୁ ପେରହି ମାତେସି ଏ ବୁଡୁ ଗୁଲା □ ବୁଡୁ
ଏଝାଣି ତାଣାଟି ହଟା ହାଜାଲିଏ ଏ ଗୁଲା ଜଲିତେସି; ଏମ୍ବାଟିଏ ଲକୁ
ବାରେ କାବା ଆଡେରି □

୧୫ ☆ସାମା ଏଝାରି ବିତ୍ରାଟି ଆମ୍ବା ଆମ୍ବାଆରି ଏଲେଇଚେରି,
 “ଏଝାସି ପଲ୍ଲଆ ବୁତୁୟାଁ କାଜା ପେନୁ ବାଲ୍ଲଜିବୁଲ୍ ବୁତୁ ତଲେ
 ବୁତୁୟାଁ ପିସ୍ପି କିହିମାନେସି □”

୧୬ ☆ଇଞ୍ଜା ଏଚ୍ଚକାତାରି ଏଝାଣାଇଁ ତାୟିପାରି କିହାଲିତାକି ଏଝାଣି
 ତାଣାଟି ହାଗୁଟି ର ସିନା ରୀସ୍ତେରି □

୧୭ ସାମା ଏଝାସି ଏଝାରି ମନତି ଅଣ୍ପୁ ପୁଞ୍ଜାନା ଏଝାରାଇଁ
 ଏଲେଇଚେସି, ଆମିନି ରାଜି ବାଗା ଆହାନା ତାନି କପାଟି ନିଜିନେ
 ଏଡି ନାସା ଆହାହାନେ ଇଞ୍ଜା ଇଲୁ ଲାକ ବାରେ ରିହାହାନେ □

୧୮ ଇଞ୍ଜା ସୟତାନ ବାଗା ଆହାନା ଜାହାରା କପାଟି ନିଜିନେ,
 ଇଚିହିଁ ତାନି ରାଜି ଏନିକିଁ ତୀରିଆହାନା ତୁୟିନେ? ନାନୁ ପଲ୍ଲଆ
 ବୁତୁୟାଁ ବାଲ୍ଲଜିବୁଲ୍ ତଲେ ବୁତୁୟାଁ ପିସ୍ପି କିହିମାଇଁ ଇଞ୍ଜିମାଞ୍ଜେରି
 □

୧୯ ସାମା ନାନୁ ପଲ୍ଲଆ ବୁତୁୟାଁ ବାଲ୍ଲଜିବୁଲ୍ ତଲେ ବୁତୁୟାଁ ପିସ୍ପି
 କିହିମାଇଁ, ଆତିହିଁ ମୀ ମୀରକା ଆମ୍ବାଆରି ବାଡ଼ୁୟୁ ତଲେ ପିସ୍ପି
 କିନେରି? ଇଞ୍ଜା ଏଝିଏ ମିଞ୍ଜେ ନୀହାଁୟି କିୟାନୁ □

୨୦ ସାମା ନାନୁ ମାହାପୁରୁ ବାଡ଼ୁୟୁ ତଲେ ବୁତୁୟାଁ ପିସ୍ପି କିହିମାଇଁ
 ଇଚିହିଁ ମାହାପୁରୁତି ରାଜି ମୀ ତାଣା ଏଗାଞ୍ଜାଚେୟିଏ □

୨୧ ବାଡ଼ୁୟୁଗାଟି ଲକୁ ଏଚେପାତେକା ଆସ୍ତି ଆସାନା ତାନି ଗାଡ଼ାତି
 ଗେଲ୍ପିନେସି, ଏଚିବେଲା ପାତେକା ତାନି ଦନ ଗେଲ୍ପିଆହାନା
 ତୁୟିନେ;

୨୨ ସାମା ଏଚିବେଲା ଏଝାଣି କିହାଁ ହାଚେକା ବାଡ଼ୁୟୁଗାଟି ଲକୁ
 ଏଝାଣିତଲେ ଦୁଜୁ କିହାନା ଜୀଣା ଆନେସି, ଏଚିବେଲା ଏଝାସି
 ଆମିନି ଆସ୍ତିତି ବାସ୍ତି କିହାମାଚେସି, ଏ ବାରେ ଏଝାସି ମୀଞ୍ଜା ଅନେସି,
 ଇଞ୍ଜା ମୀଞ୍ଜା ଅହାମାନି ଦନ ବାଟିକିହା ଅନେରି □

୨୩ ☆ଆମ୍ବାଆସି ନା ଝାକିଟି ଆଆଗାଟାସି ଏଝାସି ନା ସାତୁ; ଇଞ୍ଜା
 ଆମ୍ବାଆସି ନା ତଲେ କୁଡ଼ି କିଅସି ଏଝାସି ଆଲାରା କିନାସି □

☆ ୧୧:୧୫ ୧୧:୧୫ ମାତି ୯:୩୪; ୧୦:୨୫ ☆ ୧୧:୧୬ ୧୧:୧୬ ମାତି ୧୨:୩୮; ୧୨:୧;
 ମାର୍କ ୮:୧୧ ☆ ୧୧:୨୩ ୧୧:୨୩ ମାର୍କ ୯:୪୦

ପଲ୍ଲଆ ବୃତ୍ତୁ ଝେଣ୍ଡା ଝାନାୟି
(ମାତି ୧୨:୪୩-୪୫)

୨୪ “ର ପଲ୍ଲଆ ବୃତ୍ତୁ ର ମାଣ୍ଡି ତାଣାଟି ହଟା ହାଜାନା ଏୟୁ ହିଲାଆ ଝାୟିତି ଚାୟୁତା ଜମାଲି ପାରିନେ, ଇଞ୍ଜା ମେଡ଼ି କିଆନା ଏଲେଇନେ, ‘ନାନୁ ଆମିନି ଇଲୁଟି ହଟା ଝାହାମାଚେର୍ସ, ଏ ଇଲୁତା ଝେଣ୍ଡା ହାଲ୍ଲୁ □’

୨୫ ଇଞ୍ଜା ଏଡ଼ି ଝେଣ୍ଡା ଝାହାନା ଏଦାଆଁ ଅଜିହ୍ନେ ନେହ୍ନେ ଆହାମାନାଣି ମେହ୍ନେ □

୨୬ ଏଟିରେଲା ଏଡ଼ି ହାଜାନା ତାନିକିହ୍ନା ହାରେକା ପଲ୍ଲଆଗାଟି ସାଡାଗଟା ବୃତ୍ତୁୟା ଆସାନା ଝାନେ, ଅଡ଼େ ବାରେଜାଣା ଏମ୍ବାଆଁ ହଡାନା ବାସା କିନୁ, ଇଞ୍ଜା ଏ ମାଣ୍ଡିତି ତଲିତି କସ୍ତ କିହ୍ନା ତାୟୁତି କସ୍ତ ହାରେକା ଆନେ □”

ଆସୁଲି ରାହ୍ନା

୨୭ ଜୀସୁ ଇ ବାରେ କାତା ଝେସିମାଗାଟି ଲକୁ ମାନ୍ଦା ବିତ୍ରାଟି ର ଇୟା କାଜା ଗିୟାତଲେ ଏଲେଇଚେ, “ଆମିନିଗାଟି ଇୟା ନିଙ୍ଗେ ଜାନି କିହାନା ପାଲୁ ଡର୍ହାତେ ଏ ଇୟା ହାରେକା ନେହ୍ନେ □”

୨୮ ସାମା ଜୀସୁ ଏଲେଇଚେସି, “ଆମ୍ବାଆରି ମାହାପୁରୁତି ବଲୁ ଝେନେରି ଅଡ଼େ ମାନୁଝି ଆନେରି ଏଝାରାକିଦେହ୍ନେ ନେହ୍ନେ □”

ସିନା ପାରିନାୟି
(ମାତି ୧୨:୩୮-୪୨)

୨୯ ☆ଲକୁ ମାନ୍ଦା ମାନ୍ଦା ଆହାନା ଏଝାଣି ତାଣା ରୁଣ୍ଡା ଆହାଲିଏ ଜୀସୁ ଏଝାରାଲ୍ଲୁ ଝେସ୍ତେସି, “ଇ କାଲାଟି ଲକୁ ହାରେକା ଲାଗେଏତାରି; ଇଝାରି ବାରେ ସିନାୟା ପାରିନେରି, ସାମା ଏଝାରାକି ଜୁନସତି ସିନା ପିସ୍ତେ ଏନି ସିନା ହାପ୍‌କିଆଏ □

୩୦ ଇଚିହ୍ନେ ଜୁନସ ଏନିକ୍‌ ନିନିବି ଲକୁତାକି ର ସିନାଲେହ୍ନେ, ମାଣ୍ଡି ମୀର୍‌ସସି ଜିକେଏ ଏଲେକିହ୍ନେ ଏ ଇ ଜୁଗୁତି ଲକୁତାକି ଆନେସି □

☆ ୧୧:୨୯ ୧୧:୨୯ ମାତି ୧୨:୪; ମାର୍କ ୮:୧୨

୩୧ ନୀହାଁୟି ଦିନାତା ସିବା ଦେସାତି ରାଣି ଇ କାଲାତି ଲକୁ ନକିତା ନିଚାନା ଏଞ୍ଜାରି କପାଟି ସାକିହୀନେ, ଇଚିହ୍ ଏଡ଼ି ସଲମନତି ବୁଦିକାତା ଖେଞ୍ଜାଲି ଦାରୁତିତି ହେକ ଦେସାଟି ଖାହାମାଚେ; ମେହ୍‌ଦୁ ସଲମନକିହାଁ କାଜାସି ଇମ୍ପାଆଁ ମାନେସି □

୩୨ ନୀହାଁୟି ଦିନାତା ନିନିବି ଗାଡ଼ାତି ଲକୁ ନିଚାନା ଏଞ୍ଜାରି କପାଟି ସାକି ହୀନେରି, ଇଚିହ୍ ଏଞ୍ଜାରି ଜୁନସ ଖେସ୍ତି କାତା ଖେଞ୍ଜାନା ଅଣ୍ପା କତାନା ମନ୍ ଖେର୍‌ହେରି; ମେହ୍‌ଦୁ ଜୁନସକିହାଁ ହାରେକା କାଜାସି ଇମ୍ପାଆଁ ମାନେସି □”

ଆଜ୍ଞାତି ଉଜେଡ଼ି

(ମାତି ୫:୧୫; ୬:୨୨,୨୩)

୩୩ ☆“ଆମ୍ବାଆରି ଦୀଞ୍ ଡ଼ୀସାନା ଡ଼କୁନି ଗାୟତା କି ମାଣା ପ୍ଲୁକ୍‌ହାନା ଇଚଅରି, ସାମା ଦୀଞ୍ ସଡ଼ାତା ଇଚିନେରି, ଏନିକ୍ ଇଲୁ ବିତ୍ତା ଖାନ୍ତି ଲକୁ ଉଜେଡ଼ି ମେହ୍‌ନେରି □

୩୪ ମୀ କାଣକା ଆଜ୍ଞାତି ଦୀଞ୍ ଏଚେତା ମୀ କାଣକା ନେହ୍ ମାନୁ ଏଚିବେଲା ପାତେକା ମୀ ଆଜ୍ଞା ବାରେ ଉଜେଡ଼ି ଆନେ; ସାମା ଏଚେତା ମୀ କାଣକା ନେହ୍ ହିଲାଉ ଇଚିହ୍ ଏଚେତା ମୀ ଗୁଡ଼ା ଆଜ୍ଞା ଜିକେଏ ଆନ୍ଦେରି ଆନେ □

୩୫ ଇଦାଆଁତାକି ଜାଗ୍ରାତା ଏନିକ୍ ମୀ ହିୟାଁତା ମାନି ଉଜେଡ଼ି ଆନ୍ଦେରି ଆଏ □

୩୬ ଏନାଆଁତାକି ଇଚିହ୍ ମୀ ଗୁଡ଼ା ଆଜ୍ଞା ବାରେ ଉଜେଡ଼ି ଆନେ ଇଞ୍ଜା ଏମ୍ପାଆଁ ଏନି ଆନ୍ଦେରି ଡ଼ୟେଏ, ଆତିହ୍ ଦୀଞ୍ ଏନିକ୍ ମିଙ୍ଗେ ତାହାଣା ଉଜେଡ଼ିତା ଉଜେଡ଼ି କିୟାନେ, ଏଲେକିହ୍ ଏ ମୀ ଗୁଡ଼ା ଆଜ୍ଞା ଉଜେଡ଼ି ଆନେ □”

ଜୀସୁ ପାରୁସି ଅଡ଼େ ମେରା ଜାପ୍‌ନାରାଇଁ ଦହ୍ ଦହ୍‌ନାୟି

(ମାତି ୧୩:୧-୩୬; ମାର୍କ ୧୨:୩୮-୪୦)

୩୭ ଜୀସୁ ଇ କାତା ଖେସ୍ତି ଡ଼ାୟୁ ର ପାରୁସି ଏଞ୍ଜାଣାଇଁ ତାନି ଇଜ ଡ଼ିଞ୍ଜାଲି ଏଲେଇଚେସି; ଇଞ୍ଜା ଏଞ୍ଜାସି ଇଜ ହାଜାନା ଡ଼ିଞ୍ଜାଲି କୁରିଚେସି □

☆ ୧୧:୩୩ ୧୧:୩୩ ମାତି ୫:୧୫; ମାର୍କ ୪:୨୧; ଲୁକ ୮:୧୭

୩୮ ସାମା ତିଞ୍ଜାଲି କୁଗିନି ନକେଏ ଏଞ୍ଜାସି କେସ୍ନା କଡାୟାଁ ନରହା ହିଲାଆତେସି, ଇଦାଆଁ ମେସାନା ଏ ପାରୁସି କାବା ଆଡେସି □

୩୯ ଏରେଟିଏ ପ୍ରବୁ ଏଞ୍ଜାଣାଇ ଏଲେଇରେସି, “ମୀ ପାରୁସିୟାଁତେରି ଗିନାୟାଁ ଅଡେ ସାଡ଼ଞ୍ଜାୟାଁ ପାଙ୍ଗାତା ନରହି ମାଞ୍ଜେରି, ସାମା ମୀ ବିତ୍ରା ଜୁପକା ଅଡେ ଲାଗେଏତାୟି ନେଞ୍ଜାମାନେ □

୪୦ ଆଡେ ବୁଦି ହିଲାଆଗାଟାତେରି, ଆମ୍ବାଆସି ପାଙ୍ଗାତାଣି ଗାଡ଼ିକିତେସି, ଏଞ୍ଜାସି ବିତ୍ରାତାଣି ଜିକେଏ ଗାଡ଼ି କିହାହିଲଅସି କି ?

୪୧ ସାମା ମୀ ସାଡ଼ଞ୍ଜାୟାଁ ଅଡେ ଗିନାୟାଁଣା ମାନାଣି ହିଲାଆ ଗାଟାରାକି ହୀତିହିଁ ମିଙ୍ଗେତାକି ବାରେଏ ଅବହାୟି ଆନେ □”

୪୨ ସାମା ଆୟଡ଼ା ଡଣ୍ଡ ପାଣ୍ଡି ପାରୁସିୟାଁତେରି, ଇତିହିଁ ମୀରୁ ହାସ୍ତୁ, ରାୟି ଇଞ୍ଜା ବାରେ କୁଚାତି ଦସ ବାଗାଟି ର ବାଗା ହୀହିମାଞ୍ଜେରି, ସାମା ନୀହାୟିତା ଅଡେ ମାହାପୁରୁତି ଜୀଞ୍ଜୁ ନନି ତାଣା ଅଣ୍ଡି ହିଲଅତେରି; ସାମା ଇ ବାରେ ମାନଞ୍ଜି ଆହାନା ଏଟକାତାଣି ହେଲା ଆନାୟି ହିଲେଏ □

୪୩ “ଆୟଡ଼ା ଡଣ୍ଡ ପାଣ୍ଡି ପାରୁସିୟାଁତେରି, ଇତିହିଁ ମୀରୁ ମାହାପୁରୁ ଇଲୁତା କାଜା ଟାୟୁ ଇଞ୍ଜା ହାଟା ବାଜାରାତା ଜହରା ବେଟାଆହାଲି ନେହେଁ ଅଣ୍ଡିଦେରି □

୪୪ ଆୟଡ଼ା ମୀରୁ ଡଣ୍ଡ ବେଟା ଆନାତେରି, ଇତିହିଁ ମୀରୁ ଡଞ୍ଜା ଆଆଗାଟି ମାଡ଼ହା ମୁହ୍ନି ଟାୟୁଲେହେଁ ତାତେରି; ଇତିହିଁ ପୁନାଆନା ଲକୁ ଲାକ ତାକି ମାନେରି □”

୪୫ ଏରେଟିଏ ମସାତି ମେରାପୁନାରି ବିତ୍ରାଟି ରଅସି ଏଲେଇରେସି, “ଏ ଗୁରୁ ନୀନୁ ଏଲେଇଞ୍ଜି ମାଙ୍ଗେ ଲାଜା କିହିମାଞ୍ଜାଡି □”

୪୬ ଜୀସୁ ଏଲେଇରେସି, ଆୟଡ଼ା ମସାତି ମେରା ପୁନାତେରି ମୀରୁ, ମୀରୁ ଜିକେଏ ଡଣ୍ଡ ବେଟାଆଦେରି, ଇତିହିଁ ମୀରୁ ମାଣ୍ଡିୟାଁ ଲାକ ବଜୁଗାଟି କାସ୍ତକା ଏକହି ମାଞ୍ଜେରି ଅଡେ ଏ ବଜୁତି ମୀରୁ ର ଞ୍ଜାଞ୍ଜୁ ତଲେ ଜିକେଏ ଡାଗଅତେରି □

୪୭ ଆୟଡ଼ା ଡଣ୍ଡ ବେଟା ଆନାତେରି ମୀରୁ ମାହାପୁରୁ ଅଣ୍ଡପୁତି ବଲୁ ଖେହ୍ନାରାଇଁ ପାୟାନା ଏଞ୍ଜାରି ମାଡ଼ହା ମୁହ୍ନି ଟାୟୁ ତିୟାରା କିହିମାଞ୍ଜେରି □

୪୮ ଇଚିହଁ ମୀରୁ ମୀ ଆକୁ ଆବାୟାଁ କାମାତା ସାକି ତସି ମାଞ୍ଜେରି ଇଞ୍ଜା ଏଞ୍ଜାରିଲେହେଁ ଆହିମାଞ୍ଜେରି; ଇଚିହଁ ଏଞ୍ଜାରିସାଁ ଏଞ୍ଜାରାଇଁ ପାୟାମାଚେରି, ସାମା ମୀରୁ ଏଞ୍ଜାରି ମୁହ୍ନି ଟାୟୁତି କାତିୟାଁ ନିପୁହି ମାଞ୍ଜେରି □

୪୯ ଇଦାଆଁତାକି ମାହାପୁରୁ ଜିକେଏ ତାନି ବୁଦିତଲେ ଏଲେଇଞ୍ଜା ମାନେସି, ନାନୁ ଏଞ୍ଜାରି ନକିତା ମାହାପୁରୁ ଅଣପୁତି ବଲୁ ଝେହ୍ନାରାଇଁ ଅଡେ ପାଣ୍ଡୁଞ୍ଜି ଆହାମାନାରାଇଁ ପାଣ୍ଡୁଇଁ; ଏଞ୍ଜାରି ବିତ୍ରାଟି ଆମ୍ବା ଆମ୍ବାଆରାଇଁ ପାୟିନେରି ଇଞ୍ଜା ନିୟା କିନେରି,

୫୦ ଇ ଜୁଗୁତି ଲକୁ ଦାରତି ଗାଡ଼ି ଆଡ଼ି ନକେଏଟିଏ ବାରେ ମାହାପୁରୁ ଅଣପୁତି ବଲୁ ଝେହ୍ନାରାଇଁ ପାୟିତାକି ତଣ୍ଡ ବେଟାଆନେରି,

୫୧ ଏନିକଁ ହେବଲଇଁ ପାୟିତି ଦିନାଟିଏ ଜିକରିୟ ପାତେକା ଆମ୍ବାଆରାଇଁ ମାହାପୁରୁ ଇଲୁତି ଡାକିନି ପିଣ୍ଡା ଅଡେ ସୁଦୁ ବାକ୍ତା ମାଦିଏ ପାୟୁଞ୍ଜି ଆହାମାଚେ □ ହାଅ, ନାନୁ ମିଙ୍ଗେ ସାତା ଝେସିମାଞ୍ଜାଇଁ, ଏଦାନି ବାଦୁଲି ଇ ଜୁଗୁତି ଲକୁ ଏ ବାରେତାକି ତଣ୍ଡ ବେଟାଆନେରି □

୫୨ ଆୟତା ତଣ୍ଡ ପାଣ୍ଡିନି ମେରା ପୁନାତେରି ମୀରୁ, ଇଚିହଁ ବୁଦି ଦେନି କୁଚିତି ଅହାମାଞ୍ଜେରି; ମୀରୁତ ହଡ଼ି ହିଲଅତେରି ସାମା ହଡ଼ାଲି ଅଣ୍ଡି ମାନାରାଇଁ ଆଂଗିମାଞ୍ଜେରି □

୫୩ ଜାସୁ ଏ ଇଜଟି ହାଜାଲିଏ ପାରୁସିୟାଁ ଅଡେ ମେରାପୁନାରି ହାରେକା ଡାହାରା ଆହାନା □

୫୪ ଏଞ୍ଜାଣି ଜଲିନି ହାଡ଼ାତା ଦହ ଆସାଲି ଏଞ୍ଜାଣାଇଁ ହାରେକା କାତା ଝେଚେରି □

୧୨

କୁଟୁ ଗାଟାରି ତାଣାଟି ଜାଗ୍ରାତା

(ମାତି ୧୦:୨୭,୨୭)

୧ ☆ଏଚିବେଲତା ମାଣା ମାଣା ଲକୁ ରୁଣ୍ଡା ଆହାନା ଡିସ୍ପି ଆହିମାଚେରି; ଏଚିବେଲା ଏଞ୍ଜାସି ନକେଏ ତାନି ସୀସୁୟାଁଇଁ

ଏଲେଇରେସି, ପାରୁସିୟାଁ ଲାଗେଏତି କୁଟୁଗାଟି ତାଣାଟି ଜାଗ୍ରାତା ଆହାନା ମାଞ୍ଜୁ □

୨ ✧ ସାମା ଏନାୟି ତଞ୍ଜା ଆଏ, ଇଲେକ୍ ସ୍ତୁପ୍ କି ଆହା ହିଲେଏ, ଅଡେ ଏନାୟି ପୁନାଆରେଟୁ ଇଲେକ୍ ଡଗୁମାନାୟି ଏନାୟି ହିଲେଏ □

୩ ଇଚିହିଁ ମୀରୁ ଏନା ଏନାଆଁ ଆନ୍ଦେରିତା ଝେସାମାଞ୍ଜେରି, ଏ ବାରେ ଉଜେଡିତା ଝେଶ୍‌ମିଆନେ, ଏନା ଏନାଆଁ ପୁନାଆ ରେଟୁ ଇଲୁ ବିତ୍ରା ଡଗୁମାନା ଝେସାମାଞ୍ଜେରି, ଏନାଆଁ ଇଲୁ ତୁଡିୟାତା ଝେପ୍‌କି ଆନେ □

ଆମ୍ବାଆରାଇଁ ଆଜିନାୟି
(ମାତି ୧୦:୨୮-୩୧)

୪ ଇଚିହିଁ ନା ତଝେସିଙ୍ଗାତେରି ମୀରୁ, ନାନୁ ମିଙ୍ଗେ ଝେସିମାଞ୍ଜାଇଁ, “ଆମ୍ବାଆରି ଆଙ୍ଗାତି ପାୟିନେରି ସାମା ତାୟୁ ଏନାଆଁ କିହାଲି ଆଡଅରି, ଏଞ୍ଜାରାଇଁ ଆଜାଆଦୁ □

୫ ସାମା ଆମ୍ବାଆରାଇଁ ଆଜିଦେରି ଏନାଆଁ ମିଙ୍ଗେ ଝେସ୍ତାଇଁ; ପାୟିତି କେଟ ହିଟୁ ଗାଡ଼ୟୁତା ମେଡହାଲି ଆମ୍ବାଆରି ଅଦିକାରା ମାନେ, ଏଞ୍ଜାଣାଇଁ ଆଜାଦୁ; ହାଅ ନାନୁ ମିଙ୍ଗେ ସାତା ଝେସିମାଞ୍ଜାଇଁ, ଏଞ୍ଜାଣାଇଁ ଆଜାଦୁ □”

୬ ପାସାଗଟା ଜେତା ପଟାୟାଁ ରୀ କାନି ତାକି ପାରପି ଆଡ କି ? ଆଡିଜିକେଏ ଏଞ୍ଜାସିକା ବିତ୍ରାଟି ରଣ୍ଡାଣି ଜିକେଏ ମାହାପୁରୁ ବାଣା ଆଅସି □

୭ ସାମା ମୀ ତାୟୁଁ ବାରେ ବାଣାୟାଁ ଜିକେଏ ଏଜିକିଞ୍ଜି ଆହାମାନୁ □ ଆଜା ଆଦୁ; ଏନାଆଁତାକି ଇଚିହିଁ ମୀରୁ ଜେତା ପଟାୟାଁ କିହା ହାଡେକା ଦାରା ଗାଟାତେରି □

ଲକୁ ନକିତା ଜୀସୁଇଁ ଝେକ୍‌ନାୟି
(ମାତି ୧୦:୩୨, ୩୩; ୧୨:୩୨; ୧୦:୧୯-୨୦)

✧ ୧୨:୨ ୧୨:୨ ମାର୍କ ୪:୨୨; ଲୁକ ୮:୧୭

୮ “ଅତେ, ନାନୁ ମିଜେ ୱେସିମାଞ୍ଜାଇଁ, ଆମ୍ବାଆସି ଲକୁ ନକିତା ନାଜେ ୱେକ୍‌ହାନେସି, ମାଣ୍‌ସି ମୀରୁଏସି ଜିକେଏ ମାହାପୁରୁତି ଦୁତୁୟାଁ ନକିତା ୱେକ୍‌ନେସି □

୯ ସାମା ଆମ୍ବାଆସି ଲକୁ ନକିତା ନାଜେ ୱେକ୍‌ହଅସି, ଏଞ୍ଜାଣାଇଁ ଜିକେଏ ମାହାପୁରୁ ଦୁତୁୟାଁ ନକିତା ୱେକ୍‌ଅସି □

୧୦ ☆ଇଞ୍ଜା ଆମ୍ବାଆସି ମାଣ୍‌ସି ମୀରୁଏଶା କପାଟି ଜଲିନେସି, ଏଞ୍ଜାଣି ପାପୁ ମେଣ୍‌ଜିନେ; ସାମା ଆମ୍ବାଆସି ସୁଦୁଜୀଞ୍ଜୁ କପାଟି ନିନ୍ଦା କାତା ଜଲିନେସି, ଏଞ୍ଜାଣି ପାପୁ ମେଣ୍‌ଜେଏଏ □

୧୧ ☆ଏତିବେଲା ଏଞ୍ଜାରି ମିଜେ ଜୀହୁଦି ଲକୁତି କୁଟମି ଇଲକାଶା*, ସାଲଞ୍ଜି କିନାରି ତାଶା ଇଞ୍ଜା ଅଦିକାରା ବେଟା ଆହାମାନାରି ତାଶା ଅହାନା ନିପ୍‌ହାନେରି ଏତିବେଲା ନା ୱାକିଟି ଆହାନା ଏନା ଏନାଆଁ ଜଲିନମି ଇଞ୍ଜା ଅଶପାଆଦୁ;

୧୨ ଇତିହଁ ଏନାଆଁ ଜଲିନାୟି ମାନେ, ଏଦାଣି ଏତିବେଲାତେଏ ସୁଦୁଜୀଞ୍ଜୁ ମିଜେ ଜାପ୍‌ହାନେ □”

ବୁଦି ହିଲାଆ ଦନ ଗାଗାସି

୧୩ ଲକୁ ମାନ୍ଦା ବିତ୍ରାଟି ରଅସି ଜୀସୁଇଁ ଏଲେଇଚେସି, ଏ ଗୁରୁ ନା ତାୟିଇଁ ମା ଆବାତି ଦନ ବାଟି କିହାଲି ଏଲେଇଞ୍ଜା ହିୟାମୁ □

୧୪ ସାମା ଜୀସୁ ଏଲେଇଚେସି, ଏ ତାୟି ଆମ୍ବାଆସି ନାଜେ ମୀ ମୁହେଁ ନାହାଁୟି କିହାଲି ମାଦି କିହାନା ଆଚାମାଞ୍ଜାନେସି ?

୧୫ ଇଞ୍ଜା ଏଞ୍ଜାସି ଏଞ୍ଜାରାଇଁ ଏଲେଇଚେସି, ଜାଗ୍ରାତା, ବାରେଞ୍ଜାକିତି ଜୁପ୍‌କାଟି ମିଜେ ଗେଲ୍‌ପିକିହା କତାଦୁ, ଇତିହଁ ର ମାଣ୍‌ସିତି ଜୀଞ୍ଜୁ ତାନି ଦନତି ବାର୍ଣ୍ଣୁ କିନେ □

୧୬ ଜୀସୁ ଏଞ୍ଜାରାଇଁ ଇ ପୁଣ୍‌ମିକିନି କାତା ୱେସ୍‌ସେସି, “ର ସାଞ୍ଜୁକାରିକି ବୁମିତା ଗାଡି ତାସା କାମ୍‌ପିତେ □

୧୭ ଏମ୍ବାଟିଏ ଏଞ୍ଜାସି ମନ ମନତା ଅଶ୍‌ପାନା ଏଲେଇଚେସି, ‘ନାନୁ ନୀଏଁ ଏନାଆଁ କିଇଁ ? ନା ଆର୍ନା କୁଡି କିହାନା ଇଗାଲି ଟାୟୁ ହିଲେଏ □’

☆ ୧୨:୧୦ ୧୨:୧୦ ମାତି ୧୨:୩୨; ମାର୍କ ୩:୨୯ ☆ ୧୨:୧୧ ୧୨:୧୧ ମାତି ୧୦:୧୯,୨୦; ମାର୍କ ୧୩:୧୧; ଲୁକ ୨୧:୧୪,୧୫ * ୧୨:୧୧ ୧୨:୧୧ ସିନଗର

୧୮ ଅତେ ଏଲେଇରେସି; ‘ନୀଏଁ ଇଲେ କିଇଁ ମାନି ଗାଦେୟିକା ରିକ୍‌ହାନା କାଜାଆଁ କିହାନା ଏମ୍‌ଆଁ ଗହ୍‌ୟାଁ ଇଞ୍ଜା ଏନ୍‌ ଏନ୍‌ ଆର୍‌ନା କୃଡ଼ି କିହାନା ଇଚିଇଁ,

୧୯ ଅତେ ନା ଜୀଝୁତି ଏଲେଇଇଁ, ଏ ଜୀଝୁ, ହାରେକା ବାସା ତାକି ନିଙ୍ଗେ ତାକି ଗାଡ଼ି ଆର୍‌ନା କୃଡ଼ି କିଞ୍ଜିଆହାମାନେ, ନୀଏଟି ଜମାନା ମନକିତି ଲେହେଁ ତିଞ୍ଜା ଉଣ୍ଡାନା ରାହାଁ କିମ୍‌ୁ’

୨୦ ସାମା ମାହାପୁରୁ ଏଞ୍ଜାଣାଇଁ ଏଲେଇରେସି, ଆଡେ ବୁଦି ହିଲିଆଗାଗାତି, ନୀଞ୍ଜୁ ଲାଆଁୟାଁ ନୀ ଜୀଝୁ ନୀ ତାଣାଟି ଅଞ୍ଜିଆନେ; ଏରେଟିଏ ନୀନୁ କୃଡ଼ିକିହା ଇଟାମାନି ବାରେ ଦନ୍‌ ଆମ୍‌ଆଆରାଞ୍ଜାୟି ଆନେ □”

୨୧ ଜୀସୁ ଏଲେଇରେସି, “ଆମ୍‌ଆସି ତାଙ୍ଗେତାକି ଦନ୍‌ କୃଡ଼ି କିନେସି, ସାମା ମାହାପୁରୁ ତାଣା ଦନ୍‌ଗାଗାସି ଆଅସି, ଏଞ୍ଜାସି ଇଞ୍ଜାଣି ଲେହେଁତସି □”

**ଅଶ୍‌ପାଆଦୁ
(ମାତି ୭:୨୫-୩୪)**

୨୨ ଜୀସୁ ତାନି ସୀୟୁୟାଣି ଏଲେଇରେସି, ଇଦାଆଁତାକି ମିଙ୍ଗେ ଝେସିମାଞ୍ଜାଇଁ, ଏନାଆଁ ତିନାୟି, ଇଲେକ୍‌ ମୀ ଜୀଝୁତାକି, ଏନାଆଁ ତୁରନାୟି ଇଲେକ୍‌ ମୀ ଆଙ୍ଗା ତାକି ଜିକେଏ ମୀରୁ ଅଶ୍‌ପାଆଦୁ □

୨୩ ଇଚିହ୍‌ ରାନ୍‌ କିହାଁ ଜୀଝୁ କାଜାୟି ଅଡେ ହିମ୍‌ରିକା କିହାଁ ଆଙ୍ଗା କାଜାୟି □

୨୪ ପଗାୟାଁଣି ସିନିକିନ୍‌, ଏଞ୍ଜି ମାଗାଉ କି ଦାଉ, ଇଞ୍ଜା ଏଞ୍ଜାସିକା ଗାଦେୟିକା ହିଲାଇ, ଅଡେ ମାହାପୁରୁ ଏଞ୍ଜାସିକାକି ତିନି କାଦି ହୀନେସି; ମୀରୁ ପଗାୟାଁ କିହାଁ ଏରେକା କାଜାତେରି □

୨୫ ଅଡେ ମୀ ବିତ୍ରାଟି ଆମ୍‌ଆଆତେରି ଅଶ୍‌ପି ଅଶ୍‌ପିହ୍‌ ମୀ ଜୀଝୁତି ଆଗାଡ଼ା ପାଡ଼ିକିହାଲି ଆଡ଼ିଦେରି ?

୨୬ ମୀରୁ ର ଉଣା କାମାତି କିହାଲି ଆଡ଼ିହିଲଅତେରି, ଆଡ଼ିହ୍‌ ଏଟକାତି କାତା ଏନାଆଁତାକି ଗାଡ଼ି ଅଶ୍‌ପିମାଞ୍ଜେରି ?

୨୭ ଜାଡ଼ାତି ପୂଞ୍ଜାଣି ସିନିକିହାଁ ଅଶ୍‌ପାଦୁ, ଏଞ୍ଜି ଏନ୍‌ କାମା କିଉ; ଆଡ଼ିଜିକେଏ ନୀନୁ ମିଙ୍ଗେ ଝେସିମାଞ୍ଜାଇଁ, ସଲମନକି ବାରେ

ଅଜିତାୟି ମାରିହୁଁ ଜିକେଏ ଏଝାଣାକି ଇ ପୂଜା ଏଚେକା ଅଜିତି ହିମ୍ବରିକା ହିଲାଆଡୁ □

୨୮ ଆମିନି ଜାଡ଼ା ନୀଞ୍ଜୁ ମାନେ, ଝିଏ ଝାୟା ହାନେ ଅଡ଼େ ହଲୁଡା ହୁଡ଼କିଆନେ, ମାହାପୁରୁ ଏ ଜାଡ଼ାତି ଇଲେତି ଝାଣା ହାନେସି, ଏନାଆଁ ଏଝାସି ମିଙ୍ଗେ ହିମ୍ବରିକା ପରଝି କିୟଅସି ? ମୀ ନାମୁ ଏଚେକା ଉଣା □

୨୯ ଏଦାଆଁତାକି ଏନାଆଁ ତିନାୟି ଏନାଆଁ ଗହନାୟି, ଏଦାଆଁ ମୀରୁ ପାରିହୁଁ ରେଆଦୁ କି ଅଣ୍ପାଆଦୁ,

୩୦ ଇଚିହୁଁ ଦାରତିତି ଜୀହୁଦିଆଆତାରି ଏ ବାରେ ପାରିହୁଁ ରେନେରି; ସାମା ଇ ବାରେ ମୀ ଲଡ଼ାମାନେ ଏଦାଆଁ ମୀ ଲାକପୁରୁତି ଆବା ପୁଞ୍ଜାମାନେସି □

୩୧ ମୀରୁ ମାହାପୁରୁତି ରାଜି ପାରାଦୁ, ଆତିହୁଁ ଇ ବାରେ ମିଙ୍ଗେ ହୀପକିଆନେ □

ଲାକପୁରୁତି ଦନ

(ମାତି ୭:୧୯-୨୧)

୩୨ ଏ ଉଣା ମେଣ୍ଡାୟାଁ ମାନ୍ଦାତେରି ଆଜାଆଦୁ, ଇଚିହୁଁ ମିଙ୍ଗେ ଏ ରାଜିତି ହୀହାଲି ମୀ ଲାକପୁରୁତି ଆବାକି ଏଚେକା ରାହାଁ □

୩୩ ମୀରୁ ମୀ ଦନତି ପାରଚାନା ହିଲାଆ ଗାଟାରାକି ହୀଦୁ; ମୀରୁ ମିଙ୍ଗେତାକି ଇଲେତି ବଟଝା କେପାଦୁ; ଇଚିହୁଁ ଏମ୍ବିୟା ସରୁ ଝାଅସି ଅଡ଼େ ଲୀମ୍ବୁ ତ୍ରିନେଏ ଇଲେତି ଲାକପୁରୁ ଦନ କୁଡ଼ି କିଦୁ,

୩୪ ଇଚିହୁଁ ଆମ୍ବିୟା ଦନ ଏମ୍ବେଏ ଜିକେଏ ମୀ ମନ ମାଞ୍ଜେମାନେ □

ଜାଗ୍ରାତା ହଢ଼ଲଏସି

୩୫ ☆“ମୀ ଟେଡେଲି ଦସା କତାନା ମାଞ୍ଜୁ ଅଡ଼େ ମୀ ଦୀଝିୟାଁ ଡ଼ାଞ୍ଜିହୁଁ ମାଣ୍ଡୁ;”

୩୬ ☆ଅଡ଼େ ପ୍ରବୁ ବୀହା ଇଜ ହାଜାନା ଝେଣ୍ଡା ଝାନାଟି ଏଝାଣାଲ୍ ଦାରା ଦେନମିଝା ଇଞ୍ଜିଁ କାଟାମାନାରି, ମୀରୁ ଜିକେଏ ଏଝାରିଲେହେଁ କାଟାହାଁ ମାଞ୍ଜୁ □

୩୭ ପ୍ରବୁ ଖାହାନା ଆମିନି ହଲିୟାଙ୍ଗାଣି ଜାଗ୍ରାତା ମାନାଣି ମେହ୍‌ନେସି, ଏଞ୍ଜାସି ନେହେଁ; ନାନୁ ମିଙ୍ଗେ ସାତା ଝେସିମାଞ୍ଜାଲ୍, ଏଞ୍ଜାସି ତାନି ଚେତେଲି ରୁପାନା ଏଞ୍ଜାରାଇଁ ତିଞ୍ଜାଲି କୁଗି କିହାଁ ତାଗେ ହାଜାନା ସେବା କିନେସି □

୩୮ ଅଡ଼େ ଏଞ୍ଜାସି ମାଦି ଲାଆଁୟାଁ କି ଝେୟା ନେକେରିତା ଜିକେଏ ଖାହାନା ଏଞ୍ଜାରାଇଁ ଏଲେକ୍ କାତାମାନାଣି ମେହ୍‌ନେସି ଏ ହଲିୟାଙ୍ଗା ନେହେଁ □

୩୯ ✧ସାମା ଇଦାଆଁ ପୁଞ୍ଜାମାଞ୍ଜୁ ଆମିନି ବେଲାତା ସରୁ ଖାନ୍‌ନେସି, ଇଦାଆଁ ଇଲୁଗାଟାସି ପୁଚିହ୍ ଏଞ୍ଜାସି ତାନି କୂଡୁ ତୁଡ଼ହାଲି ହୀଆତେସିମା □

୪୦ ମୀରୁ ଜିକେଏ ଜାଗ୍ରାତା ଆହାନା ମାଞ୍ଜୁ ଇଚିହ୍ ମୀରୁ ଆମିନି ବେଲାତା ଅଶ୍‌ପା ହିଲଅତେରି, ଏଚିବେଲାତା ମାଶ୍‌ସି ମୀରୁଏସି ଖାନ୍‌ନେସି □”

**ଟିକାଣା ହିଲାଆଗାଟି ହଲେଏସି
(ମାତି ୨୪:୪୫-୫୧)**

୪୧ ଏଚେଟିଏ ପିତର ଏଲେଇଚେସି, “ଏ ପ୍ରବୁ ନୀନୁ ପୁଶ୍‌ମିକିନି କାତା ମାଙ୍ଗେ କି ବାରେତାକି ଝେସିମାଞ୍ଜି ?”

୪୨ ପ୍ରବୁ ଏଲେଇଚେସି, “ସାଞ୍ଜୁକାରି ତାନି ଇଲୁତି ଲକୁତାକି ତାନି ରାନ୍ଦା କାଟୁତା ରାନ୍ଦା ହୀହାଲି ତାନି ଗୁମୁସ୍ତା ପାଣା ହେର୍‌ପିନେସି, ଇଲେତି ଟିକାଣାଗାଟି ଅଡ଼େ ବୁଦିଗାଟି ହଲେଏସି ଆମ୍ବାଆସି ?”

୪୩ ପ୍ରବୁ ଖାହାନା ତାନି ଆମିନି ହଲେଏଶାଇଁ ଏଲେ କିହିମାନାଣି ମେହ୍‌ନେସି ଏଞ୍ଜାସି ନେହେଁ □

୪୪ ନାନୁ ମିଙ୍ଗେ ସାତା ଝେସିମାଞ୍ଜାଲ୍, ଏଞ୍ଜାସି ଏଞ୍ଜାଶାଇଁ ତାନି ବାରେ ଦନ୍‌ତି ମୁହେଁ ଗୁମୁସ୍ତା କିହା ଇଚିନେସି □

୪୫ ସାମା ଏ ହଲେଏସି ନା ସାଞ୍ଜୁକାରି ଖାନ୍‌ନାୟି ମାନେୟିଏ ଇଞ୍ଜି ମନ୍‌ତା ଅଶ୍‌ପାନା ହଲିୟାଙ୍ଗା ହଲେଣିସିକାଣି ଝେଗାଲି ଇଞ୍ଜା ତିଞ୍ଜି ଉଣ୍ଡିହ୍ କାଡ଼ ହୁଚାଲି ମାଟ୍‌ନେସି,

୪୬ ଆତିହ୍ ଏମିନି ଦିନା ହଲେଏସି କାଚାହିଲଅସି ଇଞ୍ଜା ଏମିନି ବେଲା ଏଞ୍ଜାସି ପୁଞ୍ଜାହିଲଅସି, ଏ ଦିନା ଏ ବେଲାତା ତାନି

✧ ୧୨:୩୯ ୧୨:୩୯ ମାତି ୨୪:୪୩,୪୪

ପ୍ରଭୁ ଖାନ୍ଦେସି, ଇଞ୍ଜି ଏଝାସି ଏଝାଣାଇଁ ରୀ ବାଗା କିହାନା ନାମୁ ହିଲୀଆଗାଟାରି ତଲେ ଏଝାଣାଇଁ କାଲ୍‌ନେସି □

୪୭ ଅଡେ ଆମିନି ହଲେଏସି ତାନି ସାଝୁକାରିତି ମନ ଅଶ୍‌ପାନା ଜାଗ୍ରାତା ଆଅସି କି ଏଝାଣି ମନତଲେ କାମା କିଅସି, ଏଝାସି ଗାଡି ମାଡା ବେଟା ଆନ୍ଦେସି;

୪୮ ସାମା ଆମ୍ବାଆସି ପୁନାଆନା ମାଡା ପାଣ୍‌ନି କାମା କିନେସି, ଏଝାସି ଉଣା ମାଡା ବେଟା ଆନ୍ଦେସି □ ଆମ୍ବାଆରାକି ଗାଡି ହୀପକ ଆହାମାନେ, ଏଝାଣି ତାଣାଟି ହାରେକା ରୀହନାୟି ମାନେ; ଇଞ୍ଜି ଲକୁ ଆମ୍ବାଆରାକି ଗାଡି ହୀହାମାନେରି ଏଝାଣି ତାଣାଟି ହାରେକା ଆଗାଡା ରୀହନେରି □

ଜୀସୁ ଲକୁଣି ବାଗା କିଞ୍ଜିକିନାୟି

(ମାତି ୧୦:୩୪-୩୬)

୪୯ “ନାନୁ ଇ ଦାରତିତା ହିରୁ ପ୍ରଡହାଲି ଖାହାମାଇଁ, ଇଦି ନୀଏଁ ଗୁରୁ ଗୁରୁ ଆହିମାନେ ଆତିହିଁ ନାଜେ ଏନ୍‌ ଅଶ୍‌ପୁ ?

୫୦ ☆ସାମା ନାନୁ ର ବାପ୍ତିସ୍ମା† ପାଣ୍‌ନାୟି ମାନେ, ଅଡେ ଏଦି ରାଆ ପାତେକା ନାଜେ ଏତେକା କସ୍ତୁ ହଡ଼ି ମାଞ୍ଜାନେ □

୫୧ ନାନୁ ଦାରତିତା ହିଡ଼ଡ଼ି ହୀହାଲି ଖାହାମାଇଁ ଇଞ୍ଜିଁ ମୀରୁ ଅଶ୍‌ପିମାଞ୍ଜେରି ? ନାନୁ ମିଜେ ଝେସିମାଞ୍ଜାଇଁ, ଆଏ, ବାଗା କିହାଲି ଖାହାମାଇଁ □

୫୨ ଇଚିହିଁ ର ଇଜ ପାସାଜାଣା ମାନେରି, ରିଆରି କପାଟି ତାନିଜାଣା ଅଡେ ତାନିଜାଣା କପାଟି ରିଆରି ଏଟ୍‌କା ଆନ୍ଦେରି □

୫୩ ମୀରଏଣା କପାଟି ତାଞ୍ଜି, ତାଞ୍ଜି କପାଟି ମୀରଏସି, ମାକ୍‌ମା କପାଟି ତାଲି, ତାଲି କପାଟି ମାକ୍‌ମା, କୁଡ଼ିୟାନି କପାଟି ପୟା, ଅଡେ ପୟା କପାଟି କୁଡ଼ିୟା ଏଟ୍‌କା ଆନୁ □”

କାଲ୍‌ଗି ପୁନାୟି

(ମାତି ୧୭:୨,୩)

☆ ୧୨:୫୦ ୧୨:୫୦ ମାର୍କ ୧୦:୩୮ † ୧୨:୫୦ ୧୨:୫୦ ମୁଞ୍ଜିନାୟି

୫୪ ଇଞ୍ଜା ଏଝାସି ଲକୁଣି ଜିକେଏ ଏଲେଇଚେସି, “ଝେଡ଼ା କୁଡ଼ନିଝାକି ହାଗୁ ନିଜି ମାନାଣି ମେସ୍ତ୍ରସାରେ ଦେବୁଣିଏ ଏଲେଇଞ୍ଜେରି ପିୟୁ ଝାଡ଼େ, ଅଡ଼େ ଏଲେକିହିଏ ଆଡ଼େ;

୫୫ ଅଡ଼େ ଚିଝନି ଝାକିଚି ଗାଲି ଝେନାଣି ମେସ୍ତ୍ରସାରେ ମୀରୁ ଏଲେଇଞ୍ଜେରି, ଗାଡ଼ି କାରା ଆଡ଼େ, ଅଡ଼େ ଏଲେଏ ଆଡ଼େ □

୫୬ ଆଡ଼େ କୁଟୁ ଗାଟାଡ଼େରି, ମୀରୁ ଦାରତି ଅଡ଼େ ହାଗୁଡ଼ି ସିନାୟା ପୁଞ୍ଜିମାଞ୍ଜେରି, ସାମା ଇ କାଲାତି ସିନାୟା ଏନିଲେହେଡ଼ାଇ ପୁଞ୍ଜି ହିଲଅଡ଼େରି ?”

**ଗଡ଼ହା ଆଡ଼ାଣି ତଲେ ଆଣ୍ଡିନାୟି
(ମାତି ୫:୨୫,୨୬)**

୫୭ ଏନାଆଁ କିନାୟିମାନେ ଇଞ୍ଜିଏ ମୀରୁ ଏନାଆଁତାକି ମୀ ବିତ୍ରା ନୀହାୟି କିହିହିଲଅଡ଼େରି ?

୫୮ ଇଚିହିଏ ମୀ ଗଡ଼ହା ଆଡ଼ାଣି ତଲେ ନୀହାୟି କିନାଣି ତାଣା ହାନିବେଲାତା ଜିରୁଡ଼େଏ କାଲୁଝିଆନି ଉପେୟି ଅଣ୍ଡ଼ାମୁ, ଏଲାଆଆଡ଼ିହିଏ ଏଝାସି ନିଜେ ଅଡ଼େ ଝେଶ୍ଟେ ନୀହାୟି କିନାଣି ତାଣା ରେଜା ଅୟାନେସି, ଅଡ଼େ ନୀହାୟି କିନାସି କସକା କେୟୁତା ହେରପାନେସି, ଅଡ଼େ କସକା ନିଜେ କାୟିଦି ଇଲୁତା ଇଟାନେରି □

୫୯ ନାନୁ ମିଜେ ଝେସିମାଞ୍ଜାଇ, “ମୀରୁ ର କାନି ଜିକେଏ ପିହିଆନାହା ହାତିହିଏ ଦେଏ ମ୍ପାଟି ହଡ଼ା ଝାହାଲି ଆଡ଼ିଦେରି □”

୧୩

ମନ ଝେଟ୍‌ଆଡ଼ିହିଏ ନାସା ଆନାୟି

୧ ଏଚିବେଲାତା ଏଚେକା ଲକୁ ଝାହାନା, ପିଲାତ ଏମିନି ଗାଲିଲି ଲକୁଡ଼ି ନେଡ଼େରି ଏଝାରି ପୂଜା ତଲେ ଆଡ଼ହାମାଚେସି, ଏ କାତା ଜୀସୁଇଁ ଝେସ୍ତେରି □

୨ ଏମ୍ପାଟିଏ ଜୀସୁ ଏଝାରାଇଁ ଏଲେଇଚେସି, “ଏ ଗାଲିଲିତାରି ଡ଼ଣ୍ଡୁ ବେଟାଆହାଲିଏ ଏଝାରି ଅର ଗାଲିଲିତାରି କିହାଁ ହାରେକା ପାପୁ ଗାଟାରି ଇଞ୍ଜିଏ ମୀରୁ ଅଣ୍ଡ଼ିମାଞ୍ଜେରି ?

୩ ନାନୁ ମିଜେ ଝେସିମାଞ୍ଜାଇ, ଏଲେକିଏ ଆଏ, ସାମା ମୀରୁ ମନ ଝେଟ୍‌ଆଡ଼ିହିଏ ବାରେ ଜାଣାଡ଼େରି ଏଝାରିଲେହେଁ ହାଡ଼େରି □

୪ ସିଲହତା ଆମିନି ଅଟ୍ଟର ଜାଣାତି ଲାକ ପାତାଆଡ଼ି କଟା ଇଲୁ ରିହାନା ହାଡେରି, ଏଞ୍ଜାରି ବାରେଜାଣା ଜିରୁସାଲମତି ଲକୁ କିହାଁ ହାରେକା ପାପୁ ଗାଟାରି ଇଞ୍ଜିଁ ମୀରୁ ଅଣ୍ପିମାଞ୍ଜେରି ?

୫ ନାନୁ ମିଙ୍ଗେ ୱେସିମାଞ୍ଜାଇଁ, ଏଲେକିଁ ଆଏ, ମୀରୁ ମନ ୱେଟ୍‌ଆଡ଼ିହଁ ବାରେଜାଣା ତେରି ଏଲେକିହଁଏ ନାସା ଆଦେରି □”

ପାଡ଼େୟି ଆୟାଆଗାଟି ତୟା ମାରୁନୁ

୬ ଜୀସୁ ଇ ପୁଣ୍ଟିକିନି କାତା ୱେସ୍‌ସେସି, ରଅଣି ଅଙ୍ଗୁରି ବାଡ଼ାତା ର ତୟା ମାରୁନୁ ଉହି ଆହାମାଚେ □ ଏଞ୍ଜାସି ୱାହାନା ପାଡ଼େୟି ପାରିତେସି ସାମା ମେଡ଼ିକିଆତେସି □

୭ ଇଞ୍ଜା ଏଞ୍ଜାସି କାମା କିନାଣାଇଁ ଏଲେଇଚେସି, “ମେହ୍‌ମୁ ନାନୁ ତାନି ବାର୍ସା ଆଡେୟିଏ ଇ ତୟା ମାରୁନୁତା ୱାହାନା ପାଡ଼େୟି ପାରିମାଇଁ, ସାମା ମେଡ଼ିକିହି ହିଲଅଁ; ଏଦାଣି ଟୁଣ୍‌ହା ଟୁହ୍‌ମୁ, ଇଦି ଏନାଆଁତାକି ବୁମିତି ପାଡ଼ିୟା କିନେ ?”

୮ ସାମା କାମାକିନାସି ଏଲେଇଚେସି, “ପ୍ରବୁ ଇଦି ଇୟନା ତାକି ମାଣ୍‌ମେ, ନାନୁ ଇଦାଣି ସାରିସୁଟୁ କାରହାନା ଗାତା ହାଇଁ,

୯ ଅଡ଼େ ତାୟୁ ପାଡ଼େୟି ଆୟିତିହଁ ନେହେଁ ଆୟାଆଡ଼ିହଁ ଏଦାଣି ଟୁଣ୍‌ହା ଟୁହ୍‌ମୁ □”

ଜୀସୁ ଜମିନି ଦିନା ର ଟୁଡୁଞ୍ଜା ଇୟନି ନେହଁ କିନାୟି

୧୦ ର ଦିନା ଜୀସୁ ଜମିନି ଦିନା ର ଜୀହୁଦି ଲକୁଡ଼ି କୁଟମି ଇଲୁତା* ଜାପୁହି ମାଚେସି □

୧୧ ଏମ୍‌ଆଁ ର ଇୟା ମାଚେ, ଏଦି ଅଟର ବାର୍ସା ପାଚେକା ପଲୁଆ ବୁଡୁ ତଲେ କସ୍‌ ଆହିମାଚେ, ଏଦି ଟୁଡୁଞ୍ଜା ଆହାନା ସଲକେ ଆହଁ ତାକାଲି ଆଡ଼ିହିଲାଆଚେ □

୧୨ ଜୀସୁ ଏଦାନି ମେସାନା ତାଗେ ହାଟାନା ଏଲେଇଚେସି, “ଏ ଇୟା ନୀନୁ ନୀ ଆଡ଼ାଆ କସ୍‌ଟି ନେହଁ ଆଡ଼ି □”

୧୩ ଅଡ଼େ ଏଞ୍ଜାସି ଏଦାନିଲେକ କେୟୁ ଇଚିତେସି, ଏମ୍‌ାଟିଏ ଏଦି ଏ ଦେବୁଣିଏ ସଲକେ ଆହାନା ମାହାପୁରୁତି ଜହରା କିତେ □

* ୧୩:୧୦ ୧୩:୧୦ ସିନଗଗ

୧୪ ସାମା ଜୀସୁ ଜମିନି ଦିନାତା ନେହୁଁ କିହିମାତାକି ଜୀହୁଦି ଲକୁଡି କୁଟମି ଇଲୁଡି† କାଜାସି କାରବି ଆହାନା ଲକୁଣି ଏଲେଇଚେସି, “କାମା କିହାଲି ସ ଦିନା ମିଙ୍ଗେ ମାନେ; ଏଦାଣିତାକି ସ ଦିନା ନେହୁଁ ଆହାଲି ଖାଦୁ, ଜମିନି ଦିନାତା ଖାଆଦୁ □”

୧୫ ସାମା ପ୍ରବୁ ଏଞ୍ଜାଣାଇଁ ଏଲେଇଚେସି, “ଆଡେ କୁଟୁ ଗାଟାଡେରି, ମୀରୁ ବାରେଜାଣା ତେରି ଜମିନି ଦିନାତା ମୀ କଡି କି ଗାଡ଼ଦେତି ହାଃଅଲାଟି ଅହାନା ଏୟୁ ଉର୍ହୁ ହିଲଅତେରି କି ?

୧୬ ଅଟ୍ଟର ବାର୍ସା ପାତେକା ସୟତାନ ତାଣାଟି ଦସ୍ପି ଆହାମାନି ଅରାହାମ କୁଡାତି ଇ ଇୟାନି ଜମିନି ଦିନାତା ନେହୁଁ କିନାୟି ହିଲାଆତେ କି ?”

୧୭ ଏଞ୍ଜାସି ଇ ବାରେ କାତା ଝେସାଲିଏ, ତାନି ସାତୁୟାଁ ବାରେ ଲାଜା ବେଟାଆଡେରି, ସାମା ଜୀସୁ କିହାମାନି କାମା ମେସାନା ଲକୁ ରାହାଁ ଆଡେରି □

ହାର୍ସୁ ପାଡ଼େୟି

(ମାତି ୧୩:୩୧,୩୨; ମାର୍କ ୪:୩୦-୩୨)

୧୮ ଜୀସୁ ଏଲେଇଚେସି, “ମାହାପୁରୁ ରାଜି ଏନିଲେହେଁତାୟି ? ଆମ୍ବାରିତଲେ ଏଦାନି ତୁକ୍‌କି ?

୧୯ ଏଦି ଇଲେତି ର ହାର୍ସୁ ପାଡ଼େୟି ଲେହେଁ, ଏଦାଆଁ ଅହାନା ରଅସି ତାନି ବାଡ଼ାତା ମାଟିଡେସି, ଅଡେ ଏଦି ପାତାଆହାନା ର ମାର୍‌ନୁ ଆଡେ, ଅଡେ ହାଗୁ ଲାକ ଉଦିନି ପଟାୟାଁ ଖାହାନା ଏ କମାତା ବାସା କିତୁ □”

ପୁଲାଏୟୁ

(ମାତି ୧୩:୩୩)

୨୦ ଜୀସୁ ଅଡେ ଏଲେଇଚେସି, “ନାନୁ ଆମ୍ବାରିତଲେ ମାହାପୁରୁଡି ରାଜି ତୁକ୍‌କି ?

୨୧ ଏଦି ପୁଲା ଏୟୁଲେହେଁତାୟି, ର ଇୟା ତାନିମାଣା ଗୁଣ୍ଡାତା କାଲହା ଇଟିଡେ, ତାୟୁ ବାରେ ଗୁଣ୍ଡା ପୁଲା ଆଡେ □”

† ୧୩:୧୪ ୧୩:୧୪ ସିନଗର

ଜାକଣି ଦୁଝେରି
(ମାତି ୭:୧୩,୧୪,୨୧-୨୩)

୨୨ ତାୟୁ ଜୀସୁ ଗାଡ଼ାତାକି ଗାଡ଼ା ନାୟୁଁ ତାକି ନାୟୁଁ ରେଜିହିଁ
ଜାପୁହିହିଁ ଜିରୁସାଲମ ଝାକି ହାଜିମାରେସି □

୨୩ ରଅସି ଏଝାଣାକ୍ ଝେରେସି, “ପ୍ରବୁ ଗେଲୁପି ଆନାରି ଝାରୁଇ
ଇଚରା ଜାଣାକି ?”

ଜୀସୁ ଏଝାରାକ୍ ଏଲେଇଚେସି,

୨୪ “ଜୀସୁ ତୁସାନା ଜାକଣି ଦୁଝେରିଚି ହାଜୁ; ଇଚିହିଁ ନାନୁ
ମିଙ୍ଗେ ଝେସିମାଞ୍ଜାକ୍, ହାରେକା ହଡ଼ାଲି ଅଣ୍ପିନେରି, ସାମା ହଡ଼ାଲି
ଆଡ଼ଅରି □

୨୫ ଇଲୁଗାଟାସି ନିଙ୍ଗାନା ଦାରା ସୁଣ୍ଡିତି ତାୟୁ ଏଚେତା ମୀରୁ
ପାଙ୍ଗାତା ନିଚାନା ଦାରା ଡୀ ଡୀ ଝେଚିହିଁ ‘ଏ ପ୍ରବୁ ମାଙ୍ଗେତାକି
ଦାରା ଦେତାମୁ’ ଇଞ୍ଜିଁ ହାଟିଦେରି, ଏଚେତା ଏଝାସି ମିଙ୍ଗେ
ଏଲେଇଞ୍ଜାନେସି, ‘ମୀରୁ ଏମ୍ପିତାଚେରି ନାନୁ ପୁଞ୍ଜାମାଞ୍ଜଅଁ’ □

୨୬ ଏଚିବେଲା ମୀରୁ ଏଲେଇଞ୍ଜେରି, ‘ଏ ପ୍ରବୁ ମାମ୍ବୁନୀ ତଲେ
ତିଚା ଉଚାତମି, ଅଡ଼େ ନୀନୁ ମା ଆଂଗେଣିକାଣା ଜାପୁହିମାଞ୍ଜାତି □’

୨୭ ଅଡ଼େ ଏଝାସି ମିଙ୍ଗେ ଏଲେଇଞ୍ଜାନେସି, ‘ମୀରୁ ଆମିନି ଟାୟୁତି
ଲକୁଚେରି ନାନୁ ପୁଞ୍ଜାମାଞ୍ଜଅଁ; ଏ ଲାଗେଏ ପଡ଼େଏ ତାଚେରି ନା
ତାଣାଟି ହେକ ଆଦୁ □’

୨୮ ☆☆ଏଚିବେଲା ମୀରୁ ଅବ୍ରାହାମ, ଇସାହାକ, ଜାକୁବ ଇଞ୍ଜା
ବାରେ ମାହାପୁରୁ ଅଣ୍ପୁତି ବଲୁ ଝେହ୍ନାରାକ୍ ମାହାପୁରୁ ରାଜିତା
ମାନାଣି ଅଡ଼େ ମିଙ୍ଗେ ପାଙ୍ଗାତା କୁତା ମାଞ୍ଜାନାଣି ଅଣ୍ପାମା ପାଲକା
ଟୀଟି କିହିଁ ଡୀଦେରି □

୨୯ ଅଡ଼େ ହାରେକା ଲକୁ ଝେଡ଼ା ହପୁ ଝାକିଚି ଅଡ଼େ ଝେଡ଼ା କୃଡ଼ନି
ଝାକିଚି, ଟିଝନି ଝାକିଚି ଚେବୁ ଝାକିଚି ଝାହାନା ମାହାପୁରୁତି ରାଜିତି
ବଜିତା କୁରିନେରି □

୩୦ ☆ଅଡ଼େ ମେହ୍ନୁ ତାୟୁ ମାନି କଚେକା ନକିତା ଆନେରି ଅଡ଼େ
ନକିତା ମାନି କଚେକା ତାୟୁ ଆନେରି □”

☆ ୧୩:୨୮ ୧୩:୨୮ ମାତି ୨୨:୧୩; ୨୫:୩୦ ☆ ୧୩:୨୮ ୧୩:୨୮ ମାତି ୮:୧୧,୧୨
☆ ୧୩:୩୦ ୧୩:୩୦ ମାତି ୧୯:୩୦; ୨୦:୧୭; ମାର୍କ ୧୦:୩୧

ଜୀସୁ ଜିରୁସାଲମତି ଜୀଝୁନନାୟି
(ମାତି ୨୩:୩୭-୩୯)

୩୧ ଏତିବେଲାତେଏ ଏଚରଜାଣା ପାରୁସିୟାଁ ଖାହାନା ଜୀସୁଇଁ
ଝେସ୍ତେରି, “ନୀନୁ ଇ ଟାୟୁ ପିସାନା ହାଜାତୁହ୍ମୁ ଏନାଆଁତାକି
ଇଚିହିଁ ହେରଦ ନିଜେ ପାୟାଲି ଅଣ୍ପିମାନେସି □”

୩୨ ଜୀସୁ ଏଝାରାଇଁ ଏଲେଇଚେସି, “ମୀରୁ ହାଜାନା ଏ ନାକାଇଁ
ଝେହ୍ମୁ, ‘ମେହ୍ମୁ ନୀନୁ ନୀଝୁ ଅଡେ ଝିଏ ବୁତୁୟାଁ ପିସ୍ପି କହିମାଇଁ
ଅଡେ ନେହିଁ କିହିମାଇଁ ଇଞ୍ଜା ତାନି ଦିନାଟିଏ ନା କାମା ରାପୁଇଁ □’

୩୩ ଏନିଜିକେଏ ନୀଝୁ ଝିଏ ଅଡେ ମାଏଁ ନାଜେ ତାକିହିଁ ହାଜାଲି
ଆନେ, ଇଚିହିଁ ମାହାପୁରୁ ଅଣ୍ପୁତି ବଲୁ ଝେହ୍ନାସି ଜିରୁସାଲମ
ପିସ୍ପେ ପାଙ୍ଗାତା ହାନାୟି ନେହେଁ ଆଏ □”

୩୪ “ଏ ଜିରୁସାଲମ, ଏ ଜିରୁସାଲମ ମାହାପୁରୁ ଅଣ୍ପୁତି ବଲୁ
ଝେହ୍ନାରାଇଁ ପାୟିନାତି ଅଡେ ନୀ ତାଣା ପାଣ୍ଡୁଝି ଆହାମାନାରାଇଁ
ଝାଲକାତଲେ ଝେନାତି, ତାଲି କୟୁ ଏନିକିଁ ତାନି ହୀପାୟାଣି ତାନି
ମାରାୟାଁ ତୁଇ ଜକ୍ଝିନେ, ଏଲେକିଁ ଏଚର ଦେବା ନୀ ପଡି ପଡାତି
ପୁକ୍ଝାନା ଇଚିଇଁ ଇଞ୍ଜିଁ ଅଣ୍ପିମାଚେଏଁ ସାମା ମୀରୁ ଏଲେକିହାଲି
ହିୟାଆଚେରି □

୩୫ ମେହ୍ମୁ ମୀ ଇଲୁ ମୀ କେୟୁତା ହୀପକି ଆହିମାଞ୍ଜାନେ;
ଅଡେ ନୀନୁ ମିଜେ ଏଲେଇଞ୍ଜିମାଞ୍ଜାଇଁ ମାହାପୁରୁ ଦରୁଟି ଆମ୍ବାଆସି
ଝାହିମାନେସି ଏଝାସି ନେହାସି ଇଞ୍ଜିଁ ଏମିନି ନେରୁ ଇ କାତା
ଏଲେଇଞ୍ଜେରି ଏ ଦିନା ଝାଆ ପାତେକା ମୀରୁ ଅଡେ ନାଜେ
ମେସୁଅଚେରି □”

୧୪

ଜୀସୁ ରଗ ଗାଟାଣାଇଁ ନେହିଁକିନାୟି

୧ ଜୀସୁ ର ଜମିନି ଦିନା ରାନ୍ଦା ତିଞ୍ଜାଲି ପାରୁସିୟାଁ ବିତ୍ରାଟି ର
କାଜାଣି ଇଜ ହଡାଲିଏ ଏଝାରି ଏଝାଣାଇଁ ଦହ ଦସାଲି ପରୁହି
ମାଚେରି □

୨ ଅଡେ ମେହ୍ମୁ ଏଝାଣି ନକିତା କେସ୍ତା କଡାୟାଁ ପଂଗିତାସି ରଅସି
ମାଚେସି □

୩ ଏମ୍ବାଟିଏ ଜୀସୁ ମସାତି ମେରାପୁନାରି ଅଡ଼େ ପାରୁସିୟାଁଇଁ ଏଲେଇଚେସି, “ଜମିନି ଦିନାତା ରଅଣାଇଁ ନେହୁଁ କିନି ମେରା ମାନେକି ଆଏ ?”

୪ ଏମ୍ବାଟିଏ ବାରେଜାଣା ପାଲେଏ ଆଡ଼େରି □ ଇଞ୍ଜା ଜୀସୁ ଏଞ୍ଜାଣାଇଁ ତୀଗାହାଁ ନେହୁଁ କିହାନା ମୀ ଇଜ ହାଲମୁ ଇଞ୍ଜୁଁ ହେଲ ହୀଡେସି □

୫*ଇଞ୍ଜା ଏଞ୍ଜାସି ଏଞ୍ଜାରାଇଁ ଏଲେଇଚେସି, “ମୀ ବିତ୍ରାଟି ଆମ୍ବାଆସି ମୀରଏସି କି କଡ଼ି ଜମିନି ଦିନାତା କୁହିତା ରିଡ଼ହୁଁ ଏ ଦେବୁଣିଏ ଡ଼େଞ୍ଜା କଡ଼ଅସି କି ?”

୬ ଅଡ଼େ ଏଞ୍ଜାରି ଇ ବାରେ କାତା ଝେଞ୍ଜାନା ଏନାଆଁ ଜଲ୍ଲାଲି ଆଡ଼ାଆଡେରି □

ସେବା କିନାୟି ଅଡ଼େ ତାମ୍ବେ ଉଣା କିହା କଡ଼ିନାୟି

୭ ବଜିତା ହାଟୁକି ଆହାମାଚାରି ନେହୁଁ ନେହୁଁ ଟାୟୁତା କୁଗାଲି ବାଟି କିହିମାଚାଣି ମେସାନା, ଏଞ୍ଜାରାଇଁ ର ପୁଣ୍ଡିକିନି କାତା ଝେସ୍ତେସି,

୮ “ଏଚିବେଲା ରଅସି ମିଙ୍ଗେ ବୀହା ବଜିତା ହାଟାନେସି, ଏମ୍ବାଆଁ ନେହୁଁ ଟାୟୁତା କୁଗାଆଦୁ, ଇଚିହୁଁ ଏମ୍ବାଆଁ ମୀ କିହାଁ କାଜାସି ଜିକେଏ ହାଟୁକି ଆହାଡ଼ୟିନେସି,

୯ ଏଚେତା ନିଙ୍ଗେ ଅଡ଼େ ଏଞ୍ଜାଣାଇଁ ହାଟା ମାନାସି, ଏଞ୍ଜାସି ଝାହାନା ଇଞ୍ଜାଣାକି ଇ ଟାୟୁ ପିସାହାମୁ ଇଞ୍ଜାନେସି, ଏଚେତା ନୀନୁ ଲାଜାତଲେ ଉଣା ଟାୟୁତା କୁଗିଦି □

୧୦ ସାମା ଏଚିବେଲା ନୀନୁ ହାଟୁକି ଆହାମାନି ତାଣା ହାଜାନା ଡ଼ଇଡ଼ି ଟାୟୁତା କୁଗାମୁ, ଏଚେଟିଏ ନିଙ୍ଗେ ହାଟି କିହାମାଞ୍ଜାନାସି, ଏ ଡ଼େଣେ ନୀନୁ ଇ ନେହୁଁ ଟାୟୁତା କୁଗାମୁ ଇଞ୍ଜୁଁ ହାଟାସାରେ ଏଚିବେଲା କୁଡ଼ା ଆହାମାନି ଲକୁ ନକିତା ଗାଡ଼ି ମାନି ବେଟାଆଡ଼ି □

୧୧ *ଇଚିହୁଁ ଆମ୍ବାଆସି ନାନୁ କାଜାତେଏଁ ଇଞ୍ଜୁଁ ଇଞ୍ଜା କଡ଼ିନାଣାଇଁ ଉଣା କିଞ୍ଜିଆନେ, ଅଡ଼େ ଆମ୍ବାଆସି ତାଙ୍ଗେ ଉଣା କିହାକଡ଼ିନେସି ଏଞ୍ଜାଣାଇଁ କାଜାସି କିଞ୍ଜିଆନେ □”

୧୨ ଇଞ୍ଜାଁ ଜୀସୁ ତାଙ୍ଗେ ହାଟି କିହା ମାତାଣାଈଁ ଜିକେଏ ଏଲେଇଚେସି, “ନୀନୁ ବଜି ହୀନାଟି ନୀ ତଢେସିଙ୍ଗାଣି, ତାୟିୟାଁ, ସାମାୟିୟାଁ କି ନୀ ନାୟୁତା ମାନି ଦନ ଗାଟାରାଇଁ ହାଟାଆନି, ଇଚିହଁ ଏଞ୍ଜାରି ଜିକେଏ ନିଙ୍ଗେ ହାଟାଲି ଆଡାନେରି ଅଡେ ନୀନୁ ଖେଣ୍ଡେ ବେଟାଆଦି □

୧୩ ସାମା ବଜି କିତିସାରେ ହିଲାଆ ଗାଟାରି, କଲାୟାଁ, ସଗାୟାଁ, କାଣାୟାଣି ହାଟାମୁ; ଆତିହଁ ନୀନୁ ନେହାଁତି ଆଦି,

୧୪ ଆତିହଁ ନିଙ୍ଗେତାକି ନେହେଁ, ଇଚିହଁ ନିଙ୍ଗେ ଖେଣ୍ଡେ ହାହାଲି ଏଞ୍ଜାରିତାଣା ଏନାୟି ହିଲେଏ; ଇଞ୍ଜାଁ ତାରିଗାଟାରି ଖେଣ୍ଡେ ନିଙ୍ଗିନାଟି ମାହାପୁରୁ ନିଙ୍ଗେ ଖେଣ୍ଡେ ହିୟାନେସି □”

କାଜା ବଜିତି ପୁଣ୍ଡିକିନାୟି

(ମାତି ୨୨:୧-୧୦)

୧୫ ଈ କାତା ଖେଞ୍ଜାନା ଏଞ୍ଜାଣିତଲେ ତିଞ୍ଜାଲି କୁଗାମାଟାରି ବିତାଟି ରଅସି ଜୀସୁଈଁ ଏଲେଇଚେସି, “ଆନିନିଗାଟାସି ମାହାପୁରୁ ରାଜିତା ବଜି ତିନାସି ଏଞ୍ଜାସି ନେହାଁସି □”

୧୬ ସାମା ଜୀସୁ ଏଞ୍ଜାଣାଈଁ ଏଲେଇଚେସି, “ରଅସି ର କାଜା ବଜି ଲକୁକି ହାଈଁ ଇଞ୍ଜାଁ ଅଣ୍ପାନା ହାଟେକା ଲକୁଈଁ ହାଟିତେସି;

୧୭ ଅଡେ ତିନି କାଟୁ ଆୟାଲିଏ, ଏଞ୍ଜାସି ହାଟାମାନି ଲକୁତାଣା ତାନି ହଲେଏଣାଈଁ ପାଣ୍ଡାନା ଏଲେଇଚେସି, ‘ବାରେ ଆଡେୟିଏ ନାଏଟି ମୀରୁ ତିଞ୍ଜାଲି ଖାଦୁ □’

୧୮ ସାମା ବାରେଜାଣା ଏଞ୍ଜାଣାଈଁ ରଣ୍ଡିଏ କାତା ଏଲେଇଚେରି, ରଅସି ଖେସ୍ତେସି, ‘ନୀନୁ ଇଚାଣି ବୁମି କତାମାଈଁ ଏଡାଆଁ ସିନକିହାଲି ହାନାୟିମାନେ; ଏଡାଆଁତାକି ନାଙ୍ଗେ କାର୍ନା ଅଣ୍ପାମୁ ନୀନୁ ଖାହାଲି ଆଡଅଁ □’

୧୯ ଅଡେ ରଅସି ଏଲେଇଚେସି, ‘ନୀନୁ ପାସା ହେରୁ କଡିୟାଁ କତାମାଈଁ, ନୀନୁ ଏଞ୍ଜାସିକାଣି ମାଡୁନାୟି ମାନେ ଏଡାଣିତାକି ନାଙ୍ଗେ କାର୍ନା ଅଣ୍ପାମୁ ନୀନୁ ଖାହାଲି ଆଡଅଁ □’

୨୦ ଅଡେ ରଅସି ଏଲେଇଚେସି, ‘ନୀନୁ ନୀଞ୍ଜୁ ବାହା ଆହାମାଈଁ ଏଡାଆଁତାକି ନୀନୁ ଖାହାଲି ଆଡଅଁ □’

୨୧ ଇଞ୍ଜା ଏ ହଲେଏସି ଖାହାନା ବାରେ ତାନି ସାଝୁକାରିଇଁ
 ଝେସ୍ତେସି □ ଏଚେଟିଏ ଏ କାତା ଝେଞ୍ଜାନା ଏଝାସି କାରୁବି ଆହାନା
 ତାନି ହଲେଏଶାଇଁ ଏଲେଇଚେସି, ନାନୁ ତବେ ଗାଡ଼ାତି ସାହୁଡ଼ାୟା
 ଅଡ଼େ ତାଶ୍ଟେଣାଁ ହାଜାନା ହିଲିଆଗାଟାରାଇଁ, କଲାରାଇଁ, ସଟାରାଇଁ
 ଇଞ୍ଜା କାଶାରାଇଁ ଇମ୍ପାଆଁ ହାଟାତାମୁ □

୨୨ ତାୟୁ ଏ ହଲେଏସି ଏଲେଇଚେସି, ‘ଏ ପ୍ରବୁ ନୀ କାତାତଲେ
 ବାରେ କିତମି ସାମା ଇଲୁ ନେଞ୍ଜା ହିଲେଏ □’

୨୩ ଏମ୍ପାଟିଏ ସାଝୁକାରି ହଲେଏଶାଇଁ ଟାଣ୍ଡିଚେସି, ‘କାଜା ଆଂଗେଣି
 ଅଡ଼େ ମାରୁନୁ ଡ଼ଇ ହାଜାନା ନା ଇଲୁ ଏନିକିଁ ନେଞ୍ଜିନେ
 ଏଦାଆଁତାକି ଲକୁଣି ଖାହାଲି ଏଲେଇନାମୁ □

୨୪ ନାନୁ ଝେସିମାଞ୍ଜାଇଁ ତଲି ହାଟାମାଟାରି ବିଡ଼ାଟି ରଅସି ଜିକେଏ
 ନା ବଡ଼ି ଖାଣ୍ଡାଲି ବେଟାଆଅସି □ ’ ”

ଏନିଲେହେଁତାସି ଜୀସୁତି ସୀସୁ ଆନେସି

(ମାତି ୧୦:୩୭,୩୮)

୨୫ ମାନ୍ଦା ଲକୁ ଜୀସୁତଲେ ହାଜିମାଚେରି, ଏଝାସି ତାୟୁଝାକି
 ସିନିକିହାନା ଏଝାରାଇଁ ଏଲେଇଚେସି,

୨୬ ☆“ଆମ୍ପାଆସି ନା ତାଶା ଖାହାନା ତାନି ତାଲି, ତାଞ୍ଜି, ତକ୍ତି,
 ମୀରକା, ମାସକା, ତାୟି ତାଞ୍ଜିସ୍ମାଣି ଅଡ଼େ ତାନି ଜୀସୁତି ଜିକେଏ
 ଅପିନେସି ଏଝାସି ନା ସୀସୁ ଆୟାଲି ଆଡ଼ଅସି □

୨୭ ☆ଆମ୍ପାଆସି ତାନି କୁସ ଡ଼େକାନା ନା ଢେଚ ଢେଚ ଝାଅସି,
 ଏଝାସି ନା ସୀସୁ ଆୟାଲି ଆଡ଼ଅସି □

୨୮ ମୀ ବିଡ଼ାଟି ଆମ୍ପାଆସି ପାଡ଼ିକିହଁ କଟା ଇଲୁ ଦସାଲି
 ଅଣ୍ପିନେସି, ଦହନି କାମା ରାପୁହାଲି ଟାକାୟା ଏନୁ କି ଏଡ଼
 ଇଞ୍ଜିହଁ ଏମ୍ପାତି ଲେକା କିଅସିକି ?

୨୯ ଏଚେତା ଏଝାସି ପୁନାଦି ନିପୁହାନା ରାପୁହାଲି ଆଡ଼ାଆସାରେ,
 ଏଚେକା ଲକୁ ଏଦାଆଁ ମେହନେରି, ବାରେଜାଶା ଏଝାଶାଇଁ
 କାକ୍ନେରି,

☆ ୧୪:୨୭ ୧୪:୨୭ ମାତି ୧୦:୩୭ ☆ ୧୪:୨୭ ୧୪:୨୭ ମାତି ୧୦:୩୮; ୧୭:୨୪; ମାର୍କ
 ୮:୩୪; ଲୁକ ୯:୨୩

୩୦ ଲକ୍ଷ୍ମୀ ଏଝାଣାକ୍ ଲାଜାକିହିଁ ଏଲେଇନେରି, ଇଝାସି ଇଲୁ ଦସାଲି ମାଟ୍‌ହେସି ରାଠ୍‌ହାଲି ଆଡ଼ାଆତେସି □

୩୧ ର ରାଜା ଅର ରାଜା କପାଟି ଜୁଜୁ କିହାଲି ହାଜିମାନାଟି ଦସ ମାଣା କସ୍‌କା ଏଝାଣି କଡ଼େ ମାଣା କସ୍‌କା କପାଟି ଜୁଜୁ କିହାଲି ଆଡ଼ିନେରିକି ଆଏ ଇଞ୍ଜି ଅଣ୍ଡାପଅସିକି ?

୩୨ ଆଡ଼ାଆଲେହେଁ ଇଚିହିଁ ଏ ରାଜା ହେକ ମାନାଟିଏ ଏଝାସି ରାଜିମାନା ଆୟାଲି କସ୍‌କାଣି ହିଡ଼ଡ଼ି ତାକି ଏଲେଇଞ୍ଜା ପାଣ୍ଡିନେସି □

୩୩ ଏଲେକିହିଁ ଏ ମୀ ବିତ୍ରାଟି ଜିକେଏ ଆମ୍ବାଆସି ତାନି ବାରେ ପିହଆତିହିଁ ଏଝାସି ନା ସୀସୁ ଆୟାଲି ଆଡ଼ଅସି □”

ମୂଆ ହାରୁ

(ମାତି ୫:୧୩; ମାର୍କ ୯:୫୦)

୩୪ “ହାରୁତ ନେହାୟି; ସାମା ହାରୁ ମୂଆସାରେ ଏଦାଆଁ ଏନିକିହିଁ ଅଡ଼େ ଏନାଆଁତଲେ ହାରୁ ଲେହେଁ ମୂପି କିନାୟି ?

୩୫ ଏଦି ବୂମିତା କି ଗାତା କରୁତା କୁଡ଼ୁସାଲି ଜିକେଏ ଜଡ଼େ ଆଏ □ ଲକ୍ଷ୍ମୀ ଏଦାନି ପାଙ୍ଗାତା କୁତା ତୁହନେରି □ ଆମ୍ବାଆରି ଖେଞ୍ଜାଲି କୀକୀ ମାତିହିଁ, ଖେଞ୍ଜୁ □”

୧୫

ଜାଜ୍‌ଜି ମେଣ୍ଡା

(ମାତି ୧୮:୧୨-୧୪)

୧ ✨ର ଦିନା ସିସୁ ରୁହନାରି ଅଡ଼େ ପାପୁ ଗାଟାରି ବାରେଜାଣା ତାନି କାତା ଖେଞ୍ଜାଲି ଝାହିମାରେରି □

୨ ଏଚେଟିଏ ପାରୁସିୟାଁ ଅଡ଼େ ମେରାପୁନାରି ଜୀସୁକ୍ ଗୁରୁମୁରୁ ଆହିଁ ଏଲେଇଚେରି, “ଇଝାସି ପାପୁ ଗାଟାରାକ୍ ଆବିମାନେସି, ଇଞ୍ଜା ଏଝାରିତଲେ ତିଞ୍ଜି ଉଣ୍ଡି ମାନେସି □”

୩ ଏମ୍ବାଟିଏ ଜୀସୁ ଏଝାରାକ୍ ଇ ପୁଣ୍ଡିକିନି କାତା ଖେସ୍ତେସି □

୪ “ମୀ ବିତ୍ରାଟି ଆମ୍ବାଆତେରି ଇଲେତି ଲକ୍ଷ୍ମୀ ମାଞ୍ଜେରି, ଏଝାଣାକି ପାସାକଡ଼ି ମେଣ୍ଡାୟାଁ ମାତିହିଁ, ଏଝାସିକା ବିତ୍ରାଟି ରଣ୍ଡି ଜାଜ୍‌ଜିହିଁ

☆ ୧୫:୧ ୧୫:୧ ଲୁକ ୫:୨୯,୩୦

ଏଞ୍ଜେଲ୍ ଏନାଆଁ କିନେସି, ରଣ୍ଡି ଉଣା ପାସାକଡ଼ି ମୋଣ୍ଡାୟାଁ ବାଗାତା ପିସାନା ଜାକ୍ସାମାନି ମୋଣ୍ଡା ବେଟାଆନି ପାତେକା ପାରଅସି କି ?

୫ ଇଞ୍ଜାଁ ବେଟାଆତିସାରେ ରାହାଁତଲେ ଡେକାନା ଇଜ ତାନେସି,

୬ ଇଞ୍ଜାଁ ତାନି ତଣେସିଙ୍ଗାଣି ଅଡେ ନାୟୁଁତାରାଲ୍ ହାଟାନା ଏଲେଇନେସି, ମୀରୁ ନା ତଲେ ରାହାଁ କିଦୁ, ଏନାଆଁତାକି ଇତିହିଁ ଜାକ୍ସାମାତି ନା ମୋଣ୍ଡା ବେଟାଆଡେଏଁ ।

୭ ନାନୁ ମିଙ୍ଗେ ଝେସିମାଞ୍ଜାଇଁ, ଏଲେକିହିଁଏ ମନ ଝେଟ୍ଟହାଲି ଲଡା ଆଆଗାଟି ରଅସି ଉଣା ପାସାକଡ଼ି ତାରିଗାଟାରି କିହାଁ ପାପୁ ଗାଟାସି ରଅସି ତାନି ମନ ଝେଟ୍ଟହା କଡିତିହିଁ, ଏଞ୍ଜାଣି କସମି ଲାକପୁରୁ ହାରେକା ରାହାଁ ଆଡେ ।”

ଜାକ୍ସିଟି ଟାକା

୮ “ଅଡେ ଇଲେତି ଆମିନି ଇୟା ମାନେ, ଏ ଇୟାନାକି ଦସଗଟା ଝେଣ୍ଡି ଟାକା ମାଟିହିଁ ରଣ୍ଡାଆଁ ଜାକ୍ସିହିଁଏଁ ଏଡି ଏନାଆଁ କିନେ, ଦୀଝଁ ଡସାନା ଇଲୁ ହେପାନା ଏ ଜାକ୍ସି ଟାକା ବେଟାଆନି ପାତେକା ଜାଡନୁ ତଲେ ପାରେଏକି ?

୯ ଇଞ୍ଜାହାଁ ଏ ଟାକା ବେଟାଆତିସାରେ ଏଡି ତାନି ତଡ଼ ଲୁକୁଣି ଇଞ୍ଜାଁ ନାସକାତି ଲକୁଣି ରୁଣ୍ଡି କିହାନା ଏଲେଇନେ ନା ତଲେ ରାହାଁ କିଦୁ, ଏନାଆଁତାକି ଇତିହିଁ ଜାକ୍ସାମାତି ଟାକା ବେଟାଆଡେଏଁ ।

୧୦ ନାନୁ ମିଙ୍ଗେ ଝେସିମାଞ୍ଜାଇଁ, ଏଲେକିହିଁଏ ଆମ୍ବାଆସି ମନ ଝେଟ୍ଟନେସି, ଇଲେତି ପାପୁ ଗାଟାରାକି ମାହାପୁରୁତି ଦୁଡୁୟାଁ ନକିତା ରାହାଁ ଆଡେ ।”

ଜାକ୍ସିଟି ମୀରୁଏସି

୧୧ ଜୀସୁ ଅଡେ ଏଲେଇଚେସି, ରଅଣାକି ରିଆରି ମୀରୁକା ମାଚେରି ।

୧୨ ଏଞ୍ଜାରି ବିତ୍ରାଟି ଉଣା ମୀରୁଏସି ଆବାଲ୍ ଏଲେଇଚେସି, ଆବା ଇଲୁତି ଦନ ବାଟି କିହାନା ନାଙ୍ଗେ ଆୟାନି ବାଗା ହିୟାମୁ । ଏଚେଟିଏ ତାନି ଆବା ତାନି ଦନ ବାଟି କିହାନା ରୀ ମୀରୁକାକି ହୀତେସି ।

୧୩ ଏମ୍ବାଟିଏ ଏଚରଦିନା ହାଜାଲିଏ ଇତି ମୀରୁଏସି ଇଲୁ ବାଗା ହୀହାମାଟାଣି ପାରୁଟାହାଁ ଟାକାୟାଁ ଆସାହାଁ ହେକରାଜି ହାଜାଡୁସେସି,

ଇଞ୍ଜା ଲେନିପନିଏ ଡାୟୁ ଏସ୍କି ଅଣ୍ଠାଆନା ଲାଗେଏତି କାମାତା ତାନି ଦନ ରାପ୍‌ହେସି □

୧୪ ସାମା ବାରେ ଦନ ରାପ୍‌ହେ କେତ ଏ ଦେସାତା କାର୍‌ଖୁ କାଡ଼ାରା ଆହାଲିଏ ଏଞ୍ଜାସି କାକୁଲି ଆଡେସି □

୧୫ ଏରେଟିଏ ଏଞ୍ଜାସି ହାଜାନା ଏ ଦେସାତି ର ସାଞ୍ଜୁକାରି ତାଣା ଗତି ଡୟିତେସି, ଏଞ୍ଜାସି ଏଞ୍ଜାଣାକି ପାଜିୟା ମେଚାଲି ଗୁଡ଼ିୟାତା ପାଣ୍ଡିତେସି;

୧୬ ଇଞ୍ଜା ପାଜିୟା ଆମିନି କାକ୍‌ସା ସାଲିୟା ତିଞ୍ଜି ମାରୁ, ଏଞ୍ଜାଆଁ ତିଞ୍ଜାଲି ମନ କିତେସି, ସାମା ଆମ୍ବାଆରି ଏଞ୍ଜାଣାକି ତିଞ୍ଜାଲି ହାହି ହିଲାଆତେରି □

୧୭ ର ଦିନା ତୀରପୁ ଆହାନା ଅଣ୍ଠାପିତେସି, ମା ଆବା ତାଣାତି ଗତି ବୁଡ଼ି ତିନି ରାନ୍ଦେଏ ହାରା ହାଜିମାନେ, ସାମା ନାନୁ ଇମ୍ବାଆଁ ହାକି ତାକି ହାହିମାଲ୍ □

୧୮ ନାନୁ ନିଜ୍ଜାନା ମା ଆବା ତାଣା ହାଲ୍ ଇଞ୍ଜା ଏଞ୍ଜାଣାଲ୍ ଖେହ୍‌ଲ୍, “ଲାକପୁରୁତି ଆବା କପାଟି ଅଡେ ନୀ ନକିତା ନାନୁ ପାପୁ କିତେଏଁ;

୧୯ ନୀ ମୀରଏଣାତେଏଁ ଇଞ୍ଜା ନାନୁ ଅଡେ ପାଡ଼ା ଆଅଁ; ନାଙ୍ଗେ ର ହଲେଏଣା ଲେହେଁ ଇଟାମୁ □” ଏମ୍ବାଟିଏ ଏଞ୍ଜାସି ନିଜ୍ଜାନା ତାନି ଆବା ଖାକି ହାଚେସି □

୨୦ ସାମା ଆବା ତାନି ମୀରଏଣା ଖାହିମାନାଣି ହେକଟିଏ ମେସାନା କାର୍ମା ଆହାନା ହଟି ହଟିହ୍ ହାଜାନା ପମାହାଁ ନଶ୍ଚିତେସି □

୨୧ ଏମ୍ବାଟିଏ ମୀରଏ ଗାଟାସି ଏଲେଇଚେସି, “ଲାକପୁରୁ ଆବା କପାଟି ଅଡେ ନୀ ନକିତା ନାନୁ ପାପୁ କିତେଏଁ, ନୀ ମୀରଏଣାତେଏଁ ଆୟାଲି ପାଡ଼ା ଆଅଁ □”

୨୨ ସାମା ଆବା ତାନି ହଲିୟାକାଣି ଏଲେଇଚେସି, “ଅଜିତି ହିମ୍ବୁରି ତବେ ତାଚାନା ଇଞ୍ଜାଣାକି ହୁଟି କିଦୁ, ଇଞ୍ଜାଣି କେୟୁତା ମୁଦି ଅଡେ କତାୟାଣା ସେପୁୟା ତୁରୁଞ୍ଜି କିଦୁ,

୨୩ ଇଞ୍ଜାହାଁ ଆକ୍‌ସା ଆଡ଼ି କଡ଼ି ତାଲୁ ତାକା ହାଜାନା ପାୟାଦୁ; ମାର ତିଞ୍ଜା ଉଣ୍ଡାନା ରାହାଁ କିନ,

୨୪ ଇଚିହ୍ ନା ମୀରଏସି ହାହା ହାଜାମାଚେସି, ଖେଣ୍ଡେ ନୀତାମାନେସି; ଜାକ୍‌ସା ହାଜାମାଚେସି ଅଡେ ମେଡ଼ା ଆୟାତେସି □”

ଏମ୍ବାଟିଏ ଏଝାରି ରାହାଁ କିହିମାଚେରି □

୨୫ ଏତିବେଲାତା କାଜା ମୀର୍‌ଏସି ଗୁଡିୟାତା ମାଚେସି, ଏଝାସି କାମା କିହାଁ ଇଲୁ ତାଗେ ଝାୟାଲିଏ, ତାମି ଇଜ ବାଜାଗାଜା ଅଡ଼େ ରାହାଁ କିହିମାନି ହାଲି ଝେଞ୍ଜାନା,

୨୬ ର ହଲେଏଶାଲ୍ ହାଟାନା ଝେଚେସି, “ମାଜ ଏନାଆଁ କିହିମାନେରି □”

୨୭ ଏଝାସି ଏଝାଶାଲ୍ ଏଲେଇଚେସି, “ନୀ ଉଶା ତାୟି ଝେଶ୍ଟା ଝାହାମାନେସି, ଅଡ଼େ ଏଝାସି ନେହ୍ ଆଙ୍ଗା ତଲେ ଝେଶ୍ଟା ଝାଡାଶି ମେସାନା ମୀ ଆବା ଆଙ୍ଗା ଆଡ଼ି କଡ଼ି ପାୟାମାନେସି □”

୨୮ ଏମ୍ବାଟିଏ କାଜା ତାୟି କାର୍‌ବି ଆହାନା ଇଜ ହାଲାଆତେସି; ସାମା ତାମି ଆବା ପାଙ୍ଗାତା ଝାହାନା ଏଝାଶାଲ୍ କାହିବା କପା ଆଆନି ଇଜ ଝାମୁ ଇଞ୍ଜ୍ ବାଡିମାଲିଚେସି □

୨୯ ଇଞ୍ଜା ଏଝାସି ତାମି ଆବାଲ୍ ଏଲେଇଚେସି, “ମେହ୍‌ମୁ ନାନୁ ଇଚର ବାର୍‌ସା ଆଡ଼େ ନୀ ହଲେଏଶା ଲେହେଁ କାମା କିହିମାଲ୍, ଏଚେଲା ଜିକେଏ ନୀ ହୁକୁମି ଉରାହିଲଅଁ, ଆଡ଼ିଜିକେଏ ନା ତଡ଼େସିଙ୍ଗା ତଲେ ବଡ଼ି କିହାଲି ନୀନୁ ନାଙ୍ଗେ ର ଗରି ଡାଲୁ ଜିକେଏ ହୀହାମାଞ୍ଜଅତି;

୩୦ ସାମା ଇ ନୀ ମୀର୍‌ଏସି ଇଲୁତି ବାରେ ଦନ୍ ଅହାନା ସାନେଶିସ୍ମାତଲେ ମାଞ୍ଜାନା ବାରେ ରାପ୍‌ହେସି, ଏଚେତା ଇଝାସି ଝେଶ୍ଟାଝାଡେସି, ଏଚେତା ଏଝାଶାକି ଆଙ୍ଗା ଆଡ଼ି କଡ଼ି ପାୟାମାଞ୍ଜି □”

୩୧ ଏଚେଟିଏ ତାଞ୍ଜି ଗାଟାସି ଏଲେଇଚେସି, “ମୀର୍‌ଏଶା ନୀନୁତ କାଲେଏ ନା ତଲେ ମାଞ୍ଜାମାଞ୍ଜି, ଅଡ଼େ ଏନା ଏନାୟି ନାଦି ଏ ବାରେତ ନୀଦି;

୩୨ ସାମା ଇ ନୀ ତାୟି ହାହା ହାଜାମାଚେସି, ଝେଶ୍ଟେ ନୀତାମାନେସି, ଜାଙ୍ଗା ହାଜାମାଚେସି, ମେଡ଼ା ଆୟାଚେସି, ଏଦାଆଁତାକି ରାହାଁ କିନାୟି ମାଚେ □”



୧ ଜୀସୁ ତାରି ସୀସୁୟାଁଇଁ ଏଲେଇରେସି, “ର ଦନଗାଟାସି ମାରେସି; ଏଝାଣାକି ର ଗୁମୁସ୍ତା ମାରେସି, ଏଝାସି ତାରି ଦନତି ଆଲାରା କିହାମାନାଣି ପୁଞ୍ଜାନା,

୨ ଏଝାସି ଏଝାଣାଇଁ ହାଟାନା ଏଲେଇରେସି, ‘ନାନୁ ନୀ କାତା ଝେରେସିଁ ନାନୁ ନୀ ଗୁମୁସ୍ତା କାମା ଏନି କିହିମାଞ୍ଜି ଲେକା ତସ୍ତାମ୍ବୁ, ଇତିହିଁ ନାନୁ ଅଡେ ଗୁମୁସ୍ତା ଆହା ମାଞ୍ଜାଲି ଆଡଅତି □’

୩ ଏମ୍ବାଟିଏ ଏ ଗୁମୁସ୍ତା ଅଣ୍ପା କତିଡେସି, ‘ନା ସାଝୁକାରି ନା ଗୁମୁସ୍ତା କାମା ପିସିପି କିହିମାଞ୍ଜାନେସି, ନାନୁ ଏନାଆଁ କିଇଁ? ଇର୍ଥା କାରୁହାଲି ନାଜେ ବପୁ ହିଲେଏ, ଅଡେ ରାସ୍ପା ତିଞ୍ଜାଲି ଲାଜା ହଡ଼ି ମାଞ୍ଜାନେ □

୪ ନୀସି ପୁରେସିଁ, ନାଜେ ଗୁମୁସ୍ତା ପାଣାଟି ପିସିପି କିୟାତି ତାୟୁ ଲକୁ ନାଜେ ତାମି ଇଲକାଣା ଆବାନିଲେହେଁ କିଇଁ □’

୫ ଇଞ୍ଜା ଏଝାସି ତାମି ସାଝୁକାରି ତାଣାଟି ରାଣା ଅହାମାଚାରାଇଁ ହାଟାନାହାଁ ତଲିତାଣାଇଁ ଝେରେସି, ‘ନା ସାଝୁକାରି ତାଣା ନୀ ରାଣା ଏରେକା ମାନେ?’

୬ ଏଝାସି ଏଲେଇରେସି, ‘ପାସାକଡ଼ି ତାଟା ନିୟୁଁ’ ଗୁମୁସ୍ତା ଏଝାଣାଇଁ ଏଲେଇରେସି, ‘ନାନୁ ତବେ ଇମ୍ବାଆଁ କୁଗାନା ରୀ କଡ଼ି ଦସ ଇଞ୍ଜିଁ ରାଟାମୁ □’

୭ ତାୟୁ ଅଡେ ରଅଣାଇଁ ଝେରେସି, ‘ନାନୁ ଏରେକା ରାଣା ଅହାମାଞ୍ଜି?’ ଏଝାସି ଏଲେଇରେସି, ‘ର ମାଣା ବାସ୍ତା ଗହଁୟାଁ’ ଗୁମୁସ୍ତା ଏଝାଣାଇଁ ଏଲେଇରେସି, ‘ନାନୁ ତବେ ଇମ୍ବାଆଁ କୁଗାନା ଆଟା ଝାଞ୍ଜା ଇଞ୍ଜିଁ ରାଟାମୁ □’

୮ ଏ ଲାଗେଏତି ଗୁମୁସ୍ତା ବୁଦିତଲେ କାମା କିହାମାନାକି ସାଝୁକାରି ଏଝାଣାଇଁ ନାନୁ ନେହିଁ କାମା କିହାମାଞ୍ଜି ଇରେସି; ଏନାଆଁତାକି ଇତିହିଁ ଉଜେଡ଼ିତି ମୀରକା କିହାଁ ଇ ଦାର୍ଡିତାରି ତାମି କାମାତା ହାରେକା ବୁଦିଗାଟାରି □”

୯ ନାନୁ ଜିକେଏ ମିଜେ ଝେସିମାଞ୍ଜାଇଁ, “ମୀରୁ ଦାର୍ଡିତି ଲାଗେଏତି ଦନ ତଲେ ତଣେ ଦହ୍ତୁ, ଏଡ଼ି ରାଡ଼ିସାରେ ମିଜେ କାଲକାଲାତି ବାସା ଟାୟୁତା ମିଜେ ଆବାନେରି □

୧୦ ଆମ୍ବାଆସି ଉଣା କାମାତା ନାମୁଗାଟାସି ଆନେସି ଏଝାସି କାଜା

କାମାତା ଜିକେଏ ନାମୁଗାଟାସି ଆନେସି, ଇଞ୍ଜା ଆମ୍ବାଆସି ଉଣା କାମାତା ନାମୁଗାଟାସି ଆଆସାରେ ଏଞ୍ଜାସି କାଜା କାମାତା ଜିକେଏ ନାମୁଗାଟାସି ଆଅସି □

୧୧ ଲାଗେଏତି ଦନତା ନାମୁ ଗାଟାତେରି ଆହାହିଲଅତେରି, ଆତିହ୍ ଆମ୍ବାଆସି ମିଙ୍ଗେ ନାମାହାଁ ସାତା ଦନ ମୀ କେୟୁତା ହେରପାନେସି ?

୧୨ ମୀରୁ ଏଟକାତାଣା ଦନତି ନାମୁତଲେ ଲେମ୍ବା ହିଲାଆସାରେ ମିଙ୍ଗେ ମୀ ଲଡ଼ାମାନାଣି ଆମ୍ବାଆସି ହିୟାନେସି ?”

୧୩ ☆“ର ହଲେଏସି ରୀ ସାଞ୍ଜୁକାରି ତାଣା ହଲେଏସି ଆହାଲି ଆଡ଼ଅସି; ଇତିହ୍ ରଅଣାଲ୍ ଜୀଞ୍ଜୁ ନନେସି ରଅଣାଲ୍ ଜୀଞ୍ଜୁ ନନେସି, ଆଆତ୍ ରଅଣାଲ୍ ମାନଞ୍ଜି ଆନେସି ରଅଣାଲ୍ ଅପଅସି □ ମୀରୁ ମାହାପୁରୁ ଅଡ଼େ ଦନତି ହଲିୟାଙ୍ଗା ଆହାଲି ଆଡ଼ଅତେରି □”

ଜୀସୁ ଖେସ୍ତି କାତାୟାଁ

(ମାତି ୧୧:୧୨,୧୩; ୫:୩୧,୩୨; ମାର୍କ ୧୦:୧୧,୧୨)

୧୪ ଇ ବାରେ କାତା ଖେଞ୍ଜାନା ଦନ ଜୁପକା ପାରୁସିୟାଁ ଜୀସୁଲ୍ କାକହେରି □

୧୫ ଏତେଟିଏ ଜୀସୁ ଏଞ୍ଜାରାଲ୍ ଏଲେଇତେସି, “ଆମ୍ବାଆରି ମାଣ୍ଡସି ନକିତା ତୀରିଗାଟାରି ଇଞ୍ଜା ତସା କତିମାନେରି, ମୀରୁ ଏଲେତି ଲକୁ, ସାମା ମାହାପୁରୁ ମୀ ହିୟାତି ପୁନାସି ଇତିହ୍ ଏନାୟି ମାଣ୍ଡସି ଅଣ୍ଡପୁତା କାଜାୟି ଲେହେଁ ତଞ୍ଜା ଆନେ, ଏଡ଼ି ମାହାପୁରୁ ନକିତା ଅପାଆଗାଟାୟି □”

୧୬ ☆“ମସାତି ମେରା ଅଡ଼େ ମାହାପୁରୁ ଅଣ୍ଡପୁତି ବଲୁ ଖେହ୍ନାରି ରାଡ଼ିତି ପତି ଜହନ ପାତେକା ସାଲଞ୍ଜି ଆହିମାଟୁ; ଏତିବେଲାଟିଏ ମାହାପୁରୁ ରାଜିତି ନେହ୍ କାରୁ ଖେକ୍ହି ମାନେରି ଇଞ୍ଜା ବାରେଜାଣା ତାମି ବାଡ଼ୟୁ ତଲେ ମାହାପୁରୁ ରାଜିତା ହଡ଼ିମାନେରି □

☆ ୧୭:୧୩ ୧୭:୧୩ ମାତି ୭:୨୪ ☆ ୧୭:୧୭ ୧୭:୧୭ ମାତି ୧୧:୧୨,୧୩

୧୭ ☆ହାଗୁପାକା ଅଡ଼େ ଦାର୍ତ୍ତି ବାରେ ମେଶ୍‌ଜିନେ ସାମା ମେରାତି
 ଇଚାୟି ସିନା ଜିକେଏ ମେଶ୍‌ଜେଏ □”

୧୮ ☆“ଆମ୍ବାଆସି ତାନି ଡକ୍ରିନି ପିସାନା ଏଟ୍‌କାତାଣି ବୀହା ଆନେସି,
 ଏଞ୍ଜାସି ଦାରି କିନେସି; ଇଞ୍ଜା ଆମ୍ବାଆସି ପିସ୍ତି ଡକ୍ରିନି ବୀହା ଆନେସି,
 ଏଞ୍ଜାସି ଦାରେଲା ଆନେସି □”

ଦନ୍ ଗାଟାସି ଅଡ଼େ ଲାଜର

୧୯ “ର ଦନ୍ ଗାଟାସି ମାଚେସି, ଏଞ୍ଜାସି ହାରେକା ଅଜିତି ହିମ୍ବୁରିଦୁକି
 ହୁଚାନା ନେହ୍ ରାନ୍ଦା ତିଞ୍ଜିହ୍ ହାରେକା ରାହ୍‌ତଲେ ଡୟିମାଚେସି
 □

୨୦ ସାମା ଏଞ୍ଜାଣି ଦୁଞ୍ଜେରି ଦାରିତା ଲାଜର ଦରୁଗାଟି ରୀସ୍‌ପା
 ତିନାସି ଡୟାମାଚେସି,

୨୧ ଗୁଡା ଆଙ୍ଗା ଗାହ୍‌ୟା ଆହାମାଚେସି; ଏ ଦନ୍ ଗାଟାଣି ଜୁଟା
 ଲିତା ତିଞ୍ଜାନା ତାନି ବାଣ୍ଡି ପାଞ୍ଜିକିହାଲି ଆସା କିହିମାଚେସି; ଇଞ୍ଜା
 ନେସ୍‌କା ଖାହି ତାନି ଗାହ୍‌ୟା ନାକିମାରୁ □

୨୨ ର ଦିନା କାର୍ମାଗାଟି ଲାଜର ହାହାହାଚେସି ଇଞ୍ଜା ଲାକପୁରୁତି
 ଦୁହ୍‌ୟା ତଲେ ଅବ୍ରାହାମ ମାଟିତାଣା ଅଞ୍ଜିଆଡେସି; ତାମ୍ବୁ ଏ ଦନ୍
 ଗାଟାସି ଜିକେଏ ହାହାହାଚେସି ଇଞ୍ଜା ମାହ୍‌ଣି ମାଣ୍ଡାତା ମୁସ୍‌ପି
 ଆଡେସି,

୨୩ ଅଡ଼େ ଏଞ୍ଜାସି ହାଡାରି ମାନି ରାଜିତି କସ୍ତତଲେ କିଲିବିଲି
 ଆହ୍ ଲାକ ସିନିକିହାଲିଏ ହେକଟି ଅବ୍ରାହାମ ଅଡ଼େ ତାନିତଲେ
 ଲାଜରଇଁ ମେସ୍‌ସେସି □

୨୪ ଏଚେଟିଏ ଏଞ୍ଜାସି ହାଡିଡେସି, ‘ଏ ଆବା ଅବ୍ରାହାମ, ନାଙ୍ଗେ
 କାର୍ମା ଅଶ୍‌ପାନା ଲାଜରଇଁ ନା ତାଣା ପାଣ୍ଡାମ୍ବୁ ଏଞ୍ଜାସି ତାନି ଖାଞ୍ଜୁତା
 ଏମ୍ବୁ ବନ୍ଦା ତାଚାନା ନା ଖେନ୍‌ରତି ହିଡ଼ଡ଼ି କିୟାପେସି, ଇଚିହ୍ ନାନୁ
 ଇ ହିଡୁତା କିଲିବିଲି ଆହିମାଇଁ □’

୨୫ ସାମା ଅବ୍ରାହାମ ଏଲେଇଚେସି, ‘ମୀର୍‌ଏଣା ନୀନୁ ନୀତାମାଟି
 ବେଲାତା ନୀ ନେହ୍‌ଣି ବେଟାଆଡ଼ି, ଇଞ୍ଜା ଲାଜର ଏଲେକିହ୍ ଏ
 ପଲ୍‌ଆ ଗାଟାଣି ବେଟାଆଡେସି, ଇଦାଆଁ ଅଶ୍‌ପାମ୍ବୁ; ସାମା ନୀଏଁ

ଏଝାସି ଇମ୍ପାଆଁ ସୁକୁ ବେଟାଆହି ମାନେସି, ଅଡ଼େ ନୀନୁ କିଲିବିଲି ଆହିମାଞ୍ଜି □

୨୭ ଅଡ଼େ ର କାତା ମୀ ମାଦି ମା ମାଦି ର କାଜା ଗାଡ଼ୁମ୍ପୁ ମାନେ, ଆମ୍ପାଆରି ଇ ଟାୟୁଟି ମୀ ତାଣା ହାଜାଲି ମନ କିନେରି, ଏଝାରି ହାଜାଲି ଆଡ଼ଅରି ଆଆତ୍ ଏ ଟାୟୁଟି ଇ ଟାୟୁତା ଗାଣ୍ଟାନା ଝାୟାଲି ଆଡ଼ଅରି □

୨୮ ଏମ୍ପାଟିଏ ଦନ ଗାଟାସି ଏଲେଇଚେସି, ‘ଏ ଆବା, ଆତିହିଁ ନାନୁ ନିଜେ ବାତିମାଲିମାଞ୍ଜାଇଁ, ଲାଜରଇଁ ମା ଆବା ଇଜ ପାଣ୍ଡାମ୍ପୁ,

୨୯ ଇତିହିଁ ନା ପାସାଜାଣା ତାୟିୟାଁ ମାନେରି; ଏଝାରି ଜିକେଏ ଏନିକ୍ ଇ କସ୍ତାଟି ଟାୟୁତା ଝାଅରି, ଏଦାଆଁତାକି ଏଝାସି ଏଝାରିତାଣା ସାକି ହାନେସି □

୩୦ ସାମା ଅବାହାମ ଏଲେଇଚେସି, ‘ଏଝାରିତାଣା ମସା ଅଡ଼େ ମାହାପୁରୁ ଅଣ୍ପୁତି ବଲୁ ଝେହନାରି ପତିୟାଁ ମାନୁ, ଏଝାରି ଏ କାତାତି ଝେଣ୍ପାରି □

୩୧ ଏମ୍ପାଟିଏ ଦନ ଗାଟାସି ଏଲେଇଚେସି, ‘ଏ ଆବା ଅବାହାମ, ଏଚେକେଏ ସାରି ଆଏ, ସାମା ହାଡ଼ାରି ବିତ୍ରାଟି ରଅସି ଏଝାରିତାଣା ହାନେସି ଆତିହିଁ ଏଝାରି ମନ ଝେଟନେରି □

୩୨ ସାମା ଅବାହାମ ଏଲେଇଚେସି, ଏଝାରି ମସା ଅଡ଼େ ମାହାପୁରୁ ଅଣ୍ପୁତି ବଲୁ ଝେହନାରି କାତା ଝେନଅରି, ଆତିହିଁ ହାଡ଼ାରି ବିତ୍ରାଟି ଝେଣ୍ପେ ନିଜିତ୍ ଜିକେଏ ଏଝାଣି କାତା ନାମଅରି □”

୧୭

ପାପୁ

(ମାତି ୧୮:୭,୭,୨୧,୨୨; ମାର୍କ ୯:୪୨)

୧ ଜୀସୁ ତାନି ସୀସୁୟାଁଇଁ ଏଲେଇଚେସି, “ଏମିନି ତାୟିପାରି କିନି ତାଣାଟି ଲକୁ ପାପୁତା ହେରନେରି, ଏ ବାରେ ପିଟଞ୍ଜି ଆଏ, ସାମା ତାୟିପାରି କିଞ୍ଜି କିନାସି ଆୟତା ଏଝାସି ଗାଡ଼ି ତଣ୍ଡ ବେଟାଆନେସି;

୨ ଡ଼ଣା କକାରି ବିତ୍ରାଟି ରଅଣାଇଁ ତାୟିପାରି କିନିବାଟା ତାନି ହେରକିତା କାଜା ଜେତାଞ୍ଜାଲି ଦସାନା ସାମ୍ପୁରିତା ମେଡ଼ହିହିଁ ଏଝାଣାକି ନେହେଁ ଆଡ଼େମା □

୩ ✨ମୀରୁ ମୀ ତାକି ଜାଗ୍ରାତା ଆହାମାଞ୍ଜୁ □” “ନୀ ତାୟି ପାପୁ କିନେସି, ଆତିହିଁ ଏଞ୍ଜାଣାଇଁ ଲାଗାମୁ; ଏଞ୍ଜାସି ନାନୁ ପାପୁ କିତେଏଁ ଇଞ୍ଜିଁ ମନ ଖେଟ୍‌ହିହିଁ, ଏଞ୍ଜାଣି ପାପୁ ମ୍ଲୋକ୍‌ହା ତୁହ୍‌ମୁ □

୪ ଅଡେ ଏଞ୍ଜାସି ସାତା ପାଲି ନୀ କପାଟି ପାପୁ କିନେସି ଅଡେ ସାତା ପାଲି ନୀ ତାଣା ଖେଣ୍ଟା ଖାହାନା ନାନୁ ମନ ଖେଟ୍‌ହିମାଇଁ ଇଞ୍ଜିଁ ଇଞ୍ଜାନେସି ଆତିହିଁ ଏଞ୍ଜାଣି ପାପୁ ମ୍ଲୋକ୍‌ହା ତୁହ୍‌ମୁ □”

ନାମୁ

୫ ଏଚେଟିଏ ପାଣ୍ଡୁଞ୍ଜି ଆହାମାନାରି ପ୍ରବୁଇଁ ଏଲେଇଚେରି, “ମା ନାମୁତି ପାତି କିୟାମୁ □”

୬ ପ୍ରବୁ ଏଲେଇଚେସି, “ର ହାସ୍‌ସୁ ପାଡେୟି ଏଚେକା ମୀ ନାମୁ ମାତିହିଁ ମା, ଇ ତୁତୁକଲି ମାର୍‌ନୁତି ହାରୁତଲେ ମେଗାହାଜାନା ସାମ୍‌ଦୁରିତା ଉହି ଆମୁ ଇତିହିଁ ଏଡି ମୀ କାତା ମାନଞ୍ଜି ଆନେ □”

ର ହଲେଏସି କିନି କାମା

୭ “ସାମା ମୀ ବିତ୍ରାଟି ଇଲେତାସି ଆମ୍ବାଆସି ମାନେସି, ତାନି ହଲେଏସି ହେରୁ ତହାନା କି କଡିୟାଁ ମେଗାନା ଖାଡିସାରେ ଏଞ୍ଜାସି ଏଞ୍ଜାଣାଇଁ ଜୁରୁୟାଁ ଗହ୍‌ମୁଦେଁ ଇନେସି ?

୮ ନାଞ୍ଜେ ତିଞ୍ଜାଲି ହିୟାମୁ, ନାନୁ ତିଞ୍ଜାଲି ଆଡାଆ ପାତେକା ଚେତେଲି ହିମ୍ବୁରି ରୁପାନା ନା ସେବା କିୟାମୁ, ଇଞ୍ଜା ତାୟୁ ନୀନୁ ତିନାମୁ ଇଞ୍ଜିଁ ଏଞ୍ଜାଣାଇଁ ଏଲେଇନଅସି ?

୯ ର ହଲେଏସି ସାଞ୍ଜୁକାରି କାତା ମାନଞ୍ଜି ଆହାନା କାମା କିନାକି ଏଞ୍ଜାଣାଇଁ ଜହରା କିନେସିକି ?

୧୦ ଏଲେକିହିଁ ଏ ମୀରୁ ଜିକେଏ ହୁକୁମି ତଲେ କାମା କିତି ତାୟୁ ‘ମାମୁ ପାଡା ଆଆ ହଲିୟାଙ୍ଗାତମି; ଏନାୟି ମାମୁ କିନାୟି ମାଚେ ଏଡାଆଁ କିହାମାନମି’ ଇଞ୍ଜେରି □”

ଜୀସୁ ଦସଜାଣା କାଜା ରଗ ଗାଟାରାଇଁ ନେହିଁ କିନାୟି

୧୧ ଜୀସୁ ଜିରୁସାଲମତା ହାଜିମାଚାଟି ଗାଲିଲି ଅଡେ ସମିରଣି ଦେସା ମାଦିଟି ହାଜିମାଚେସି □

୧୭ ଏମ୍ବାଟିଏ ଏଝାସି ର ନାୟୁତା ଏଗାହାଜାଲିଏ ଦସଜାଣା କାଜା ରଗ ଗାଟାରି ଏଝାଣାକ୍ ବେଟାଆଡେତରି;

୧୩ ଏଝାରି ହେକ ନିଗାନା କାଜା ଗିୟାତଲେ ଏଲେଇଚେରି, “ଏ ଜୀସୁ ଗୁରୁ ମାଜେ କାର୍ମା ମେସ୍ତାମୁ □”

୧୪ ଜୀସୁ ଏଝାରାକ୍ ମେସାନା ଏଲେଇଚେସି, “ମୀରୁ ହାଜାନା ପୂଜେରାଜା ତାଣା ତଞ୍ଜା ଆକାଦୁ □” ଅଡେ ଏଝାରି ହାଜି ହାଜିହ୍ ନେହ୍ ଆଡେରି □

୧୫ ସାନା ଏଝାରି ବିତ୍ତାଟି ରଅସି ତାନୁ ନେହ୍ ଆଡାଣି ମେସାନା କାଜା ଗିୟାତଲେ ମାହାପୁରୁତି ଜହରା କିହ୍ କିହ୍ ଝେଣ୍ଡା ଝାହାନା,

୧୬ ଜୀସୁତି କତାୟା ଡ଼ଇ ମୁନୁ କୁତାନା ଜହରା କିତେସି; ଏଝାସି ସମିରଣି ଲକୁ ମାଚେସି □

୧୭ ଏଚେଟିଏ ଜୀସୁ ଏଲେଇଚେସି, “ଦସଜାଣା ନେହ୍ ଆଆଡେରିକି ? ଅଡେ ନ ଜାଣା ଏମ୍ବିୟା ମାନେରି ?

୧୮ ମାହାପୁରୁକ୍ ଜହରା କିହାଲି ଇ ଜୀହୁଦିଆଆତି ଲକୁ ପିସ୍ପେ ଆମ୍ବାଆସି ଝେଣ୍ଡା ଝାଆଡେସି ?”

୧୯ ଇଞ୍ଜା ଜୀସୁ ଏଝାଣାକ୍ ଏଲେଇଚେସି, “ନିଜାନା ହାଲାମୁ ନୀ ନାମୁ ନିଜେ ନେହ୍ କିହାମାଞ୍ଜାନେ □”

ମାହାପୁରୁ ରାଜି ଝାନାୟି

(ମାତି ୨୪:୨୩-୨୮, ୩୭-୪୧)

୨୦ ମାହାପୁରୁତି ରାଜି ଏଚେଲା ଝାହିମାନେ, ଇ କାତା ପାରୁସିୟା ଝେଞ୍ଜାଲିଏ ଏଝାସି ଏଝାରାକ୍ ଏଲେଇଚେସି, “ମାହାପୁରୁତି ରାଜି ତଞ୍ଜା ଆହ୍ ଝାଏ;

୨୧ ଇମ୍ବାଆଁ ମାନେକି ଏମ୍ବାଆଁ ମାନେ ଇଞ୍ଜ୍ ଲକୁ ଝେସ୍ତଅରି; ଇଚିହ୍ ମାହାପୁରୁତି ରାଜି ମୀ ବିତ୍ରେଏ ମାନେ □”

୨୨ ଇଞ୍ଜା ଜୀସୁ ତାନି ସୀସୁୟାକ୍ ଏଲେଇଚେସି, “ଇଲେତି ବେଲା ଝାନ୍ନେ, ଏଚିବେଲା ମାଣ୍ଡସି ମୀରଏଣାତି ର ଦିନା ମେସାଲି ମନ୍ କିତିହ୍ ଜିକେଏ ମେହ୍ଅଡେରି □

୨୩ ଏଚିବେଲା ଲକୁ ମିଙ୍ଗେ ଖେସ୍ତାନେରି, ଏଝାସି ଇମ୍ବାଆଁ ମାନେସି ଏମ୍ବାଆଁ ମାନେସି; ସାମା ଏଝାରି କାତା ଆହୁଆଦୁ କି ଏଝାରିତଲେ ତାକାଆଦୁ □

୨୪ ଏନିଇଚିହିଁ ହାଗୁ ମ୍ଲୁହନାଟି ର କନଟି ଅର କନଝାକି ଉଜେଡ଼ି ଆନେ, ଏଲେକିହିଁଏ ମାଣ୍ଠସି ମୀରୁଏଣା ଦିନାତା ଆନେ □

୨୫ ସାମା ଏଝାସି ଗାଡ଼ି କସ୍ତ ପାଣ୍ଠନାୟି ମାନେ, ଇଞ୍ଜା ଇ କାଲାତି ଲକୁ ଏଝାଣାଇଁ ଅପଅରି □

୨୬ ଅଡ଼େ ନହ ବେଲାତା ଏନିକିଁ ଆହାମାଚେ, ମାଣ୍ଠସି ମୀରୁଏସି ଝାନ୍ତି ଦିନାତା ଜିକେଏ ଏଲେକିହିଁଏ ଆନେ;

୨୭ ନହ ଜାଜାତା ହଡ଼ନି ଦିନା ପାତେକା ଲକୁ ତିଞ୍ଜି ଉଣ୍ଡିହିଁ ବୀହା କିୟାଲି ବୀହା ହିୟାଲି ହେରାମାଚେରି, ଏଚିବେଲା କାଜା ପିୟୁ ଝାଡ଼େ ଇଞ୍ଜା ବାରେତି କୁପହାତୁସ୍ତେ □

୨୮ ଲଟ ବେଲାତା ଜିକେଏ ଏଲେଏ ଆଡ଼େ, ଲକୁ ତିଞ୍ଜି ଉଣ୍ଡି ମାଚେରି, କଡ଼ି ମାଚେରି, ପାର୍ଡ଼ି ମାଚେରି, ମାର୍କା ଉହି ମାଚେରି ଅଡ଼େ ଇଲକା କିହାଲି ହେରାମାଚେରି,

୨୯ ସାମା ଲଟ ସଦମ ଗାଡ଼ାଟି ହଡ଼ା ହାଲୁଝନିଏ, ଲାକପୁରୁଟି ହିତୁ ଅଡ଼େ ଗାନ୍ଦାଗୁଣ୍ଡା ଝାହାନା ବାରେତି ନାସା କିତେ □

୩୦ ମାଣ୍ଠସି ମୀରୁଏସି ଝାନ୍ତି ଦିନାତା ଜିକେଏ ଏଲେଆହିଁଏ ଆନେ □”

୩୧ ☆“ଏ ଦିନା ଆମ୍ବାଆସି ଇଲୁ ଲାକ ମାନେସି, ଏଝାସି ଇଲୁ ବିତ୍ରାମାନି ତାନି ଆସ୍ତି ଅହାଲି ରେଚା ଝାଆପେସି; ଏଲେକିହିଁଏ ଆମ୍ବାଆସି ନେଝଏଲାତା ମାନାସି ଇଜ ଖେଣ୍ଡା ଝାଆପେସି □

୩୨ ଲଟ ଡକ୍ତିନି କାତା ଅଣ୍ପାଦୁ □

୩୩ ☆ଆମ୍ବାଆସି ତାନି ଜୀଝୁତି ନୀଟହାଲି ମନ କିନାସି, ଏଝାସି ନାସା ଆନେସି, ଅଡ଼େ ଆମ୍ବାଆସି ତାନି ଜୀଝୁତି ଆସା କିଆଗାଟାସି ଏଝାସି ନୀଡିନେସି □

୩୪ ନାନୁ ମିଙ୍ଗେ ଖେସିମାଞ୍ଜାଇଁ, ଏ ଲାଆଁୟାଁ ରିଆରି କାଚେଲିତା ତୁରା ଡ଼ୟିନେରି, ରଅସି ଅଝିଆନେସି ଅଡ଼େ ରଅସି ଏମ୍ବାଆଁ

☆ ୧୭:୩୧ ୧୭:୩୧ ମାତି ୨୪:୧୭,୧୮; ମାର୍କ ୧୩:୧୫,୧୬
୧୦:୩୯; ୧୭:୨୫; ମାର୍କ ୮:୩୫; ଲୁକ ୯:୨୪; ଜହ ୧୨:୨୫

☆ ୧୭:୩୩ ୧୭:୩୩ ମାତି

ଡ଼ିନିନେସି □

୩୫ ରୀ ଇୟାସିକା ରଣ୍ଡିଏ ତାଣା ନୁୟ୍‌ମାନୁ, ରଣ୍ଡି ଅଢ଼ିଆନେ ରଣ୍ଡି ଏମ୍ବାଆଁ ଡ଼ିନିନେ □

୩୬ ରିଆରି ନେଃଏଲୀତା ମାନେରି, ରଅସି ଅଢ଼ିଆନେସି, ରଅସି ଏମ୍ବାଆଁ ଡ଼ିନିନେସି □”

୩୭ ଏଚେଟିଏ ସୀସୁୟାଁ ଏଲେଇଚେରି, “ଏ ପ୍ରବୁ ଏମ୍ବିୟା ?” ଜୀସୁ ଏଲେଇଚେସି, “ମାଡ଼ହା ଏମ୍ବିୟାମାନେ ଏମ୍ବାଆଁ ରାମ୍‌ଣାୟାଁ ରୁଣ୍ଡା ଆନୁ □”

୧୮

ରାଢ଼େଣି ଇୟାନି ନୀହାଁୟି

୧ ୱାହାଆନା ଅଲେ ଅଲେ ପ୍ରାଡାନା କିନାୟିମାନେ, ଇ କାତାତି ଜୀସୁ ସୀସୁୟାଁଇଁ ପୁଣ୍ଡିକିନି କାତାତଲେ ୱେସେସି

୨ “ର ଗାଡାତା ର ନୀହାଁୟି କିନାସି ମାଚେସି, ଏଞ୍ଜାସି ମାହାପୁରୁଇଁ ଆଜି ହିଲାଆତେସି କି ମାଣ୍ଡିୟାଁଇଁ ଜିକେଏ ଅଣ୍ଡିପି ହିଲାଆତେସି □

୩ ଏ ଗାଡାତା ର ରାଢ଼େଣି ମାଚେ, ଏଡ଼ି ନୀହାଁୟି କିନାଣି ତାଣା ଅଲେ ଅଲେ ହାଜିହଁ ନୀନୁ ନେହଁ ନୀହାଁୟି କିହଁ ନା କପାଟି ନିଙ୍ଗିମାଞ୍ଜାନାଣା ତାଣାଟି ଗେଲ୍‌ପାମୁ ଇଞ୍ଜିଁ ବାତିମାଲିମାଚେ □

୪ ଅଡ଼େ ଏଞ୍ଜାସି ଏଦାନି କାତା ୱେଞ୍ଜି ହିଲାଆତେସି; ତାମୁ ଏଞ୍ଜାସି ମନ ମନତା ଅଣ୍ଡିପିତେସି, ନାନୁ ମାହାପୁରୁଇଁ ଆଜିହିଲଅଁ କି ମାଣ୍ଡିୟାଁ ଅଣ୍ଡିପି ହିଲଅଁ,

୫ ଆଡ଼ିଜିକେଏ ଇ ରାଢ଼େଣି ନାଙ୍ଗେ କସୁ ହାହିମାଞ୍ଜାନାକି ନାନୁ ତାନି କପାଟି ନିଙ୍ଗିମାନି ନୀହାଁୟି ଡିକହାତୁହଇଁ, ଆଆତଁ ଏଡ଼ି ନାଙ୍ଗେ ବାରେବେଲା ରିଜିରିଜା କିହେମାଞ୍ଜାନେ □”

୬ ଏମ୍ବାଟିଏ ପ୍ରବୁ ଏଲେଇଚେସି, “ଇ ଲାଗେଏତି ନୀହାଁୟି କିନାଣି କାତା ଅଣ୍ଡିପାଦୁ □

୭ ଆଡ଼ିହଁ ମାହାପୁରୁ ଆଡ଼ିତି ଲକୁ ଲାଆଁ ମାଦେନା ଏଞ୍ଜାଣାଈଁ ହାଡ଼ିହଁ ଡ଼ିନିନେରି, ଏଞ୍ଜାସି କି ଏଞ୍ଜାରି ନୀହାଁୟି କିଅସି ? ଆଡ଼ିଜିକେଏ ଏଞ୍ଜାସି ଏଞ୍ଜାରି ସାତୁୟାଁକି ହାଡ଼େକା ଅର୍‌ହିନାସି ଆନେସି କି ?

୮ ନାନୁ ମିଙ୍ଗେ ଝେସିମାଞ୍ଜାଇଁ, ଏଞ୍ଜାସି ତବେ ଏଞ୍ଜାରି ତାକି କିଞ୍ଜି ଆହାମାନି ପଲ୍ଲଆ କାମାତି ନୀହାୟି କିନେସି, ଆଡ଼ିଜକେଏ ମାଣସି ମୀରଏସି ଦାର୍ତ୍ତିତା ଖାହାନା ନାମୁତି ମେହ୍ନେସି ?”

ପାରୁସି ଅଡ଼େ ସିସ୍ତୁ ରୁାହ୍ନାଣି ପୁଣ୍ଡିକିନି କାତା

୯ ତାମଙ୍ଗେ ତୀରିଗାଟାତମି ଇଞ୍ଜି ଅଣ୍ପାନା ଏଟ୍ଟକା ତାରାଇଁ ହାଣି କିନି ଲକୁଣି ଜୀସୁ ଇ ପୁଣ୍ଡିକିନି କାତା ଝେସ୍ତେସି,

୧୦ ରିଆରି ପ୍ରାତାନା କିହାଲି ର ପ୍ରାତାନା ଇଲୁତା ହାଚେରି, ରଅସି ପାରୁସି ଅଡ଼େ ରଅସି ସିସ୍ତୁ ରୁାହ୍ନାସି □

୧୧ ପାରୁସି ନିଚାନା ଇଲେକିହ୍ ପ୍ରାତାନା କିତେସି, “ଏ ମାହାପୁରୁ ନାନୁ ନିଙ୍ଗେ ଜହରା କିହିମାଞ୍ଜାଇଁ, ନାନୁ ଏଟ୍ଟକା ଲକୁ ଲେହେଁ ଦାମ୍ବୁ ହିଲାଆ ଗାଟାତେଏଁ ଆଏ, ସରୁ, ଦାରି ଗାଟାତେଏଁ ଆଏ କି ଇ ସିସ୍ତୁ ରୁାହ୍ନାଣି ଲେହେଁ ଜିକେଏ ଆଏ;

୧୨ ନାନୁ ଖାଚା ତାକି ରୀ ଦେବା ଉପାସା କିହିମାଞ୍ଜାଇଁ, ଅଡ଼େ ନାନୁ ବେଟାଆହି ମାନାଣି ବାରେ ଦସ ବାଗାଟି ର ବାଗା ହାହିମାଞ୍ଜାଇଁ □”

୧୩ ସାମା ସିସ୍ତୁ ରୁାହ୍ନାସି ହେକ ନିଚାନା ତାନି କାନୁ ଲାକପୁରୁ ଖାକି ଜିକେଏ ପେରହାଁ ସିନକିହାଲି ସାସା କିଆତେସି, ସାମା ତାନି ବକତା ଝେଟା କତାନା ଏଲେଇଚେସି, “ଏ ମାହାପୁରୁ ନାନୁ ପାପୁ ଗାଟାତେଏଁ ନାଙ୍ଗେ କାମା ମେସ୍ତାମୁ □”

୧୪ ☆“ନାନୁ ମିଙ୍ଗେ ଝେସିମାଞ୍ଜାଇଁ, ଏଞ୍ଜାସି ଆଏ ସାମା ସିସ୍ତୁ ରୁାହ୍ନାସି ତୀରିଗାଟାସି ଆହାନା ତାନି ଇଜ ହାଚେସି; ଏନିଇଚିହ୍ ଆମ୍ବାଆସି ନାନୁ କାଜାତେଏଁ ଇଞ୍ଜା କଡ଼ିନେସି, ଏଞ୍ଜାଣାଇଁ ଉଣା କିଞ୍ଜିଆନେ, ସାମା ଆମ୍ବାଆସି ନାନୁ ଉଣାତେଏଁ ଇନେସି, ଏଞ୍ଜାଣାଇଁ କାଜାସି କିଞ୍ଜିଆନେ □”

**ଜୀସୁ ଉଣା ପଦି ପଦାୟାଣି ବର ହାନାୟି
(ମାତି ୧୯:୧୩-୧୫; ମାର୍କ ୧୦:୧୩-୧୭)**

☆ ୧୮:୧୪ ୧୮:୧୪ ମାତି ୨୩:୧୨; ଲୁକ ୧୪:୧୧

୧୫ ଏଞ୍ଜାସି ଏନିକି କକାରି ପଦାଣି ତାଗିନେସି, ଏଦାଆଁତାକି ଲକୁ ଏଞ୍ଜାରାଇଁ ଜୀସୁ ତାଣା ତାଚାଲି ମାଟ୍‌ହେରି; ସାମା ସୀସୁୟାଁ ଏଦାଆଁ ମେସାନା ଏଞ୍ଜାରାଇଁ ଦାକା ହୀତେରି □

୧୬ ସାମା ଜୀସୁ କକାରି ପଦାଣି ତାଗେ ହାଟାନା ଏଲେଇଚେସି, “କକାରି ପଦାଣି ନା ତାଗେ ଖାହାଲି ହୀଦୁ, ଏଞ୍ଜାରାଇଁ କାହିକିଆଦୁ; ଏନିଇଚିହିଁ ମାହାପୁରୁତି ରାଜି ଇଲେତାରାଞ୍ଜାୟି □

୧୭ ନାନୁ ମିଙ୍ଗେ ସାତା ଖେସିମାଞ୍ଜାଇଁ, ଆମ୍ବାଆସି ଉଣା କକାରି ପଦାୟାଁ ଲେହେଁ ମାହାପୁରୁ ରାଜି ଆହୁଅସି ଏଞ୍ଜାସି ଏନିକି ଜିକେଏ ଏମ୍ବାଆଁ ହଡାଲି ଆଡ଼ଅସି □”

ର ଦନ ଗାଟାସି

(ମାତି ୧୯:୧୭-୩୦; ମାର୍କ ୧୦:୧୭-୩୧)

୧୮ ଜୀହୁଦି ଲକୁ ବିତ୍ରାଟି କାଜାସି ଜୀସୁଇଁ ଖେଚେସି, “ଏ ନେହିଁ ଗୁରୁ କାଲାକାଲାତି ଜୀସୁ ବେଟାଆହାଲି ନାନୁ ଏନାଆଁ କିଇଁ ?”

୧୯ ଜୀସୁ ଏଞ୍ଜାଣାଇଁ ଏଲେଇଚେସି, “ନାଙ୍ଗେ ନେହାଁତି ଇଞ୍ଜିଁ ଏନାଆଁତାକି ଏଲେଇଞ୍ଜିମାଞ୍ଜି ? ଇଚିହିଁ ମାହାପୁରୁ ରଅସିଏ ନେହାଁସି ମାନେସି ଏଞ୍ଜାଣି ପିସ୍‌ପେ ଆମ୍ବାଆସି ନେହାଁସି ହିଲଅସି □

୨୦ ହୁକୁମିକା ପୁଞ୍ଜାମାଞ୍ଜି, ‘ଦାରି କିଆନି, ଲକୁଣି ପାୟାଆନି, ସରୁ କିଆନି, ମିଚିସାକି ହୀଆନି, ତାଲି ତାଞ୍ଜି କାତା ମାନି କିମ୍ପୁ’ □”

୨୧ ଦନଗାଟାସି ଏଲେଇଚେସି, “ନାନୁ ଇ ବାରେ ଉଣାଖେଡ଼ାଟିଏ କିହିମାଇଁ □”

୨୨ ଜୀସୁ ଇ କାତା ଖେଞ୍ଜାନା ଏଞ୍ଜାଣାଇଁ ଏଲେଇଚେସି, “ନୀନୁ ର କାମା କିନାୟିମାନେ; ନୀନୁ ନୀ ତାଣା ମାନି ବାରେ ଦନବିତି ପାରତାନାହାଁ ହିଲାଆ ଗାଟାରାକି ଦାନା ହୀମୁ, ଇଞ୍ଜା ତାୟୁ ନୀନୁ ଲାକପୁରୁତା ଦନ ବେଟାଆଦି; ଏଚେଟିଏ ନା କ୍ରେଟ କ୍ରେଟ ଖାମୁ □”

୨୩ ସାମା ଏଞ୍ଜାସି ଇ ବାରେ କାତା ଖେଞ୍ଜାନା ହାରେକା ଦୁକୁ ଆଡ଼େସି, ଇଚିହିଁ ଏଞ୍ଜାସି ବାଡ଼କୁ ଗାଟାସି ମାଚେସି □

୨୪ ଏଚେଟିଏ ଜୀସୁ ଏଞ୍ଜାଣାଇଁ ମେସାନା ଏଲେଇଚେସି, “ଆମ୍ବାଆରି ଦନ ମାନେ, ଏଞ୍ଜାରି ହାରେକା କସ୍ତଲେ ମାହାପୁରୁତି ରାଜିତା ହଡ଼ନେରି □

୨୫ ଇତିହାସି ମାହାପୁରୁଷି ରାଜିତା ଦନଗାଟାସି ହଡ଼ନି କିହାଁ ଉଟୁ ସୂଜା କାଣିଟି ହଡ଼ାହାନାୟି ଉସାସା □”

୨୬ ଏ କାତା ଖେଞ୍ଜିମାଟାରି ଏଲେଇଚେରି, “ଆତିହାସି ଆମ୍ବାଆସି ଗେଲ୍‌ପି ଆହାଲି ଆଡ଼ିନେସି ?”

୨୭ ଜୀସୁ ଏଲେଇଚେସି, “ଏନାଆଁ ଲକୁ କିୟାଲି ଆଡ଼ାଆଗାଟାଣି ମାହାପୁରୁ କିହାଲି ଆଡ଼ିନେସି □”

୨୮ ଏଚେତା ପିତର ଜୀସୁଇଁ ଖେଚେସି, “ମେହ୍‌ମୁ ମାମ୍ବୁବାରେ ପିସାନା ନୀ ଜେତ ଖାହିମାନମି □”

୨୯ ଜୀସୁ ଏଞ୍ଜାରାଇଁ ଖେସେସି, “ନାନୁ ମିଙ୍ଗେ ସାତା ଖେସିମାଞ୍ଜାଇଁ, ଆମିନି ଗାଟାରି ମାହାପୁରୁ ରାଜିତାକି ଇଲୁକାଣ୍ଡା, ଡକ୍ରିନି, ତାୟି, ତାଲି ତାଞ୍ଜି, ଅଡ଼େ ମୀରକା ମାସ୍କାଣି ପିସାମାନେରି,

୩୦ ଏଞ୍ଜାରି ଇ ଜୁଗୁତା ହାରେକା ଆଗାଡ଼ା ବେଟାଆହାନା, ଖାନି ଜୁଗୁତା କାଲ୍ୟାକାଲ୍ୟାତି ଜୀଞ୍ଜୁ ବେଟା ଆନେରି □”

ଜୀସୁ ତାନି ଦେବା ତାନି ହାକିତି ଖେହ୍‌ନାୟି

(ମାତି ୨୦:୧୭-୧୯; ମାର୍କ ୧୦:୩୨-୩୪)

୩୧ ଜୀସୁ ତାନି ବାରଜାଣା ସୀସୁୟାଁଇଁ ହାଟାନା ଖେସେସି, “ମେହ୍‌ମୁ ମାର ଜିରୁସାଲମତା ହାଜିମାନାୟି, ଏମ୍ବାଆଁ ମାଣ୍ଡସି ମୀରଏଣି ତାକି ମାହାପୁରୁ ଅଣ୍‌ପୁତି ବଲୁ ଖେହ୍‌ନାରି ଏନା ଏନାଆଁ ରାଟାମାନେରି, ଏ ବାରେ ମାଣ୍ଡସି ମୀରଏଣା ତାଣା ସାତା ଆନେ;

୩୨ ଇତିହାସି ଏଞ୍ଜାଣାଇଁ ଏଟ୍‌କା କୃତାତାରି କେୟୁତା ହେର୍‌ପିନେସି, ଇଞ୍ଜା ଏଞ୍ଜାରି ଏଞ୍ଜାଣାଇଁ କାକ୍‌ନେରି, ଏଞ୍ଜାଣାଇଁ ହୀଣି କିହାନା ହୁପିନେରି,

୩୩ ଏଞ୍ଜାଣାଇଁ ସାଟ୍‌ଣି ତ:ରିତଲେ ଖେଟାନା ପାୟିନେରି, ଇଞ୍ଜା ତାନି ଦିନାଟିଏ ନିଜିନେସି □”

୩୪ ସାମା ସୀସୁୟାଁ ଇ ବାରେ କାତା ପୁଞ୍ଜାଲି ଆଡ଼ାଆତେରି; ଇ କାତା ଏଞ୍ଜାରିତାଣା ଡ଼ଗୁାନା ମାଟେ, ଏନାଆଁ ଖେସ୍‌ପି ଆହିମାଟେ ଏ ବାରେ ପୁଞ୍ଜିହିଲାଆତେରି □

ରୀସପାତିନି କାଣାଇଁ ଜୀସୁ ନେହ୍‌କିନାୟି

(ମାତି ୨୦:୨୪-୩୪; ମାର୍କ ୧୦:୪୭-୫୨)

୩୫ ଜୀସୁ ଜିରିହ ଗାଡ଼ାତା ଏଜିମାଚାଟି ର କାଣା ଜିରୁତା କୁଗାନା ରାସ୍ତାରେସି □

୩୬ ଏଝାସି ଲକ୍ଷ୍ମି ହାଜିମାନି ହାଡ଼ା ଖେଞ୍ଜାନା, “ଇଦି ଏନାୟି ଆହିମାନେ ଇଞ୍ଜି ଖେରେସି □”

୩୭ “ନାଜରିତତି ଜୀସୁ ଇମ୍ପାଟି ହାଜିମାନେସି” ଇଞ୍ଜି ଖେସ୍ତେରି □

୩୮ ଏରେଟିଏ କାଣା କାଜା ଗିୟାତଲେ ଏଲେଇଞ୍ଜି ଇରେସି, “ଏ ଜୀସୁ ଦାଝୁଦ ମୀରଏଣାତି ନାଞ୍ଜେ କାର୍ମା ମେସ୍ତାମୁ □”

୩୯ ସାମା ନକିତା ହାଜିମାଚାରି ଏଝାଣାକ୍ ପାଲେଏ ମାଞ୍ଜାଲି ଦାକା ହୀତେରି, ସାମା ଏଝାସି ଅଡ଼େ କାଜା ଗିୟାତଲେ ଏଲେଇରେସି, “ଏ ଜୀସୁ ଦାଝୁଦ ମୀରଏଣାତି ନାଞ୍ଜେ କାର୍ମା ମେସ୍ତାମୁ □”

୪୦ ଏରେଟିଏ ଜୀସୁ ଏମ୍ପାଆଁ ନିଚାନା କାଣାକ୍ ତାନି ଦାରିତା ତାଚାଲି ଚାଣ୍ଡିତେସି; ଏରେତା କାଣା ତାଗେ ଝାଡ଼େସି ଇଞ୍ଜା ଜୀସୁ ଏଝାଣାକ୍ ଖେରେସି,

୪୧ “ନାନୁ ନିଞ୍ଜେତାକି ଏନାଆଁ କିକ୍ ଇଞ୍ଜି ମନ କିହିମାଞ୍ଜି ?”

କାଣା ଏଲେଇରେସି, “ଏ ପ୍ରବୁ ନାନୁ ଏନିକ୍ ମେସାଲି ଆଡ଼ିକ୍ □”

୪୨ ଜୀସୁ ଖେସ୍ତେସି, “ନାନୁ ମେହ୍ମୁ, ନୀ ନାମୁ ନିଞ୍ଜେ ନେହ୍ମ କିୟାତେ □”

୪୩ ଏ ଦେବୁଣିଏ ଏଝାସି ମେସାଲି ଆଡ଼ିତେସି ଇଞ୍ଜା ମାହାପୁରୁତି ଜହରା କିହି କିହି ଜୀସୁ ଜେଚ ହାରେସି, ଅଡ଼େ ଲକ୍ଷୁ ଏନାଆଁ ମେସାନା ମାହାପୁରୁକ୍ ଜହରା କିତେରି □

୧୯

ଜୀସୁ ଅଡ଼େ ଜକିୟ

୧ ଜୀସୁ ଜିରିହତା ହଡ଼ାନା ଗାଡ଼ା ମାଦିଟି ହାଜିମାରେସି □

୨ ଏମ୍ପାଆଁ ଜକିୟ ଦରୁଗାଚାସି ରଅସି ମାରେସି, ଏଝାସି ସିସ୍ତୁ ରାହ୍ନାରି ବିତ୍ରାଟି କାଜାସି ଅଡ଼େ ଏଝାଣାକି ହାରେକା ଦନ ମାରେ □

୩ ଜୀସୁ ଏନିଲେହେଁତାସି ଇଞ୍ଜିଁ ଏଝାଣାଇଁ ମେସାଲି ହାରେକା ମନ ମାତେ, ସାମା ହାରେକା ଲକୁ ମାତାକି ମେସାଲି ଆଡ଼ିହିଲାଆତେସି, ଏନାଆଁତାକି ଇଚିହଁ ଏଝାସି କୁଜା ମାତେସି □

୪ ଏମ୍ବାଟିଏ ଏଝାସି ନକିତା ହଟି ହଟି ହାଜାନା ଜୀସୁ ହାନି ଜିରୁତା ଏଝାଣାଇଁ ମେସାଲି ର ତୟା ମାର୍ନୁତା ହଡ଼େସି, ଇଚିହଁ ଜୀସୁ ଏ ଜିରୁଟି ହାନାୟି ମାତେ □

୫ ଜୀସୁ ଏମ୍ବାଆଁ ଏଜାନା ଲାକ ସିନିକିହାନା ହାଟିତେସି, “ଆଡ଼େ ଜକିୟ ତବେ ରେଚାଝାମୁ ଇଚିହଁ ନୀଞ୍ଜୁ ନାନୁ ମୀ ଇଜ ଗତା ଝାନାୟି ମାନେ □”

୬ ଏଝାସି ତବେ ରେଚାଝାହାନା ଏଝାଣାଇଁ ରାହ୍ମାଟି ତାମି ଇଜ ହାଟିତେସି □

୭ ଇଦାଆଁ ମେସାନା ବାରେ ଲକୁ ମୁରୁ ମୁରୁ ଆହଁ କାତା ଆଡ଼େରି, “ଇଝାସି ର ପାପୁ ଗାଟାରି ଇଜ ଗତା ହାଜିମାନେସି □”

୮ ସାମା ଜକିୟ ନିଚାନା ପ୍ରବୁଇଁ ଏଲେଇଚେସି, “ଏ ପ୍ରବୁ ନାନୁ ନା ଦନତି ର ବାଗା ହିଲାଆ ଗାଟାରାକି ହାଇଁ, ଅଡ଼େ ନାନୁ ଆମ୍ବାଆରି ତାଣାଟି ଏନାଆଁ ତାଚାମାଟିହଁ ସାରି ବାଗା ଆଗାଡ଼ା ଝେଟ୍ଟଇଁ □”

୯ ଏମ୍ବାଟିଏ ଜୀସୁ ଏଲେଇଚେସି, “ନୀଞ୍ଜୁ ଇ ଇଜତି ଲକୁତାକି ଗେଲ୍ପିନାୟି ଝାହାମାନେ, ଇଚିହଁ ଇଝାସି ଜିକେଏ ଅବ୍ରାହାମତି କୃତାତାସି □

୧୦ ✨ଇଚିହଁ ଏନାୟି ଜାଙ୍ଗା ହାଜାମାନେ ଏଦାଆଁ ପାରାନା ଗେଲ୍ପାଲି ମାଣ୍ଡସି ମୀର୍ଏସି ଝାହାମାନେସି □”

ବାଂଗାରା ଟାକା
(ମାତି ୨୫:୧୪-୩୦)

୧୧ ଲକୁ ଇ କାତା ଝେଞ୍ଜି ମାଟାଟି ଏଝାସି ଅଡ଼େ ର ପୁଣ୍ଡିକିନି କାତା ଝେସେସି, ଇଚିହଁ ଏଝାସି ଜିରୁସାଲମ ତାଗେ ଆହାମାତେସି, ଇଚିହଁ ମାହାପୁରୁ ରାଜି ତବେ ତଞ୍ଜାଆନେ ଇଞ୍ଜିଁ ଅଣ୍ଡିପାରେରି □

୧୨ ଏଝାସି ଏଲେଇଚେସି, “ର କାଜା କୃତାତାସି ରାଜା ପାଣା ବେଟାଆହ୍ମା ଝେଶ୍ଟା ଝାଇଁଝା ଇଞ୍ଜିଁ ର ହେକ ରାଜି ହାଚେସି □

୧୩ ଏଞ୍ଜେଲ୍ ତାରି ଦସଜାଣା ହଲିୟାଙ୍ଗାଣି ହାଟାନା ଏଞ୍ଜେରାକି ଦସଗଟା ଖେଣ୍ଡି ଟାକା ଲାକା ହାହାନା ଏଲେଇରେସି, ‘ନାନୁ ଖେଣ୍ଡା ଖାନି ପାତେକା ମୀରୁ ଇ ଟାକା ତଲେ ବେବାରା କିଦୁ □’

୧୪ ସାମା ତାନି ଦେସାତାରି ଏଞ୍ଜେଲ୍ ଅପିହିଲାଆତେରି, ‘ଇଞ୍ଜେଲ୍ ମାଜେତାକି ରାଜା ଆୟାଆପେସି’ ଇଞ୍ଜେଲ୍ ତାନି ଜେଟଏ କସ୍‌କାଣି କାରୁ ଖେସା ପାଣ୍ଡିତେରି □”

୧୫ ତାୟୁ ଏଞ୍ଜେଲ୍ ରାଜା ପାଣା ବେଟାଆହାନା ତାନି ରାଜିତା ଖେଣ୍ଡାଖାଡେସି, ଇଞ୍ଜେଲ୍ ତାନୁ ଟାକାୟା ହାହାମାଟି ହଲିୟାଙ୍ଗା ବେବାରା କିହାଁ ଏତେକା ଲାବା କିହାମାନେରି ଏଡାଆଁ ପୁଞ୍ଜାଲି ଏଞ୍ଜେରାକି ହାଟିକିତେସି, ଇଞ୍ଜେଲ୍ ଖେରେସି □

୧୬ ତଲିତାସି ଖାହାନା ଏଲେଇରେସି, “ବାବୁ ନୀନୁ ହାହାମାଞ୍ଜାତି ର ଟାକା ତଲେ ବେବାରା କିହାନା ଦସଟାକା ଲାବା କିହାମାକି □”

୧୭ ଏଞ୍ଜେଲ୍ ଏଞ୍ଜେଲ୍ ଏଲେଇରେସି, “ନେହ୍ ଟିକାଣାଗାଟି ନାମୁଟି ହଲେଏଣାଟି, ନୀନୁ ଉଣା କାମାତାକି ନେହ୍ କାମା କିହାମାନାକି ନୀନୁ ଦସଗଟା ଗାଡ଼ାୟାଁ ସାଲୁଞ୍ଜି କିନି ଅଦିକାରା କିମୁ □”

୧୮ ଅଡେ ରଅସି ଖାହାନା ଏଲେଇରେସି, “ବାବୁ ନୀନୁ ହାହାମାଞ୍ଜାତି ଟାକା ତଲେ ପାସାଗଟା ଲାବା କିହାମାକି □”

୧୯ ଏଞ୍ଜେଲ୍ ଏଞ୍ଜେଲ୍ ଜିକେଏ ଏଲେଇରେସି, “ନୀନୁ ଜିକେଏ ପାସାଗଟା ଗାଡ଼ାୟାଁ ମୁହେଁ ଅଦିକାରା ଆମୁ □”

୨୦ ଅଡେ ରଅସି ଖାହାନା ଏଲେଇରେସି, “ପ୍ରବୁ ମେହମୁ ଇଦି ନୀନୁ ହାହାମାଞ୍ଜାତି ଟାକା; ଇଦାଆଁ ନାନୁ ଦ୍ରାଞ୍ଜାଲିତା ରୁପାନା ଇଟାମାଚେସି □

୨୧ ଇଟିହ୍ ନାନୁ ନିଜେ ଆଜାତେସି, ନୀନୁ ର ଗିରିଗିରା ଗାଟାଟି, ଇଟା ହିଲାଆଗାଟାଣି ପାରିନାଟି, ମାଟା ହିଲାଆତାଣା ଦାଞ୍ଜାଆନାଟି □”

୨୨ ଏଞ୍ଜେଲ୍ ଏଞ୍ଜେଲ୍ ଏଲେଇରେସି, ଆଡେ ପଲୁଆଗାଟି ହଲେଏଣାଟି, ନୀ ଗୁଡିତି ହାଡାତଲେ ନୀ ନୀହାୟି କିୟାକି, ନାନୁ ଗିରିଗିରା ଗାଟାତେସି, ଇଟାହିଲାଆ ତାଣା ପାରିନାତେସି ମାଟାଆତି ତାଣା ଦାଞ୍ଜାଆନାତେସି ଇଦାଆଁ ପୁଞ୍ଜାମାଟି ?

୨୩ ଆତିହାସିକ ଏନାଆଁତାକି ନା ଟାକାତି ରୀଣା ଅନାରାକି ହୀଆତି, ନାନୁ ଖାହାନା ଅତିତଲେ ବେଟାଆତେଏଁନା ।

୨୪ ଇଞ୍ଜା ଦାରିତା ନିଗାମାଚାରାଇଁ ଖେସ୍ତେସି, “ଇଝାଣି ତାଣାଟି ଏ ଟାକା ମୀଞ୍ଜା ଅହାନା ଆମ୍ବାଆରିକି ଦସଟାକା ମାନୁ ଏଝାଣାକି ହୀଦୁ ।”

୨୫ ଏଚେଟିଏ ଏଝାରି ଖେସ୍ତେରି, “ପ୍ରବୁ ଏଝାଣାକି ଦସଟାକା ମାନୁ ।”

୨୬ ☆ନାନୁ ମିଙ୍ଗେ ଖେସିମାଞ୍ଜାଇଁ, “ଆମିନିଗାଟାଣାକି ମାନେ, ଏଝାଣାକି ଗାତି ହୀପୁକିଆନେ । ସାମା ଆମ୍ବାଆରାଝାୟି ହିଲେଏ ଏଝାଣି ତାଣା ଏନାୟି ମାନେ ଏଦାଆଁ ଜିକେଏ ଏଝାଣି ତାଣାଟି ଅଝିଆନେ ।

୨୭ ☆ସାମା ନାଙ୍ଗେ ତାମି ରାଜା ଆହାଲି କୁହାମାଞ୍ଜାନି ସାତୁୟାଁଇଁ ଇମ୍ବାଆଁ ତାକା ହାଜାନା ଏଝାରାଇଁ ନା ନକିତା ଚୁଣ୍ଡାହାତୁହୁଦୁ ।”

ଜୀସୁ ଜିରୁସାଲମତା ରାହାଁଟି ହାନାୟି

(ମାତି ୨୧:୧-୧୧; ମାର୍କ ୧୧:୧-୧୧; ଜହ ୧୨:୧୨-୧୯)

୨୮ ଇ ବାରେ କାତା ଖେସ୍ତି ତାୟୁ ଜୀସୁ ଜିରୁସାଲମ ଝାକି ହାଚେସି ।

୨୯ ଏଝାସି ଜୀତ ହରୁ ଦାରିତା ମାନି ବେତନିୟାଁ ଅଡ଼େ ବେତପାଗି ନାସ୍‌କାଣାଁ ଏଜାନା ତାନି ସୀସୁୟାଁ ବିତ୍ରାଟି ରିଆରାଇଁ ଇ କାତା ଖେସା ପାଣ୍ଡିତେସି ।

୩୦ “ମୀରୁ ହାଜାନା ମୀ ନକିତି ନାୟୁଁତା ହଡ଼ଦୁ ଇଞ୍ଜା ଲକୁ ଏଚେଲା ହଟା ହିଲଅରି; ଇଲେତି ର ଗାଡ଼ଦେ ତାଲୁତି ଦସାମାନାଣି ମେହ୍‌ଦେରି; ଏଦାଆଁ ଦାଝାଁ ହୁକ୍‌ହାଁ ନା ତାଣା ତାଟିହାଁ ଝାଦୁ ।

୩୧ ଆମ୍ବାଆସି ଏନାଆଁତାକି ହୁକ୍‌ହିମାଞ୍ଜେରି ଇଞ୍ଜାଁ ଖେଞ୍ଜାତିହାଁ, ଇଦାନି ମା ପ୍ରବୁକି ଲଡ଼ାମାନେ ଇଞ୍ଜାଁ ଖେହ୍‌ଦୁ ।”

୩୨ ଏମ୍ବାଟି ଜୀସୁ ପାଣ୍ଡାମାଚାରି ଏଝାସି ଏନିକାଁଁ ଖେସାମାଚେସି, ଏଲେହେଁ ମେସ୍ତେରି ।

☆ ୧୯:୨୬ ୧୯:୨୭ ମାତି ୧୩:୧୨; ମାର୍କ ୪:୨୫; ଲୁକ ୮:୧୮ ☆ ୧୯:୨୭ ୧୯:୨୭ ମାତି ୨୫:୧୪-୩୦

୩୩ ଇଞ୍ଜା ଏଝାରି ଗାଡ଼ଦେ ତାଲୁତି ଦାଞ୍ଜା ହୁକ୍‌ହିମାଚାଟି ଗାଡ଼ଦେ ସାଞ୍ଜୁକାରିୟା “ଏନାଆଁତାକି ହୁକ୍‌ହିମାଞ୍ଜେରି ଇଞ୍ଜାଁ ଝେଚେରି ?”

୩୪ ଏଝାରି ଏଲେଇଚେରି, “ଇଦାନି ମା ପ୍ରବୁକି ଲଡ଼ାମାନେ □”

୩୫ ଏମ୍ବାଟିଏ ଗାଡ଼ଦେ ଜୀସୁ ତାଣା ତାଚାନା ଏଦାନିଲେକ ହିମ୍ବୁରିକା ପାସାନା ଜୀସୁଇଁ ଲାକ କୁଗିକିତେରି □

୩୬ ଅଡ଼େ ଏଝାସି ନକିତା ହାଜିମାଚାଟି ଲକୁ ଜିରୁତା ତାମି ହିମ୍ବୁରିକା ପାଡ଼େସ୍‌ରି □

୩୭ ଇଞ୍ଜା ଏଝାସି ଜିରୁସାଲମ ତାଗେ ମାନି ଜୀତ ହରୁଟି ଝାନି ବେଲାତା ଏଝାସି ଇଞ୍ଜା ତାମି ସୀସୁୟାଁ ଜୀସୁ କିତି ବାଡ଼ୁୟୁତି କାମାତାକି ମାହାପୁରୁଇଁ ଜହରା କିହିହିଁ ରାହାଁଟି ପାରୁ ପାଡ଼ିତେରି □

୩୮ “ପ୍ରବୁତି ଦରୁଟି ଆମିନି ରାଜା ଝାହିମାନେସି ଏଝାଣାକି ନେହେଁ □ ଲାକପୁରୁ ହିଡ଼ଡ଼ି ଅଡ଼େ ଲାକପୁରୁତି ମାହାପୁରୁଇଁ ଗାଝୁରମି ଆପେ □”

୩୯ ଏଚେଟିଏ ଲକୁ ମାନ୍ଦାଟି ଏଚରଜାଣା ପାରୁସିୟାଁ ଜୀସୁଇଁ ଏଲେଇଚେରି, “ଏ ଗୁରୁ ନୀ ସୀସୁୟାଁଇଁ ଲାଗାମୁ □”

୪୦ ନାନୁ ମିଙ୍ଗେ ଝେସିମାଞ୍ଜାଇଁ, “ଇଝାରି ପାଲେଏ ଆଡ଼ିସାରେ, ଝାଲକା ହାଲେହେଁ କାଜା ଗିୟାଁତଲେ ଜଲିତୁମା □”

ଜୀସୁ ଜିରୁସାଲମ ତାକି ଡ଼ାନାୟି

୪୧ ଅଡ଼େ ଏଚେତା ଗାଡ଼ା ତାଗେ ଝାଡ଼େସି, ଏଚିବେଲା ଗାଡ଼ାତି ମେସାନା ଡ଼ାହିହିଁ ଏଲେଇଚେସି,

୪୨ “ନାନୁ, ହାଅ, ନାନୁ ନୀଞ୍ଜୁ ହିଡ଼ଡ଼ି ଜିରୁ ପୁଟିହିଁ ଅଜିତେମା! ସାମା ଏଡ଼ି ନୀ ତାଣାଟି ଡ଼ଗୁାମାନେ □

୪୩ ଏଚିବେଲା ମାହାପୁରୁ ନିଙ୍ଗେ ଗେଲ୍‌ପାଲି ଅଣ୍‌ପାମାଞ୍ଜାତେସି ଏଦାଆଁ ପୁନାଆତାକି ଏଚିବେଲାତା ନୀ ସାଡ଼ୁୟାଁ ନୀ ସାରିସୁଟୁ କାଜା କଟା ଦସାନା ମୁଚାନେରି,

୪୪ ଇଞ୍ଜା ନିଙ୍ଗେ ଅଡ଼େ ନୀ ତାଣା ମାନି ନୀ ମୀରକାଣି କୁଡ଼ପୁନାସା କିୟାନେରି, ଅଡ଼େ ର ଝାଲିତି ଅର ଝାଲି ଲାକ ତାରି ଆହାଲି ହିୟଅରି, ଇଲେତି ଦିନା ଝାହିମାନେ □”

ମାହାପୁରୁ ଇଲୁତା ଜୀସୁ ହଡ଼ନାୟି

(ମାତି ୨୧:୧୨-୧୭; ମାର୍କ ୧୧:୧୫-୧୯; ଜହ ୨:୧୩-୨୨)

୪୫ ଏମ୍ବାଟିଏ ଜୀସୁ ମାହାପୁରୁ ଇଲୁତା ହଡ଼ନାୟି ବେବାରା କିନାରାଇଁ ଏମ୍ବାଟି ହାସା ପେରହାତୁସ୍ତେସି,

୪୬ ଦାମ୍ବୁପତିତା ରାସ୍ତକି ଆହାମାନେ, “ନା ଇଲୁ ପ୍ରାତାନା ଇଲୁ ଆନେ, ସାମା ମୀରୁ ଏଦାଆଁ ଡ଼ଗାୟାଁ ପାଖୁ ମ୍ବୁପହାତୁସ୍ତେରି □”

୪୭ ✱ଅଡ଼େ ଜୀସୁ ଦିନାତାକି ଦିନା ପ୍ରାତାନା ଇଲୁତା ଜାପୁହି ମାରେସି, ସାମା କାଜା ପୂଜେରାଜ୍ଞା ଅଡ଼େ ମେରାପୁନାରି ଲକ୍ଷୁତି କାଜାରି ତଲେ ଜୀସୁଇଁ ପାୟାଲି ଅଣ୍ଡିମାରେରି,

୪୮ ସାମା ଲକ୍ଷୁ ରାହାଟି ଏଞ୍ଜାଣି ଜାପୁନାଣି ଖେଞ୍ଜିମାତାକି ଏଞ୍ଜାରି ଏନିକିହାଲି ଆନେ ପାରୁ ବେଟାଆହି ହିଲାଆତେରି □

୨୦

ଜୀସୁତି ଅଦିକାରା

୧ ର ଦିନା ଜୀସୁ ମାହାପୁରୁ ଇଲୁତା ଲକ୍ଷୁଣି ଜାପୁହି ମାରେସି, ଅଡ଼େ ନେହଁ କାରୁ ଖେକ୍‌ହି ମାରେସି, ଏତିବେଲା କାଜା ପୂଜେରାଜ୍ଞା ଅଡ଼େ ମେରାପୁନାରି ପ୍ରାତିନାଜ୍ଞା ତଲେ ଖାହାନା ଖେରେରି,

୨ “ନୀନୁ ଆମିନି ଅଦିକାରା ତଲେ ଇ ବାରେ କିହିମାଞ୍ଜି, ଏଲେକିହାଲି ଆମ୍ବାଆସି ଅଦିକାରା ହୀହାମାଞ୍ଜାନେସି, ମାଙ୍ଗେ ଖେସ୍ତାମୁ □”

୩ ସାମା ଜୀସୁ ଏଞ୍ଜାରାଇଁ ଏଲେଇରେସି, “ନୀନୁ ଜିକେଏ ର କାତା ଖେଞ୍ଜାଇଁ, ନାଙ୍ଗେ ଖେସ୍ତାମୁ

୪ ଜହନଇଁ ବାପ୍ତିସ୍ତା* ହୀମୁ ଇଞ୍ଜି ଆମ୍ବାଆସି ଚାଣ୍ଡିତେସି, ଲାକପୁରୁଟି କି ମାଣ୍ଡି ତାଣାଟି ?”

୫ ଏଚେଟିଏ ଏଞ୍ଜାରି ତାମ୍ବୁ ତାମ୍ବୁ ଜଲ୍‌କି ଆଡ଼େରି, “ଲାକପୁରୁଟି ଇନାୟି, ଆଡିହଁ ଏଞ୍ଜାସି ଏଲେଇଞ୍ଜାନେସି ଏନାଆଁତାକି ଏଞ୍ଜାଣାଇଁ ନାମାଆତେରି ?

✱ ୧୯:୪୭ ୧୯:୪୭ ଲୁକ ୨୧:୩୭

* ୨୦:୪ ୨୦:୪ ମୁଞ୍ଜିନାୟି

୬ ସାମା ମାଣ୍ଡସି ତାଣ୍ଡାଟି ଇନାୟି, ଇଞ୍ଜା ଲକୁ ମାଙ୍ଗେ ଖାଲକାତଲେ ପାୟାନେରି, ଇତିହିଁ ଜହନଇଁ ମାହାପୁରୁ ଅଣପୁତି ବଲୁ ଖେହ୍ନାରି ତାଣ୍ଡାଟି ରଅସି ଇଞ୍ଜାଁ ହାରେକା ନାମାମାନେରି □”

୭ ଏଞ୍ଜାରି ଏଲେଇଚେରି, “ମାମ୍ବୁ ପୁଞ୍ଜାହିଲଅମି ଏଡ଼ି ଏମ୍ବିଟି ଆହାମାନେ □”

୮ ଜୀସୁ ଏଞ୍ଜାରାଇଁ ଏଲେଇଚେସି, “ଆତିହିଁ ନାନୁ ଆମିନି ଅଦିକାରା ତଲେ କିହିମାଇଁ ନାନୁ ଜିକେଏ ଖେସୁଅଁ □”

**ଅଞ୍ଜୁରି ବାଡ଼ାତା ବାଗା କାମାକିନାରି ପୁଣ୍ଡିକିନି କାତା
(ମାତି ୨୧:୩୩-୪୬; ମାର୍କ ୧୨:୧-୧୨)**

୯ ଏମ୍ବାଟିଏ ଜୀସୁ ଇ ପୁଣ୍ଡିକିନି କାତା ଖେସେସି, “ରଅସି ର ଅଞ୍ଜୁରି ବାଡ଼ା କିହାନା କାମା କିନାରାକି ବାଗା ହାହାନା ହାରେକା ଦିନାତାକି ଅର ଦେସାତା ହାଚେସି □

୧୦ ଅଞ୍ଜୁରି ପାଡ଼େୟି କାମ୍ବିନି ବେଲା ଏଞ୍ଜାସି ତାନି ବାଗା ବେଟାଆହାଲି ର ହଲେଏଶାଇଁ ପାଣ୍ଡିତେସି, ସାମା ଅଞ୍ଜୁରି ବାଡ଼ାତା କାମାକିନାରି ଏଞ୍ଜାଶାଇଁ ମାଡ଼ା ଖେଚାନା ଖାରଇ କେୟୁଟି ପେରହାତୁସ୍ତେରି □

୧୧ ଏଞ୍ଜାସି ଅଡ଼େ ର ହଲେଏଶାଇଁ ପାଣ୍ଡିତେସି; ଏଞ୍ଜାରି ଏଞ୍ଜାଶାଇଁ ଜିକେଏ ଖେଚାନା ନିନ୍ଦା କିହାଁ ଖାରଇ କେୟୁଟି ପେରହା ପାଣ୍ଡିତେରି;

୧୨ ତାୟୁ ଅଡ଼େ ରଅଶାଇଁ ପାଣ୍ଡିତେସି, ସାମା ଏଞ୍ଜାଶାଇଁ ଜିକେଏ ରାଶାରାକା କିହାନା ବାଡ଼ାତି ପାଙ୍ଗାତା ମେଡ଼ହାତୁସ୍ତେରି □

୧୩ ଏମ୍ବାଟିଏ ଅଞ୍ଜୁରି ବାଡ଼ାତି ସାଖୁକାରି ନୀଏଟି ଏନାଆଁ କିଇଁ ଇଞ୍ଜାଁ ଅଣ୍ଡପାନା, ନା ଜୀଞ୍ଜୁତି ମୀରଏଶାଇଁ ପାଣ୍ଡିଇଁ ଆତିହିଁ ଏଞ୍ଜାଶାଇଁ ମାନି କିନେରି □

୧୪ ସାମା କାମାକିନାରି ଏଞ୍ଜାଶାଇଁ ମେସାନା ତାମ୍ବୁ ତାମ୍ବୁ ଏଲେଇଣ୍ଡି ଆଡ଼େରି ‘ଇଞ୍ଜାସି ଅଦିକାରା ଗାଟାସି, ଇଞ୍ଜାଶାଇଁ ପାୟାତୁହନ, ଆତିହିଁ ଇ ଅଞ୍ଜୁରି ବାଡ଼ା ମାଙ୍ଗେ ଆୟାନେ □’

୧୫ ଅଡ଼େ ଏଞ୍ଜାଶାଇଁ ଅଞ୍ଜୁରି ବାଡ଼ା ପାଙ୍ଗାତା ମେଡ଼ହାନା ପାୟିତେରି □”

“ଆତିହାସିକ ଅଜ୍ଞୁରି ବାଡ଼ାତି ସାହୁକାରି ଏଝାରାଇଁ ଏନାଆଁ କିନେସି ?

୧୭ ଏଝାସି ଝାହାନା ଇ କାମା କିନାରାଇଁ ପାୟାତୁହନେସି, ଅଡ଼େ ଏଟକାତାରାକି ଏ ଅଜ୍ଞୁରି ବାଡ଼ା ହୀନେସି □”

ଲକୁ ଇ କାତା ଝେଞ୍ଜାନା ଏଲେଇଚେରି, “ଏଲେକିହାସି ଆଝୁଏ ଆଆପେ □”

୧୭ ସାମା ଜୀସୁ ଏଝାରାଇଁ ଝେସ୍ତେସି, “ଆତିହାସିକ ରାଡ଼ାମାନି ଇ ବଲୁ ଏନାୟି ?

ଇଲୁ କେପିନାରି ଆମିନି ଝାଲିତି କୁତେରି,

ଏଦି ଇଲୁ କନତି ମୂଲୁ ଝାଲି ଆଡ଼େ □

୧୮ ଆମ୍ବାଆସି ଏ ଝାଲି ଲାକ ତରଗିନେସି, ଏଝାସି କାଣ୍ଡାମୁକା ଆନେସି; ଇଞ୍ଜା ଏ ଝାଲି ଆମ୍ବାଆରି ମୁହେଁ ତରଗିନେ ଏଝାଣାଇଁ ଗୁଣ୍ଡୁଗୁଣ୍ଡା କିନେ □”

ସିସୁ ହୁାନି କାତା

(ମାତି ୨୨:୧୫-୨୨; ମାର୍କ ୧୨:୧୩-୧୭)

୧୯ ଏଚେଟିଏ ମେରାପୁନାରି ଅଡ଼େ କାଜା ପୂଜେରାଞ୍ଜା ଦେବୁଣିଏ ଜୀସୁଇଁ ଆସାଲି ଅଶ୍ପିତେରି, ସାମା ଲକୁ ମାନ୍ଦାତି ଆଜିତେରି, ଇତିହାସିକ ଏଝାସି ଏ ପୁଶ୍ମିକିନି କାତା ଏଝାରାଇଁ ସିନିକିହାନା ଝେସାମାଚେସି ଇଞ୍ଜା ଏଝାରି ପୁଚେରି □

୨୦ ଏମ୍ବାଟିଏ ଏଝାରି ଜୀସୁଇଁ ପାଣା ଅଡ଼େ ବାଡ଼ମୁଗାଟି ସାଲୁଝି କିନାରି କେମୁତା ଏଝାଣାଇଁ ହେରପାଲି ପାରୁ ପାରିତେରି, ଇଞ୍ଜା ଏଚରଜାଣା ତାମ୍ବୁତାମ୍ବୁତା ଦାମ୍ବୁଗାଟାରି ଇଞ୍ଜା ତସା କଡ଼ିନି ନାଡ଼ିକିନାରି ଜୀସୁଇଁ ତାନି ଝେହ୍ନି କାତାତା ଦହ ଦସାଲି ଏଝାଣି ତାଣା ପାଣିତେରି □

୨୧ ଏଝାରି ଜୀସୁଇଁ ଝେଚେରି, “ଗୁରୁ, ମାମ୍ବୁ ପୁଞ୍ଜାମାନମି, ନୀନୁ ଏନାଆଁ ଝେସାମାଞ୍ଜି ଅଡ଼େ ଜାପୁହାମାଞ୍ଜି ଏଦି ସାତା, ଅଡ଼େ ଆମ୍ବାଆରାଇଁ ପାରଡ଼ା ବାଟି କିଅତି, ସାମା ସାତା ମାହାପୁରୁତି ଜିରୁତି କାତା ଜାପୁଦି □

୨୨ ଆତିହାସିକ କାୟିସରକି ସିସୁ ହୁାନାୟି ମେରା ମାନେକି ଆଏ □”

୨୩ ସାମା ଜୀସୁ ଏଞ୍ଜାରି ନାଡ଼ିକିନି ଅଣ୍ଠପୁତି ପୁଞ୍ଜାନା ଏଞ୍ଜାରାଇଁ
 ଝେସ୍ତେସି, “ନାଙ୍ଗେ ର ଝେଣ୍ଡି ଟାକା ହିୟାଦୁ □”

୨୪ ଏ ଝେଣ୍ଡି ଟାକାତା ଆମ୍ବାଆରି ବମା ଅଡ଼େ ଦରୁ ମାନେ, ଏଞ୍ଜାରି
 ଝେସ୍ତେରି, “କାୟିସରଝାୟି □”

୨୫ ଏଚେଟିଏ ଜୀସୁ ଏଞ୍ଜାରାଇଁ ଝେସ୍ତେସି, “ଆତିହିଁ
 କାୟିସରଝାୟି ଏନାୟି ଏଦାଆଁ କାୟିସରକି ହୀଦୁ; ଇଞ୍ଜା
 ମାହାପୁରୁଝାୟି ଏନାୟି ଏଦାଆଁ ମାହାପୁରୁକି ହୀଦୁ □”

୨୬ ଏଚେଟିଏ ଏଞ୍ଜାରି ଲକୁ ନକିତା ଏଞ୍ଜାଣାଇଁ ଏନି ଦହ ଦସାଲି
 ଆଡ଼ାଆତେରି, ଇଞ୍ଜା ଏଞ୍ଜାରି ଜୀସୁ ଝେସ୍ତି କାତାତାକି ଆଡ଼ାଜାକା
 ଆହାନା ପାଲେଏ ମାଚେରି □

ହାଡ଼ାରି ଝେଣ୍ଡେ ନିଙ୍ଗିନି କାତା

(ମାତି ୨୨:୨୩-୩୩; ମାର୍କ ୧୨:୧୮-୨୭)

୨୭ ☆ଏମ୍ବାଟିଏ ହାଡ଼ାରି ଝେଣ୍ଡେ ନିଙ୍ଗିନାଣି ନାମିହିଲ୍ୟାଆଗାଟି
 ଏଚରଜାଣା ସାଦୁକିୟାଁ ଜୀସୁତାଣା ଝାହାନା ଝେଚେରି,

୨୮ “ଏ ଗୁରୁ ମସା ମାଙ୍ଗେତାକି ରାଡ଼ାମାନେସି, ରଅସି ବାହା ଆହାଁ
 କକାରି ପଦାଁ ଆଆନା ହାଡ଼ିହିଁ, ଏଞ୍ଜାଣି ତାୟି ତାନି ତକ୍ତିନି ଇଟାନା
 ଏଞ୍ଜାଣି କୁଡ଼ା ଏପିକିୟାଲି ଆନେ □

୨୯ ସାତା ଜାଣା ତାୟିୟାଁ ମାଚେରି; କାଜାସି ବାହା ଆହାନା କକାରି
 ପଦାଁ ଆଆନା ହାଡ଼େସି;

୩୦ ତାୟୁ ଏଞ୍ଜାଣି ଜେଚତାସି ଇଚିତେସି, ଅଡ଼େ ଏଞ୍ଜାଣି ଜେଚତାସି
 ଇଚିତେସି;

୩୧ ଏଲେକିହିଁଏ ସାତା ଜାଣା ଜିକେଏ କକାରି ପଦାଁ ଆଆନା
 ହାଡ଼େରି □

୩୨ ତାୟୁ ଏ ଇୟା ଜିକେଏ ହାଡ଼େ □

୩୩ ଆତିହିଁ ଝେଣ୍ଡେ ନିଙ୍ଗିନି ଦିନା ଏଞ୍ଜାରି ବିତ୍ରାଟି ଏ ଇୟା
 ଆମ୍ବାଆରି ତକ୍ତି ଆନେ ? ଇଚିହିଁ ସାତା ଜାଣା ଜିକେଏ ଏଦାନି
 ଇଟାମାଚେରି □”

୩୪ ଜୀସୁ ଏଞ୍ଜାରାଇଁ ଏଲେଇଚେସି, “ଇ ଦାର୍ତତି ଲକୁ ବାହା
 କିନେରି ଅଡ଼େ ଆନେରି,

୩୫ ସାମା ୱାନ୍ତି ଜୁଗୁତାକି ଇଞ୍ଜା ହାକିଟି ନିଜାଲିତାକି ପାଡ଼ା ଆନାରି ବାହା ଆଅରି କି ବାହା ହାଅରି;

୩୬ ଇଚିହିଁ ଏଞ୍ଜାରି ଦୂରୁୟାଲେହେଁ ଆହାନା ଏଚେଲାଞ୍ଜା ହାଅରି, ଇଞ୍ଜା ହାକିଟି ନିଜାମାନାକି ଏଞ୍ଜାରି ମାହାପୁରୁତି ମୀରକା ଆନେରି □

୩୭ ସାମା ହାଡ଼ାରି ସାତେଏ ନିଜିନେରି ଇଞ୍ଜାଁ ମସାଇଁ ଜିକେଏ ଝେହିମାନି ବୁଟାତି କାରୁତଲେ ନେହିଁକିଁ ତସାମାଚେସି, ଇଚିହିଁ ଏଞ୍ଜାସି ପ୍ରବୁଇଁ ଅଗ୍ରାହାମତି ମାହାପୁରୁ, ଇସାହାକତି ମାହାପୁରୁ ଅଡ଼େ ଜାକୁବତି ମାହାପୁରୁ ଇଞ୍ଜାମାଚେସି □

୩୮ ଏଞ୍ଜାସି ହାଡ଼ାରି ମାହାପୁରୁ ଆଏ ସାମା ଜୀଞ୍ଜୁଗାଟାରି ମାହାପୁରୁ; ଇଚିହିଁ ମାହାପୁରୁ ନକିତା ବାରେଜାଣା ନୀତାମାନେରି □”

୩୯ ଏମ୍ବାଟିଏ ମେରାପୁନାରି ବିତ୍ରାଟି ଏଚରଜାଣା ଏଲେଇଚେରି, “ହାଅ, ଗୁରୁ ନୀନୁ ଅଜେ ଝେସ୍ତାତି □”

୪୦ ଇଚିହିଁ ଏଞ୍ଜାଣାଇଁ ଅଡ଼େ ଏନାଆଁ ଝେଞ୍ଜାଲି ଏଞ୍ଜାରାକି ସାସା ହିଲାଆତେ □

କ୍ରୀସ୍ତ ଆମ୍ବାଆସି

(ମାତି ୨୨:୪୧-୪୬; ମାର୍କ ୧୨:୩୫-୩୭)

୪୧ ଏମ୍ବାଟିଏ ଜୀସୁ ଏଞ୍ଜାରାଇଁ ଝେଚେସି, କ୍ରୀସ୍ତ ଦାଞ୍ଜୁଦ ମୀରଏସି, ଲକୁ ଏନିକିଁ ଏଲେଇନେରି ?

୪୨ ଇଚିହିଁ ଦାଞ୍ଜୁଦ ତାନୁଏ ପାରୁ ପତିତା ଏଲେଇଞ୍ଜି ମାନେସି, ପ୍ରବୁ ନା ପ୍ରବୁଇଁ ଝେସ୍ତେସି,

୪୩ ନାନୁ ନୀ ସାତୁୟାଣି ନୀ କତାୟାଁ ତୁଇ ଇଟାଆ ପାତେକା,

ନୀନୁ ନା ଚିଃନିଞ୍ଜାକି କୁଗାମାନାମୁ □

୪୪ ଦାଞ୍ଜୁଦ ତାନୁଏ ଏଞ୍ଜାଣାଇଁ ପ୍ରବୁ ଇଞ୍ଜାଁ ମାନେସି; ଆତିହିଁ କ୍ରୀସ୍ତ ଏନିକିଁ ଏଞ୍ଜାଣି ମୀରଏସି ?

ମେରାପୁନାରି ତାଣାଟି ଜାଗ୍ରାତା

(ମାତି ୨୩:୧-୩୭; ମାର୍କ ୧୨:୩୮-୪୦)

୪୫ ତାୟୁ ବାରେ ଲକୁ ନକିତା ସାସୁୟାଁଇଁ ଝେସ୍ତେସି,

୪୬ “ମେରା ଜାପୁନାରି ତାଣାଟି ଜାଗ୍ରାତା! ଇଚିହିଁ, ଏଞ୍ଜାରି ଲାମ୍ବା ଲାମ୍ବା ହିମ୍ବରିକା ହୁଚାନା ତିରଞ୍ଜିହିଁ ରେଜାଲି, ଅଡ଼େ ହାଟା

ବାଜାରାତା ଜହରା ବେଟାଆହାଲି, ପ୍ରାଡ଼ାନା ଇଲକାଣା ନେହ୍
 ନେହ୍ କୁଚ୍‌ୟା ଅଡ଼େ ବଜିତା ନେହ୍ ଟାୟୁ ବେଟାଆହାଲି
 ଅଣ୍ଡିନେରି;

୪୭ ଏଞ୍ଜାରି ରାଣ୍ଡେଣିସିକା ଇଲୁ ସେନ୍‌ନେରି ଅଡ଼େ ଉଜେ ଉଜେଏ
 ଲାମ୍ବା ଲାମ୍ବା ପ୍ରାଡ଼ାନା କିନେରି; ଏଞ୍ଜାରି ହାଡ଼େକା ଡ଼ଣ୍ଡ ବେଟାଆଡ଼େରି
 □”

୨୧

ରାଣ୍ଡେଣିନି ଦାନା
 (ମାତି ୧୨:୪୧-୪୪)

୧ ଏଟିବେଲା ଦନଗାଟାରି ଦାନା ପେଡ଼ାତା ତାନି ଦାନା ମେଡ଼ହି
 ମାଚାଣି ଜୀସୁ ସିନିକହିମାଚେସି,

୨ ଅଡ଼େ ର କାର୍ମାଗାଟି ରାଣ୍ଡେଣି ଖାହାନା ଏମ୍ବାଆଁ ରୀ ଉଣା ତାମ୍ବାତି
 ଆଦଲି ମେଡ଼ହାଣି ମେସାନା ଏଲେଇଚେସି,

୩ “ନାନୁ ମିଙ୍ଗ ସାତା ଝେସିମାଞ୍ଜାଲ୍ ଇ କାର୍ମାଗାଟି ରାଣ୍ଡେଣି ଗାଡ଼ି
 ଦାନା ହୀହାମାନେ,

୪ ଇଚିହ୍ ଦନ ଗାଟାରି ତାନି ଗାଡ଼ି ଦନଟି ଇଚାଣି ତାଚାନା ବେଟୁ
 ହୀହାମାନେରି, ସାମା କାର୍ମାଗାଟି ରାଣ୍ଡେଣି ତାନି ହିଲାଆବେଲାତା
 ତାଙ୍ଗେ ନୀଡ଼ାଲିତାକି ଏନାୟି ମାଚେ ଏ ବାରେ ହୀହାମାନେ □”

ମାହାପୁରୁ ଇଲୁ ନସ୍ତୁ ଆନି କାତା
 (ମାତି ୧୪:୩-୧୪; ମାର୍କ ୧୩:୩-୧୩)

୫ ଅଡ଼େ ଆମ୍ବା ଆମ୍ବାଆରି ମାହାପୁରୁ ଇଲୁ ଅଜି ଅଜିତି ଖାଲକା
 ଅଡ଼େ ଦାନା ହୀନାଣି ତଲେ ଅଜିକ୍ ଅଜାମାନେ ଇଞ୍ଜି ଇଞ୍ଜାଲିଏ
 ଜୀସୁ ଏଲେଇଚେସି,

୬ “ମୀରୁ ନୀଏଁ ଏନା ଏନାଆଁ ମେସିମାଞ୍ଜେରି, ଦିନା ଖାଡ଼େ,
 ଏଟିବେଲା ର ଖାଲି ଅର ଖାଲି ଲାକ ଡ଼ୟେଏ, ଇ ବାରେ
 ମେଣ୍ଡିଙ୍ଗାହାନେ □”

କସ୍ତୁ ଅଡ଼େ ନିନ୍ଦା ଖାନି କାତା
 (ମାତି ୨୪:୩-୧୪; ମାର୍କ ୧୩:୩-୧୩)

୭ ଏତିବେଳା ଏଞ୍ଜାରି ଏଞ୍ଜାଣାଙ୍କୁ ଖେଚେରି, “ଏ ଗୁରୁ ଆଡ଼ିହିଁ ଈ ବାରେ ଏଚେଲା ଆନ୍ନେ ? ଇଞ୍ଜା ଈ ବାରେ ଆମିନି ବେଲାତା ଆନ୍ନେ, ଏ ବେଲାତି ସିନା ଏନାୟି ?”

୮ ଜୀସୁ ଏଲେଇଚେସି, “ଜାଗ୍ରାତା ମୀରୁ ଏନିକିଁ ଆନ୍ନା ଆଡ଼ିଚେରି; ଇଚିହିଁ ହାରେକା ନା ଦରୁଚି ଖାହାନା ନାନୁ ଏଞ୍ଜାଚେଏଁ ଅଡ଼େ ଏ ଦିନା ଏଦାଚେୟିଏ ଇଞ୍ଜାଁ ଇଞ୍ଜାନେରି; ଏଞ୍ଜାରି ଜେଚ ହାଲାଆନୁ □

୯ ଇଞ୍ଜା ମୀରୁ ଏଚେତା ଜୁଜୁ ଇଞ୍ଜା ମେଲି ଆହିମାନାଣି ଖେଚିସାରେ ଆଜାଆନୁ; ଏନିଇଚିହିଁ ଈ ବାରେ ନଚେଏ ଆୟାଲି ଆନ୍ନେ, ଆଡ଼ିଜିକେଏ ଏତିବେଳା ଜୁଗୁ ରାଏ □”

୧୦ ତାୟୁ ଏଞ୍ଜାରାଙ୍କୁ ଏଲେଇଚେସି, “ଦେସା କପାଟି ଦେସା, ରାଜି କପାଟି ରାଜି ମେଲି ନିଜିନେ,

୧୧ ଇଞ୍ଜା ଇମ୍ପାଆଁ ଏମ୍ପାଆଁ ବୁମି ଖୀତିନେ, ହାରେକା ଚାୟୁତା ମରୁଡ଼ି ଇଞ୍ଜା କାରୁଖୁ ଖାନ୍ନେ, ଅଡ଼େ ହାଗୁ ପାକାତା ଆଜିହପେତି ସିନାୟା ତଞ୍ଜା ଆନୁ □

୧୨ ସାମା ଈ ବାରେ ଆଆ ନଚେଏ ଲକୁ ମିଙ୍ଗେ ଆସାନା ନା ଦରୁ ତାକି ନିନ୍ଦା କିହାନା ଜୀହୁଦି ଲକୁତି କୁଚମି ଇଲକାଣା*, କାୟିଦି ଇଲକାଣା, ରାଜା ଇଞ୍ଜା ନୀହାୟି କିନାରି ତାଣା ହେରପାନେରି;

୧୩ ଇଦି ମିଙ୍ଗେତାକି ସାକି ଆନ୍ନେ □

୧୪ ☆ଇଞ୍ଜା ଏନାଆଁ ଜଲିଙ୍କୁ ଏନାଆଁ ଖେହୁଙ୍କୁ ଇଞ୍ଜାଁ ତଲିଏ ମନତା ଅଣ୍ପାଆନୁ;

୧୫ ଏନାଆଁତାକି ଇଚିହିଁ ମୀ ସାତୁୟାଁ ମିଙ୍ଗେ ଖେଶ୍ଟେ ଜଲାଲି କି ଖେସାଲି ଆଡ଼ାଆପେରିଖା ଇଞ୍ଜାଁ ନାନୁ ମିଙ୍ଗେ ଏତିବେଲାତା ନେହିଁ ରୁଦି ଅଡ଼େ ସୁଖା ହିୟାଙ୍କୁ □

୧୬ ସାମା ମୀ ତାଲି ତାଞ୍ଜି ତାୟିୟାଁ ସାମ୍ପାୟିୟାଁ ଇଞ୍ଜାଁ ମୀ ତଣେସିଙ୍ଗା ଜିକେଏ ମିଙ୍ଗେ ହେରପାନେରି, ଅଡ଼େ ମୀ ବିତ୍ରାଟି ଆମ୍ବା ଆମ୍ବାଆରାଙ୍କୁ ଇରହାନା ପାୟିନେରି,

୧୭ ଇଞ୍ଜାଁ ନା ଦରୁ ତାକି ବାରେ ଲକୁତାଣା ଲାଜା ବେଗାଆଦେରି ଅଡ଼େ ଅପଅରି □

* ୨୧:୧୭ ୨୧:୧୭ ସିନଗର୍ ☆ ୨୧:୧୪ ୨୧:୧୪ ଲୁକ ୧୭:୧୧,୧୨

୧୮ ସାମା ମୀ ତାୟ୍ ତ୍ତ୍ରି ର ବାଣା ଜିକେଏ ନସ୍ତ ଆଏ;
 ୧୯ ଅରହିନି ତାଣାଟି ମୀରୁ ମୀ ଜୀଝୁତି ଗେଲ୍ପିକିହା କଡିଦେରି
 □”

ଜିରୁସାଲମ ନାସା ଆନି କାତା
 (ମାତି ୨୪:୧୫-୨୧; ମାର୍କ ୧୩:୧୪-୧୯)

୨୦ “ସାମା ମୀରୁ ଏଚିବେଲା ସାତୁୟ୍ ଜିରୁସାଲମ ଗାଡ଼ାତା
 ମୁରାମାନାଣି ମେହ୍‌ଦେରି, ଏଚିବେଲା ଏଡି ନାସା ଆନି କାଲା
 ଏଦାତେ ଇଞ୍ଜ୍ ପୁଞ୍ଜୁ □

୨୧ ଏଚିବେଲା ଏମିନିଗାଟାରି ଜୀହୁଦା ଦେସାତା ମାନେରି, ଏଝାରି
 ହରକାଣା ହଶ୍‌ପାରି; ଇଞ୍ଜା ଏମିନିଗାଟାରି ଗାଡ଼ା ବିତ୍ରା ମାନେରି,
 ଏଝାରି ହଟା ହାଲ୍‌ବେରି; ଏମିନିଗାଟାରି ନାସ୍‌କାଣା ମାନେରି, ଏଝାରି
 ଗାଡ଼ାତା ହଡ଼ଆପେରି;

୨୨ ଏନିଇଚିହ୍ ମାହାପୁରୁ ପତିତା ରାସ୍‌କି ଆହାମାନି ବାରେ
 କାତାଲେହେଁ ଆୟାଲିତାକି ଏଡି ତଶ୍ତ ହାନି କାଲା □

୨୩ ଆୟତା ଏଚିବେଲା ପୁରାମାସା ଆହାମାନୁ କି ପାଲୁ ଉର୍‌ହିମାନୁ
 ଏଝି ଉଶେଏ କସ୍ତ ପାଶ୍‌ନୁକି! ଏନିଇଚିହ୍ ଏଚିବେଲା ଇ ଦାର୍‌ତିତା
 କାଜା ତଶ୍ତ ଅଡେ ଇ ଲକୁତାକି ମାହାପୁରୁତି କପା ଆନେ,

୨୪ ଏଚରଜାଣା କାଶ୍‌ତଲେ ରୁଶ୍‌ଝି ଆନେରି, ଇଞ୍ଜା ଏଚର
 ଜାଣାଇଁ ଦସ୍‌ପି କିହ୍‌ଆ ଏଟକା କୂଡାତି ଲକୁତାଣା ଅନେରି, ଇଞ୍ଜା
 ଏଟକା ଜାଡିତି ଲକୁତି କାଲା ଏଆ ପାତେକା ଏଝାରି କଡାୟ୍‌ଆ ତୁଇ
 ଜିରୁସାଲମ ଗାଡ଼ା ଝିସ୍‌ପିଆହ୍ ତୁୟିନେ □”

ମାଶସି ମୀରଏସି ଝେଶ୍‌ତା ଝାନାୟି
 (ମାତି ୨୪:୨୯-୩୧; ମାର୍କ ୧୩:୨୪-୨୭)

୨୫ ☆“ଏମ୍‌ପାଟିଏ ଝେଡ଼ା ଲେଞ୍ଜୁ ଅଡେ ହୁକାୟ୍ ବିତ୍ରାଟି ଏନି ଏନି
 ସିନାୟ୍‌ଆନେ, ସାମ୍‌ପୁରି ଗାଜ୍‌ନାଣି ଇଞ୍ଜା ଏୟୁ ନିକ୍‌ନାଣି
 ମେସାନା ଦାର୍‌ତିତି ବାରେ ଦେସାତି ଲକୁ ଆତାଜାକା ଆନେରି,

☆ ୨୧:୨୫ ୨୧:୨୫ ଝେ ବଲ୍ଲ ୭:୧୨,୧୩

୨୬ ଇଞ୍ଜା ଦାର୍ତ୍ତିତା ଏନା ଏନାୟି ଗଟଞ୍ଜି ଆହିମାନେ ଇଞ୍ଜା କାଡ଼ାନା ଲକୁ ଆଜିତାକି ଜୀଞ୍ଜୁ ପିସ୍ତଲେହେଁ ଆନେରି, ଏନିଇଚିହଁ ହାଗୁ ପାକାତି ବାଡ଼ୟୁ ବାରେ ଖୀଡ଼ିନେ □

୨୭ ☆ଏଚିବେଲା ମାଣ୍ଠିସି ମୀରୁଏସି କାଜା ବାଡ଼ୟୁ ଅଡ଼େ ଗାଞ୍ଜୁରମି ତଲେ ହାଗୁ ଲାକତି ଦୁହାଟି ଖାନାଣି ମେହ୍‌ଦେରି □

୨୮ ସାମା ଇ ବାରେ ଗଟଞ୍ଜି ଆୟାଲି ମାଟ୍‌ହିସାରେ ମୀରୁ ଲାକ ସିନିକିଦୁ ଏନିଇଚିହଁ ମିଙ୍ଗେ ଗେଲ୍‌ପିନି କାତା ଏଜିମାଞ୍ଜାନେ □”

ତୟା ମାର୍‌ନୁଚି ଜାପିନାୟି

(ମାତି ୨୪:୩୨-୩୫; ମାର୍କ ୧୩:୨୮-୩୧)

୨୯ ଅଡ଼େ ଜୀସୁ ଏଞ୍ଜାରାଇଁ ର ପୁଣ୍ଠିକିନି କାତା ଖେସ୍‌ସିସି, “ତୟା ମାର୍‌ନୁ ଅଡ଼େ ବାରେ ମାର୍‌କାଣି ସିନିକିଦୁ;

୩୦ ଏଚିବେଲା ଏଞ୍ଜି ଗଞ୍ଜେଡ଼ି ଗାଲ୍‌ନୁ, ଏ ଗଞ୍ଜେଡ଼ି ଗାଲ୍‌ନାଣି ମେସାନା କାରା ଖେଡ଼ା ଖାଡ଼େ ଇଞ୍ଜା ମୀରୁ ପୁଞ୍ଜେରି;

୩୧ ଏଲେକିହଁ ଏ ମୀରୁ ଇ ବାରେ ମେସାନା ମାହାପୁରୁତି ରାକ୍ତି ଏଜିମାଞ୍ଜାନେ ଇଞ୍ଜା ପୁଞ୍ଜେରି □”

୩୨ “ନାନୁ ମିଙ୍ଗ ସାତା ଖେସିମାଞ୍ଜାଇଁ, ଇ ବାରେ ଆଆପାତେକା ଇ କାଲାତି ଲକୁ ଏନିଜିକେଏ ମେଣ୍‌ଜାଅରି □

୩୩ ହାଗୁପାକା ଦାର୍ତ୍ତି ବାରେ ମେଣ୍‌ଜାନେ, ସାମା ନା ବଲୁ ଏଚେଲାଞ୍ଜା ମେଣ୍‌ଜୋଏ □”

କାଡ଼ିହଁ ମାନାୟି

(ମାତି ୨୪:୩୬-୪୪; ମାର୍କ ୧୩:୩୨-୩୭)

୩୪ “ଏଦାଆଁତାକି ମୀରୁ ଜାଗ୍ରାତା ଆହାନା ମାଞ୍ଜୁ, ଆଆଡ଼ିହଁ ତିନାଣି ଉନାଣି ଅଡ଼େ ବାଡ଼କିନି ଅଣ୍‌ପୁ ମୀ ହିୟାତା ନେଞ୍ଜିନେ ଅଡ଼େ ଏ ଦିନା ଦେବୁଣିଏ ପାନ୍‌ଲେହେଁ ମୀ ମୁହେଁ ଖାନେ;

୩୫ ଏନିଇଚିହଁ ଏଦି ପାନ୍‌ଲେହେଁ ଦାର୍ତ୍ତିତି ବାରେ ଜାଡ଼ିତି ଲକୁ ମୁହେଁ ଖାନେ □

୩୬ ସାମା ମୀରୁ ଏନିକିଁ ଇ ବାରେ ଖାହିମାନି ତଣ୍ଡୁଟି ଗେଲୁପି ଆହାଲି ଅଡେ ମାଣ୍ଡସି ମୀରୁଏଣି ନକିତା ନିତାଲି ଆଡିଦେରି, ଏଦାଆଁତାକି ବାରେବେଲା କାତାନା ପ୍ରାତାନା କିହେମାଞ୍ଜୁ ।”

୩୭ ☆ଜୀସୁ ଏତିବେଲା ପ୍ରାତାନା ଇଲୁତା ଜାପୁହି ମାଚେସି, ଇଞ୍ଜା ଲାଆଁୟାଁ ଗାଡାଟି ହଡା ହାଜାନା ଜୀତ ଇନି ହରୁତା ମାଣ୍ଡମିତେସି ।

୩୮ ଅଡେ ବାରେ ଲକୁ ପ୍ରାତାନା ଇଲୁତା ଜୀସୁ କାତା ଖେଞ୍ଜାଲି ଲାଈ ଲାଈସିଏ ରୁଣ୍ଡା ଆହିମାଚେରି ।

୨୨

ଜୀସୁଇଁ ପାୟାଲି ପାରୁ ପାରିନାୟି

(ମାତି ୨୪:୧-୫; ମାର୍କ ୧୪:୧,୨; ଜହ ୧୧:୪୫-୫୩)

୧ ପିସପିଆନି ପାରୁ ଦରୁଗାଟି ପୁଲାଏୟୁ ଆଣ୍ଡାଆତି ରୁଟି ତିନି ପାରୁ ତାଗେ ଆହିମାଚେ ।

୨ ଇଞ୍ଜା କାଜା ପୂଜେରା ଅଡେ ମେରାପୁନାରି, ଜୀସୁଇଁ ଏନିକିଁ ପାୟାଲି ଆଡିନେରି, ଏଦାଆଁତାକି ପାରୁ ପାରିମାଚେରି, ସାମା ଏଞ୍ଜାରି ଲକୁଣି ଆଜିମାଚେରି ।

ଜୀହୁଦା ଜୀସୁଇଁ ଆସପି କିହାଲି ରାଜି ଆନାୟି

(ମାତି ୨୬:୧୨-୨୬; ମାର୍କ ୧୪:୧୦,୧୧)

୩ ଏତିବେଲା ବାରଜାଣା ସୀସୁୟାଁ ବିତ୍ରାମାନି ଇସ୍ପାରିୟତ ଦରୁଗାଟି ଜୀହୁଦା ହିୟାଁତା ସୟତାନ ହଟେ;

୪ ଅଡେ ଜୀହୁଦା ହାଜାନା ଏନିକିଁ କାଜା ପୂଜେରାଞ୍ଜା ଅଡେ ମାହାପୁରୁ ଇଲୁ କାପୁଗାଟି କାଜାରି କେୟୁତା ଆସପି କିନେସି, ଏଦାଆଁତାକି ଏଞ୍ଜାରିତଲେ କାତାବାର୍ତା ଆଡେସି ।

୫ ଏମ୍ପାଟିଏ ଏଞ୍ଜାରି ରାହାଁ ଆହାନା ଏଞ୍ଜାଣାକି ଟାକାୟାଁ ହୀହାଲି ଆଞ୍ଜିତେରି ।

୬ ଅଡେ ଜୀହୁଦା ରାଜି ଆହାନା ଲକୁ ହିଲାଆବେଲାତା ଜୀସୁଇଁ ଏଞ୍ଜାରି କେୟୁତା ହେର୍ପାଲି ପାରୁ ପାରିତେସି ।

ପିସ୍‌ପିଆନ୍ତି ପାର୍ବୁତି ବଜି ତିୟାରା କିନାୟି

(ମାତି ୨୬:୧୭-୨୫; ମାର୍କ ୧୪:୧୨-୨୧; ଜହ ୧୩:୨୧-୩୦)

୭ ଡାୟୁ ଆମିନି ଦିନା ପୁଲ୍ୟାୟୁ ଆଣ୍ଡାଆତି ରୁଟି ତିନି ପିସ୍‌ପିଆନ୍ତି ପାର୍ବୁତାକି ମେଣ୍ଡା ଡାଲୁକାଣି ପୂଜା କିନି ଦିନା ଏତେ;

୮ ଏରେଟିଏ ଜୀସୁ ପିତର ଅଡ଼େ ଜହନଇଁ ଇ କାତା ଖେସା ପାଣ୍ଡିତେସି, “ମୀରୁ ହାଜାନା ମାଙ୍ଗେତାକି ପିସ୍‌ପିଆନ୍ତି ପାର୍ବୁତାକି ରାନ୍ଦା ଖାଜାଦୁ ମାର ତିନଖା □”

୯ ଏମ୍ବାଟିଏ ଏଝାରି ଜୀସୁଇଁ ଖେରେରି, “ମାନ୍ସୁ ଆମ୍ବିୟା ହାଜାନା ରାନ୍ଦା ଖାଜିହାଲାପାରି ଇଞ୍ଜିଁ ନୀନ୍ଦୁ ଅଣ୍ଡିପିମାଞ୍ଜି ?”

୧୦ ଏଝାସି ଏଝାରାଇଁ ଏଲେଇରେସି, “ମୀରୁ ଗାଡ଼ା ହଟିସାରେ ତ:କାତା ଏୟୁ ଅହିମାନାଣାଇଁ ମେହ୍‌ଦେରି; ଏଝାଣି ଜେତ ଜେତ ହାଜାନା ଏଝାସି ଆମିନି ଇଜ ହଡ଼ନେସି ଏ ଇଲୁ ଗାଟାଣାଇଁ ଖେହ୍‌ଦୁ,

୧୧ ଗୁରୁ ନିଙ୍ଗ ଇଲେଇଞ୍ଜିଁ ଖେସା ପାଣ୍ଡାମାଞ୍ଜାନେସି, ନୀନ୍ଦୁ ନା ସୀସୁୟାଁ ତଲେ ପିସ୍‌ପିଆନ୍ତି ପାର୍ବୁତି ବଜି ଏମିନି ଇଲୁତା ତିଇଁ ଏ ବାକ୍ରା ଆମିନାୟି ତସ୍ତାମୁ ?

୧୨ ଏମ୍ବାଟିଏ ଏଝାସି ନେହ୍‌ ତିୟାରା ଆହାମାନି ଲାକନି ପାରୁତି ର କାଜା ବାକ୍ରା ତସ୍ତାନେସି; ଏମ୍ବାଆଁ ମାଙ୍ଗେତାକି ରାନ୍ଦା ଖାଜାଦୁ □”

୧୩ ଏଝାରି ହାଜାନା ଜୀସୁ ଏଝାରାଇଁ ଏନିକିଁ ଖେସାମାରେସି, ଏଲେକିଁ ମେସାନା ପିସ୍‌ପିଆନ୍ତି ପାର୍ବୁତି ରାନ୍ଦା ଖାଜିତେରି □

ପ୍ରବୁତି ବଜି

(ମାତି ୨୬:୨୬-୩୦; ମାର୍କ ୧୪:୨୨-୨୬; ଲକର ୧୧:୨୩-୨୫)

୧୪ ପିସ୍‌ପିଆନ୍ତି ପାର୍ବୁତି ବେଲା ଆୟାଲିଏ, ଜୀସୁ ଅଡ଼େ ତାନି ପାଣ୍ଡି ଆତି ସୀସୁୟାଁ ତଲେ ତିଞ୍ଜାଲି କୁଗିତେରି □

୧୫ ଅଡ଼େ ଏଝାସି ଏଝାରାଇଁ ଏଲେଇରେସି, “ନୀନ୍ଦୁ ଦୁକୁ କସ୍ତ ପୁଞ୍ଜିଆ ନକେଏ ମୀ ତଲେ ଇ ପିସ୍‌ପିଆନ୍ତି ପାର୍ବୁତି ବଜି ତିଞ୍ଜାଲି ହାରେକା ଅଣ୍ଡାପାମାରେଏଁ □

୧୬ ଏନିଇଚିହିଁ ନାନୁ ମିଙ୍ଗେ ୱେସିମାଞ୍ଜାଇଁ, ମାହାପୁରୁ ରାଜିତା ଇ କାତା ବାରେ ପୁରା ଆଆପାତେକା ନାନୁ ଅଡ଼େ ଏଚେଲାଝା ଏଦାଆଁ ତିନଅଁ □”

୧୭ ଇଞ୍ଜା ଏଝାସି ର ସଲ୍ଲା ଆସାନା ମାହାପୁରୁଇଁ ଜହରା କିହାନା ଏଲେଇଚେସି, “ମୀରୁ ଇଦାଆଁ ଅହାନା ମୀ ବିତ୍ରା ବାଟିକିଦୁ □

୧୮ ଇଚିହିଁ ନାନୁ ମିଙ୍ଗେ ୱେସିମାଞ୍ଜାଇଁ, ମାହାପୁରୁ ରାଜି ଝାଆ ପାତେକା ନାନୁ ନୀଞ୍ଜୁଟିଏ ଅଞ୍ଜୁରି ରାସା ଏଚେଲାଝା ଗହଅଁ □”

୧୯ ଅଡ଼େ ଏଝାସି ରୁଟି ଅହାନା ମାହାପୁରୁଇଁ ଜହରା କିହାଁ ଡିକିହାନା ହୀହାଁ ଏଲେଇଚେସି, “ମିଙ୍ଗେତାକି ହୀପୁକି ଆହାମାନି ନା ଆଙ୍ଗା ଇଦି; ନାଙ୍ଗେ ଅଣ୍ଟପାଲି ଇଦାଆଁ କିଦୁ □”

୨୦ ଏଲେକିହିଁଏ ତିଚି ତାୟୁ ଏଝାସି ଗହନି ସଲ୍ଲା ଆସାନା ଏଲେଇଚେସି, “ଇ ସଲ୍ଲାତା ମିଙ୍ଗେତାକି ଝାକିହମାନି ନା ନେତେରିତି ପୁଃନି ରାଜିମାନା □”

୨୧ “ସାମା ମେହଦୁ ଆମ୍ବାଆସି ନାଙ୍ଗେ ସାତୁ କେନ୍ଦୁତା ହେରପିମାଞ୍ଜାନେସି, ଏଝାସି ନା ତଲେ ବଜିତା କୁଗାମାନେସି □

୨୨ ଏନିଇଚିହିଁ ମାହାପୁରୁ ତୀରି କିହାମାଟି ଲେହେଁ ମାଣ୍ଡସି ମୀରସସି ହାନେସି, ସାମା ଏଝାଣାଇଁ ସାତୁ ତାଣା ହେରପିନାସି ଆୟତା ଏଝାସି ଉଣେଏ ତଣ୍ଡ ବେଟା ଆନେସି □”

୨୩ ଏମ୍ବାଟିଏ ଏଝାରି ମା ବିତ୍ରାଟି ଆମ୍ବାଆସି ଇଲେତି କାମା କିନେସି ଇଞ୍ଜାଁ ତାମ୍ବୁତାମ୍ବୁ ଜଲ୍ଲକି ଆଡ଼େରି □

ଆମ୍ବାଆସି କାଜାସି ଇଞ୍ଜାଁ ବାଦିବାଦା

୨୪ ✠ଇଞ୍ଜାଁ ଏଝାରି ବିତ୍ରାଟି ଆମ୍ବାଆସି କାଜାସି ଆନେସି ଇଞ୍ଜାଁ ସୀମୁୟାଁ ବିତ୍ରା ଆସପି ଆଡ଼େରି □

୨୫ ଏମ୍ବାଟିଏ ଜାମ୍ବୁ ଏଝାରାଇଁ ଏଲେଇଚେସି, “ଏଚ୍‌କା କୃତାତି ରାଜାୟାଁ ଏଝାରି ମୁହେଁ ସାଲ୍‌ଝି କିନେରି, ଅଡ଼େ ଆମିନି ଗାଟାରି ଏଝାରାଇଁ ସାଲ୍‌ଝି କିନେରି, ଏଝାରି ଲକୁତାଣା ନେହାରି ଇଞ୍ଜାଁ ୱେଙ୍ଗାଲି ଅଣ୍ଟପିନେରି □

✠ ୨୨:୨୪ ୨୨:୨୫ ମାଟି ୧୮:୧; ମାର୍କ ୯:୩୪; ଲୁକ ୯:୪୭

୨୬ ✠ସାମା ମୀ ବିତ୍ତା ଏଲେଆଥାବୁ ଇଚିହିଁ ମୀ ବିତ୍ତା ଆମ୍ବାଆସି କାଜାସି ଏଞ୍ଜାସି ଓଶା ଆପେସି, ଇଞ୍ଜା ଆମ୍ବାଆସି ସାଲୁଝି କିନାସି ଏଞ୍ଜାସି ସେବା କିନାସି ଆପେସି □

୨୭ ✠ଆମ୍ବାଆସି କାଜାସି ? ତିଞ୍ଜାଲି କୁଗିନାସି କାଜାସି କି ସେବା କିନାସି କାଜାସି ? ତିଞ୍ଜାଲି କୁଗିନାସି କାଜାସି ଆଏକି ? ସାମା ନାନୁ ମୀ ବିତ୍ତା ସେବା କିନାତେଏଁଲେହେଁ ଆହାମାଇଁ □”

୨୮ “ସାମା ମୀରୁ ନା ବାରେ କସ୍ତୁତା ନା ତଲେ ମାଞ୍ଜାମାଞ୍ଜେରି;

୨୯ ଇଞ୍ଜା ନା ଆବା ଏନିକିଁ ନାଞ୍ଜେ ସାଲୁଝି କିହାଲି ପାଶା ହାହାମାଞ୍ଜାନେସି, ନାନୁ ଜିକେଏ ଏଲେକିହିଁ ଏ ମିଞ୍ଜେ ହିୟାଇଁ,

୩୦ ✠ଏନିକିଁ ମୀରୁ ନା ରାଜିତା ନା ତଲେ କୁଗାନା ତିଞ୍ଜେରି, ଇଞ୍ଜା ସିଂଗାସାଣିତା କୁଗାନା ଇସ୍ତାୟେଲତି ବାର କୁଡ଼ାତି ସାଲୁଝି କିଦେରି □”

ପିତର ଜୀସୁଇଁ ପୁଞ୍ଜାହିଲଅଁ ଇଞ୍ଜିଁ ଝେହ୍ନି କାତା

(ମାତି ୨୬:୩୧-୩୫; ମାର୍କ ୧୪:୨୭-୩୧; ଜହ ୧୩:୩୭-୩୮)

୩୧ “ସିମନ, ସିମନ ମେହ୍ନୁ ସୟତାନ ଗହଁ ହାଣ୍ଡିକିନିଲେହେଁ ସୟତାନ ମାହାପୁରୁ ତାଣାଟି ହେଲ ବେଟାଆହାମାନେ;

୩୨ ସାମା ନୀ ନାନୁ ଏନିକିଁ ମେଣ୍ଡାଞ୍ଜେଏ, ଇଦାଆଁତାକି ନାନୁ ନୀ ତାକି ପ୍ରାତାନା କିତେଏଁ; ଇଞ୍ଜା ନୀନୁ ନେହିଁ ଆହାନା ଝେଶ୍ଟାସାରେ ନୀ ତାୟିୟାଣି ତାରପୁକିମୁ □”

୩୩ ସାମା ପିତର ଏଲେଇତେସି, “ଏ ପ୍ରବୁ ନାନୁ ନୀ ତଲେ କାୟିଦିତା ହାଜାଲି ଅଡ଼େ ହାହାଲି ଜିକେଏ ଆଣ୍ଡାଇଁ □”

୩୪ ସାମା ଜୀସୁ ଏଲେଇତେସି, “ଏ ପିତର ନାନୁ ଏଲେଇଞ୍ଜିମାଞ୍ଜାଇଁ, ନୀଞ୍ଜୁ କୟୁ କେଣ୍ଡାଆ ନକେଏ ନୀନୁ ନାଞ୍ଜେ ତାନିପାଲି ପୁଞ୍ଜାହିଲଅଁ ଇଞ୍ଜିଁ ଝେହ୍ନି □”

ଟାକାୟାଁ ମଣା ଅଡ଼େ କାଣ୍ଡା

✠ ୨୨:୨୬ ୨୨:୨୭ ମାତି ୨୩:୧୧; ମାର୍କ ୯:୩୫ ✠ ୨୨:୨୬ ୨୨:୨୭ ମାତି ୨୦:୨୫-୨୭; ମାର୍କ ୧୦:୪୨-୪୪ ✠ ୨୨:୨୬ ୨୨:୨୭ ଜହ ୧୩:୧୨-୧୫ ✠ ୨୨:୩୦ ୨୨:୩୦ ମାତି ୧୯:୨୮

୩୫ ✧ ଜୀସୁ ଏଝାରାଇଁ ଏଲେଇଚେସି, “ଏଚିବେଲା ନାନୁ ମିଙ୍ଗେ ତାରୁୟାଁ ମଣା ଇଞ୍ଜା ସେପୁୟାଁ ଅଥାନା ହାକୁ ଇଞ୍ଜିଁ ପାଣ୍ଡା ମାଞ୍ଜାତେଏଁ ଏ ବେଲା ମିଙ୍ଗେ ଏନାୟି ଉଣା ଆୟାତେକି ?” ଏଝାରି ଏଲେଇଚେରି, “ଏନାୟି ଆଏ □”

୩୬ ଏମ୍ବାଟିଏ ଜୀସୁ ଏଲେଇଚେସି, “ସାମା ନୀଏଁ ଆମ୍ବାଆରାକି ତାରୁୟାଁ ମାନୁ ଏଝାସି ଏଝାଆଁ ଅପେସି, ଏଲେକିହଁଏ ମଣା ଜିକେଏ ଅପେସି, ଅଡେ ଆମ୍ବାଆରାକି କାଣ୍ଡା ହିଲେଏ ଏଝାସି ତାନି ହିମ୍ବୁରି ପାର୍ତାନା କତାପେସି □

୩୭ ଇଚିହଁ ନାନୁ ମିଙ୍ଗେ ଝେସିମାଞ୍ଜାଇଁ, ମାହାପୁରୁ ପତିତା ରାସ୍‌କି ଆହାମାନାୟି ସାତେଏ ନାଙ୍ଗେତାକି ଆନାୟି ମାନେ, ଏଝାସି ପାପୁ ଗାଟାରି ତଲେ ଲେକା ଆନେସି, ଏଲେଆହଁଏ ଏ ବାରେ ନାଙ୍ଗେ ଏଜାତାଟିମାନେ □”

୩୮ ଏମ୍ବାଟିଏ ଏଝାରି ଏଲେଇଚେରି, “ଏ ପ୍ରବୁ ଇମ୍ବାଆଁ ରୀ କାଣ୍ଡା ମାନୁ □” ଇଞ୍ଜା ଏଝାସି ଏଲେଇଚେସି, “ହାଅ, ଏଝିଏ ସାରି ଆନୁ ଇଚେସି □”

ଜୀସୁ ଜୀତ ହରୁତା ପ୍ରାଡାନା କିନାୟି

(ମାତି ୨୬:୩୭-୪୬; ମାର୍କ ୧୪:୩୨-୪୨)

୩୯ ଏଝାସି ଗାଡାଟି ହଟା ହାଜାନା ତାନୁ ହାଲ୍‌ଝିତିଲେହେଁ ଜୀତ ହରୁତା ହାଚେସି, ଅଡେ ସୀସୁୟାଁ ଜିକେଏ ଏଝାଣି ଜେତ ହାଚେରି □

୪୦ ଏମ୍ବାଆଁ ଏଜାନା ଏଝାସି ତାନି ସୀସୁୟାଁଇଁ ଝେସ୍‌ସେସି, “ମୀରୁ ଏନିକିଁ ପାନ୍ଦାତା ହେରଝି ଆଅତେରି, ଇଦାଆଁତାକି ପ୍ରାଡାନା କିଦୁ □”

୪୧ ଅଡେ ଏଝାସି ଏଝାରି ତାଣ୍ଡାଟି ହିରେ ହେକ ହାଜାନା ମେଣ୍ଡାକୁତାନା ପ୍ରାଡାନା କିହଁ ଝେସ୍‌ସେସି,

୪୨ “ଏ ଆବା ନୀନୁ ମନ କିତିହଁ ଇ ଦୁକୁ କସ୍ତ ନା ତାଣ୍ଡାଟି ଗୁଚି କିମ୍ବୁ; ସାମା ନା ମନ କଡେ ଆଏ ନୀ କାତେଏ ଆପେ □”

୪୩ ଅଡେ ଲାକପୁରୁତି ର ଦୁତୁ ତଞ୍ଜାଆହାନା ଏଝାଣାକି ବାଡ଼ୁୟୁ ହୀତେ □

✧ ୨୨:୩୫ ୨୨:୩୫ ମାତି ୧୦:୯,୧୦; ମାର୍କ ୬:୮,୯; ଲୁକ ୯:୩; ୧୦:୪

୪୪ ଏବେଟିଏ ଏଞ୍ଜେଲ୍ ହାରେକା ଦୁକୁତଲେ ଅଡ଼େ ଗାଡ଼ିକିହିଁ ପ୍ରାତାନା କିତେସି, ଇଞ୍ଜା ଏଞ୍ଜାଣି ଗାମା ନେତେରିଲେହେଁ ବୁନିତା ତରରିମାରେ □

୪୫ ଅଡ଼େ ଏଞ୍ଜେଲ୍ ପ୍ରାତାନାଟି ନିଜା ଖାହାନା ତାନି ସୀସୁୟାଣି ଦୁକୁତଲେ ଇଦା କିତାଣି ମେସ୍ତେସି;

୪୬ ଇଞ୍ଜା ଏଞ୍ଜେଲ୍ ଏଞ୍ଜାରାଲ୍ ଏଲେଇରେସି, “ଏନାଆଁତାକି ତୁରାମାଞ୍ଜେରି ? ପାନ୍ଦାତା ଏନିକିଁ ହେରୁଞ୍ଜିଅତେରି ଏନାଆଁତାକି ନିଜାନା ପ୍ରାତାନା କିଦୁ □”

ଜୀସୁଇଁ ଦହିନି କାତା

(ମାତି ୨୬:୪୭-୫୨; ମାର୍କ ୧୪:୪୩-୫୦; ଜହ ୧୮:୩-୧୧)

୪୭ ଏଞ୍ଜେଲ୍ ଜଲିମାଗାଟି ର ମାନ୍ଦା ଲକୁ ଏମ୍ପାଆଁ ଏଗା ଖାଡ଼େରି, ଅଡ଼େ ବାରଜାଣା ସୀସୁୟାଁ ବିତ୍ରାଟି ଜୀହୁଦା ଦରୁଗାଗାସି ଏଞ୍ଜାରି ନକିତା ଖାହାନା ଜୀସୁଇଁ ନଶ୍ଟାଲି ତାନି ତାଣା ହାରେସି □

୪୮ ସାମା ଜୀସୁ ଏଞ୍ଜାଣାଲ୍ ଏଲେଇରେସି, “ଏ ଜୀହୁଦା ନଶ୍ଟାନା ମାଣ୍ଡସି ମାର୍‌ଏଶାଲ୍ ସାତୁୟାଁ କେୟୁତା ହେରପିମାଞ୍ଜି ?”

୪୯ ଏମ୍ପାଟିଏ ଜୀସୁତଲେ ମାଗାରି ଇଦି ଏନାୟି ଇଞ୍ଜିଁ ପୁଞ୍ଜାନା ଜୀସୁଇଁ ଏଲେଇରେରି, “ଏ ପ୍ରବୁ ମାମ୍ପୁ ଇଞ୍ଜାରାଲ୍ କାଣ୍ଡାତଲେ ପାୟିନମି କି ?”

୫୦ ଅଡ଼େ ଏଞ୍ଜାରି ରଅସି କାଜା ପୂଜେରା ହଲେଏଶାଲ୍ ଇରହାନା ତାନି ଟିଝନି କିୟିଁ ଦୁାତାତୁସ୍ତେସି □

୫୧ ସାମା ଜୀସୁ ଏଲେଇରେସି, “ଇରେକେଏ ଆଡ଼େ” ଇଞ୍ଜାନା ଏଞ୍ଜାଣି କିୟିଁ ତୁାଗାନା ନେହିଁ କିତେସି □

୫୨ ଅଡ଼େ ଜୀସୁ ତାଜେ ଆସାଲି ଖାହାମାଟି କାଜା ପୂଜେରା, ମାହାପୁରୁ ଇଲୁତି କାପୁଗାଗାରି ଅଡ଼େ ଲକୁତି କାଜାରାଲ୍ ଏଲେଇରେସି, “ମୀରୁ ସରୁଇଁ ଆହିନିଲେହେଁ ଇଟା କାଣ୍ଡା ଅଡ଼େ ଚେଙ୍ଗାୟାଁ ଆସାନା ଖାହାମାଞ୍ଜେରି ?

୫୩ ☆ନାନୁ କାଲେଏ ମୀ ତଲେ ମାହାପୁରୁ ଇଲୁତା ମାଚେଏଁ, ଏରିବେଲା ମୀରୁ ନାଜେ ଆସ୍ତାଆତେରି; ସାମା ଇ ଦିନା ମୀଦିଏ ଅଡ଼େ ଆନ୍ଦେରିତି ବାଡ଼ୁଲୁ ରାଜିକିନି ଦିନା □”

ପିତର ଜୀସୁଇଁ ପୁଞ୍ଜାହିଲଅଁ ଇଞ୍ଜିଁ ଇନାୟି

(ମାତି ୨୨:୫୭,୫୮,୬୯-୭୫; ମାର୍କ ୧୪:୫୩,୫୪,୬୭-୭୨; ଜହ ୧୮:୧୨-୧୮,୨୫-୨୭)

୫୪ ତାଲୁ ଏଞ୍ଜାରି ଏଞ୍ଜାଣାଇଁ ଅହାନା କାଜା ପୂଜେରା ଇଜ ତାତେରି; ସାମା ପିତର ହେକ ମାଞ୍ଜାନା ଜେତ ଜେତ ହାଚେସି □

୫୫ ଅଡ଼େ ଏଞ୍ଜାରି ଆଂଗେଣିତା ହିରୁ ତାସାନା ହିରୁ ସାରିସୁରୁ କୁଗିତେରି, ଇଞ୍ଜାଁ ପିତର ଜିକେଏ ଏଞ୍ଜାରିତଲେ କୁଗିତେସି □

୫୬ ଏମ୍ବାଟିଏ ର ହଲେଣି ପିତର ହିରୁ ମାଣ୍ଡାତା କୁଗାମାନାଣି ମେସାନା, ଏଞ୍ଜାଣାଇଁ ସିନିକିହାନା ଏଲେଇଚେ, “ଇଞ୍ଜାସି ଜିକେଏ ଏଞ୍ଜାଣିତଲେ ମାଚାସି □”

୫୭ ସାମା ପିତର ଏଲେଇଚେସି, “ଆଏକା ନାନୁ କଡ଼େ ଏଞ୍ଜାଣାଇଁ ପୁଣ୍ଡୁସୁ ପୁଞ୍ଜାହିଲଅଁ □”

୫୮ ଅଡ଼େ ଗାଡ଼େକା ହାଜାଲିଏ ଅଡ଼େ ରଅସି ଏଲେଇଚେସି, “ନାନୁ ଜିକେଏ ଏଞ୍ଜାରି ବିତ୍ତାଟି ରଅତି □” ସାମା ପିତର ଏଲେଇଚେସି, “ଆଏ ତାୟି ନାନୁ କଡ଼େ ଆଏ □”

୫୯ ଅଡ଼େ ର ଗଂଟା ହାଜାଲିଏ ଅର ରଅସି ଏଲେଇଚେସି, “ସାତେଏ ଇଞ୍ଜାସି ଏଞ୍ଜାରିତଲେ ମାଚାସି, ଏନିଇଚିହଁ ଇଞ୍ଜାସି ଗାଲିଲି ଦେସାତାସି □”

୬୦ ସାମା ପିତର ଏଲେଇଚେସି, “ନାନୁ ଏନାଆଁ ଇଞ୍ଜିମାଞ୍ଜି ତାୟି ନାନୁ ଏଦାଆଁ ପୁଞ୍ଜିହିଲଅଁ □”

ଏ ଦେବୁଣିଏ କୟୁ କେଶ୍‌ତେ;

୬୧ ଏମ୍ବାଟିଏ ପ୍ରୁ ମୁମୁ ପେରହାନା ପିତରଇଁ ସିନିକିତେସି; ଏମ୍ବାଟିଏ ନୀଞ୍ଜୁ କୟୁ କେଶ୍‌ଆ ନକେଏ ନାନୁ ପୁଞ୍ଜାହିଲଅଁ ଇଞ୍ଜାଦି, ପ୍ରୁ ଖେସ୍ତି ଇ କାତା ତାନି ମନତା ଖାଡ଼େ,

୬୨ ଇଞ୍ଜାଁ ଏଞ୍ଜାସି ପାଙ୍ଗାତା ହାଜାନା ଗାତି ଦୁକୁ ଆହାନା ଡ଼ାତେସି □

ଜୀସୁଙ୍କ ନିନ୍ଦାକିହିଁ କାକ୍‌ନାୟି ଅଡ଼େ ଝେନାୟି

(ମାତି ୨୨:୨୭,୨୮; ମାର୍କ ୧୪:୨୫)

୨୩ ଅଡ଼େ ଆମିନିଗାଟାରି ଜୀସୁଙ୍କ ଆସା ଇଟାମାଚେରି, ଏଞ୍ଜାରି ଏଞ୍ଜାଣାଇଁ ଝେଟି ଝେଟିହିଁ କାକ୍‌ହେରି,

୨୪ ଅଡ଼େ ଏଞ୍ଜାଣି ମୁମ୍‌ତୁ ହିମ୍‌ରି ପ୍ଲୁକ୍‌ହାନା ଝେଚେରି, “ନୀନୁସାଁ ମାହାପୁରୁ ଅଣ୍‌ପୁତି ବଲୁ ଝେହ୍‌ନାତି! ଝେସ୍‌ୟାମୁ ନିଙ୍ଗେ ଆମ୍ବାଆସି ଝେତାତେସି ?”

୨୫ ଅଡ଼େ ଏଞ୍ଜାରି ହାରେକା କାତା ଏଞ୍ଜାଣି କପାଟି ଜଲାନା ଏଞ୍ଜାଣି ନିନ୍ଦାକିତେରି □

ବେରଣିମାଣ୍ଡା ନକିତା ଜୀସୁ

(ମାତି ୨୨:୫୯-୬୨; ମାର୍କ ୧୪:୫୫-୬୪; ଜହ ୧୮:୧୯-୨୪)

୨୬ ଲାଇଁ ଝେୟାଲିଏ ଲକୁତି କାଜାରି, କାଜା ପୂଜେରାଙ୍ଗା ଅଡ଼େ ମେରାପୁନାରି ରୁଣ୍ଡା ଆହାନା ତାମି ବେରଣିମାଣ୍ଡାତା ଜୀସୁଙ୍କ ଅହାନା ଝେଚେରି,

୨୭ “ନୀନୁ କ୍ରୀସ୍ତିକି ମାଙ୍ଗେ ଝେସ୍‌ୟାମୁ □” ସାମା ଏଞ୍ଜାସି ଏଞ୍ଜାରାଇଁ ଏଲେଇଚେସି, “ନୀନୁ ମିଙ୍ଗେ ଝେସ୍‌ୟାସାରେ ମୀରୁ ନାମଅତେରି;

୨୮ ଅଡ଼େ ନୀନୁ ଝେଞ୍ଜାତିହିଁ ମୀରୁ ଝେସାଲି ଆଡ଼ଅତେରି □

୨୯ ସାମା ନୀର୍‌ଏଟିଏ ମାଣ୍ଡସି ମୀର୍‌ଏସି ବାଡ଼୍‌ୟୁଗାଟି ମାହାପୁରୁ ଟିଝନି ଟଟତା କୁଗିନେସି □”

୩୦ ଏମ୍ବାଟିଏ ବାରେଜାଣା ଝେଚେରି, “ଆତିହିଁ ନୀନୁ ମାହାପୁରୁ ମୀର୍‌ଏଣାତିକି ?”

ଏଞ୍ଜାସି ଏଞ୍ଜାରାଇଁ ଏଲେଇଚେସି, “ମୀରୁତ ଝେସିମାଞ୍ଜାଦେରି, ନୀନୁ ଏଞ୍ଜାତେସି □”

୩୧ ଏଚେଟିଏ ଏଞ୍ଜାରି ଏଲେଇଚେରି, “ମାଙ୍ଗେ ଅଡ଼େ ଏନ୍ତି ସାକି ଲଡ଼ା, ମାରୁତ ଇ କାତା ତାନି ଗୁତିଟିଏ ଝେଚାୟି □”

୨୩

ପିଲାତ ନକିତା ଜୀସୁ

(ମାତି ୨୭:୧,୨; ୨୭:୧୧-୧୪; ମାର୍କ ୧୫:୧-୫; ଜହ ୧୮:୨୮-୩୮)

୧ ଏଚେଟିଏ ତାୟ ବାରେଜାଣା ନିଜାନା ଜୀସୁଇଁ ପିଲାତ ନକିତା ଅଡେରି ।

୨ ଇଞ୍ଜା ଏଝାରି ଜୀସୁ କପାଟି ଦହ ଦସାନା ଏଲେଇଚେରି, “ମାମୁ ପୁଚମି ଇଝାସି ମା କୁଡାତି ଲକୁଣି ପଲୁଆ ଜାପୁହିମାନେସି, ଇଚିହ ଇଝାସି କାୟିସରକି ସିସୁ ହୁଆଦୁ ଇଞ୍ଜ, ତାନୁ ନାନୁଏ କ୍ରୀସୁ ଅଡେ ରାଜାତେଏଁ ଇଞ୍ଜ ଝେସା କଡିମାନେସି ।”

୩ ଏଚେଟିଏ ପିଲାତ ଜୀସୁଇଁ ଝେଚେସି, “ନୀନୁ କି ଜୀହୁଦି ଲକୁଡି ରାଜାତି ?”

ଜୀସୁ ଝେସେସି, “ନୀନୁତ ଝେସିମାଞ୍ଜି ।”

୪ ଏଚେଟିଏ ପିଲାତ କାଜା ପୂଜେରା ଅଡେ ବାରେ ଲକୁଣି ଏଲେଇଚେସି, “ନୀନୁ ଇଝାଣି ତାଣା ଏନି ଦହ ପୁଃଆତେଏଁ ।”

୫ ସାମା ଏଝାରି ଗାଡିକିହ ଜଲିତେରି, “ଇଝାସି ଗାଲିଲିଟିଏ ମାଟୁହାନା ଇମ୍ବା ପାତେକା ବାରେ ଜୀହୁଦା ଦେସାତି ଲକୁଣି ଜାପୁହାନା ଲାଗେଏ କିହିମାନେସି ।”

ହେରଦ ନକିତା ଜୀସୁ

୬ ସାମା ପିଲାତ ଇ କାତା ଝେଞ୍ଜାନା ଝେଚେସି, “ଇଝାସି ଗାଲିଲିତାସିକି ?”

୭ ଇଞ୍ଜା ଏଝାସି ହେରଦ ରାଜା ରାଜି ତାସି ଇଞ୍ଜ ପୁଞ୍ଜାନା ଏଝାଣାଇଁ ହେରଦ ତାଣା ପାଣ୍ଡିତେସି, ଏନିଇଚିହ ଏଚିବେଲା ହେରଦ ଜିରୁସାଲମତା ମାଚେସି ।

୮ ହେରଦ ଜୀସୁଇଁ ମେସାନା ହାରେକା ରାହାଁ ଆଡେସି, ଏନିଇଚିହ ଏଝାସି ଏଝାଣି କାତା ଝେଞ୍ଜା ମାଚାକି ଏଝାଣାଇଁ ହାରେକା ଦିନାଟିଏ ମେସାଲି ମନ କିହିମାଚେସି, ଇଞ୍ଜା ଏଝାଣି ତାଣାଟି ଏନି କାବାଆନି କାମାକିନାଣି ମେହଇଁ ଇଞ୍ଜ ଆସା କିହିମାଚେସି ।

୯ ହେରଦ ଜୀସୁଇଁ ଏନି ଏନି କାତାୟାଁ ଝେଚେସି, ସାମା ଜୀସୁ ଏଝାଣାଇଁ ଏନି କାତାଝା ଝେଶ୍ଟେ ଝେହୁଆତେସି ।

୧୦ ସାମା କାଜା ପୂଜେରାଞ୍ଜା ଅଡେ ମେରାପୁନାରି ନିଚାନା ଏଝାଣି କପାଟି ଆଜିହପେତି କାତାୟାଁ ଜଲିମାଚେରି ।

୧୧ ଏତେଟିଏ ହେରଦ ତାନି କସ୍କା ତଲେ ଏଝାଣାଈଁ କାକ୍‌ହି କାକ୍‌ହିହିଁ ନିନ୍ଦାକିତେରି ଏତେଟିଏ ର ପାଟୁ ହିମ୍ବରି ଏଝାଣାଈଁ ହୁଟି କିହାନା ପିଲାତ ତାଣା ଝେଣ୍ଣେ ପାଣ୍ଡିତେରି □

୧୨ ଏ ଦିନାଟିଏ ପିଲାତ ଅଡ଼େ ହେରଦ ତଣେ ଆଡ଼େରି; ଏଝାରି ନକେଏ ସାତୁୟାଁଲେହେଁ ମେସ୍‌ପି ଆଝିତେରି □

ଜୀସୁକି ହାନି ତଣ୍ଡ

(ମାତି ୨୭:୧୫-୨୬; ମାର୍କ ୧୫:୬-୧୫; ଜହ ୧୮:୩୯; ୧୯:୧୬)

୧୩ ଏମ୍ବାଟିଏ ପିଲାତ କାଜା ପୂଜେରା ଜୀହୁଦି ଲକୁଡି କାଜାରି ଅଡ଼େ ବାରେ ଲକୁଇଁ ହାଟି କିହାନା ଏଝାରାଇଁ ଏଲେଇତେସି,

୧୪ “ଇଝାସି ଲକୁଣି ପଲଆ ଜାପୁହିମାନେସି ଇଞ୍ଜିଁ ମୀରୁ ନା ତାଣା ତାତେରି; ସାମା ନାନୁ ଏଝାଣାଈଁ ମୀ ନକିତା ତାୟିପାରି କିତେଏଁ ଇଞ୍ଜାଁ ମୀରୁ ଝେସାମାଞ୍ଜାତି ଏନ୍ଦି ଦହ ଏଝାଣି ତାଣା ପ୍ଲାଝଆତେଏଁ, ଇଞ୍ଜାଁ ହେରଦ ଜିକେଏ ପ୍ଲାଝଆତେସି,

୧୫ ଏନ୍ଦିଇଟିହିଁ ହେରଦ ଅଡ଼େ ଝେଣ୍ଣେ ନା ତାଣା ପାଣ୍ଡାତେସି; ଇଞ୍ଜାଁ ମେହଦୁ ଇଝାସି ହାନି ତଣ୍ଡ ପାଣ୍ଡି ଏନ୍ଦି ଦହଝା କିହାହିଲଅସି;

୧୬ ଏଦାଆଁତାକି ନାନୁ ଇଝାଣାଈଁ ସାଟୁଣି ତଲେ ଝେଚାନା ପିହିଇଁ □”

୧୭ ପିସ୍‌ପିଆନ୍ଦି ପାରୁଁ ବେଲା କାୟିଦି ମାନାରି ବିତ୍ରାଟି ରଅଣାଈଁ ଏଝାରାକି ପିସାଲି ମେରା ମାତେ □

୧୮ ସାମା ଏଝାରି ରହେଏ ଗାଡିକିହିଁ ଏଲେଇତେରି, “ଇଝାଣାଈଁ ପାୟାଦୁ ବାରବାଇଁ ମାଙ୍ଗେ ପିସାହିୟାମୁ □”

୧୯ ଈ ବାରବାଇଁ ଗାଡ଼ାତି ଗଡ଼ହା ତାକି ଇଞ୍ଜାଁ ରଅଣାଈଁ ପାୟାମାତାକି କାୟିଦି ଇଟାମାତେରି □

୨୦ ସାମା ପିଲାତ ଜୀସୁଇଁ ପିସାଲି ଅଣ୍‌ପାନା ଲକୁ ମାନ୍ଦାତି ଅଡ଼େ ପୁଣ୍ଡି କିହାଲି ଝେସେସି □

୨୧ ସାମା ଏଝାରି କାଜା ହାଡ଼ାତଲେ ଏଲେଇତେରି, “ଏଝାଣାଈଁ ପାସି ମୁଣ୍ଡାତା ଏକ୍‌ଦୁ ପାସି ମୁଣ୍ଡାତା ଏକ୍‌ଦୁ ଇଞ୍ଜିଁ ଇତେରି □”

୨୨ ଇଞ୍ଜାଁ ଏଝାସି ଅଡ଼େ ତାନି ପାଲି ଝେସେସି, “ଏନାଆଁତାକି, ଏଝାସି ଏନ୍ଦି ଦହ କିହାମାନେସି ? ନାନୁ ଏଝାଣି ତାଣା ଏନ୍ଦି

ହାନିହରଗତି ଦହ ପ୍ଲାଃଆତେଏଁ; ଏଦାଆଁତାକି ନାନୁ ଏଞ୍ଜାଣାଇଁ ସାସ୍ତି ହୀହାନା ପିହ୍ଇଁ ।”

୨୩ ସାମା ଏଞ୍ଜାରି କାଜା ଗିୟାଁତଲେ ଏଞ୍ଜାଣାଇଁ ପାସି ମୁଣ୍ଡାତା ଏକହାଲି ଝେସ୍ତେରି, ତାମ୍ଭୁ ଏଞ୍ଜାରି ଝେସ୍ତାୟିଏ ଆଡେ ।

୨୪ ଇଞ୍ଜା ଏଞ୍ଜାରି ଝେସ୍ତଲେହେଁଏ କିୟାଲି ପିଲାତ ହୁକୁମି ହୀତେସି;

୨୫ ସାମା ଆମିନିଗାଟାସି ଗଡ଼ହା ଅଡେ ଲକୁଣି ପାୟାଲିଏ କାୟିଦିତା ଇଟାମାଟାଣାଇଁ ରୀସା ମାରେରି ପିସ୍ତେସି, ଅଡେ ଜୀସୁଇଁ ଏଞ୍ଜାସି ଏଞ୍ଜାରି ଅଣ୍ପିତି ଲେହେଁ କିୟାଲି ଏଞ୍ଜାରିତାଣା ହେର୍ପିତେସି ।

ଜୀସୁଇଁ ପାସି ଏକନାୟି

(ମାତି ୨୭:୩୨-୪୪; ମାର୍କ ୧୫:୨୧-୩୨; ଜହ ୧୯:୧୭-୨୭)

୨୬ ଏଞ୍ଜାରି ଜୀସୁଇଁ ଅହିମାଟାଟି ସିମନ ଦରୁଗାଟି କୁରିଣି ଦେସାତି ର ନାୟୁଟି ଖାହିମାରେସି, ଏଞ୍ଜାରି ଏଞ୍ଜାଣାଇଁ ପାସିମୁଣ୍ଡା ଡେକି କିହାନା ଜୀସୁ ଜେଟ ଜେଟ ଅଡେରି ।

୨୭ ମାୟା ଲକୁ ଜୀସୁ ଜେଟ ହାଜିମାରେରି ଅଡେ ତାନି ତାକି ବକତା ଝେଟା କଡିହଁ ଡୀହି ଡୀହି ଏତରଜାଣା ଇୟାସିକା ଜିକେଏ ଏଞ୍ଜାଣି ଜେଟ ହାଜିମାରୁ ।

୨୮ ସାମା ଜୀସୁ ଏଞ୍ଜାସିକା ଖାକି ସିନିକିହାନା ଏଲେଇଚେସି, “ଆଲ, ଜିରୁସାଲମତି ମାସ୍ତକାତେରି ନା ତାକି ଡୀଆଦୁ ସାମା ମୀ ତାକି ଅଡେ ମୀ କକାରି ପଦ୍ମା ତାକି ଡୀଦୁ;

୨୯ ହେଣ୍ଡୁ ଇଲେଡି ଦିନା ଖାହିମାନେ, ଆମ୍ବାଆୟି ବାଞ୍ଜେଣିସିକା, ଆମ୍ବାଆୟି ଏଚେଲା ପୂରାମାସା ଆହାହିଲାଉ ଅଡେ ପାଲୁ ଡର୍ହା ହିଲାଉ ଲକୁ ଏଞ୍ଜାସିକାଣି ମିଙ୍ଗେଏ ନେହେଁ ଇଞ୍ଜାନେରି ।

୩୦ ☆ଏଚିବେଲା ଲକୁ ହର୍କାଣି ଏଲେଇନେରି ମା ଲାକ ତରଗାଦୁ ଅଡେ ଡଣା ହର୍କାଣି ଏଲେଇନେରି ମାଙ୍ଗେ ପ୍ଲିକ୍‌ହାନା ଡକୁହାଦୁ ।

୩୧ ଏନିଇଚିହଁ ଲକୁ ହିଇଲି ମାର୍‌ନୁଡି ଏଲେକିଡିହଁ, ଏଦି ଖାୟିସାରେ ଏଦାଆଁ କିହା ଆଗାଡ଼ା କିଅରିକି ?”

୩୨ ଦହଗାଟାରି ରିଆରି ଜିକେଏ ପାସି ଏକହାଲି ଜୀସୁତଲେ ଅଞ୍ଜିଆଡେରି □

୩୩ ଏମ୍ବାଟିଏ ଏଞ୍ଜାରି ତାୟ୍ ରୁପା ଇନି ଟାୟୁତା ଏଜାନା ଏମ୍ବାଆଁ ଜୀସୁଇଁ ପାସି ମୁଣ୍ଡାତା ଏକହାନା ଏ ରୀ ଦହଗାଟାରି ବିତ୍ରାଟି ରଅଣାଇଁ ଏଞ୍ଜାଣି ଟିଃନିଞ୍ଜାକି ଅଡେ ରଅଣାଇଁ ଏଞ୍ଜାଣି ଟେବୁଞ୍ଜାକି ପାସି ଏକହେରି □

୩୪ ଏଟିବେଲ୍ୟା ଜୀସୁ ଏଲେଇଚେସି, “ଏ ଆଡା ଏଞ୍ଜାରି ଦହ ଆହଆନି, ଇଚିହ୍ ଏଞ୍ଜାରି ଏନାଆଁ କିହିମାନେରି ଏନାଆଁ ପୁଞ୍ଜାହିଲଅରି □”

ଅଡେ ଏଞ୍ଜାରି ଏଞ୍ଜାଣି ହିମ୍ବୁରି ବାଟିକିହାଲି ପାଦି କିତେରି □

୩୫ ଇଞ୍ଜା ଲକୁ ବାରେ ନିଚାନା ସିନିକିହିମାଚେରି, ଏଞ୍ଜାରି ବିତ୍ରାଟି କାଜାରି ଜିକେଏ ନିନ୍ଦାକିହ୍ ଏଲେଇଚେରି, “ଏଞ୍ଜାସି ଏଟ୍‌କା ଲକୁଣି ଗେଲ୍‌ପିତେସି; ଏଞ୍ଜାସି ମାହାପୁରୁ ଆଡିତି କ୍ରୀସୁ ଇଚିହ୍ ତାନୁଏ ତାଙ୍ଗେ ଗେଲ୍‌ପିକିହା କତାପେସି □”

୩୬ କସ୍‌କା ଜିକେଏ ଏଞ୍ଜାଣି ତାଗେ ହାଜାନା ପୁଲ୍ୟାଏୟୁ ଗସାଲି ହାହାଁ ଏଞ୍ଜାଣାଇଁ କାକ୍‌ହିହ୍ ଏଲେଇଚେରି,

୩୭ “ନୀନୁ ଜୀହୁଦି ଲକୁଡି ରାଜାଡି ଇଚିହ୍ ନୀନୁଏ ନିଙ୍ଗେ ପିସ୍‌ପି କିହାକତାମୁ □”

୩୮ ଇଞ୍ଜା ଏଞ୍ଜାଣି ପାସିମୁଣ୍ଡା ଲାକ ଇଲେଇଞ୍ଜ୍ ରାସ୍‌କି ଆହାମାଚେ, “ଇଞ୍ଜାସି ଜୀହୁଦି ଲକୁଡି ରାଜା □”

୩୯ ଅଡେ ପାସି ମୁଣ୍ଡାତା ପାସି ଏକହାମାଟି ଦହଗାଟାରି ବିତ୍ରାଟି ଜିକେଏ ରଅସି ଏଞ୍ଜାଣାଇଁ ନିନ୍ଦାକିହ୍ ଏଲେଇଚେସି, “ନୀନୁ କ୍ରୀସୁତି ଆଏକି ? ନିଙ୍ଗେ ଅଡେ ମାଙ୍ଗେ ପିସ୍‌ପି କିୟାମୁ □”

୪୦ ସାମା ଅଡେ ରଅସି ଏଞ୍ଜାଣାଇଁ ଦାକା ହୀହାନା ଏଲେଇଚେସି, “ନୀନୁ ଏଞ୍ଜାଣିଲେହେଁ ତଣ୍ଡ ବେଟାଆହ୍ ଜିକେଏ ନିଙ୍ଗେ ମାହାପୁରୁଇଁ ଆଜି ହିଲେଏ ?

୪୧ ଅଡେ ମାରସା ନୀହାୟି ତଲେ ତଣ୍ଡ ବେଟାଆହ୍ ମାନାୟି, ଇଚିହ୍ ମା କିତି କାମାଡି ପାଡେୟି ବେଟାଆହ୍ ମାନାୟି; ସାମା ଇଞ୍ଜାସି ଏନି ଦହ କିହାହିଲଅସି □”

୪୨ ଇଞ୍ଜା ଏଝାସି ଜୀସୁଇଁ ଏଲେଇରେସି, “ଏ ଜୀସୁ ନୀନୁ ନୀ ରାଜିତା ହାଚିସାରେ ନାଜେ ଅଣ୍ଠାପାମୁ □”

୪୩ ଏମ୍ବାଟିଏ ଜୀସୁ ଏଝାଣାଇଁ ଏଲେଇରେସି, “ନୀନୁ ନିଜ ସାତା ଝେସିମାଞ୍ଜାଇଁ, ନୀଞ୍ଜୁ ନୀନୁ ପାରଦେସାତା* ନା ତଲେ ମାଞ୍ଜି □”

ଜୀସୁତି ହାକି

(ମାତି ୨୭:୪୫-୪୬; ମାର୍କ ୧୫:୩୩-୪୧; ଜହ ୧୯:୨୮-୩୦)

୪୪ ଏତିବେଲା ସମାନା ବାରଗଂଗା ଆହାମାଚେ, ଅଡେ ଝେଡ଼ା ଉଜେଡି ହୀଆତାକି ତାନି ଗଂଗା ପାତେକା ଦେସା ବାରେ ଆନ୍ଦେରି ଆହାମାଚେ,

୪୫ ଇଞ୍ଜା ମାହାପୁରୁ ଇଲୁତା ଲେଚାମାନି ହିମ୍ବରି ରୀ ବାଗା ଆହୁଁ ଗେଞ୍ଜା ହାଚେ □

୪୬ ଅଡେ ଜୀସୁ କାଜା ଗିୟାତଲେ ହାଚିହୁଁ ଏଲେଇରେସି, “ଏ ଆବା ନୀ କେୟୁତା ନା ଜୀସୁତି ହେରପିମାଞ୍ଜାଇଁ □” ଏଲେଇଞ୍ଜି ଜଲାନା ତାନି ଜୀସୁ ହାଚେ □

୪୭ ଏଦାଆଁ ମେସାନା ପାସାକଡ଼ି କସ୍‌କା ମୁହେଁ କାଜାସି ମାହାପୁରୁଇଁ ଜହରା କିହୁଁ ଏଲେଇରେସି, “ଇଝାସି ସାତେଏ ତୀରିଗାଟାସି ମାଚେସି □”

୪୮ ଇଞ୍ଜା ଏଝାଣାଇଁ ମେସାଲି ରୁଣ୍ଡା ଆହାମାଚି ବାରେ ଲକୁ ଇ ବାରେ ମେସାନା ବକତା ଝେଚା କଡ଼ିହୁଁ ଝେଣ୍ଡା ହାଚେରି □

୪୯ ସାମା ଜୀସୁଇଁ ପୁଞ୍ଜାମାଚି ବାରେ ଲକୁ ଇଞ୍ଜା ଗାଲିଲିଚି ରହେଁଏ ଆଣ୍ଡାନା ତାନି ଜେଚ ଜେଚ ଝାହାମାଚି ଇୟାସିକା ହେକ ନିଚାନା ଏ ବାରେ ସିନିକିହିମାରୁ □

ଜୀସୁଇଁ ମୁହ୍‌ନାୟି

(ମାତି ୨୭:୫୭-୬୧; ମାର୍କ ୧୫:୪୨-୪୬; ଜହ ୧୯:୩୮-୪୨)

୫୦ ଇଞ୍ଜା ଜୀହୁଦି ଦେସାତି ହାରାମାତିୟା ଇନି ଗାଡ଼ାତି ଜସେପ ଇନାସି ଜୀହୁଦି ଲକୁତି କାଜା କୁଲମିତି ରଅସି ମାଚେସି; ଏଝାସି ନେହାସି ଇଞ୍ଜା ତୀରିଗାଟାସି ମାଚେସି □

* ୨୩:୪୩ 23:43 ପାରଦେସା/ହାତାରି ତୟିନି ଗାୟୁ

୫୧ ଜୀବୁଦାତି ହାରାମାତିୟା ଇନି ନାୟୁତି ଜସେପ ଇନାସି ର ମାଣସି ମାଚେସି □ ଏଞ୍ଜାସି ଦାମ୍ବୁଗାଟାସି ଇଞ୍ଜା ମାନ୍ନିଗାଟାସି ମାଚେସି ଅଡ଼େ ମାହାପୁରୁତି ରାଜି ଖାନ୍ନାଣି କାଟିମାଚେସି □ କାଜା ବେରଣିତି ମାଣସି ମାଚିହିଁ ଜିକେଏ, ଏଞ୍ଜାସି ଏଞ୍ଜାରି କାତା ଅଡ଼େ କାମାତା ଆଣ୍ଡିହିଲାଆଡେସି □

୫୨ ଏଞ୍ଜାସି ପିଲାତ ତାଣା ହାଜାନା ଜୀସୁ ମାଡ଼ହାତି ରୀସ୍ତେସି,

୫୩ ଇଞ୍ଜା ମାଡ଼ହାତି ରେପହାନା ନେହିଁ ପାଡ଼ାଡ଼ା ହିମ୍ବୁରି ରୁପାନା ଏମ୍ପାଆଁ ହରୁତା କାରହାମାତି ଏଚେଲା ଆମ୍ପାଆରି ମୁସାହିଲାଆ ମାଡ଼ହା ମୁହ୍ନି ଟାୟୁତା ଏଞ୍ଜାଣାଇଁ ମୁସ୍ତେରି □

୫୪ ଏ ଦିନା ତିୟାରା ଆନି ଦିନା ମାଚେ ଅଡ଼େ ଜମିନି ଦିନା ଏଗା ଖାହିମାଚେ □

୫୫ ଅଡ଼େ ଗାଲିଲିତି ଖାହାମାନି ଇୟାସିକା ଜେଚ ଜେଚ ହାଜାନା ମାହ୍ଣି ମାଣ୍ଡା ଅଡ଼େ ତାନି ମାଡ଼ହା ଏନିକିଁ ମୁସାମାଚାଣି ମେସ୍ତୁ

୫୬ ଇଞ୍ଜା ଏଞ୍ଜି ଖେଣ୍ଡା ହାଜାନା ଗାନ୍ଦା ନିୟୁଁ ଇଞ୍ଜା ଗାନ୍ଦାଗାଟି ଆସ୍ତି ତିୟାରା କିତୁ □ ଇଞ୍ଜା ଜମିନି ଦିନାତା ତାମି ମେରାଲେହେଁ ଜମିତୁ □

୨୪

ଜୀସୁ ହାହାନା ଖେଣ୍ଡେ ନିଜିନାୟି

(ମାତି ୨୮:୧-୧୦; ମାର୍କ ୧୬:୧-୮; ଜହ ୨୦:୧-୧୦)

୧ ଅଡ଼େ ଜମିନି ଦିନାତି ମେରା ତଲେ ଜମିତୁ, ସାମା ଖାଚାତି ତଲିତି ଦିନାତା ଜୁଲୁପୁଲୁ ଖେୟାଲିଏ ଏଞ୍ଜି ତାମ୍ବୁ କୁହାମାତି ଗାନ୍ଦାନିୟୁଁ ଆସାନା ମାହ୍ଣି ମାଣ୍ଡାତା ହାତୁ □

୨ ଇଞ୍ଜା ମାହ୍ଣି ମାଣ୍ଡାତା ପୁକ୍‌ହାମାତି ଖାଲି ଗୁତା ଆହାମାନାଣି ମେସ୍ତୁ □

୩ ସାମା ଏଞ୍ଜି ବିତ୍ରା ହାଜାନା ପ୍ରବୁ ଜୀସୁତି ମାଡ଼ହା ଏମ୍ପାଆଁ ମେହ୍‌ଆତୁ □

୪ ଏଞ୍ଜି ଏଦାଆଁତାକି ବିଲକି ଆହିମାତି ଦେବୁଣିଏ ମୁହ୍ନି ହିମ୍ବୁରି ହୁଚାମାତି ରିଆରି ଏଞ୍ଜାସିକା ନକିତା ନିଚାମାନେରି □

୫ ଏମ୍ବାଟିଏ ଏଝି ଆଡାଜାକା ଆହାନା ବୁମିତା ତାର୍ଜା ଲେସୁ ଇଞ୍ଜା ଏଝାରି ଏଝାସିକାଣି ଏଲେଇଚେରେ, “ମୀରୁ ଏନାଆଁତାକି ହାଡ଼ାରି ବିତ୍ରାଟି ନୀତାମାନାରାଇଁ ପାରିମାଞ୍ଜେରି ?

୬ ☆ଏଝାସି ଇମ୍ବାଆଁ ହିଲଅସି, ଏଝାସି ନିଙ୍ଗାମାନେସି, ଏଝାସି ଗାଲିଲିତା ମାଟାଟି ଝେସାମାଞ୍ଜାତାଣି ଅଣ୍ପାଦୁ □

୭ ମାଣସି ମୀରୁଏସି ପାସି ମୁଣ୍ଡାତା ହାୟାଲି ପାପୁ ଗାଟାରି ତାଣା ହେରପି ଆନାୟି ମାନେ ଇଞ୍ଜା ତାନି ଦିନାଟିଏ ହାକିଟି ଝେଣ୍ଡେ ନିଙ୍ଗାନେସି □”

୮ ଏମ୍ବାଟିଏ ଏଝି ଏଝାଣି ଝେସୁ କାତା ଅଣ୍ପପିତୁ,

୯ ଇଞ୍ଜା ଏଝି ମାହଣି ମାଣ୍ଡାଟି ଝେଣ୍ଡା ହାଜାନା ଏଗାର ଜାଣା ସୀମୁୟା ଅଡେ ଏଟକା ତାରାଇଁ ଇ ବାରେ କାତା ଝେସୁ □

୧୦ ଏଝି ମଗ୍ଦଲିନି ମରିୟମ, ଜହାନା, ଜାକୁବ ତାମି ଇୟା ମରିୟମ ଅଡେ ଏଝାସିକାତଲେ ମାଟି ଏଟକାଟି ଇୟାସିକା; ଇଝି ପାଣ୍ଡୁଝି ଆହାମାନାରାଇଁ ଇ ବାରେ କାତା ଝେସୁ □

୧୧ ସାମା ଇ ବାରେ କାତା ଏଝାରି ନକିତା ମନତା ଗାଡ଼ିକିଟି ର ପୁସ୍ପନି ଲେହେଁ ଆଡେ, ଅଡେ ଏଝାରି ଏଝାସିକାଣି ନାମାଆତେରି □

୧୨ ସାମା ପିତର ନିଙ୍ଗାନା ମାଡ଼ହା ମୁହ୍ନି ଟାୟୁତା ହଟି ହଟିହିଁ ହାଚେସି, ଇଞ୍ଜା କାପାନା ସିନକିତେସି ଏମ୍ବାଆଁ ପାଡ଼ାଡ଼ା ହିମ୍ବୁରିକା ମେସ୍ତେସି, ଇଞ୍ଜା ଇଦି ଏନି ଆଡେ ଇଞ୍ଜା କାବାଆହାନା ତାମି ଇଜ ହାଚେସି □

ଇମାୟୁତା ହାନାୟି

(ମାତି ୧୭:୧୨,୧୩)

୧୩ ଏ ନେରୁ ଏଝାରି ବିତ୍ରାଟି ରିଆରି ଜିରୁସାଲମଟିଏ ଏଗାର କିଲମିଟରଲେହେଁ ହେକ ମାଟି ଇମାୟୁ ଇନି ନାୟୁତା ହାଜିମାଚେରି □

୧୪ ଅଡେ ହାଜି ହାଜିହିଁ ଇ ବାରେ କାତା ଜଲୁକି ଆହିମାଚେରି □

☆ ୨୪:୬ ୨୪:୬ ମାତି ୧୭:୨୧; ୧୭:୨୨,୨୩; ୨୦:୧୮,୧୯; ମାର୍କ ୮:୩୧; ୯:୩୧; ୧୦:୩୩,୩୪; ଲୁକ ୯:୨୨; ୧୮:୩୧-୩୩

୧୫ ଏଲେକ୍ଟ୍ରୋ ଶ୍ରେୟସି ଆହୁଁ ତାମ୍ଭୁତାମ୍ଭୁ ଜଲ୍ଲକି ଆହିମାତାଟି ଜୀସୁ ତାମ୍ଭୁ ଏଞ୍ଜାରିତାଣା ଖାହାନା ଏଞ୍ଜାରିତଲେ ହାରେସି;

୧୬ ସାମା ଏଞ୍ଜାରି ଏଞ୍ଜାଣାଇଁ ମେସ୍ତ୍ରୁ ଜିକେଏ ପୁଞ୍ଜାଲି ଆଡାଆତେରି
□

୧୭ ଜୀସୁ ଏଞ୍ଜାରାଇଁ ଶ୍ରେୟସି, “ମୀରୁ ହାଜି ହାଜିହୁଁ ଏନା ଏନାଆଁ ଜଲ୍ଲକି ଆହିମାଞ୍ଜେରି ?” ଏମ୍ବାଟିଏ ଏଞ୍ଜାରି ମୁମ୍ଭୁ ଖାଡ଼ି କିହାନା ନିତେରି □

୧୮ ଅଡ଼େ ଏଞ୍ଜାରି ବିତ୍ରାଟି କ୍ଲେୟାପା ଇନାସି ରଅସି ଏଞ୍ଜାଣାଇଁ ଶ୍ରେୟସି, “ଇ ଖାରା ବିତ୍ରା ଜିରୁସାଲମତା ଏନା ଏନାୟି ଆଡେ ଏମ୍ବାଆଁ ମାନାରି ବିତ୍ରାଟି ନୀନୁ ରଅତିଏ ପୁଞ୍ଜାହିଲଅତିକି ?”

୧୯ ଏଞ୍ଜାସି ଏଞ୍ଜାରାଇଁ ଶ୍ରେୟସି, “ଏନା ଏନାୟି ଆଡେ ?”

ଏଞ୍ଜାରି ଏଞ୍ଜାଣାଇଁ ଶ୍ରେୟସି, “ନାଜରିତ ଜୀସୁତି କାତା; ମାହାପୁରୁ ନକିତା ଅଡ଼େ ବାରେ ଲକୁ ନକିତା ଏ ଜୀସୁ କାମାତା ଅଡ଼େ କାତାତା ର ବାଡ଼ୟୁଗାଟି ମାହାପୁରୁ ଅଣ୍ଡପୁତି ବଲୁ ଶ୍ରେୟସି ମାରେସି,

୨୦ ଅଡ଼େ ମା କାଜା ପୂଜେରାଜା ଅଡ଼େ ସାଲୁଝି କିନାରି ଏଞ୍ଜାଣାଇଁ ହାକି ଡଣ୍ଡ ହାହାଲି ହେରପାନା ଏଞ୍ଜାଣାଇଁ ପାସି ମୁଣ୍ଡାତା ଏକ୍ହାନା ପାୟିତି କାତା □

୨୧ ସାମା ଏଞ୍ଜାସି ଇସ୍ରାୟେଲ ଲକୁଣି ପିସ୍ପି କିନାସି ଇଞ୍ଜୁଁ ମାମ୍ଭୁ ଆସା କିହାମାଟମି; ସାମା ଇ ବାରେ ଆହାନା ନୀଞ୍ଜୁଟିଏ ତାନିଦିନା ଆହିମାନେ □

୨୨ ଅଡ଼େ ଜିକେଏ ମା ବିତ୍ରାଟି ଏଚରଜାଣା ଇୟସିକା ମାଙ୍ଗେ ଆଡାଜାକା କିହାମାଞ୍ଜାନୁ; ଏଞ୍ଜି ଲାଇସିଏ ମାଡ଼ହା ମୁହନି ଚାୟୁତା ହାଜାମାତୁ,

୨୩ ଏମ୍ବାଆଁ ଏଞ୍ଜି ଏଞ୍ଜାଣି ମାଡ଼ହା ମେହୁଆନା ଖାହାନା ଶ୍ରେୟାତୁ, ଇଞ୍ଜା ଦୁତୁୟାଁ ତଞ୍ଜାଆହାନା ଶ୍ରେୟାତେରି, ଏଞ୍ଜାସି ନୀତାମାନେସି □

୨୪ ଅଡ଼େ ମା ବିତ୍ରାଟି ଏଚରଜାଣା ମାଡ଼ହା ମୁହନି ଚାୟୁତା ହାଜାନା ଇୟସିକା ଶ୍ରେୟିଲେହେଁଏ ମେସ୍ତ୍ରୁରି ସାମା ଏଞ୍ଜାଣାଇଁ ମେହୁଆତେରି
□”

୨୫ ଏମ୍ବାଟିଏ ଜୀସୁ ଏଞ୍ଜାରାଇଁ ଏଲେଇରେସି, “ଆଡେ ବୁଦି

ହିଲାଆଗାଟାତେରି, ଅଡ଼େ ମାହାପୁରୁ ଅଣ୍ଟପୁଡ଼ି ବଲୁ ଖେହ୍ନାରି
ବାରେ କାତାତି ନାମାଲି ଆଡ଼ାଆଲେହେଁତି ହିୟାଁ ଗାଟାତେରି,

୨୬ କ୍ରୀସ୍ତ ଇ ବାରେ କସ୍ତ ବେଟାଆହାନା ତାନି ଗାଝୁରମିତା
ହଡ଼ନାୟି ହିଲାଆତେ କି ?”

୨୭ ମସା ଇଞ୍ଜାଁ ବାରେଜାଣା ମାହାପୁରୁ ଅଣ୍ଟପୁଡ଼ି ବଲୁ ଖେହ୍ନାରି
ତାଣାଟି ମାଟ୍‌ହାନା ଦାମ୍‌ ସାସ୍ତେରିତା ତାନି ତାକି ରାସ୍‌କି ଆହାମାନି
ବାରେ କାତା ଏଝାସି ଏଝାରାଇଁ ପୁଣ୍ଠି କିତେସି □

୨୮ ଏଝାରି ହାଜିମାଟି ନାୟୁଁ ତାଗେ ଏଜାଲିଏ ଜୀସୁ ଅଡ଼େ ନକିତା
ହାନି ଅଣ୍ଟପୁ ତସ୍ତେସି □

୨୯ ସାମା ଏଝାରି ଏଝାଣାଇଁ ଆଂରିହୁଁ ଏଲେଇଚେରି, “ମା ତଲେ
ଡ଼ୟାହାଲାମ୍‌ ଏନିଇଚିହୁଁ ଆନ୍ଦେରି ଆହିମାନେ, ଖେଡ଼ାହାଚେୟିଏ
□” ଏମ୍‌ାଟିଏ ଏଝାସି ଏଝାରିତଲେ ଡ଼ୟାଲି ଇଲୁ ବିତ୍ରା ହାଚେସି □

୩୦ ଅଡ଼େ ଏଝାରିତଲେ ରାନ୍ଦା ତିଞ୍ଜାଲି କୁଗିତି ତାୟୁ ଏଝାସି ରୁଟି
ଆସାଁ ମାହାପୁରୁଇଁ ଜହରା କିତେସି, ଇଞ୍ଜାଁ ଡ଼ିକ୍‌ହାନା ଏଝାରାକି
ହୀତେସି □

୩୧ ଏମ୍‌ାଟିଏ ଏଝାରି କାଣ୍‌କା ଦେପିଆତୁ ଇଞ୍ଜାଁ ଏଝାରି ଏଝାଣାଇଁ
ପୁରେରି; ଅଡ଼େ ଏ ଦେବୁଣିଏ ଏଝାସି ଏଝାରି କାଣ୍‌କାତା ତଞ୍ଜା
ଆଆତେସି □

୩୨ ଏଚେଟିଏ ଏଝାରି ତାମ୍‌ ତୁତାମ୍‌ସୁ ଏଲେଇଚେରି, “ଏଚିବେଲା
ଏଝାସି ମାଙ୍ଗେ ଜିରୁତା କାତାବାର୍ତ୍ତା ଆହିମାଚେସି ଅଡ଼େ ମାଙ୍ଗେ
ଦାମ୍‌ ସାସ୍ତେରି ତେଲ୍‌ହି କିହିମାଞ୍ଜାତେସି, ଏଚିବେଲା ମା ହିୟାଁ କାଡ଼ି
ମାଞ୍ଜାଆତେ କି ?”

୩୩ ଅଡ଼େ ଏଝାରି ଦେବୁଣିଏ ନିଙ୍ଗାନା ଜିରୁସାଲମତା ଖେଣ୍ଡା
ହାଜାନା କୁଡ଼ା ଆହାମାଟି ଏଗାର ଜାଣା ସୀୟୁୟାଁ ଅଡ଼େ ଏଝାରି
ଆର୍‌ହିତାରାଇଁ ମେସ୍ତେରି;

୩୪ ଏଝାରି ଏଲେଇଞ୍ଜିମାଚେରି, “ପ୍ରବୁ ସାତେଏ ନିଙ୍ଗାମାନେସି
ଅଡ଼େ ସିମନଇଁ ତଞ୍ଜାଆଡ଼େସି □”

୩୫ ଅଡ଼େ ଏଝାରି ଜିକେଏ ଜିରୁତି ବାରେ କାତା ଅଡ଼େ ରୁଟି
ଡ଼ିକ୍‌ହାଟିଏ ଏଝାରି ପୁଞ୍ଜାଲି ଆଡ଼ିତମି ଇଞ୍ଜାଁ ଏଝାରି ଖେସ୍ତେରି □

ଜୀସୁ ତାନି ସୀସୁୟାଁଇଁ ତଞ୍ଜା ଆନାୟି

(ମାତି ୨୮:୧୭-୨୦; ମାର୍କ ୧୬:୧୪-୧୮; ଜହ ୨୦:୧୯-୨୩; କାମା ୧:୬-୮)

୩୭ ସାମା ଏଞ୍ଜାରି ଇ ବାରେ କାତା ଜଲ୍ଲକି ଆହିମାଚାଟି ଜୀସୁ ଏଞ୍ଜାରି ମାଦି ନିଚାନା ଏଲେଇଚେସି, “ମିଙ୍ଗେ ହିଡ଼ଡ଼ି ଆୟାପେ □”

୩୭ ଏମ୍ବାଟିଏ ଏଞ୍ଜାରି ବୁଡୁ ମେସ୍ତମି ଇଞ୍ଜି ଅଶ୍‌ପାନା ଆତାଜାକା ଆଡ଼େରି □

୩୮ ଏଚେଟିଏ ଏଞ୍ଜାସି ଏଞ୍ଜାରାଇଁ ଏଲେଇଚେସି, “ମୀ ହିୟାଁତା ଏନାଆଁତାକି ଆଜିମାଞ୍ଜେରି, ଇଞ୍ଜା ମୀ ହିୟାଁ ଏନାଆଁତାକି ଆନାମାନା ଆହିମାନେ ?

୩୯ ନାନୁଏ ଏଞ୍ଜାଡେଏଁ ନା କେସ୍ତା କଡାୟାଁ ମେହ୍‌ଦୁ, ନାଙ୍ଗେ ତୀଗାଦୁ ମୀରୁ ନାଙ୍ଗେ ଡଙ୍ଗା ପେଶ୍‌କା ମାନାଣି ମେସ୍ତିଲେହେଁ ବୁଡୁକି ହିଲାର □”

୪୦ ଅଡ଼େ ଏଞ୍ଜାସି ଏଲେଇଞ୍ଜାନା ଏଞ୍ଜାରାଇଁ ତାନି କେସ୍ତା କଡାୟାଁ ତସ୍ତେସି □

୪୧ ଏଲେଜିକେଏ ଏଞ୍ଜାରି ରାହାଁତାକି ନାମାଲି ଆଡାଆନା ଆନାମାନା ଆହାଁ କାବା ଆହିମାଚାକି ଜୀସୁ ଏଲେଇଚେସି, “ମିଙ୍ଗେ ଇମ୍ବାଆଁ ଏନି ରାନ୍ଦା ମାନେକି ?”

୪୨ ଏମ୍ବାଟିଏ ଏଞ୍ଜାରି ଏଞ୍ଜାଣାକି ର ଝାସ୍ତି ମୀନୁ ହୀଡେରି,

୪୩ ଅଡ଼େ ଏଞ୍ଜାସି ଏଡାଆଁ ଆସାନା ଏଞ୍ଜାରି ନକିତା ତିଚେସି □

୪୪ ଇଞ୍ଜା ଏଞ୍ଜାସି ଏଞ୍ଜାରାଇଁ ଏଲେଇଚେସି, “ମସାତି ମେରା ପତିତା ଇଞ୍ଜା ମାହାପୁରୁ ଅଶ୍‌ପୁତି ବଲ୍ଲୁ ଝେହ୍‌ନାରି ପତିତା ଅଡ଼େ ପାରୁ ପତିତା ନାଙ୍ଗେତାକି ଏନାୟି ରାସ୍‌କି ଆହାମାନେ, ଏ ବାରେ ସାତା ଆନାୟି ମାନେ, ନାନୁ ମୀ ତଲେ ମାଚାଟି ଇ ବାରେ ଝେସାମାଞ୍ଜାଡେଏଁ □”

୪୫ ଏଚେଟିଏ ଏଞ୍ଜାରି ଏନିକିଁ ଦାମ୍ବୁ ସାସ୍ତେରି ତେଲ୍‌ହାଲି ଆଡ଼ିନେରି, ଏଡାଆଁତାକି ଏଞ୍ଜାରି ହିୟାଁତି ଦାରା ଦେତେସି;

୪୬ ଅଡ଼େ ଏଞ୍ଜାସି ଏଞ୍ଜାରାଇଁ ଏଲେଇଚେସି, “ଏଲେଆହ୍‌ ରାସ୍‌କି ଆହାମାନେ, କ୍ରୀସ୍ତ ବୁକୁ କସ୍ତ ବେଟା ଆନେସି ଅଡ଼େ ତାନି ଦିନାଟିଏ ହାଡାରି ତାଣାଟି ଝେଶ୍ତେ ନିଜିନେସି,

୪୭ ଇଞ୍ଜି ଜିରୁସାଲମଟିଏ ମାଟ୍‌ହାନା ବାରେ କୃତା ତାଣା ଏଞ୍ଜାଣି ଦରୁଟି ପାପୁ ମ୍ଲୋପ୍‌କି ଆୟାଲି ମନ୍‌ ଝେଟ୍‌ନି କାତା ଝେକ୍‌ନାୟି ମାନେ
□

୪୮ ମୀରୁ ଇ ବାରେତାକି ସାକି ଆଡେରି □

୪୯ ☆ଅଡେ ହେଶୁ ଆବା ଏନାଆଁ ଆଞ୍ଜାମାନେସି ଏଦାଆଁ ନାନୁ ମୀ ତାଣା ପାଣ୍ଡିମାଞ୍ଜାଇ, ସାମା ଲାକପୂରୁଟି ବାଡ଼ୁୟୁ ପ୍ଲାଃଆ ପାତେକା ମୀରୁ ଇ ଗାଡ଼ାତେଏ ମାଞ୍ଜୁ □”

ଜୀସୁ ଲାକପୂରୁ ଅଢ଼ିଆନାୟି

(ମାର୍କ ୧୬:୧୯,୨୦; କାମା ୧:୯-୧୧)

୫୦ ☆ଏମ୍‌ପାଟିଏ ଜୀସୁ ଏଞ୍ଜାରାଇଁ ବେତନିୟାଁ ପାତେକା ଅଡେସି ଇଞ୍ଜା ତାନି କେସ୍‌ମା ପେରହାନା ଏଞ୍ଜାରାଇଁ ବର ହୀତେସି □

୫୧ ଇଞ୍ଜା ଏଞ୍ଜାରାଇଁ ବର ହୀହି ହୀହି ଏଞ୍ଜାସି ଏଞ୍ଜାରି ତାଣାଟି ଏଟ୍‌କା ଆହାନା ଲାକପୂରୁ ଅଢ଼ିଆଡେସି □

୫୨ ଏରେଟିଏ ଏଞ୍ଜାରି ଏଞ୍ଜାରାଇଁ ଜହରା କିହାନା ହାରେକା ରାହାଁତଲେ ଜିରୁସାଲମତା ଝେଶ୍‌ୟା ହାରେରି,

୫୩ ଇଞ୍ଜା ଏ ଦିନାଟିଏ କାଲେଏ ମାହାପୂରୁ ଇଲୁତା ମାଞ୍ଜାନା ମାହାପୂରୁଇଁ ଜହରା କିହେମାରେରି □

cxxviii

ପୁସ୍ତକ ଶିକ୍ଷା

The New Testament the Kusaal language (Ghana)

copyright © 1996 Wycliffe Bible Translators, Inc.

Language: Kusaal (Kuvi)

Contributor: Wycliffe Bible Translators, Inc.

ପୁସ୍ତକ ଶିକ୍ଷା,

କୁସାଲ ପୁସ୍ତକ ଶିକ୍ଷା, 2020

The New Testament in Kuvi Language

The Word for the World International

All rights reserved.

2025-05-08

PDF generated using Haiola and XeLaTeX on 8 May 2025 from source files

dated 8 May 2025

c688c8bf-38ac-5c00-90bd-6e4eaa165a20